



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:


- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



Vet. Span. II C 31



37
PASQUAL.

VINDICIÆ


LULLIANÆ,

SIVE

DEMONSTRATIO CRITICA.

TOMUS III.

18



VINDICIÆ
LULLIANÆ,
SIVE
DEMONSTRATIO CRITICA

• IMMUNITATIS Doctrinæ illuminati Doctoris B. RAYMUNDI LULLI
Martyris, ab erroribus eidem à Nicolao Eymerico impactis, à Censuris
ab Albitio Cardinali relatis; reliquisque aliorum lituris.

FUNDATA

*In collatione textuum LULLI, ex quâ proprius ostenditur Catholicus sensus, & in
consensu Doctrinæ, imò, & modo loquendi ejusdem eum Patribus, & Doctoribus
Sacris:*

CUI SUBNECTITUR

Explicatio aliorum quorundam textuum, quibus aliqui fortè possent offendi.

IN QUATUOR TOMOS DIVISÆ.

AUCTORE,

D. D. ANTONIO-RAYMUNDO PASQUAL, Monacho Cisterciensi, in Regiâ Lullianâ, Baleari
Universitate, Philosophiæ & Theologiæ Doctore; post Philosophicam, Cathedræ Theologiæ Lullianæ
primariæ, vespertinæ, Moderatore, Congregationis Cisterciensis Aragonicæ Magistro, iterumque
Definitore, ac Monasterii B. V. Mariæ de Regali, Ex-Abbate.

TOMUS TERTIUS.




AVENIONE,

Apud J. GARRIGAN, Typ. Bibliop. in Vico Sancti Desiderii.



M. DCC. LXXVIII.
SUPERIORUM PERMISSU.





VINDICIÆ LULLIANÆ, TOMUS TERTIUS.

De immunitate Doctrinæ B. RAYMONDI LULLI, Doctoris
illuminati & Martyris.

AGITUR PRÆCIPUE

*De Censuris, quas Cardinalis Albitius, Lib. de Inconstantia in fide,
cap. 40, à num. 142, latas à quibusdam Romanis refert, à quibus
B. Lulli Doctrina omnino libera demonstratur.*

SYNOPSIS CAPITIS.

SI ex solo argumenti apice, quis attonitè, quàm magnam arduam-
que provinciam me adoriri prospiciat, non tamen ut tantis,
doctissimisque viris me comparem opinetur, aut credat: (me enim
undique imparem cerno:) sed quia tot Censurarum capita, ab his
eruditissimis Theologis adducta minimè in B. Lulli scriptis invenian-
tur; & Magistri honos cum sit naturæ ac pietatis jure, à Discipulis
defendendus; ideo licet exiguus, veritatis tantum zelo, & amore
mei Doctoris indutus compellor ad litem, ut rei veritas clariùs elu-
cescat: *omnes quidem diligimus veritatem*, ait August. Libr. contr.
Mend. & *nemo vult falli*. Nemo igitur, me ex procacitate, aut pe-

4 VINDICIÆ LULLIANÆ,

tulantiâ palæstram ingredi subfannet; de veritatis enim honore agitur: cumque oppressâ & quasi in ergastulo veritas posita ab his Censoribus teneatur, & queratur, & clamet, solum *gestiens ne ignorata damnetur*. Mandat Clemens XIII ut audiat, & iterum B. Martyris Lulli examinentur opera; coactor igitur nimis, & etiam me urgebo, ut à tot acerbis, injustisque censuris mei Præceptoris Doctrinam solvam, & solutam (quantum in me est) educam, & gloriosam in palam faciam.

Sed Censores, plures, ac me pluris scientiæ sunt, qui illam ligatam tenent? Verum; nec eorum pluralitas me terreat; quia non idem infallibiliores, nec minus fallibiles quia plures: plures enim fuere in Ariminensi Concilio qui Athanasii Doctrinam damnarunt, veritate in toto Orbe ingemiscente; sed processus recognitione factâ, absolutus est Athanasius, & plures errasse compertum est. Nec Censorum scientia, ac in judicandis solertia, meum ab incepto dimovent animum: quoniam gnarus quidem fateor, in una facultate quis esse potest, & valde in aliâ ignarus, quæ tamen ad bene judicandum necessaria est, quam si non habuerit, totum iudicium inficiet: ecce Orientales, & Græci Patres zelo fidei, Doctrinæque præstantissimi, quia Latini idiomatis omnino ignari, ait Augustinus, Pelagiana dogmata artificiosè in libello latine conscripta (Pelagii opinione decepti) in sua Synodo approbarunt, & in Christi gratiam censuram protulerunt. Raymundi libros partim latine, partim lingua cathalonica (vel ut malunt alii) lemovicensi, aut gotica antiqua conscriptos, sicque Romam missos esse constat: quæ quidem lingua etiam indigenis tunc ignota, utpote obsoleta erat, (uti etiam nunc est,) ita ut ferè nemo inveniat (nisi ex peritioribus sit,) qui eam vix intelligere, & sine erroris periculo loqui queat. Perfecte-ne igitur, aut satis, quamvis alias Doctissimi Censores nostri difficillimum hoc cathalonicum idioma callebant, ut censuras suas sine erroris periculo ferre possent? Eymerico quidem natione Cathalano licet illis proximiori temporibus, quibus magis hoc idioma vigeat, etiam falli contigit; quanto magis illis? Cathalani enim, ac Majoricenses Romanam linguam (licet faciliorem) comprehendere nequeunt; quomodo ergo Romani eorum linguam antiquissimam & obsoletam intelligere poterunt?

Lulli methodus aliunde, à quibusdam, ut vidimus à Gersone in Chron. Proëctesi, tom. 2, ut obstrusa, difficilis, & in Scholis inutilata non approbatur. Fuit-ne igitur, & Scholis Romæ, & istis:

SYNOPSIS CAPITIS.

etiam Theologis Censoribus obstrusa & inusitata? Quomodo ergo citò, & tam faciliè, obstrusum arduumque Systema & Methodum addiscere ac perfectè intelligere, ut omni certitudine, has Theologicas Censuras illis inferre potuerint? Permultum quidem temporis, velocitè absque dubio, in percurrendis tot voluminosis Lulli operibus insumpsisse, oportuit! Ut omnis igitur de eorum censuris, aut modo agendi, tolleretur suspicio, aliquos probos, juratosque Lullistas, in Systemate & pervetusto idiomate Cathalanico peritissimos, sibi in librortum ac propositionum examine adsciscere, (vel Interpretes, vel in dubiis Expositores) debuissent; qui aut de eorum integritate, fidem facere, aut de ipsorum Cathalanici idiomatis intelligentià testari possent: ne meritò de illis conqueri posset, sicut Tertullianus in *Apologet. advers. Gentes*, de aliis quondam Romanis Judicibus conquestus est, & his verbis irrisit. *Non potes dementiam dicere, qui reverteris ignorare. Vel juxta vulgatum: non decet immuscos, de musicis judicare.*

Mihi præterea quod opinor promere, liceat; vehementi quidem præsumptione premor. Theologi Thomistæ fuere Censores Lulli.... Eymerici honorem sospitare quærentes: sed ut tanto Inquisitori servaretur honos, necessariò oportuit, ut Joannis I. Aragoniorum Regis Decretum [1], quo (propter Lulli causam, aliaque facinora [2] Eymericus exilio multatus fuerat) vilipenderetur, & irritum fieret, & causa B. Martyris Lulli cassâ reddita, totum ejus negotium in pessum iret; tanquàm si ex solo nomine jam reus esset

(1) Suo Decreto vocat Rex Joannes Eymericum, *Inquisitoris officio abutentem, viperam pestilentem, hominem nequam capiendum, &c.* Sed alibi Decret. jam duximus.

Ferè consimili nota impiat eum Henricus Sponda in Annal. Eccles. tom. 1. an. 1402. n. VIII. quia processus contra Fratrem sui Ordinis, Vincentium Ferrerium, prout communiter tenebatur de hæresi convictum, (*dixerat enim Inquam habuisse veram penitentiam salutarem,*) confecerat. Ausugit autem Vincentius ad Cardinalem P. de Luna tunc Hisp. existentem, qui ab accersito coram se Eymerico, processus abripuit, & Pontifex postea renunciatus Benedict. XIII. combussit. Et subdit Sponda ibid. in margin. sub litt. (q) *Debit calumniosè de hæresi Vincentius accusari, quem mirâ semper pietate, ac religione præfulsisse videmus inferius. Fuisseque Nicolaum Eymerici ardentiorum in officio Inquisitionis exercendo, adeò, ut sæpè ultra modum excesserit; vidimus aliquoties superius, & ejus scriptis, aliisque diversorum assertionibus constat.* Est-ne igitur mirandum, si B. Lullo, livore ductus tanta impegerit? Sed, quid contra omnes sui sæculi non egit? Utinam omnia ejus acta, ad Dei gloriam, sicut B. Vincentii processus, combusta fuissent.

(2) P. Joannes de Montefono Dominicanus, Eymerici Discipulus, etiam (ferè eadem de Lulli causâ, & quasi eodem tempore) exulare cogitur. Legatur historia Paparum Avenione sedentium sub Clement. VIII. tom. 1. & tom. 2. in Notis, Autore Stephano Baluze. Ubi totus processus & Sententia lata, &c. instante Sorbona, inveniuntur.

6 VINDICIÆ LULLIANÆ,

Lullus, aut ipsius prolatio crimen & delictum. Sed Proh ! optimi peritissimique Theologi ! Si Lullo favere nolueritis, estò ; sed saltem nocere non debuistis.

Non mirandum itaque si prætermittis pluribus Lulli libris, quos legere debuissent, ut sensum illius proprium adinvenirent, sed potius quasi mali nominis ab Eymerico ejusque Sequacibus Lullo illati, præventionem ducti, statim ex quò aliquid aut dissonum, aut dubium, vel illis subobscurum, primo intuitu, in propositionibus apparuerit, sæpè neglectis aliorum textuum collationibus, quas quidem illorum coherrentia necessariò conferri exigebat, citò in pravam sensum projicientes, Censuræ dabant. Quod quidem à retroactis sæculis ab aliis præstantissimis Theologis, (etiam Thomistis) toto orbe dispersis (quorum Patriam, numerum, & nomina nunc referre non vacat,) Lulli opera versantibus, ejusque Systema & Methodum perfectè callentibus, numquàm simile factum, aut dictum esse compèrimus. Pro me enim fateor, continuè me in Universitatibus, multis ab hinc annis B. Lulli Doctrinam terentem, ejusque opera diurnâ nocturnâque manu versantem, quæ ei à Romanis Censoribus ascribuntur, numquàm invenisse attestor : quamobrem omnes ad experimentum provoco ; nam si attentè ac sine aliqua præventionem prava legatur Lullus, certò certius ejus sensus longè diversus reperietur ab eo, quem ei præfati Theologi adscribere voluerunt ; quapropter ejus Doctrinam veluti seipsam explicantem exponam ; melius enim est, ut non ego, sed ipse Lullus per se, de Doctrinâ suâ tam clarè loquens audiat : ipsemet utique in propriâ causâ adversariorum potentior erit vindex athletâ : mei tantùm muneris erit, Interpretis agere vices, quia si in uno loco brevius aliquid scriptum quandoque inveniatur, ideoque subobscurum appareat, in alio dein diffusius reperietur, statimque, omni excusâ caligine, dilucidius difficultatis enodatio occurret ; hâc quidem spe, ita certissimè ducor, ut censurarum cum propositionum textibus B. Lullj, tanquàm in parallelo, factâ collatione, omninò immunis à notâ reperietur ; & dum sensus illius propriis phrasibus concinnatos, labio in Scholis usitatori elucidaverim, profectò in omnibus concordēs cum Ss. Patribus & Doctoribus invenientur.

Ea-propter, eos enixius obsecro, qui criminatores, vel critici esse voluerint, ut se Christianos, vel homines ratione utentes esse meminerint : & si quid dissonum, aut sibi inconvincendum in dictis B. Lulli, primâ fronte, appareat, seridò tamen, prout decet cordatos viros

(habitâ etiam illius sæculi ratione) perpendant; quod si ingenuè fecerint, me hertulè! quid impiare possint, non invenient. Eos saltem rogo, ut regulas pro examinandis libris, à Pontificibus, maximè à Doctissimo Benedicto XIV. in Bullâ: *Sollicita & provida*, traditas (de quibus jam aliqua, in Dissert. prævia, tom. 1. adduximus.) observare velint: id maximoperè considerantes, quod numquam Auctoris cujuscunque sensus meritò desumi potest, ex aliquâ clausulâ solitariè inspectâ, sed attento contextu, simul & antecedentibus, & consequentibus ejusdem libri, imò etiam & aliis libris, in quibus de eadem tractat materiâ; signanter autem ubi operosè de ipsâ differit: observatis etiam aliis, quæ in dictâ Dissertatione prævia, tom. 1, præmisimus. His sanè regulis in hoc opere procedam, ita contextendo Lulli textus tum ex libris notatis, tum ex aliis ejusdem; ut videatur proprius ejus sensus, qui sic clarè ostenditur, omninò alienus ab eo, qui in dictis censuris fuit eidem attributus.

Porro, ut ordinatè & distinctè procedam, licèt Albitius loc. citat. non cunctas Censuras omnium Censorum discernat, sed tantùm aliquas uniuscujusque explicet, cum tamen dicat quibus libris, & à quibus Examinatoribus fuerunt adductæ; & aliundè in quodam manuscripto è Roma delato habeam ipsas Censuras & Textus Lulli, super quibus fuerunt prolatae, tametsi tacito Censoris nomine, diffusè exaratas, & de eisdem, licèt breviter, agat Joannes Riera Franciscanus in suo Memoriali sacrae Congregationi oblato: idèò utrisque collatis, distingui possent uniuscujusque Censoris, quos nominat citatus Albitius, Censuræ & Textus, de quibus fuerunt prolatae; at quia non est opus Censores explicare, sed Censuras: idèò de istis solis per varias distinctiones in duobus sequentibus tomis pertractabo. Cæterùm, cum hîc tantùm fit animus Lullum eluendi à Censuris latis adversus determinatos ejus textus, cum tom. 1. ipsam vindicaverim ab aliquibus à Cardinali Albitio relatis, quæ generaliter ipsam Doctrinam afficiunt: Quoad alia quæ refert idem Albitius, cum ipse tantùm fideliter referat quæ pro & contra Lullum invenit, præcipuè in Romanis Archivis, nihil pro nunc occurrat dicendum, utpotè ad Historiam causæ Lullianæ tantùm spectant; & solum adverto, quod in Censura quæ ab ipso refertur à claræ memoriæ de Rubeis fidei Promotore lata, nimium deferri videtur Eymerico, Bzovio, eorumque sequacibus, ex quibus Gualterus verborum sensus desumpsit, quæ de ipso ibi contra Lullum allegantur; & reticetur, quod ipse Gualterus in secunda editione palinodiam

8 VINDICIÆ LULLIANÆ,

cecinerit. At quoad cultum B. Lullo tributum, novissimè sanctissimus D. Clemens XIII. die 18 Junii 1763 *jussit, & statuit nihil esse innovandum circa cultum servi Dei Raymundi Lulli*. Revisio verò librorum Lulli etiam est injuncta ab eodem Pontifice ut in causa Beatificationis & Canonisationis ejusdem procedatur.

Gravior sanè nota, quæ adversus Lullum adduci potest, ea est, quæ resultat ex Relatione Cardinalis Bellarmini sacrae Congregationi facta, quam describit idem Albitius, cùm Theologi destinati ad examen librorum, post eorum revisionem aded acrem tulerint Censuram, ut si in causa fuisset procedendum, Lulli Opera veniebant proscribenda; sed Dei providentiâ, quæ in sui dispositione non fallitur, hoc non permisit. Sanè Pontifices summos videtur semper cordi habuisse judicium, quod Deputati à Concilio Tridentino protulerunt de amovendo nomine Lulli ab Indice librorum prohibitorum: unde Belarminus, vel ipse Albitius in sua relatione ait: *Pius IV. ex disputationibus habitis in Concilio Tridentino, novum Indicem edens, jussit aboleri nomen Raymundi ex Indice; & ideò in hac congregatione habitâ die 19 Augusti 1619. coràm sanctissimo, ubi facta fuit à Cardinali Belarmino memorata relatiq, prescripsit Summus Pontifex: Interim videatur an in Castro Sancti Angeli adsint acta per Deputatos à sacro Concilio Tridentino ad revidendum hujusmodi libros; quæ acta mirùm profecto est, non potuisse hucusque, quodd sciam, inveniri, cum tamen videatur, ea apud Congregationem Indicis die 3 Junii 1594. celebratam extitisse, cùm referente eodem Albitio, decretum fuerit: Ut in novo Indice Lullus non reponatur, eisdem de causis, quibus Deputati in sacro Concilio Tridentino eundem Raymundum ab Indice sustulerunt; & idem decretum fuit in Congregatione habitâ die 4 Martii 1595.*

Itaque, cùm prefatæ Examinatorum à sacra Congregatione Deputatorum Censuræ, meritò habeantur, ut magnæ autoritatis & ponderis, & quæ majus obstaculum Causæ Lullianæ videntur opponere; sedulò sunt tractanda loca librorum Lulli, quæ occasio ad easdem fuerunt; & hoc cum collatione antecedentium & consequentium, imò & aliorum librorum Lulli, ut proprius ejus demonstretur sensus, ita ut de ipso dubitari non possit, nisi enim quædam exhibeatur demonstratio, semper prævalere videbitur tantorum virorum suffragium: undè & operosè & exactè erit hæc discussio facienda, cùm laudatus Riera tam leviter ea attigerit; modus autem procedendi semper erit, prout in Dissertatione prævia, tom. 1, præscripsimus.

DIST.

DISTINCTIO I.

DISTINCTIO I.

De prima classe Censurarum super Librum B. Raymundi Lulli, inscriptum : *Disputatio Raymundi, & Eremitæ super aliquibus dubiis, quæstionibus Sententiarum Magistri Petri Lombardi, prolatarum.*

Sciendum est hoc Lulli Opus non tendere ad omnia ventilanda; quæ tractat Magister Sententiarum, prout communiter faciunt scribentes super ipsum, sed solum ad resolvendas aliquas speciales quæstiones, quæ particularem difficultatem Lullo afferre visæ fuerunt in omnibus quatuor Magistri Libris: undè non observat ordinem ab aliis usitatum, sed subsultando easdem excitat; ipsæ tamen sunt adèd inter se concatenatæ, ut posteriorum resolutio, ex præcedentium pendeat doctrina. Breviter in omnibus procedit Lullus per modum disputationis inter ipsum & Eremitam; ità tamen, prout advertit in Prologo, ut supposita Fidei veritate, & ejus totali autoritate, ex principis suæ artis resolvat, & objectiones dissolvat. Tres Classes Censurarum à tribus Cenforibus super Libro Sententiarum emanatas invenio: adèdque hîc de prima, & in sequentibus de aliis venit agendum.

D I S S E R T A T I O I.

De Demonstratione Mysteriorum Fidei, quoad Censuras Textuum quæstionis 1, 12, & aliarum, qui circa hoc notantur; & de Fidei necessitate.

§. I.

Afferuntur Textus & Censuræ; & ostenditur, non esse erroneum Mysteria Fidei posse demonstrari, Fide & revelatione supposita.

1. **T**extus prædictarum quæstionum, & Censuræ, quas eisdem attribuit primus Censor, ita habentur: PRIMUS TEXTUS: *Per sensitivum non dico quodd Trinitas sit demonstrabilis, cum ipsa sensibilis non sit, neque imaginabilis, sed secundum modum discursivum, quem habet intellectus in attingendo, est ipsa Trinitas demonstrabilis, non propter quid, sed per æquiparantiam.* Quæst. 1, num. 5.

Tom. III.

B

SECUNDUS TEXTUS : *Quandò intellectus non est discursivus per necessarias rationes circa veritatem Articulorum Fidei, sicut intellectus mechanici, aut alicujus alterius, qui stat ad positiones tantum, restauratur veritas articulorum in credulitate intellectus, qui ipsos credit & hujusmodi restauratione multum indiget intellectus, cum omnes homines dispositi non sint, ad investigandum veritatem Articulorum Fidei, & Sacrae Scripturae per necessarias rationes, sicut mulieres. Quæst. 1, num. 1.*

TERTIUS : *Credere, intellectui est appropriatum per supremum objectum, ut per fidem veritatem illam attingere possit, quam demonstrative attingere non potest, propter aliquod impedimentum, quod habet ratione subiecti, aut materiae. Quæst. 1, num. 1.*

QUARTUS : *Theologia est scientia proprie, alioquin divinae intelligibilitati esset injuriatum, in quantum intellectus humanus Trinitatem divinam intelligere non posset secundum magnitudinem objecti, & secundum magnitudinem ipsius intellectus. Et sic deficiunt divina bonitas, magnitudo, æternitas, potestas, à parte objecti supremi, & à parte ipsius intellectus. Quæst. 1, num. 2.*

QUINTUS : *Miratus fuit Raymundus, quare consideraverit quòd Pater, & Filius de necessitate Spiritum Sanctum spirant, ut supra probatum est, cum Beatus Joannes non dixerit, qui ab utroque procedit: unde Raymundus ad principia suae Artis recurrit ad investigandum de hoc veritatem, secundum modum suae Artis, per quem modum possunt auctoritates Sanctorum exponi & declarari, & cum rationibus necessariis concordari. Quæst. 12, num. 5.*

Censura : *Quilibet Textus ex prædictis est erroneus, quia vel asserit, quòd Mystera Fidei possunt demonstrari, vel quòd possunt probari necessariò.*

TEXTUS secundus etiam videtur indicare, Eidem Rusticis tantum esse necessariam.

Etiam Lullus profitetur, quæst. 1, se probare Trinitatem divinam demonstratione: Et quæst. 15, principiis suae Artis, & quæst. 20, ratione naturali, & idem profitetur de Incarnatione, quæst. 1.

Totus hic liber fundatur in hac Doctrinâ seu Arte.

2. Ex dictis, Tom. 2, cap. 39, abundanter constat, sensum Eulli, dum asserit posse Fidei Mystera demonstrari, semper intelligi, id esse, Fide, & revelatione suppositâ, sicut omnes Patres, & Doctores, quos pro hac Sententia illic adduximus; omnes enim, præfertim D. Augustinus, D. Cyrillus Alexandrinus, ac D. Anselmus, & cum

ipsis Lullus, inculcant illud Isaïæ: *Nisi credideritis, non intelligetis*: quò necessitatem præsuppositionis Fidei, & possibilitatem demonstrationis, ipsâ suppositâ, deducunt; pro eodem enim sumitur intelligere ac demonstrativè cognoscere, seu clarè, perspicuè, & absque dubietate percipere: Unde, cùm hæc Sententia in tot Scripturæ decretis, Sanctorumque Patrum placitis, fundetur, prout ibi exposuimus; nec obviet ulli Scripturæ vel aliorum Theologorum fundamentorum sensui; quia omnia, quæ ab Autoribus adversis afferuntur, absque violentia intelligi possunt de demonstratione Mysteriorum absque præsuppositione fidei vel revelationis: ideo hæc Sententia censi non potest erronea.

3. Hæc ideo adduxi, quia in relata Censura absolutè dicitur erroneum, quòd *Mysteria Fidei possint demonstrari*. Sanè judico Laudatum Censorem præjudicio, ut solet, ductum, ex Directorio Eymerici contracto, videlicet quòd Lullus senserit Mysteria absque præsuppositione Fidei vel revelationis posse demonstrari: sub hoc sensu notam erroris inussisse; quia tamen absolutè, & absque distinctione Censuram profert, quæ proinde de Sententia Lulliana intelligi posset, notari debet ipsam propter prædicta non posse præfatâ Censurâ inuri: Unde Eximius Suarez, licèt lib. 1, de Trinit. cap. 2, num. 3, ex aliorum, ut videtur, relatione, dicat, Lullum sentire Mysterium Trinitatis posse evidenti ratione demonstrari ab humano intellectu carente omni divinâ revelatione; & ibi conclusione 1, statuât ut certum de Fide, seclusâ omni revelatione divinâ impossibile esse per evidentem demonstrationem cognoscere in Deo esse plures personas: tamen cap. 12, num. 8, refert Tenentes, suppositâ revelatione tanti Mysterii, & firmâ credulitate illius conceptâ posse per vires ingenii humani inveniri rationes demonstrativas Mysterii; at eorum Sententiam non censurat, licèt non amplectatur, imò addit: *Hæc fortè fuit opinio Raymundi Lulli, sed est antiquior illo, nam eam refert Durandus 1, dist. 1, quæst. 4.* Et pro hac citat Richardum de Sancto Victore Henricum, & Gersonem. Eamdèm etiam Lulli Sententiam, quam explicuimus, plurimi Autores, licèt impugnent, nullâ tamen notâ inurunt, & Vasquez censet, eam non esse erroneam, & Alarcon etiam cum ipso.

4. Præterea, ut loco citato ostendimus, in hac scholastica quæstione potior difficultas stat super terminò *demonstratio*; quia comuniter ab Autoribus Dialecticâ Aristotelicâ imbutis non alia agnoscitur demonstratio, quàm ea, quam præscripsit Aristoteles, ex primis prin-

cipiis causisque; at ibi explicuimus demonstrationem accipi pro certa, & clara manifestatione ex quibuscumque fundamentis certè, & clarè cognitis: & in rebus Fidei, quo ad Deum ipsum solam valere demonstrationem ab æquali, non autem per causam; eamque ab effectu dictam eatenus valere, quatenus notum est, omnem perfectionem, quæ est in creatura, modo perfectiori debere esse in Deo; nec aliud requiri ad demonstrationem, quàm conclusionem in sensu obvio clarè, & manifestè cognosci ob connexionem infallibilem cum antecedenti, ex quo deducitur, licèt non habeatur omnimoda distincta cognitio subiecti, & prædicati conclusionis; Habetur etiam demonstratio, licèt difficultatem ingerant objectiones, quæ contra conclusionem offeruntur; quia non omnis demonstrationum evidèntia debet esse ita immediatè, & per se convincens sicut quoddam triangulus v. g. habet tres angulos, quæ est evidèntia sensualis; sed debet esse evidèntia intellectualis, quæ varios habet gradus, tum respectu intellectûs, tum respectu fundamentorum, quæ evidèntem reddunt conclusionem.

5. Unde præcipuum fundamentum ad hujusmodi demonstrationes Theologicas statuitur à Lullo consistere in ipsismet divinis perfectionibus, quas aliunde Fide certissimè constat esse in Deo, utpotè in Scriptura revelatas; ipsæ enim divinæ perfectiones, seu attributa, quas in omnium sensu evidenter cognoscimus esse in Deo, sunt fundamenta, & principia, ex quibus vi connexionis juxta Lullum deducuntur demonstrationes Mysteriorum Fidei; quæ proinde *naturales* dicuntur demonstrationes, quia ex propriis, & naturalibus Dei perfectionibus eruuntur; & etiam quia, Fide præsuppositâ, à naturali vi intellectûs inveniuntur; non autem dicuntur naturales, ut Auctores communis Scholæ regulariter autumant, quia ex principiis vulgò naturaliter notis deducantur, vel ad rerum creaturarum naturam conformentur, & medio à natura oblato insistant; quoniam ut sæpè repetit Lullus, nisi in argumento ex creatura ad Deum, transcendat intellectus rerum creaturarum naturam, non potest demonstrativè Deum cognoscere, quia Dei perfectio maximo excessu transcendit omnem creaturæ perfectionem, adeoque, quæ de ipso demonstrantur, non in natura tamquam medio demonstrativo insistant, nec purè conformiter ad ejus modum essendi, & operandi Deo attribuantur, sed secundum modum propriæ Dei perfectionis considerantur.

6. Quare, ut verè demonstrationes dicantur rationes, quas Lul-

has alique Doctores de Myſteriis Fidei proponunt, non obſtat, quod ab aliquibus tales non cenſeantur, vel contra eas proponant objectiones, vel ipſas enervare conentur, ut earum inefficaciam oſtendant: non inquam obſtat; qua etiam, licet ab omnibus ſupponatur poſſe demonſtrari Deum eſſe, in eoque eſſe providentiam, ſapientiam aliaque plura, ut immutabilitatem, &c. tamen rationes, quæ communiter allegantur ad hæc demonſtranda, poſſunt pati varias objectiones, & rationes, quæ ab aliquibus efficaciffimæ cenſentur, ab aliis inefficaces reputantur, ac fere nulla eſt, quam aliquis conari non poſſit enervare. Unde cum, licet detur ratio, quæ reverà, & in ſe ſit demonſtrativa, tamen reſpectu alicujus poſſit videri non eſſe demonſtratio: propterea abſque nota aliqua poteſt dici, Lulli rationes. (ſicut alias, quas allegat Sanctus Auguſtinus, S. Anſelmus, Richardus de Sancto Victore alique plures.) de myſteriis fidei eſſe veras demonſtrationes, quamvis aliqui earum efficaciam enervare conentur.

7. Sanè pro meo captu non video majorem efficaciam in rationibus, quæ à laudatis Doctoreſſibus afferuntur ad demonſtrandam exiſtentiam, & unitatem Dei, ejuſque providentiam, ſcientiam, immutabilitatem, &c. quàm illis, quæ ab ipſis exponuntur ad manifeſtanda fidei Myſteria: & ſola eſt differentia, quòd faciliùs percipiuntur rationes de Dei exiſtentia, unitate, providentia, &c. quàm quæ afferuntur de Trinitate, Incarnatione, &c. quia in iſtis præjudicia ab intellectu contracta ex rerum creaturarum conſideratione majorem apponunt obicem, ut eas penetret; at inſpecto earum fundamento, quod eſt ipſamet infinita Dei perfectio, quæ ex vi ſuæ connexionis inferit concluſiones deductas, æqualis videtur efficacia; & ipſemet Anſelmus eadẽ energiã & ſatiſfactione ſui proprii intellectus conatur manifeſtare prædictorum omnium veritatem; ita quòd tam in demonſtrationibus exiſtentia, unitatis, immutabilitatis aliorumque attributorum Dei, quàm Trinitatis & Incarnationis, dicit ſe procedere per claras, & neceſſarias rationes, quæ manifeſtam intelligentiam tribuant intellectui.

8. Hoc autem eſt quòd innuit Scriptura, & exponunt ex eadem Patres & Doctores, dum de Dei cognoscibilitate loquuntur: videlicet quòd divina Myſteria à ſolo intellectu creato nequeunt penetrari, quia ad ea, niſi Deo manifeſtante, ob ſui parvitatem non valet affurgere; at ſequens hujus divinæ revelationis ducatum, poteſt eadem ipſa, quæ Deus manifeſtat, ratione, & intelligentiã percipere:

nonquidem totaliter, & comprehensive, nec divina metiendo suā vī
 nativā intelligendi, neque pruritu sciendi juxta ingenii acumina
 evagando; sed aliquantulum, & pro modulo, quo Deus contemplari
 potest in hac vita à creata intelligentia, & humiliter obsequendo du-
 catui fidei, ac intra ejusdem limites ingenii vires coercendo: ita ut
 primò in Fidei fundamento insistat, & deinde super hoc solo funda-
 mento rationem, & intelligentiam ædificet; quia, juxta D. August.
 Epist. 222. *Ut ergo in quibusdam rebus ad doctrinam salutarem perti-
 nentibus, quas ratione nondum percipere valemus, sed aliquando vale-
 bimur, fides præcedat rationem, quæ cor mundatur, ut magnæ rationis
 capiat, & perferat Lucem: hoc utique rationis est, & ideo rationabiliter
 dictum est per Prophetam: nisi credideritis, non intelligetis; ubi procul-
 dubio discrevit hæc duo, deditque consilium, quo prius credamus, ut
 id, quod credimus, intelligere valeamus, &c.* D. Cyrillus Alexand.
 lib. 4. in Joan. cap. 4. *Nam post fidem cognitio sequitur, non illam
 antecedit, quemadmodum scriptum est: si non credideritis non intelligetis:*
 ac proinde sic Theologia est quod de ipsa dicit idem Augustinus
 lib. 14. de Trin. cap. 1. *Scilicet, quo fides saluberrima gignitur, nu-
 tritur, defenditur, roboratur.*

9. Quare, apud Petavium, tom. 1. Theolog. Dogm. in Prologom.
 cap. 4. n. 2. Clemens Alexandr. lib. 7. Stromat. pag. 526. Theolo-
 giam sic describit: *Cognitio est demonstratio firma eorum quæ per
 fidem accepimus, quæ per Doctrinam Domini super fidem ædificantur, &
 ad hoc deducit, quod immutabile est, & cum scientia comprehendere potest.*
 Et merito quidem, quia Catholici Patres ad hoc insudarunt, ut ea,
 quæ fide credimus, manifestarent, nedum ea colligendo ex variis
 Scripturæ locis, & anteriorum Patrum doctrinâ, sed etiam om-
 nigenâ ratione, ut scientiam haberent eorum, quæ per fidem acce-
 perant: nedum ut unusquisque eadem intellectu contempleretur, sed
 etiam ut alios solidè instrueret in eorundem intelligentia; & quamvis
 in hujusmodi ratiociniis ad creaturas excurrerent, quarum perfec-
 tiones justissimo titulo Deo adscribebant, maxime tamen ex ipsis
 Dei perfectionibus suos instruebant discursus, sicut & responsiones
 ad Hæreticorum argumenta, ut in eorum scriptis observari potest.

10. Non me latet, hujusmodi discursus ab Autoribus nostræ Sen-
 tentiæ adversis haberi, ut meras persuasiones, non legitimas de-
 monstraciones; at sic jam videmur versari in quæstione super voce
demonstratio; quia has easdem persuasiones vocat Lullus demonstra-
 tiones, ut explicat ipse in lib. de *Convenientia fidei, & intellectus in*

objec. (tom. 4. part. 1.) ubi ostendens, quod veritates Fidei possunt probari, sic num. 4. discurre: Iterum Doctores Sacrae Scripturae conantur quantum possunt deducere rationes ad probandum divinam Trinitatem, & Incarnationem, &c. habentes sanam mentem, & intentionem ad exaltandum sanctam Fidem. Et ideo ego qui sum verus Catholicus, non intendo probare Articulos contra fidem, sed, mediante fide, cum sine ipsa non possem probare, nam Articuli sunt per superius, & meus intellectus est per inferius, & fides est habitus, cum quo intellectus ascendit supra sensus vires; non autem dico, quod probem Articulos fidei per causas, quia Deus non habet causas supra se, sed per talem modum, quod intellectus non potest rationabiliter negare illas rationes, & possint solvi omnes objectiones contra ipsas factae; & Infideles non possunt destruere tales rationes, vel positiones: talis est ista probatio, sive dicatur demonstratio, sive persuasio, vel quocumque alio modo possit dici, hoc non curo; quia propter nostrum affirmare vel negare nihil mutatur in re.

11. Itaque omnes illas rationes censet Lullus demonstrationes, quas non potest intellectus rationabiliter negare, quibusque oppositae objectiones possunt solvi; tales autem esse rationes a Sanctis Doctoribus adductas, nullus, ut puto, infirmari audebit; alioquin quomodo censi possent persuasiones, si eisdem rationabiliter contradicere posset intellectus, & eisdem opponere objectiones rationabiliter insolubiles? Hinc est quod Fidei Mysteria evidenter credibilia pronuntiantur; imo quod haec evidentia credibilitatis est metaphysica & non tantum moralis: Et clarissimus Augustinianus Berti, lib. 22. de Theolog. Disciplin. cap. 3. hunc ponit titulum: *Demonstratur Fidem ac Religionem Christianorum evidentissime veram esse*. Haec autem evidentia ne dum fundatur in motivis extrinsecis, quibus veritas Christianae fidei suadetur, sed etiam in rationibus ex Dei perfectione petitis quibus illa veritas ostenditur, & objectiones, quibus impetitur, ita dissolvuntur, ut nullius esse roboris ostendantur, & in ipsis non posse rationabiliter intellectum insistere.

12. Sanè, in huiusmodi argumentorum solutione fundat Lullus usum ex principis rationibus, quibus ostendis Fidei Mysteria posse demonstrari: unde in *Apostrophe Latina de Arij. Fid.* (tom. 4.) in Introductione, primò agens contra eos, qui dicunt, quod sancta Catholica Fides sit magis improbabilis, quam probabilis, quorum plerique, ut alibi notat, erant Averroistae, sic num. 2. adversus ipsos

discurrit : „ Aut intendunt dicere , quod ipsa fides sit magis impro-
 „ babilis , quàm probabilis in se , & etiam quantum ad Deum , vide-
 „ licet quod sit magis improbabile , quod ipsa sit à Deo , quàm quod
 „ non sit à Deo : & in hoc casu , nullus debet adherere tali fidei ;
 „ quæ est magis improbabilis , quàm probabilis in se , & quantum ad
 „ hoc , quod sit à Deo ; nec in non adherendo potest condemnari
 „ à justo iudice , imò adherendo est stultus , quia facit contra ratio-
 „ nem , adherendo improbabilitati , & deferendo probabilitatem .
 „ Aut intendunt dicere , quod ipsa fides sit magis improbabilis , quàm
 „ probabilis , in se , sed sit probabile , quod sit à Deo ; & in hoc
 „ casu , si est probabile quod sit à Deo , sequitur quod ipsa sit pro-
 „ babilis ; & si est verum , quod ipsa sit à Deo , est vera , & ne-
 „ cessaria , cum Deus sit summa veritas , & summa sapientia , quæ
 „ non fallit , nec fallitur , & ipse dicit , quod illa sit : ergo est verif-
 „ simum ; si enim est credendum cuilibet experto in sua scientia ,
 „ ergo multò magis expertissimo , & sapientissimo in omnibus . Nec
 „ possunt dicere tertium , scilicet quod ipsa sit probabilis in se , sed
 „ sit magis improbabile , quàm probabile , quod sit à Deo : cum
 „ enim Catholica fides jubeat amare Deum super omnia , & ponat
 „ divinas perfectiones in superlativo gradu perfectionis , & extirpet
 „ vitia , inferendo virtutes in altiori gradu perfectionis , qui possit
 „ dari , & per consequens sit bona & optima ; & omne bonum sit
 „ à Deo , tamquam à supremo Bono , necessariò sequitur , quod ipsa
 „ sit à Deo : ergo est necessaria .

13. Postea , num. 3. ostendit , Fidei Myſteria posse probari , ex
 clara solutione , quam ad objectiones Infidelium adhibent Catholici ,
 dicens : „ Et cum noster zelus , & nostra totalis intentio sit omnino
 „ circa defensionem Fidei , ideo nos Magister Raymundus Lullus
 „ legamus hanc Schedulam Sapientibus , & discretis Religiosis , &
 „ Sæcularibus ut videant , ac diligentissime persequantur prædicta ,
 „ & etiam an infra scripta sequentia contineant veritatem , videlicet ,
 „ quod aliqui Magistri in Theologia asserunt , & testantur , quod
 „ quæcumque proposita obiectio contra Sacrosanctam Catholicam Fidem
 „ possit solvi per necessarias rationes , scilicet intelligendo consequentias
 „ ipsarum rationum : ergo manifestè sequitur , quod Sancta Catholica
 „ Fides juxta eorum testimonium possit probari per necessarias ra-
 „ tiones , & hoc per modum intelligendi , non tantum per modum
 „ credendi . Si quis autem dixerit , quod ista consequentia , quam
 „ facimus , non attingat veritatem , cogitur dicere , quod prædicta
 „ ratio

„ ratio Magistrorum sit inanis , & quodd principium sit prius per
 „ suum consequens , & posterius per suum antecedens ; & quodd in
 „ syllogismo minor propositio sit antecedens , & major sit conse-
 „ quens , quodd est impossibile , & contra naturam intellectus „
 Noto , quodd hâc subsumptâ probatione præ tendit Lullus , quodd sicut
 consequens non potest esse prius , quàm antecedens , nec minor
 propositio antecedens ex quo oriatur major ut consequens , ita nequit
 solvi Infidelium objectio per necessarias rationes , quin intelligatur
 veritas per ipsam impugnata , quia nequit ostendi quodd aliqua veritas
 non sit impossibilis , ut præ tendit objectio , quin intelligatur esse
 possibilis , cùm prius sit rem intelligere , quàm ejus non impossi-
 bilitatem manifestare :

14. Unde , num. 4. ad idem ita discurret : „ si quis autem dixerit ,
 „ quodd objectiones , quæ possunt fieri contra fidem , possint solvi per
 „ necessarias rationes ; & probationes , quæ possunt fieri pro fide ,
 „ possint frangi per necessarias rationes : dicimus quodd implicat con-
 „ traditionem ; quæ non potest stare , quia duæ conclusiones con-
 „ trariæ circa idem non possunt stare , & de hoc subjungimus hoc
 „ exemplum : *Ubicumque est generatio , ibi est etiam corruptio , sed in*
 „ *Deo est generatio ; ergo in Deo est corruptio* ; qui autem intendit im-
 „ probare per necessarias rationes , quodd in Deo non sit corruptio ,
 „ ille non tantum debet tenere , quodd generatio sit in Deo , sed de-
 „ bet necessariò scire , quodd generatio sit in Deo. Hoc idem potest
 „ dici de istis maximis : *Ubicumque est principium , ibi est tempus :*
 „ *Ubicumque est productio , ibi est successio : Omne agens agit cum*
 „ *motu : De nihilo nihil fit : Nullum infinitum potest esse finitum : Qui*
 „ *non intelligit particularia non potest intelligere seipsum : Nulla Virgo*
 „ *potest parere : Nullum agens agit sine instrumento : Nullum novum est*
 „ *perpetuabile : Ubicumque est prioritas ibi est posterioritas ; Nullum*
 „ *ens , quodd est purus actus , est multiplicabile : Nullum ens potest per-*
 „ *ficere perfectum : Nullum intelligibile est intellectum. Ubi sunt plura ,*
 „ *ibi est compositio : Nullus mortuus homo potest resurgere idem numero ,*
 „ *idem actu : Nullum corpus potest esse in pluribus locis in eodem tem-*
 „ *pore : Nullum accidens potest esse sine subiecto : Nulla operatio potest*
 „ *esse infinita : In nulla æternitate , est æternabile : Multas alias maxi-*
 „ *mas possumus invenire ; sed istas ponimus , quia qui istas potest*
 „ *solvere per necessarias rationes , debet scire primitiva principia ,*
 „ *cum quibus solvat prædictas maximas , ut supra est significatum ;*
 „ *sed qui affirmant prædicta ostendunt quodd ignorent quodd Deus sit ,*

„ & quid Deus sit „. Post aliqua interjecta, ut intelligatur quid sit *Demonstratio*, ita videlicet, quòd non sit aded arctanda, ut sit communiter, concludit: „ Ergo redimus ad id, de quo prius fuit sermo, „ & dicimus quòd illi, qui docent prædicta, ostendunt quòd ignorant, quòd Deus sit, & quid sit; nam quando est manifestum & probatum, quòd sit Deus, & quid sit, hoc est, quæ sint ejus perfectiones & dignitates, sequitur quòd Articuli Christianæ fidei non solum sint magis probabiles, quàm improbables, sed etiam quòd sint veri & necessarii: quod probamus in pluribus nostris libris.

15. In hoc discursu prætendit Lullus, non posse simul stare quòd objectiones contra fidem possint solvi per necessarias rationes, & quòd probationes veritatum fidei possint etiam solvi per necessarias rationes; quia simul demonstrarentur duæ Conclusiones oppositæ, quod esse nequit; imò ex hoc ipso, quòd Infidelium objectiones per necessarias rationes solvantur, debet haberi intelligentia per necessariam rationem de veritate Fidei, quam impetit illa objectio, ut patet in exemplo adducto; nam nullus potest, solvendo illud argumentum, manifestare generationem; quæ est in Deo, esse sine corruptione, quin intelligat ipsam esse æternam, infinitam ac summè perfectam: in quo solo fundari potest necessaria ratio ostendens ipsam esse sine corruptione: Idem est de aliis Averroistarum maximis, quas proponit tamquam in rerum natura notas, quæ omnes impetunt varios fidei articulos; quia nisi intelligatur firma ratio, quâ nituntur veritates Fidei, quas impugnant, non potest ostendi eas maximas in veritatibus Fidei non verificari; nisi enim quis intelligat Dei perfectiones, quibus Deus summè est, & summè agit, non poterit ostendere, quòd productio v. g. quâ Deus Pater producit Filium, est sine successione; quod quidem est, quia Pater est æternus, & immutabilis, ac æternè, & immutabiliter producit, ac proinde nulla est ibi successio: Inde concludit Lullus, præfatos Averroistas docentes, quòd Fides Catholica magis sit improbabilis quàm probabilis, ignorare quod Deus sit, & quid Deus sit: videlicet, quòd Deus sit infinitè bonus, magnus, æternus, & sic de aliis Dei dignitatibus; cum autem demonstreretur Deum esse, & ipsum esse infinitè bonum, magnum, æternum, &c. quia in eisdem perfectionibus Dei elucet veritates Fidei, nedùm cognoscitur, quòd Articuli Fidei sunt magis probabiles quàm improbables, sed etiam quòd sint veri & necessarii, quia videlicet connectuntur cum divinis perfectionibus, & ex eisdem ratiocinando deducuntur; quæ quidem est methodus, quâ

Patres & Doctores, stabilitis Fidei veritatibus ex Scriptura, & Traditione, ac Sensu Ecclesiæ, eas ex divinis perfectionibus ostendendo explicarunt, & Infidelium dissiparunt objectiones: ac proinde valde rationabiliter asseruit Lullus cum citatis Doctoribus, supposita Fide, & revelatione, posse Fidei Mysteria demonstrari.

16. Sanè mirari sufficienter non possum, quòd aliqui Autores adeò commoveantur ex Doctrina Lulli docentis, modo prædicto posse Fidei Mysteria demonstrari *ratione naturali*, cum hoc idem expressè doceat D. Thomas quodl. 4. art. 18. dicens quòd si disputet Theologus cum illis, *qui nullam auctoritatem recipiunt, oportet, ad eos convincendos, ad rationes naturales confugere*. Si ergo Infideles possunt per rationes naturales convinci de rebus Fidei, possunt istæ demonstrari, cum hujusmodi intellectus nisi demonstratione non vincantur. Si autem hujusmodi ratio naturalis valet contra tales Infideles, valebit etiam contra admittentes auctoritatem sacram; & multò magis proderit fidelibus, ut per rationes naturales vincantur, adeoque ipsis demonstrantur veritates Fidei, quas credunt, prout ibi docet D. Thomas, præcipiens quòd in Scholis Theologicis, ut inducantur auditores ad intellectum veritatis, *oportet rationibus inniti, investigantibus veritatis radicem, & facientibus scire, quomodo sit verum, quod dicitur*; nisi enim ita procedat Magister, auditor *nihil scientiæ vel intellectûs adquiret sed vacuus abscedet*: At rationes icquirentes veritatis radicem & facientes scire, ita ut per eas acquiratur scientia, non sunt nisi demonstrationes; & ibi agit D. Thomas de rationibus adducendis contra distinctè ad auctoritates & discursus ex eisdem deductos. Item ipse S. Doct. 2. 2. qu. 3. art. 9. ad 2. admittit assensum scientiæ circa res, quas tenemur credere; & art. 10. ait: „ Alio „ modo ratio humana potest se habere ad voluntatem credentis con- „ sequenter. Cum enim Homo habet promptam voluntatem ad cre- „ dendum, diligit veritatem creditam, & super ea excogitat & am- „ plectitur, *si quas rationes ad hoc invenire potest*; & quantum ad hoc „ ratio humana non excludit meritum Fidei, sed est signum majoris „ meriti; & ad 1. dicit: quando autem homo habet voluntatem cre- „ dendi ea, quæ sunt Fidei, ex sola auctoritate divina, etiam si „ habeat *rationem demonstrativam* ad aliquid eorum, putà ad hoc quod „ est Deum esse, non propter hoc tollitur vel diminuitur meritum „ Fidei. Patet itaque ex D. Thoma, quòd habens fidem potest ad res fidei, rationes demonstrativas invenire, & eisdem potest Infideles convincere, quæ est ipsissima Lulli Doctrina. Unde videtur,

quod, dum ipse D. Thomas, 1. qu. 32. art. 1. negat per rationem naturalem posse cognosci Trinitatem divinam, id intelligit absque præsuppositione Fidei; id etiam negat in credente, quatenus credenti res creatæ per se non sufficiunt ad dandam evidentiam Trinitatis; neque ad hoc sufficit ratio naturalis purè fundata in principiis naturaliter notis, prout docet Lullus; non autem id negat, quatenus, vel ex ipsis Dei perfectionibus demonstratur Trinitas, vel, cum sciamus Deo convenire omnem perfectionem, quæ est in Creatura, imò perfectissimo modo ipsi competere, ex vestigiis Trinitatis, transcendendo creaturam, demonstrat ipsam noster intellectus; & hoc modo possunt adduci rationes naturales contra Infideles, prout docuit in quodlibeto citato.

§. II.

Ostenditur immeritò notari à Laudato Censore. Textus ex dictis quæstionibus excerptos.

17. **I**N prima hujus Libri quæstione excitat Lullus super Prologum Magistri Sententiarum, sicut omnes in ipsum scribentes, difficultatem: *Utrum Theologia propriè sit scientia?* Et n. 1. respondet „ quod Theologia sit scientia duobus modis, scilicet appropriatè „ „ & propriè: appropriatè secundum fidem à Deo datam, ut Catho- „ „ licus per fidem credat Articulos Fidei & sacram Scripturam, quæ „ „ non intelligit per argumenta, & est scientia propriè (*appropriatè* „ „ debet dici ex contextu; & in editione Panormitana dicitur: *& est* „ „ *scientia appropriata*; sicut etiam in quodam manuscripto.) quia intel- „ „ lectui non est proprium credere sed intelligere; sed credere est „ „ illi appropriatum per supremum objectum, ut per Fidem possit „ „ attingere illam veritatem, quam demonstrativè non potest attingere, propter aliquod impedimentum, quod habet ratione sub- „ „ jecti vel materiæ. Cohæret Lullus D. Augustino, Enarrat. in Psal. 35. dicenti: „ Aliud est enim quando quisque conatur intelligere „ „ & per infirmitatem carnis non potest . . . aliud autem quando „ „ perniciosius agit adversum seipsum cor humanum, ut quod possit „ „ intelligere, si bona voluntas accederet, non intelligat; non quia „ „ difficile est, sed quia voluntas adversa est. . . Fac hominem quæ- „ „ rere quomodo sit æqualis filius Patri, credidit, quærit intelligere „ „ nondum potest. Magna enim res est, & vires majores desiderat „ „ ut possit capi, & est initium Fidei, quod custodit animam, donec

„roboretur : Lacte nutritur , ut perveniat ad habitudinem , & firmitatem cibi solidioris , ut possit intelligere : *In principio erat Verbum , & Verbum erat apud Deum , & Deus erat Verbum.* Antequam hoc possit , nutritur in fide : & conatur intelligere , ut intelligat quantum Deus dederit. „ In relatis Lulli verbis , in quibus continetur tertius Textus à dicto Censore notatus , docet Lullus , quod per fidem appropriatur intellectui credere , & quia illa notitia , quam sic habet , tum positivè , veritates credendo , tum deductivè , illas colligendo , oritur à fide , quæ illi est appropriata , idè Theologia est appropriatè scientia : non quidem scientia illo sensu , quo scientiam explicuit Aristoteles , sed alio , & quidem altiori , cum ejus certitudo funderetur in certitudine Fidei , quæ est orta à supremo Objecto. Dicitur autem appropriata , quia proprius , & naturalis actus intellectus est intelligere , & ita solum ratione alterius credit , quatenus supponit verum , quod clarè non intelligit.

18. Ex hoc Textu patet , Lullum ponere fidem tamquam primum fundamentum ad intelligentiam Mysteriorum fidei ; & fidem quidem , non utcumque , sed fidem à Deo datam , & appropriatam per supremum Objectum : atque ita , præter alia adducta , Tom. I. cap. 39. patet mentem ipsius esse , veritates fidei , non nisi supposità fide posse demonstrari : quod idem innuit in Prologo , ubi num. 6. sic protestatur : *Illæ , quæ in hoc Libro propono dicere , volo quod sint , & intelligentur in omnibus , salvâ veritate , reverentiâ , & honore Sacrosanctæ Romanæ Ecclesiæ ; & propterea eidem se submittit dicens : Cujus correctioni hæc , & omnia alia mea dicta submitto.* Apertiùs autem hoc explicat in hac eadem quæst. 1. n. 11. ubi ait : *Et adhuc fides est instrumentum , & juvamentum , ut intellectus intelligat articulos , ut legitur : nisi credideritis , non intelligetis :* cum ergo in Isaïæ textu exprimatur necessitas Fidei ad intelligendum veritates , & dicat Lullus Fidem esse instrumentum , & juvamentum , ut intellectus intelligat articulos , prout dicitur in citato Isaïæ textu , planum est , mentem ipsius esse , non nisi fide supposità posse intelligi , & demonstrari articulos.

19. Proinde sub hoc tantum sensu debet intelligi Lullum loqui in hac eadem quæst. 1. tum etiam in 15. & 20; quas in Censura objicit laudatus Censor , dum dicit demonstrari , vel generaliter articulos , vel determinatè divinam Trinitatem , vel Incarnationem , vel aliam quamcumque Fidei veritatem ; cum autem , ut ostensum est , nullo modo sit erroneum asserere , quod fidei Mysteria possint demonstrari , fide & revelatione supposità ; idè. hæmeritò doctrinam

Lulli notat ut erroneam laudatus Censor ; rationes autem , quibus Lullus probat dictas veritates , dicuntur ab ipso *naturales* , ut jam notavimus , quia desumuntur ex ipsis propriis , & naturalibus Dei perfectionibus , ut videri potest in hoc & aliis Libris ; dicitur etiam probari *necessariò* dictas fidei veritates , quia videlicet in dicta probatione ex antecedenti certo & noto , necessariò , & infallibiliter deducitur consequens ; non autem quòd inducat Lullus in Deo necessitatem absolutam ad Incarnationem , & alias operationes Dei ad extra , sed tantum moralem & decentiæ , prout cum sancto Anselmo infra explicabimus.

Textus 2.

20. In citatâ quæst. 1. num. 1. post verba relata num. 17 ; ut ostendat Lullus utilitatem , & conducentiam fidei , subjungit : “ Et si-
 „ cut objectum sensibile restauratur in imaginatione in absentia sen-
 „ tiendi (quatenus , dum sensus actu non sentit , imaginatio propo-
 „ nit objectum antea perceptum per sensum) sic & multò melius .
 „ quando intellectus non est dicursivus per necessarias rationes (dē-
 „ monstrativas) circà veritatem Articulorum fidei (sicut intellec-
 „ tus mechanici , aut alicujus alterius , qui stat ad positiones tantum)
 „ restauratur veritas Articulorum in credulitate intellectus , qui ipsos
 „ credit ; & hujusmodi restauratione multum indiget intellectus ,
 „ cum omnes homines non sint dispositi ad investigandam veritatem
 „ Articulorum fidei , & sacræ Scripturæ per necessarias rationes , si-
 „ cut mulieres , Faber , Rusticus , & sic de similibus ” . Et his ver-
 bis desumptus est secundus Textus ab hoc Censore notatus ; observa-
 tamen ante ejus discussionem , quomodo cohærent omnia D. Aug.
 in Joan. cap. 7. Trac. 29. num. 6 , ubi postquam explicuisset Filium
 esse lumen de lumine , ait : “ Si intelleximus , Deo gratias : si quis
 „ parum intellexit , fecit homo , quousquè potuit , cætera videat
 „ unde speret. Forinsecus ut operarii possumus plantare , & rigare ,
 „ sed Dei est incrementum dare : *mea inquit Doctrina non est mea ,*
 „ *sed ejus qui misit me.* Audiatur consilium , qui dicit nondum intel-
 „ lexi. Magna quippe res & profunda , cum fuisset dicta , vidit uti-
 „ que ipse Dominus Christus hoc tam profundum non omnes in-
 „ tellecturos , & in consequentibus dedit consilium. Intelligere vis ?
 „ Crede. Deus enim per Prophetam dixit : nisi credideritis , non
 „ intelligetis sed ego dixeram si quis crediderit , & hoc con-
 „ filium dederam , si non intellexisti , inquam , crede. Intellectus
 „ merces est fidei. Ergo noli quærere intelligere , ut credas , sed cre-
 „ de , ut intelligas ; quoniam nisi credideritis non intelligetis ” . Et

Serm. 126. num. 8. "Lætetur, qui intelligit; patienter ferat, qui non intelligit: quod non intelligit ferat, & ut intelligat differat.

21. Duo sanè hominum genera distinguit Lullus in hoc Textu: Unum est illorum, qui stant ad positiones tantùm, hoc est illorum, qui vel ob imbecillitatem intellectûs, vel ob particularem ad exteriora applicationem, non sunt dispositi ad investigandam veritatem Articulorum fidei: in istis veritas Articulorum fidei, quæ sibi à Magistris, vel Pastoribus fuit proposita, postquam eos jam non audiunt, restauratur seu conservatur in eorum credulitate solâ, quatenus, solùm credunt, quia tantùm stant ad positiones, quin curent per rationem intelligere ipsam veritatem; & hujusmodi sola credulitas est necessaria prædictis hominibus, ut suo modo veritates fidei percipiant: Aliud genus hominum est eorum, qui non stant ad positiones tantùm, sed per necessarias rationes investigant veritatem Articulorum, quam fide perceperunt; & eorum intellectus nedùm fide, & credulitate percipit dictas veritates, sed etiam attingit intelligentiâ; & respectu istorum postea probat, quòd Theologia est propriè scientia, quia eorum intellectus per proprium & connaturalem actum, qui est intelligere seu clarè percipere, attingit dictas veritates.

22. Unde immeritò laudatus Censor scribit: *Textus secundus etiam videtur indicare fidem rusticis tantùm esse necessariam*; de quo egimus Tom. 1. cap. 40. ad art. 97. Eymerici, & ostendimus evidenter ex Lullo, fidem esse omnibus quibuscumque necessariam: immeritò quidem id Lullo attribuitur in presenti Textu; nam ex eo quod dicat, quòd fide vel credulitate veritatis Articulorum *multùm indiget intellectus*, cum omnes homines non sint dispositi ad investigandam veritatem articulorum per necessarias rationes, quales sunt rustici, non legitimè infertur, negare fidei necessitatem in Litteratis; quia, ut ostendimus, hoc textu tantùm docet, hanc fidem solam & sine intelligentiâ veritatis esse rusticis necessariam; non autem negat absolute fidem esse necessariam illis, qui conantur intelligere veritatem Articulorum per necessarias rationes, imò hoc supponit, quia, ut ostendimus ex ipso, ad intelligentiam Articulorum debet fides præsupponi. Deinde assertio, quòd fide *multùm indiget intellectus*, est generalis, ac proinde de omnibus intellectibus verificatur; ratio autem, quam subjungit, quia videlicet non omnes sunt dispositi ad investigandas rationes, non est formalis, sed est merum exemplum particulare, ut ostendat illis esse fidem necessariam.

23. Præterea ad objectionem propositam ab Eremita in hac quæst. 1. num. 5. scilicet, quod si articuli possent probari, amitteretur fides, in quantum per credere non haberemus meritum, respondet n. 9. dicens: *Et quia dicis, quod si intellectus posset attingere Articulos per demonstrationem, destrueretur fides, malè dicis; quia quanto altius intellectus intelligit veritatem Articulorum, tanto majus meritum assequitur; & num. 10. subjungit: Et licet intellectus intelligat Articulos fidei, non sequitur, quod destruatyr fides, quia ille, qui ipsos intelligit, intendit quod si ipsos non intelligeret, ipsos tamen crederet: Ex quibus patet, quod fides, quæ in principio pro omnibus asseritur necessaria, sola quidem est in rusticis, & in illis qui tantum stant ad positiones; in illis verò, qui investigant rationes, conjungitur cum eorum scientiâ; nec ejus meritum perditur: atque ita nullum est indicium, quod sentiat Lullus, fidem non esse Doctis necessariam, imò, ut supra diximus, immediate num. 11. citat illud Isaïæ: *Nisi credideritis, non intelligetis*, ut ostendat fidem esse Doctis necessariam, ut per rationes necessarias intelligant Articulos fidei.*

24. Amplius: in aliis locis ejusdem libri docet necessitatem fidei generaliter pro omnibus, ut quæst. 86. in qua eam simul cum spe, & charitate, quas dicit esse virtutes gratuitas, asserit necessariam ad meritum, dicens num. 2. *Item prædictæ virtutes spectant ad meritum, quia ratione meriti (id est ad acquirendum meritum) sunt datae, licet gratis sunt datae; & spectant ad meritum, quia si non spectarent ad meritum, implicaretur contradictio, & ipsi credere, sperare, & ipsi amare conveniret acquirere meritum & non acquirere, quod est impossibile.* Deinde quæst. 113. docet, fidem per peccatum mortale reddi informem; quia sic non prodest ad salvationem; & quæst. 114. docet, quod fides informis per adventum gratiæ fit formata, & quod sine ipsa, non acquiritur meritum nec recipitur gratia sanctificans.

25. Pergit deinde Lullus in hac præsentī quæstione ad probandum, quod Theologia propriè fit scientia, quia intellectui proprium est intelligere, sicuti igni calefacere, & oculis videre; & cum Deus, qui est subiectum Theologiæ, fit intelligibilis cum magnitudine, suæ intelligibilitatis, sequitur quod intellectus creatus fit tali magnitudine intellectivus, quod sit dispositus ad intelligendum Deum, ut suo actu proprio, in quo est major magnitudo potestatis, attingat Deum, & sic concludit. *Ergo significatum est, quod Theologia propriè*

Textus IV.

proprie sit scientia, aliàs divinæ intelligibilitati esset injuriatum, inquantum humanus intellectus non posset intelligere divinam Trinitatem, &c. secundum magnitudinem supremi objecti, & secundum magnitudinem ipsius intellectus, & sic deficiunt divina Bonitas, Magnitudo, Aeternitas, Potestas, &c. ex parte supremi Objecti, & ex parte ipsius intellectus. Ex his verbis desumptus est Textus quartus Cenforis, num. 1. relatus; dicitur autem, quod nisi Theologia esset proprie scientia, esset injuriatum divinæ intelligibilitati, quia, cum Deus sit in magnitudine intelligibilis, ipsi debet correspondere intellectus creatus in proportionata magnitudine intellectivus, & hoc exigunt divina Bonitas, Magnitudo, &c. sicut, quia Deus est in magnitudine amabilis, ipsi debet correspondere creata voluntas in proportionata magnitudine amativa.

26. Postea Lullus num. 3 & 4. eandem conclusionem probat variis rationibus, quæ etiam præcedentem confirmant; & n. 5. opponit Eremita, non esse demonstrabile, quod *Deus sit unus & trinus & incarnatus, & sic de aliis pertinentibus ad fidem*; & sic Theologia non est scientia, cum scientia non sit nisi de hoc, quod intellectui est demonstrabile sine aliquo dubio; & ratio quare articuli non possunt demonstrari est, quia omnis demonstratio fit per causam; & quia benedicta Trinitas Dei non habet aliquid supra se, non potest demonstrari per causam, quod de necessitate sit Trinitas, & sic de Divina voluntate, quæ voluit, quod Filius Dei incarnaretur. Ad hanc objectionem respondet Lullus num. 6. dicens: "Eremita: Intellectus duobus modis attingit suum objectum, scilicet subito, & successive: subito, quando attingit quod omnis triangulus habet tres angulos, & hoc quia per sensitivam, & imaginativam est certificatus; & non dico quod per hunc modum, vel per similem, Trinitas sit demonstrabilis, cum ipsa non sit sensibilis nec imaginabilis; sed secundum modum discursivum, quem intellectus habet in attingendo, est Trinitas demonstrabilis: non propter quid, sed per æquiparantiam". Ex his verbis quoad sensum desumpsit prælaudatus Cenfor Textum primum, num. 1. relatum.

27. Clarè explicat Lullus in hac responsione suum sensum super demonstrabilitate Mysteriorum Fidei; distinguens duplicem modum scientiæ in intellectu, videlicet eam, quæ subito, id est immediate, certificatur intellectus, vel per sensum, & imaginationem, vel per seipsum in objectis per se notis; & illam, quæ, mediante discursu, ex notis veritatibus alias deducit: primo modo non demonstratur

Trinitas nec alii fidei Articuli, quia nec per sensum & imaginationem, nec alio consimili modo sunt immediatè noti intellectui; at, mediante discursu, certificatur de ipsis intellectus, & acquirit de eisdem demonstrationem, non quidem per quid vel per causam, quia nihil est Deo superius, ex quo ejus veritates sint demonstrabiles; sed per æquiparantiam, quatenus, cum omnes Dei perfectiones sint æquales, ex illis veritatibus dictarum perfectionum, quæ notæ sunt intellectui, deducit veritates ad Articulos fidei pertinentes, ut ibi exemplificat Lullus, quoad Trinitatem, ex æqualitate existendi & agendi in Deo, & ex æqualitate intellectus, ac potestatis, bonitatis, &c.; & quoad Incarnationem ex æqualitate divinæ voluntatis, sapientiæ, magnitudinis, finis, &c. Unde num. 6. ostensâ distinctione in divina Trinitate, subjungit: *Et intellectus certius attingit supradictam distinctionem, quam quando intelligit, quod triangulus, habet tres angulos; & ratio hujus est, quia attingit prædictam distinctionem per infinitas rationes Dei (in quibus sanè est major veritas & necessitas) & attingit angulos trianguli per sensitivum, & imaginativum, quæ sunt finita.*

28. Textum quintum desumpsit laudatus Cenfor ex quæst. 12. in qua quæritur: *utrum Sanctus Spiritus procedat à Patre & Filio?* Et in ea, postquam Lullus ratione probavit Spiritum Sanctum procedere à Patre & Filio, Eremita num. 2. sic objicit: „Raymunde „Beatus Joannes Evangelista dixit: *Spiritus qui à Patre procedit*: „Unde videtur, quod si Spiritus Sanctus procederet à Filio, ipse „hoc dixisset; & sic secundum tua dicta es contra Sacram Scripturam, quia dicis quod Sanctus Spiritus procedat à Filio „. Ad hanc objectionem ita num. 3. Lullus respondet: *Raymundus fuit miratus, quare consideravit, quod Pater & Filius de necessitate spirarent Spiritum Sanctum, ut supra probatum est, cum Beatus Joannes non dixerit, quia ab utroque procedit: unde Raymundus recurrit ad principia suæ Artis ad investigandum de hoc veritatem secundum modum suæ Artis, per quem modum autoritates Sanctorum possunt exponi, & declarari, & concordari cum necessariis rationibus.* Sanè in hoc Textu nihil est notâ dignum, cum demonstratio vel manifestatio per necessarias rationes, semper intelligatur, ut ostendimus, fide suppositâ. Quod autem dicit, autoritates Sanctorum posse exponi & declarari secundum modum suæ Artis, & concordari cum necessariis rationibus, etiam intelligitur fide suppositâ, & ut prævenit in Prologo, *salvâ veritate Catholicæ Fidei*; & cum principia Artis Lul-

lianæ, ut ostendimus To. 1. ferè per totum, sint infallibilia principia discurrendi, idèd possunt conducere ad explicandas autoridades, & concordandas cum necessariis rationibus; unus enim modus exponendi autoridades, ut omnes fatentur, est juxtà rectam rationem; & conformiter ad hoc celebris Theologus Henricus Gandavenfis in Summa, art. 10. quæst. 2 & 3. & art. 16. quæst. 7 & 8. docet adhibendam rationem in expositione Scripturæ.

29. Unde in Censura relatà num. 1. immèritò notat laudatus Cenfor, Lullum probare Articulos Fidei *ex principiis suæ Artis*, & quòd *totus hic liber fundatur in hac Doctrina seu Arte*; cùm enim, ut ostendimus, principia Artis Lullianæ sint certa, & infallibilia fundamenta ad inveniendam veritatem, meritò adhibentur in Theologia; & quia methodus, quam sibi Lullus proposuit in hoc libro, ut exponit in Prologo num. 4. est talis, videlicèt: *Ad honorem Dei & ex debito charitatis, quæ nobis omnibus est necessaria ad salutem, cupio tibi in hac parte obedire, & juxtà meum posse, cum auxilio Dei, per prædictam Artem inquirere veritatem de supradictis quæstionibus*: Idèd juxtà propositam methodum discurret in hoc libro per principia suæ Artis; non tamen ita absolutè & rationi naturali laxando habenas, ut Ipsa sit arbitra, & nulli subdatur ferulæ, prout suggillare videtur laudatus Cenfor, sed quemadmodùm advertit in eodem Prologo num. 6. dicens: *Illæ, quæ in hoc libro propono dicere, volo quòd sint & intelligantur in omnibus, salvâ veritate, reverentiâ, & honore sacrosanctæ Romanæ Ecclesiæ, ejus correctioni hæc & omnia alia mea dicta submitto*. Itaque tantùm, suppositâ, & salvâ fidei veritate, ex principiis suæ Artis rationes adducendo, discurret Lullus in hoc libro.

30. Nec solus est Lullus, qui, suppositâ Fidei veritate, ex sola ratione procedit in tractando Theologica, imò, ut ostendimus Tom. 1. plures sunt Patres & Doctores, qui ita procedunt, & signanter Sanctus Anselmus, expressè remotâ omni autoritate, totam Theologiam absolvit; & sanè de hoc Lulli volumine indebitè exponit laudatus Cenfor hanc querimoniam, quia in pluribus quæstionibus sacram commemorat Scripturam, ut in hac quæst. ubi num. 10. probat Mysteria Fidei posse demonstrari ex variis locis Scripturæ, quibus de Christo refertur, *quando apparuit Magdalenæ, & quando cum Apostolis comedit de fave mellis, & quando Beato Thomæ ostendit suum latus, & quando, præsentibus Apostolis, ascendit ad Cælos, & sic de diversis linguis Apostolorum, & de multis aliis miraculis, quæ fuerunt facta ad probandam Catholicam Fidem*; & num. 11. profert il-

lud Ifaiæ : *Nisi credideritis , non intelligetis*. Quæst. 12. sibi opponit locum Joannis 15. 26. *Spiritus , qui à Patre procedit , & in aliquibus aliis ; & in toto libro frequentissimè provocat ad fidei veritates , ut eisdem conformet resolutiones , quas in difficultatibus scholasticis determinat*. Itaque parcè utitur Lullus Sacrà Scripturà , quia , eàdem supposità , breviter convincere intellectum per ratiocinia nititur ; non autem , vel quia eam despiciat , vel parvipendat argumenta , quæ ex motivis credibilitatis fortissima proponi possunt : quantum autem hujusmodi argumenta ipse Lullus magnificat , luculentissimè ostendit Apostrophe latinà *de Articulis Fidei* (tom. 4.) ubi art. 13. sub tit. *Quod sex Articuli , qui pertinent ad humanitatem , jam sint facti* ; præmisso , quod res facti , cujusmodi sunt præfati sex Articuli , non videantur posse probari nisi per testes , & instrumenta , ita subjungit ; „ Et si de attestationibus testium & per Scripturas sumi-
 „ tur fides & probatio , nulla secta est ita vallata , & roborata attes-
 „ tationibus testium , Scripturis , & instrumentis ; sicut Christiana
 „ fides , quam sacrosancta Romana Ecclesia confitetur ; quæ enim
 „ secta habet tot Testes , quot Fides Christiana , pro qua confiten-
 „ da , & testificanda millia millium hominum sunt martyrisata ?
 „ Imò , quod singulare & mirabile est , nulla secta moriendo est fun-
 „ data , nec multiplicata , nec lætatur de morientibus , nisi sola
 „ Christiana Fides : quæ secta habet tot Scripturas , tam altas , tam
 „ multiplices , omnes ad unam veritatem Christianæ Fidei concur-
 „ rentes , sicut Fides Christiana ? Imò , si Scripturæ aliarum Secta-
 „ rum librentur , & comparentur ad Scripturas Christianæ Fidei ,
 „ non videntur Scripturæ , sed potius quædam ruditates , & deli-
 „ ramenta : quinimò Christiana Fides tam evidentibus signis & mi-
 „ raculis est probata , & per nostrum Dominum Jesum Christum ,
 „ & eum sequentes , tam evidenter tradita , & etiam declarata ,
 „ quod dicta signa & miracula non potuerint fieri , nisi à Deo ; nec
 „ per ipsum Dominum Jesum Christum potuissent talia fieri , qua-
 „ lia fecit , nec tam evidenter tradi nec declarari , quæ nobis tra-
 „ didit , nisi ipse esset verus Deus , & verus Homo , & per confes-
 „ quens vera omnia , quæ nos docuit facere , & faciendo firmavit.



DISSERTATIO II.

De actibus à Lullo attributis divinæ Essentiæ & perfectionibus,
ex Textibus desumptis ex quæst. 2. 4. 20. 23. & 24. & eorum-
dem Censurâ.

§. I.

Exponuntur Textus, & ostenditur in eisdem nullum esse errorem.

I. LAUDATUS Censor Textus & Censuram sic profert : **PRIMUS**
TEXTUS : " Sicut elementum se habet ad elementandum, &
" leo ad leonificandum : sic & multò plùs divina natura se habet ad
" naturificandum, & Deitas ad Deificandum, fol. 4. pag. 2. hoc
" est q. 2.

SECUNDUS : " Natura divina requirit agere, ut se habeat ad ali-
" quem finem, sicut, & multò plùs, anima se habet ad intelligen-
" dum, recolendum, & amandum, fol. 6. pag. 1. id est qu. 4.

TERTIUS : " Sicut natura divina requirit agere intrinsecè, id est
" naturare, sic sua bonitas requirit bonificare, magnitudo magni-
" ficare, æternitas æternificare, &c. ibidem.

QUARTUS : " In Deo est potestas infinita, cùm quiddam est in
" Deo essentialiter sit infinitum : infinita esse non potest, si de sua
" infinita bonitate non posset producere bonificatum infinitum, &
" de sua magnitudine magnum infinitum, & sic de aliis attributis.
" fol. 15. pag. 2. hoc est qu. 20.

QUINTUS : " Undè, cùm divina potestas sit purus actus infinitus,
" producit infinitum de infinito. Ibidem.

SEXTUS : " Natura divina est Pater, & est Filius, & sic de essen-
" tia & attributis ; & natura exigit naturare, cùm de conditione
" naturæ sit agere, & per consequens generare, quod est idem quod
" agere. fol. 17. pag. 1. id est quæst. 23.

SEPTIMUS : " Si verum est hoc quod tu dicis, Eremita ; Verbum
" non esset à Patre simpliciter productum, sed secundum quid, sci-
" licet secundum Personam, & non secundum essentiam, & sic non
" esset simpliciter Filius totus Filius, neque Pater simpliciter totus
" Pater, quod est impossibile, ut in Personis non sit quantitas ; &
" sic tua ratio non obstat, & est declaratum, quòd Filius sit essen-

„ tialiter de essentia productus, sicut personaliter de Persona, ratione cujus declarationis est significatum, quod essentia Filii relata ad Personam Filii, sic est genita, sicut est ingenita, relata ad Personam Patris, cum Pater sit ingenitus. fol. 17. pag. 2. id est qu. 24.

Censura : „ Quilibet ex prædictis textibus erroneus est, quia significat in divinis naturam sive essentiam, & attributa essentialia producere, & produci. Et quamvis existimem Lullum voluisse dicere in prædictis Personam unam, alteri communicare naturam, essentiam & attributa; tamen modus loquendi erroneus est, & non ferendus.

II. De hac eadem materia locuti fuimus, Tom. 2, cap. 2. ad art. 2, 3, 4 & 5. Eymerici, ostendendo mentem & sensum Lulli non esse, quod divina natura, essentia, bonitas, magnitudo, &c. producat & producat absolute, sed tantum esse principium quo producendi; vel, dum similia proferuntur, accipi abstractum pro concreto; sicut etiam actus illos, quos in natura divina & Dei perfectionibus agnoscit Lullus, agnosci, & eisdem attribui à pluribus Patribus & Doctoribus, eodem Lulli sensu: Unde, ne actum agam, hic solum ostendam, Textus notatos ab hoc Censore, juxta sensum obvium ex contextu, non esse erroneos, nec significare essentiam, naturam, & attributa essentialia producere & produci absolute, prout objicit laudatus Censor; pro quo memorie repetendum est sensum, cujuscumque Autoris non esse determinandum ex aliqua clausula vel clausulis ejusdem à contextu avulsis, & sine respectu ad contextum consideratis; sic enim Sacrae Scripturae & Sanctis Patribus multi possent errores imponi; sed attentam mentem ipsius Autoris clare expositam, & habitam reflexione ad contextum. Mens Lulli ex variis libris deprompta circa hanc materiam aperte est manifestata dicto cap. 2, quod scilicet natura divina ejusque attributa solum sunt principium quo divinarum productionum, & quod, dum ex energica locutione aliquando abstractis divinis attribuitur producere, & produci, tunc sumitur abstractum pro concreto; atque adeo, hoc supposito, hic tantum Textus ex contextu explanabo.

III. Itaque Lullus, cit. Lib. Sent. qu. 2. inquit: *Utrum Deus sit subjectum Theologiae sub aliqua ratione determinata?* Ad hujus solutionem præmittit num. 1. quod Deus potest dupliciter considerari, scilicet absolute, & determinate; absolute, sicut quando consideramus, quod Deus sit unum ens, quod est infinitum & æternum, nullam habens

determinationem quoad suam essentiam, & naturam, sicut considerare unam bonitatem in abstracto, non contractam ad aliquid, sed nudam & remotam ab omni alio ente: & sic resolvit, quod Deus secundum suam simplicissimam unitatem & existentiam, non potest esse subiectum Theologiæ sub aliqua ratione determinata; quia sic consideratus nullam rationem determinatam importat. Determinatè consideratur Deus, dum aliqua determinata proprietas in eo agnoscitur; & hoc modo sub aliqua ratione determinata est subiectum Theologiæ, ut ibi determinat Lullus dicens: Sed secundum modum proprietatum, quas Deus habet in seipso & in suo effectû, teneo affirmativam quæstionis.

IV. Ad probandam hanc resolutionem ostendi oportet in Deo esse tales proprietates: ad quod sic n. 2. discurrit: „ In Deo existentia „ (hoc est *essentia*, ut scribitur in citato manuscripto) & natura „ sunt idem, cujus *essentia* est sua Deitas, & in ipsa Deitate sunt „ plures rationes existentes, eadem numero cum ipsa, & quælibet „ cum alia, sicut *divina Bonitas, Magnitudo, Æternitas, Potestas, „ Sapientia, Voluntas, Virtus, Veritas, & Gloria; & quia Deitas „ est idem cum sua naturâ, quælibet ratio requirit suum actum de- „ terminatum, sicut Bonitas, quæ naturaliter requirit suum bonifi- „ care, & magnitudo suum magnificare, &c. Cum omnis natura re- „ quirat actum & finem, quare est, ut non sit frustrâ, & otiosa; sicut „ essentia, quæ requirit subiectum, in quo possit existere, quod „ subiectum, per essentiam habet existentiam in existendo hoc quod „ est „ Ex hoc textu notare oportet, quod eatenus naturæ divinæ ejusque perfectionibus attribuit Lullus agere, quatenus natura requirit actum, & essentia requirit subiectum, seu esse, in quo existit; quia in his duobus principiis fundat assertionem positam, videlicet, quod quia Deitas, quæ est idem cum Bonitate, Magnitudine, &c. est idem cum naturâ, idè quælibet perfectio requirit suum actum proprium, nempe Bonitas bonificare, Magnitudo magnificare &c. undè, cum natura tantum ut principium quo requirat actum, & se habeat ad operationem, idè tantum potest intelligi ex dicto textu Deitatem, naturam, bonitatem, magnitudinem, &c. *requirere suum actum de- terminatum*, quatenus videlicet sunt principium quo illius actus, seu operationis. Hoc, præterquam quod in omnium sensu est notum, constat ex Divo Thoma, qui part. 1. qu. 39. art. 2. ad 3. ait: *Natura designat principium actus, essentia verò ab essendo dicitur; & 3. part. q. 20. art. 1. ad 2. sic scribit: Agere autem non attribuitur naturæ sicut agentis, sed personæ; actus enim suppositorum sunt & singulorum, se-**

cundum Philosophum ; attribuitur tamen actio naturæ , sicut ei , secundum quam persona , vel hypostasis , agit : Hæc eadem est Doctrina constans Lulli , ut explicuimus citat. Tom. 2. c. 2. videlicet , quod natura & essentia tantum est principium *qua* agendi ; suppositum verò est principium *quod* ; atque ita naturæ vel formæ tantum attribuitur operatio tamquam principio *quo*.

Textus I. V. Hoc supposito , subjungit Lullus immediatè in textu citato hæc verba : *Unde , cum hoc ita sit , sicut elementum se habet ad elementandum , planta ad vegetandum , sensitiva ad sentiendum , intellectiva ad intelligendum , leo ad leonificandum , homo ad homificandum ; sic , & multò plùs divina natura se habet ad naturandum , & deitas ad deificandum , & unitas ad uniendum (unificandum) unde in essentia , & natura Dei resistent proprietates personales determinatæ in quantum ad invicem sunt distinctæ , quæ sunt Paternitas , Filiatio , & Spiratio , quæ sunt ipsa Beata Trinitas Dei ; & sic ratione hujus determinationis , Deitate existente Paternitate sub una ratione , & Filiatione sub alia ratione , & sic suo modo de Spiratione , est Deus subiectum Theologiæ sub rationibus determinatis ; & sicut diximus de proprietatibus personalibus , sic intelligendum de proprietatibus vel attributis Dei.*

VI. Hæc Verba , ex quibus primum desumpsit Textum laudatus Cenfor , cum inferantur ex antecedentibus , dicendo : *unde cum hoc ita sit* , intelliguntur ex ipso contextu in eodem sensu , quo dicitur , naturam requirere actum ; & bonitatem , magnitudinem , &c. requirete actum bonificandi , magnificandi , sicut essentia requirit esse ; & cum natura , unice tanquam principium *quo* , & ratio agendi , requirat actum , & se habeat ad ipsum , sicut essentia , uti ratio essendi , se habet ad esse : idèd dum dicit in hoc Textu notato , *quod Divina natura se habet ad naturandum* , id est ad producendum habentem naturam , & *Deitas ad Deificandum* , id est , producendum Deum , & *unitas ad uniendum* , id est producendum unum , tantum ex contextu intelligitur quod se habent ad actum producendi tanquam principium *quo* , & ratio agendi ; non autem absolutè & ut principium *quod* ; atque ita ex dicto integro contextu indebitè eruitur propositio absoluta , quam exponit laudatus Cenfor , videlicet , *naturam , sive essentiam , & attributa essentialia producere , & produci ;* sed tantum hæc propositio restricta ; videlicet , *divina natura se habet ad naturandum , & Deitas ad deificandum , & unitas ad uniendum , seu producendum , tanquam principium quo , & ut ratio agendi , vel producendi* : quæ propositio est omninò Catholica ; nec in toto hoc contextu

contextu Lullus dicit absolute, quod *natura* naturet, *Deitas* deificet, *bonitas* bonificet, id est producat, sed tantum quod *natura*, *deitas*, *bonitas*, &c. *requirunt actum*, & *quod se habent ad actum*; requirere autem actum, & ad ipsum se habere proprie convenit principio *quo* & rationi agendi, quin per hoc absolute, & tanquam *quod* agat; & propterea dicimus, intellectum se habere ad intelligendum, visum ad videndum, &c. qui tantum sunt principium *quo* & ratio, cur intelligens intelligit, & videns videt.

VII. Prædicta amplius patent ex comparatione in eodem textu facta, nempe: *sicut Elementum se habet ad elementandum, &c.* in qua exponuntur extrema comparationis, tum abstracta, ut *elementum*, *sensitiva*, & *intellectiva*, tum concreta, ut *Planta*, *Leo*, *Homo*, quæ diversimodè se habent ad actum, nempe abstracta ut principium *quo*, & concreta ut principium *quod*, ut intelligatur in alio extremo simili modo, videlicet, quod *natura*, *deitas*, & *unitas* se habent ut principium *quo*; concreta autem, quæ subintelliguntur, nempe *habens naturam*, *Deus*, & *unus* ut principium *quod* se habent ad actum; & propterea subjungit Lullus, quod ex hoc, quod *natura* divina tamquam principium *quo* requirit actum producendi, *in essentia & natura Dei resultant proprietates personales determinatæ*, Deo producente Deum, ut in aliis quæstionibus distinctè explicat, quod hîc compendiosè indigitat, utpotè non necessarium ad præsentem quæstionem, in qua subjungit, qualiter *Deus* est subiectum Theologiæ sub ratione determinata, nedum proprietatum personalium, sed etiam attributorum, & aliarum rationum, quæ per Theologiam in Deo considerantur.

VIII. Hæc ratio, quâ Lullus ostendit proprietates personales divina natura, fundatur in fecunditate ejusdem naturæ, prout etiam discurrunt Patres referendi §. 2. dum autem in hoc eodem libro eam fusiùs pertractat, amplius ostendit, naturam, & abstracta divina tantum se habere ut principium *quo*; Deum autem seu concretum ipsorum esse id, quod proprie, & absolute producit: unde q. 6. num. 1. ait: *Deus habet naturam, per quam naturaliter intelligit, & diligit se ipsum*; & in tota hac quæstione Deo, & personis absolute attribuit actum, intelligendi, volendi, bonificandi, magnificandi, &c. de abstractis autem dicit esse rationes, cur tales actus sint in Deo & personis. Idem insinuat quæst. 7. 8. 9. 10. 12, ubi num. 1. ait, quod *Deus producit de se ipso ratione suæ Bonitatis, Infinitatis, Æternitatis, &c.* & quæst. 13. 14. & 15. similia repetit, ut intelli-

Tom. III. E

gatur mentem ipsius esse, quodd Deus vel persona divina propriè; & absolutè producit; natura verò & perfectiones divinæ tantùm sunt ratio, & principium quo productionum, juxta contextum hujus libri, ex quo alii textus faciliùs possunt intelligi.

IX. Secundus & tertius textus sunt desumpti ex qu. 4. in qua Lullus quærit: *Utrum ratio differentiarum divinarum attributorum sit in Deo, vel in intellectu creato?* Quod est idem ac quærere, *an divina attributa distinguantur distinctione reali, vel per intellectum*; & ad hujus resolutionem num. 1 & 2. ostendit, quodd divina essentia, natura, sapientia, voluntas, & aliæ Dei perfectiones *sunt idem numero sine differentia*; num. autem 3. miratur, *quare in Deo considerabat & numerabat unam bonitatem, unam magnitudinem, &c. postquam realiter non sunt differentes*: ad quodd intelligendum recurrit ad divinam naturam, & considerat ipsam cum divinis rationibus, sed perfectionibus, & intelligit. Quodd natura requirat agere, *ut se habeat ad aliquem finem, sicut, & multò meliùs quàm anima, quæ se habet ad recolendum, intelligendum, & diligendum, & sic Raymundus invenit rationem quare rationes Dei sint reales, licet non sint differentes*; quia, sicut natura requirit agere intrinsecè, scilicet naturare, sic sua bonitas requirit bonificare, & sua magnitudo magnificare, & sua æternitas æternificare, & sic de aliis, cum sint idem numero cum ipsa natura, ut probatum est; per quodd demonstratur, quodd rationes sint reales in divina productione intrinseca: sicut Pater, qui ratione sapientiæ naturaliter concipit Verbum, & ad hoc concurrunt omnes aliæ rationes reales essentiæ, eùm Filius sit ita bonus per bonitatem, magnus per magnitudinem, &c. sicut sapiens per sapientiam; & hoc idem est de Sancto Spiritu secundum processum amoris; & sic in Deo apparent reales rationes, & refulcent per distinctionem divinarum Personarum, cum qua ita sunt idem numero, sicut cum essentia & natura, & quolibet ipsarum cum alia.

X. Ex hoc textu, qui in editione Panormitana paulò aliter sonat, desumit laudatus Oenfor textum secundum & tertium; in quo tamen idem dicit Lullus, ac in textu primo, videlicet quodd natura requirit agere, & se habet ad agendum, sicut anima ad intelligendum & diligendum; & quodd sicut natura requirit agere, intrinsecè, scilicet naturare, sic sua bonitas, magnitudo, &c. quæ sunt idem cum natura, requirunt bonificare, magnificare, &c. Et cum natura in omnium sensu unicè tanquam principium quo, & ut ratio agendi, requirat actum, & se habeat ad agendum; non autem tanquam principium quod, & quodd absolutè agit; ideo similiter divina bonitas, magnitu-

do, &c. unice tanquam principio quo & ut ratio agendi requirunt, & se habent ad bonificandum, magnificandum, &c. Hoc expresse patet in eodem textu, ubi, natura dicitur se habere ad naturandum, sicut anima, unice tanquam principium quo, se habet ad intelligendum & diligendum; & explicatur qualiter sapientia, bonitas, & cæteræ dignitates Dei requirunt suum actum, seu sunt rationes reales in divina productione intrinseca, quatenus videlicet Pater ratione sapientiae naturaliter concipit Verbum; & quia ad hoc concurrunt omnes aliæ rationes reales, cum Filius sit ita bonus per bonitatem, magnus per magnitudinem, &c. sicut sapiens per sapientiam; ideo dictæ dignitates Dei unice requirunt bonificare, magnificare, &c. quatenus Pater ratione bonitatis bonificat, ratione magnitudinis magnificat, &c. Filium; id est ipsum producit bonum, magnum, &c.; & hoc ipsum repetitur, num. 5. in solutione argumenti: unde absque ratione censet laudatus Censor Lullum in dicto Textu sentire naturam, & essentiam, ac essentialia attributa producere & produci.

XI. Textus quartus & quintus desumuntur ex qu. 20. ubi quaeritur: *Utrum in Deo sit numerus?* Ad cuius solutionem præmittit Lullus, num. 1. duo esse prærequisita: *primum* est probare pluralitatem in Deo; & *secundum* est cognoscere differentiam inter numerum, qui est in Deo, & numerum qui est in Creaturis; hic enim est cum compositione, & cum quantitate, ac cæteris accidentibus, qualis numerus non potest esse in Deo. Ut autem probet in Deo esse pluralitatem, sic num. 2. discurrit: *In Deo est infinita Potestas, cum omne id, quod est in Deo essentialiter, sit infinitum: non potest esse infinita, si de infinita bonitate non posset producere infinitum bonificatum, & de infinita magnitudine infinitum magnum, & de æternitate æternificatum, & de se ipsa possificatum, & de sapientia intellectum, & de voluntate amatum, & sic de aliis attributis; & hoc est, quia nulum ens potest esse infinitum, nisi sit infinitum existendo, & habeat posse ad agendum aliquid de infinito; sed potestas Dei est infinita; ergo de prædictis potest, cum divina bonitas sit infinita, & sic de magnitudine, &c. Unde, cum divina potestas sit purus actus infinitus, producit infinitum de infinito; & quia produciens, & productus non possunt esse sine distinctione, cum relative se habeant, convenit de necessitate, quod in Deo sit pluralitas, cum distinctio non possit esse sine pluribus: ergo sequitur, quod in Deo sit numerus binarius, scilicet unus produciens, & alius unus productus: & isti duo in Deo sunt principium numeri; & quia principium numeri non potest esse, nisi ex ipso sequatur aliquid, scilicet*

Textus 4.

Textus 5.

tertium, convenit, quod in Deo sit numerus ternarius, scilicet unum, duo, tria, ut numerus in ipso sit perfectus à parte principii & à parte finis, &c. ut ibi prosequitur.

XII. Ex hoc Textu, qui in editione Panormitana aliquibus scatet mendis, desumpti sunt relati Textus; at, cum constet mentem Lulli esse, quod divinæ perfectiones tantum sunt ratio agendi, & producendi, dum ipsis attribuitur agere, & producere, non debet intelligi absolute, & uti attribuitur concreto, vel Personæ, sed tantum, quatenus sunt ratio agendi, & principium quo producendi, prout innuitur etiam in eodem Textu, in quo distinctio & relatio, quæ consequitur ad productionem, dicitur esse inter producentem & productum, non autem inter potestatem, & potestatem. Deinde in hoc eodem libro qu. 6. Posse Bonificare, Magnificare, &c. seu posse producere de infinita bonitate, magnitudine, &c. attribuitur Deo, qui sic potest ratione suæ naturæ & dignitatum: Idem habetur qu. 7. & signanter qu. 8. num. 1. de potestate generandi dicitur, quod sit illa potentia, *per quam Filius potest generari à Patre.* Tandem non est ratio calumniandi in Lullo, quod divina potestas possit producere, generare, creare, & similia, cum hoc sit labium commune, sicut dicitur de divino intellectu, quod concipit Verbum, & de voluntate quod spirat Spiritum Sanctum, ut §. 2. exponam.

XIII. Ex qu. 23. *Utrum Pater, idè sit Pater, quia generat, vel idè generet, quia Pater?* Desumptus est sextus Textus; & quidem ad hujus quæstionis solutionem præmittit Lullus, num. 1. quod, ut evitetur in Deo causa & effectus, recurrit ad principia suæ Artis, considerans in attributis Dei æqualitatem, & æquiparantiam secundum quod se habent ad generationem: juxta quod num. 2. sic discurret: *Natura Divina est Pater, & est Filius* (in sensu videlicet reali) *& sic de essentia & attributis* (quæ etiam eodem sensu sunt Pater, & Filius) *& natura exigit naturare, cum de conditione naturæ sit agere, ratione cujus sequitur agens, agibile, & agere naturaliter, & per consequens generare, quod est idem cum agere, & naturare, & quia Pater & Filius, essentia & attributa sunt idè cum divina natura, de necessitate sequitur, quod Pater idè sit Pater, quia generat, & idè generet quia Pater, cum natura ita requiratur, &c. At in hoc Textu idem dicit Lullus, quod in antecedentibus, videlicet, quod natura est principium quo, & ut ratio agendi requirit agere, & naturare, quod est idem ac generare, ut in eodem exprimit, quia de conditione naturæ est agere, ut ratio videlicet agendi, quoniam propter hujus*

Textus 6.

naturæ conditionem & requisitionem est in ipsa *agens*, quod ratione ipsius agit, est *agibile* & est *agere* agenti correspondentia, ratione requisitionis ipsius naturæ.

XIV. Septimus Textus desumitur ex qu. 24. *Utrum Verbum in Divinis dicatur essentialiter, vel personaliter?* Quam diverso valde sensu tractat Lullus, ac in Schola communi; nam in ista inquiritur, an de essentia vel aliquo essentiali prædicato verificetur esse Verbum; an verò tantum verificetur de Persona; Lullus verò eam investigat sub hoc sensu, an videlicet Verbum identificetur cum essentia Divina, & sit ipsa essentia, & substantia, ac proinde concretum substantiale includens ipsam essentiam; vel sit Persona; & num. 1. ac 2. proposita difficultate circa utrumque, resolvit, quòd Verbum dicitur essentialiter, quia est de essentia Patris, & non est accidens, sed substantia divina; & quòd etiam dicitur personaliter, quia est Persona à Patre distincta, eadem tamen cum ipsa Patris essentia. Postea, num. 3. sic objicit Eremita: “Pater intelligendo Verbum” intelligit quòd ipsemet sit Pater, & non quòd sit essentia, cum
 ” essentia absolutè conveniat omnibus tribus Personis; & ratio, quare
 ” non intelligit, quòd sit essentia in generando, est, ut non generet ipsam, quam sic generaret, intelligendo essentiam, sicut generat Filium intelligendo quòd sit Pater; & quia essentia est in-
 ” generabilis, cum sit absoluta, sequitur, quòd Filius non dicatur
 ” essentialiter Verbum, sed simpliciter personaliter.

XV. Huic objectioni duplicem adhibet Lullus responsum; & quidem num. 4. ait, quòd Pater, “licet intelligat quòd sit essentia,
 ” sicut intelligit, quòd sit Pater, non sequitur, quòd absolutè generet essentiam; quia sic intelligit, quòd de sua essentia generat Filium, sicut intelligit, quòd sit Pater, in generando Filium de sua essentia. Et num. 5. subjungit: Item si verum esset hoc quod tu dicis, Textus 7.
 ” Verbum non esset simpliciter productum à Patre, sed secundum quid
 ” scilicet secundum Personam, non secundum essentiam, (id est secundum, quod est concretum habens essentiam) & sic Filius non esset
 ” simpliciter totus Filius, nec Pater simpliciter totus Pater; quod est impossibile, ut in Personis non sit quantitas: & sic tua ratio non obstat
 ” & est demonstratum quòd Filius essentialiter (id est quoad suum esse
 ” essentiale) sit productus de essentia, sicut personaliter (ut Persona)
 ” de Persona (quæ est Pater): per quam demonstrationem significatum
 ” est, quòd essentia Filii relata ad Personam, (id est essentia ut Persona) sic sit genita, sicut essentia Patris relata ad Personam Patris

2 (ut est Persona Patris) est ingenua , cum Pater sit ingenuus. . .

XVI. At in his verbis , ex quibus est desumptus relatus Textus , aperte constat , ut expressè asserit Lullus n. 4. quòd Pater absolute non generat essentiam ; ac proinde , dum num. 5. dicit : Quòd essentia Filii relata ad Personam , sic sit gentia , sicut essentia Patris , relata ad Personam Patris est ingenua , ex obvio sensu non intelligitur , quòd essentia absolute , & in abstracto sumpta , sit gentia ; sed tantum essentia sumpta in concreto , quod est idem ac essentia relata ad Personam , seu concretum essentiale . , quòd est Deus , qui est concretum Deitatis , est gentia ; quod patet ex resolutione quæstionis , in qua resolvit , quòd Verbum dicitur essentialiter , id est quòd Verbum , verè est concretum essentiae , quæ est eadem in Patre & Filio ; vel intelligitur , essentia relata ad Personam , idem ac essentia , ut est Persona ; & hoc modo rectè dicitur , quòd essentia divina ut Pater generet ; & essentia divina , ut Filius gignitur : ac proinde laudatus Censor immeritò attribuit Lullo sentire , quòd essentia , & natura divina absolute producit , & producitur.

§. I I.

Modum loquendi in relatis Textibus non esse erroneum , sed conformem Patrum & Doctorem usui loquendi ostenditur.

XVII. In Censura relata num. 1. subjungit laudatus Censor quòd , quamvis existimet Lullum voluisse dicere in prædictis , Personam unam alteri communicare naturam , essentiam , & attributa , tamen modus loquendi erroneus est , & non ferendus ; at hoc etiam immeritò censet , nam ipse modus loquendi nihil præ se fert errorem sapiens , utpotè usitatissimus apud PP. & DD. ut de omnibus distinctè ostendam ; & quidem , primò Lullus in text. 2 , 3 & 6. utitur hoc modo loquendi , scilicet quòd divina natura , & sic de bonitate , magnitudine , &c. requirit & exigit agere , hoc est producere , quia natura ex sua ratione requirit actum , & de conditione naturæ est agere . Certum est autem , quòd , saltem in Aristotelicorum sensu , est principium certum & constans quòd de conditione naturæ est agere , & quod ipsa ex sua ratione requirit & exigit agere : non quòd ipsa propriè & absolute agat & operetur , sed quòd suppositum agat ratione ipsius , & ex ejus exigentia : Undè communiter natura intelligitur esse vis infusa rebus ex similibus similia procreans , & hoc innuit definitio Aristotelis :

principium motus & quietis &c. non enim esset hujusmodi principium, nisi requireret operationem.

XVIII. Præterea Divus Thomas 1. part. q. 27. art. 1. in corpore ait : *Manifestum est enim , quod unumquodque , secundum quod est actu & perfectum , secundum hoc , est principium activum alicujus : Ex quo deducit potentiam in Deo.* Idem qu. 36. art. 2. ad 6. ait : „ Dicendum „ quod per hoc quod Spiritus Sanctus perfecte procedit à Patre , non „ solum non superfluum est dicere , quod Spiritus Sanctus procedat „ à Filio sed omnino necessarium , quia una virtus est Patris , & Filii : „ Hoc autem non esset , nisi hæc una virtus requireret actum spirandi. Ibidem qu. 39. art. 2. ad 3. dicit : *Natura designat principium actus , essentia verò ab essendo dicitur :* Et qu. 41. art. 4. probat in Patre potentiam generandi , *cum potentia nihil aliud significet , quam principium alicujus actus.* Et art. 5. in Cor. scribit ; *Illud propriè dicitur potentia in quocumque agente , quo agens agit ; omne autem producens aliquid , per suam actionem producit sibi simile ; & ex hoc concludit , quod natura divina in Patre est potentia generandi in ipso.* Tandem qu. 42. art. 2. in Cor. manifestat Filium Patri co-æternum , quia Pater Filium generat naturâ , *& quia natura Patris ab æterno perfecta fuit ;* & art. 6. in Cor. scribit : *Potentia enim agendi consequitur perfectionem naturæ ; videmus enim in Creaturis , quod quanto aliquis habet perfectiorem naturam , tanto est majoris virtutis in agendo.* Similiter Divus Bonaventuro in Compendio Theologicæ veritatis , lib. 1. cap. 4. ita discurret ; *Æternum Patrem esse per hoc ostenditur , quod , cum Deus sit potentissimus , sapientissimus , & optimus , potest , scit , & vult se summè communicare ; Hoc autem est alteri majestatis suæ plenitudinem dare : Ergo Deus Pater ab æterno Filium sibi æqualem genuit , cui divinitatis suæ essentiam communicavit.* Hic sanè discursus non subsisteret , nisi potestas , sapientia , & bonitas Dei exigèrent actum talis communicationis ; quod idem denotat , dum in fine ait : *Quod Pater virtute essentiae existentis in se generat ;* & cap. 5. dum dicit ; *Cum igitur copiosissimo fons bonitatis competat emanatio perfectissima , constat , quod Persona , quæ Pater est , qui est fons totius bonitatis , generat filium sibi æqualem.*

XIX. Hoc ipsum , nempe , naturam divinam , requirere & exigere actum producendi , dicunt quoad substantiam omnes Scholastici , dum asserunt , divinam naturam esse principium quo divinarum processionum ; nam illud est principium quo , quod est ratio , & virtus producendi , & determinat suppositum ad producendum : atque ita exigit , & requirit ut suppositum producat ; & dictum principium

quo dicitur principium generandi, & principium inclinatum ad generationem : unde subtilis Scotus in 1. Dist. 13. qu. unica, §. *Ad questionem respondeo*, num. 20. vers. *Ad argumenta*, ait : „ Illa habi-
 „ tudo inter produciens & productum est naturalis ; & naturalitas
 „ hujus habitudinis est ex parte naturalitatis ipsius producentis, quia
 „ producit principio naturaliter inclinato, ad agendum „ . Et vers. *Alio modo dicitur*, scribit : „ Ibi communiter concurrit ex parte
 „ agentis inclinatio naturalis, seu forma naturalis, quæ est princi-
 „ cipium generandi, & hoc modo videtur esse generatio in Divinis ; „
 Et propterea juxta omnes principium quo dicitur principium produ-
 cendi, sicut intellectus, principium intelligendi & intellectionis, &
 voluntas principium volendi & volitionis ; quæ omnia æquivalenter
 sunt idem, ac id quod dicit Lullus.

XX. Eundem loquendi modum habent Patres, qui ex fecunditate
 & perfectione divinæ naturæ ostendunt productionem in Deo : qui
 apud Petavium, Theologic. Dogmat. tom. 2. Tract. de Trinit. lib.
 5. cap. 6. num. 8. plures sunt, & *Divinitatem ipsam, hoc est natu-
 ram & essentiam Dei, non sterilem & infæcundam esse statuunt, sed ge-
 nitali vi præditam, & communicabilem* : Unde Divus Athanasius Orat.
 2. Hæreticos arguens, qui Patrem nihil aliud nisi Opificem & Con-
 ditorem esse dicebant, neque genitabilis fecundæque substantiæ, sic
 apud ipsum eosdem impugnat : *Quod si non fecunda est sed sterilis Di-
 vina substantia, ut illi volunt, sit tamquam lux non illuminans, aut
 Fons siccus ; quomodo non eos pudet, cum procreatricem efficientiam illi
 tribuunt ; ac detracto eo, quod secundum naturam est, non erubescunt id
 præ se ferre, quod ex voluntate pendet*. Et Divus Cyrillus Alexan. 5.
 Thesauri. pag. 37. *Quare, qui Deum negat Patrem esse, is fecundita-
 tem auferre à divina natura, ut jam perfecta non sit, quæ generandi vir-
 tute careat : Notio ergo perfectionis fecunditas est* : Et 6. Thesau. pag.
 47. *Nam, si stultum est arbitrari, nihil ab humano intellectu prodire,
 quia & Dominus hoc asserit, & res ipsa clamat : Quomodo non erit
 absurdum, supremum intellectum, qui Deus est, quique omnem intellec-
 tum excedit, infæcundum opinari, aut generationem ipsius corporum le-
 gibus subicere ; præsertim, cum ipse noster intellectus non corporum more
 generet ?* Et idem 5. Thesauri, pag. 42. apud Petav. ibidem cap. 9.
 num. 8. *Quid igitur obstat, quominus substantia Patris, perfecta cum
 esset, id gigneret quod ex ipsa natum est, tamquam ipsi coæternum ?
 Non enim dici illud potest, Patris substantiam in tempore adeptam esse*.
 Et num. 7. explicat Petav. Cyrillum, Dial. 2. de Trinit. pag. 456.
 dicere,

dicere, *Patrem habere naturam genitalem, hoc est, quæ possit gignere.* Et Divus Dionysius, lib. de Divin. Nomin. cap. 2. ait: *Bonitas & ad benefaciendum suapte sponte proclivis amor, qui in eo, quod excellenter bonum est, ante existit, non sivit ipsum infæcundum in sese ac sterilem manere, sed eum movit, ut ad omnium productionem genitalem quoddam vi summè esset actuosum, & efficax;* quæ verba, ut ait Petavius, Theol. Dogm. tom. 1. de Deo, lib. 2. cap. 8. num. 16. intelliguntur de interiori propagatione Divinitatis. Hæc omnia & plura alia, quæ sunt adducta tom. 2. cap. 2. non possunt intelligi, nisi intelligatur naturam, essentiam, bonitatem, &c. Dei, exigere & requirere actum producendi.

XXI. Alius loquendi modus, quo utitur Lullus in textu primo relato, num. 1. est, quod natura divina *se habet ad producendum*, hoc est, ad naturificandum, Deitas ad Deificandum, sicut creatæ naturæ; at hæc expressio quoad rem in omnium ore versatur, qui tenent divinam naturam esse principium quo Divinarum processio-num, nam principium quo est ipsa virtus & potentia agendi; hæc autem virtus & potentia se habet ad actum, ut intellectus ad intelligendum, & voluntas ad volendum; imò suppositum agens non nisi ratione naturæ, seu principii quo, se habet ad producendum: nihil etiam apud omnes magis in ore, quàm quod potentia generandi se habet ad generandum; & potentia spirandi ad spirandum; & subtilis Scotus in Dist. 7. qu. unic. num. 9. §. & vers. *loquendo tunc*, scribit; “Non distinguuntur autem in Divinis productiones per modum naturæ & voluntatis, nisi quia principium quo produciens” producit aliter, & aliter se habet ad productionem, & produc-tum”; & ex dictis supra agnoscit in natura inclinationem & habitudinem ad productionem. Et ex Divo Thoma supra num. 18. adducto, sicut essentia se habet ad esse, ita natura se habet ad operationem.

XXII. Quantum ad comparisonem, quam in citato Textu instituit Lullus, videlicet, quod sicut sensitiva se habet ad sentiendum, &c. ita divina natura ad naturificandum seu producendum: notandum est hujusmodi comparationes esse frequentissimas apud Patres, ut constat cit. cap. 2. Tom. 2. & exempli gratiâ audiatur Divus Cyrillus Alex. in Joan. pag. 99. litt. C, dicens: *Nam, cum omnia quæ generant, similia sibi æqualiaque ratione substantiæ producant, sola divina natura minus se ipsa generat; sed natura Patris nullius vitii est susceptiva, bona verò, quæ in nobis sunt, multò perfectius in eo, ut in*

Tom. III. F

primitivo, à quo ad nos defluunt, quàm in nobis sunt : non ergo minorem se Filium generabit, sed æqualem ac consubstantialem.

XXIII. Divus Augustinus in collatione cum Maximino Ariano Episc. five lib. 1. contra ipsum, num. 14. ait : “ Quare verus Deus ? ” Quia verus Dei Filius. Si enim animalibus dedit, ut non generent nisi quod sunt : homo hominem generat, canis canem, & Deus Deum non generat ? ” Et eadem iterum tractans Augustinus lib. 2. vel potius, ut in editione nova, in lib. 1. contra Maximin. cap. 6. ait : “ Sexto loco, ut ejusdem naturæ, cujus & Pater est, ostenderem Filium, etiam mortalium foetus animalium immanitati vestri erroris objecti, increpans cor vestrum, qui ejusdem naturæ, cujus est Pater, negatis esse Deum Filium, quamvis verè esse Filium non negatis ; cum Deus ipse dederit animalibus hoc generare, quod ipsa sunt : ubi non solum hominis hominem, verum etiam canis canem filium nominavi : non ad similitudinem Dei, sed ad confusionem detrahentium Filio Dei ; qui, cum videant corruptibiles mortalesque naturas habere tamen naturæ de suis parentibus unitatem, Filio Dei verò nolunt concedere communionem naturæ unius habere de Patre ; cum sit inseparabilis à Patre, & incorruptibilis, æternusque cum Patre..... Hic tu, ut appareret quàm magnâ veritatis mole premereris, omnino ad rem non respondisti : sed, tanquam deficienti flatu anhelares, reprehendendum me putasti, dicens, quòd tam fœda comparatio, de Filio scilicet hominis, sive canis, in illam tantam immensitatem produci non debuit. Hoc respondere est, an potius inopiam responsionis ostendere ? Quasi ego, propterea terrenarum naturarum ista exempla produxerim, ut incorruptioni corruptionem, immortalitati mortalitatem, invisibilibus visibilia, æternis temporalia, cœquarem : ac non potius, ut vos in magnis & summis rebus errantes de rebus parvulis infimisque convincerem ; qui non videtis bonum, quòd Creator summè bonus dedit etiam extremis vilissimisque creaturis, ut, cum longè aliud sint, quàm est ipse, hoc tamen generant quod sunt ipsæ. Nec attenditis, quid mali dicatis, ut, cum homines & canes & cætera hujusmodi habeant filios veros, quos illis gignentibus creat veritas, non sit verus Dei Filius ipsa veritas ”. Et lib. 2. cap. 6. ad hoc idem ait : “ Quandoquidem creaturam corruptibilem cernitis, hoc quod ipsa est gignere factum suum, & Deum Patrem omnipotentem credi-

» *tis non potuisse*, nisi ejus degenerante natura, gignere unicum suum.

XXIV. Quod tertio loco dicit Lullus in Text. 4. & 5. *relatis*, num. 1. est, quòd *infinita Potestas Dei potest producere infinitum*. At hic loquendi modus est frequentissimus apud omnes, nedùm quoad productionem ad extra, sed etiam quoad productionem ad intra; cùm enim Potestas ex usu & modo loquendi non intelligatur tanquam quid per se subsistens, sed semper intelligatur esse potestas alicujus, quod per ipsam potestatem est potens, licèt ex modo loquendi attribatur posse potestati, intelligitur tamen propriè attribui potenti, & potestati tamquam rationi & virtuti, quâ potens potest; quod frequentius animadvertitur, dum loquimur de omnipotentia Dei erga creaturas, cui attribuitur posse creare, conservare, &c. in productione verò ad intra, eo modo potestati attribuitur posse, sicut intellectui intelligere, & voluntati velle, cùm tamen ita sit, quòd juxta omnes, illi actus attribuuntur divino intellectui & voluntati, sicut aliis divinis perfectionibus actus proportionati, quamvis hoc non ita frequenter contingat: Unde Divus Augustinus lib. 13. de Civitate Dei, cap. 13. sic Deum alloquitur: *Essentia tua scit & vult incommutabiliter, & scientia tua est & vult incommutabiliter, & voluntas tua scit, & vult incommutabiliter*. Divus Cyrillus Alexand. lib. 1. Thesau. cap. 7. ait: *Essentia est virtus generativa Dei*. Divus Bonaventura in 1. Dist. 2. q. 3. respondens ad objectionem ait: „Ad illud, „quod objicitur, quòd infinita virtus infinitate emanans producit infinita, dicendum, quòd divinæ virtuti non convenit productio nisi perfecti; & idèd non convenit ei productio alicujus infinitatis nisi illius, quæ stat cum summa perfectione.... Ad ultimum, quòd „objicitur, quòd potentiæ est se multiplicare, dicendum, quòd non „omni modo multiplicare se est potentiæ, sed perfectè multiplicare „se potentiæ est, & convenit Deo.

XXV. Tandem in septimo Textu dicit Lullus, quòd *essentia Filii relata ad personam Filii sic est genita, sicut est ingenita relata ad personam Patris*; non autem, quòd absolutè essentia sit genita & gignens, prout notare videtur laudatus Cenfor relatus num. 1. quia hoc expresse negat Lullus in eodem Textu, prout notavimus num. 15. & 16. dicens: Quòd *Pater absolutè non generat essentiam*: quòd autem essentia relata ad Personam, quòd idem est ac dicere *essentia ut Persona*, benè dicatur *genita & gignens*, videtur esse communis loquendi modus; & de hoc Petavius Theolog. Dogm. tom. 2. lib.

6. cap. 10. à num. 1. sic scribit : “ Ad ea, quæ de sapientia, vo-
 „ luptate, cæterisque, quæ personis communia sunt tribus, exposui
 „ in antecedentibus duobus capitibus multum conducet præsentis
 „ disputatio, in qua sensus eorum inquiritur, quæ ab Antiquis bene
 „ multis usurpata scimus : *Nata sapientia, vel genita, tum nata sa-
 „ pientia de sapientia, aut simpliciter : Sapientia de sapientia, lumen
 „ de lumine, vel essentia de essentia.* Sic enim Martyr Ignatius Epist.
 „ 3. *Essentiam sive substantiam genitam natamve dixit ; & Gregorius*
 „ Nyssenus *generationem essentia probavit : Hilarius, naturæ ex na-
 „ tura gignentis nativitatem, nec non essentia de essentia ; nativitatem*
 „ *& naturam unigenitam, ex innascibili genitam essentia : Item : Vita*
 „ *(inquit in libro de Synodis ad Anathematismum 4.) in Unigeni-*
 „ *to, quæ ex Patre generata est, essentia intellecta, ita similitudinem*
 „ *essentia ad essentiam significari connectitur. Tali confessione originis*
 „ *sua indiscretæ naturæ perfectæ Nativitas est ; quod enim in utroque*
 „ *vita est, id in utroque significatur essentia : & vita, quæ generatur*
 „ *ex vita, id est essentia, quæ de essentia nascitur ; dum non dissimilis*
 „ *nascitur, scilicet, quia vita, ex vita est, &c.* Sic Augustinus *essen-*
 „ *tiam de essentia dixit, & divinitatem Filii de natura Patris esse na-*
 „ *tam.* Et alibi ; *de se ipso genuisse Patrem id quod est.* Fulgentius,
 „ *substantiam de substantia, item Filium essentialiter natum esse de*
 „ *Patre, & naturam genitam.* Idem Præfatione lib. contra Variman-
 „ dum, *naturam de se Filium generare.* Anselmus Monologii cap. 43.
 „ *Natam essentiam de Patris essentia.* Athanasius quoque Oratione 5.
 „ *Essentiam essentia Patrem dixit.*

XXVI. Prosequitur Petavius num. 2. sic : “ Quibus in loquendi
 „ generibus, illud in primis tenendum : cum dicitur, *nata sapien-*
 „ *tia de sapientia, vel lumen de lumine, vel essentia de essentia, falli*
 „ quosdam, qui ista vocabula significare personas existimant, quasi
 „ ille sit sensus, persona illa, quæ *nata sapientia, id est Verbum,*
 „ *proprie dicitur, nata, vel genita est de ea Persona, quæ est ingenita*
 „ *sapientia : Quod verum non puto, sed utrobique id quod est essen-*
 „ *tia, & absolutè & ad se dicitur, exprimi.* Id enim ex Augustino
 „ colligitur, qui eam Quæstionem cæteris accuratiùs ac subtiliùs in-
 „ tituit, cujus loca illa, quæ adduximus, præsertim è septimo libro
 „ de Trinitate, non obscurè significant sapientiam, quæ Filio pro-
 „ prie tribuitur, & nata dicitur ab essentia, nihil differre, nec mi-
 „ nus Patri convenire, quàm Filio, utriusque salvâ proprietate,
 „ quam genitæ vel natæ, & innatæ atque ingenitæ vocabula demonst-

„ trant. Est enim nata & innata sapientia una prorsus eademque sapientia, hoc est essentia, quia tam essentia de essentia, quam sapientia de sapientia ab Augustino dicitur. Proinde sapientia non hic precise Verbum est, sive expressa sapientia, nisi cum *nata* vox additur; sed perinde se habet, ac cum Deus de Deo, æternus ex æterno, bonus ex bono, lumen de lumine, & hujus generis cætera dicuntur; quorum notionibus subest absolutum quippiam, etsi personales proprietates ex obliquo significantur.

XXVII. Postea refert Petavius ex Concilio Toletano XV. illam propositionem: *Voluntas genuit voluntatem, sicut sapientia sapientiam*, quam notavit Benedictus Papa, ejusque Apologiam à Juliano Toletano exaratam; & concludit Petavius: „ Quamobrem in istis locutionibus: *Sapientia de sapientia, voluntas de voluntate*, utrobique secundum essentiam, non secundum proprietatem, nomina funt. Adducit subinde plura ex parente Anselmo in Monolog. cap. 43. quæ in idem recidunt, & subjungit: „ In his omnibus liquet, sapientiam, & essentiam ac reliqua, secundum naturam accipi, nec aliud esse, vel essentiam de essentia, vel sapientiam de sapientia, quam eandem essentiam & sapientiam, quæ est in Patre, communicari Filio, & ejus fieri propriam, uti est Patris, non alienam. Similia repetit Petavius num 6. nempe per illas locutiones, *non proprie, & ut dixi, directe personas indicari, sed ipsam potius essentiam, & naturam, ita tamen ut in Persona aliqua subsistens intelligatur*; & postea subjungit: „ Neque verò, qui hæc dicunt, aut ista, quæ initio capitis attuli, *naturam natura gignit, aut essentia de essentia nascitur*, sic intelligendi sunt, tanquam proprie gigni, produci-ve naturam velint. . . . Quare sic enuntiationes istæ declarandæ sunt, ut hoc significant, Patrem gignendo Filium suam ipsi communicasse naturam; hoc enim est *gignere naturam*, derivare eam in Filium; & *natura genita* idem est, ac generatione transfusa.

XXVIII. De eadem materia agens Petavius cap. 12. num. 2. distinguit terminum *adaquatum*, generationis, quem dicit esse illam rem, quæ gignitur, & hæc est persona constans ex essentia & proprietate, quæ sola verè & directe gigni dicitur; & terminum *formalem*, qui est natura genito communicata, & in ipsum derivata; & concludit: *proinde neque gigni, neque gignere essentiam, sic, ut existere generatione ipsa fingatur; verum eatenus ut existens communicetur Filio, vel existat in Filio*; & agens à num. 3. de dissidio, qui videtur esse inter Richardum de Sancto Victore, asserentem *substantiam gigni*

nere substantiam ; & Magistrum Sententiarum , concludit Concilium Lateranense in determinatione contra Doctrinam Joachimi Abbatis non præjudicasse adversus Richardi Doctrinam : pro quo num. 4. scribit : » Non enim ... absolutèque essentiam de essentia , vel potius » substantiam de substantia gigni , (quod habet Richardus) negat illa » Synodus , itave loquentem condemnat , neque absolutè itidem si- » dei decretum est , quod *essentia seu Divinitas non generat aut gene-* » *ratur* , ut plures ex Synodi Sanctione , ac Joachimi damnatione » colligunt , præsertim Suarez , Vasquez , Canariensis , & ante hos » Argentina. Verùm essentiam divinam absolutè ac per sese , & ut » à Personis tribus abstracta præciseque spectatur , Lateranensis Sy- » nodus intellexit ; non autem , ut in quaque Persona consideratur , » & est peculiari affecta proprietate ». Hoc ostendit ex sensu Lom- bardi , & Joachimi , ac Concilii determinatione , & concludit : » Ità substantiam vel essentiam Joachimus eo modo consideravit , quo » communis est , neque uni Personæ affixa ; vel certâ proprietate » devincta ; quâ sanè ratione neque generat neque generatur. At » eadem , si , ut est in Patre , consideretur , generat : si , ut in Filio » est , gignitur , hoc est gignendo communicatur.

XXIX. Ex hucusque relatis apertè constat , quàm frequens sit apud Patres locutio illa , quâ essentiam , naturam , deitatem , sapientiam , &c. gignere , & gigni dicitur : quæ locutio , si per *gignere* intelligatur communicare essentiam , & ipsam derivari , de ipsa intelligitur essentia communi ; si per *gigni* intelligatur produci , ita ut ex vi generationis res habeat esse , non absolutè verificatur de essentia ac Deitate , sed tantùm de ipsa ut affecta personalitate ipsique devincta : unde , cùm Lullus in textu notato , & ubicumque de hoc agat , numquam adeò generaliter dixerit divinam essentiam , naturam , deitatem &c. *gigni , nasci , &c.* prout relati Patres explicant ; nec dicat absolutè essentiam gigni , imò hoc expressè neget in textu notato & diffusè relato , num. 15. videlicet quod *Pater absolutè non generat essentiam* ; sed tantùm contractè & limitatè dicat , *quod essentia Filii relata ad Personam sic sit genita , sicut essentia Patris relata ad Personam Patris est ingenita , cùm Pater sit ingenuus* : nullatenus est calumniandus iste loquendi modus ; cùm idem sit *essentia relata ad Personam* , ac essentia ut devincta affixa & determinata ad Personam , vel brevius , *essentia ut Persona* ; & de essentia in hoc sensu , & sub dictâ limitatione ab omnibus dicitur gignere & gigni : Atque ita , dum Lullus in textu adducto num. 15. dicit , *Quod Filius , essentialiter sit*

productus de essentia, quodd est dicere, Filius ut est concretum essentialiter seu habens essentiam est productus de essentia: idem docet, ac Fulgentius, dum lib. *de Fide ad Petrum* cap. 1. & 13. dixit: *Filium essentialiter natum esse de Patre*; & D. Bonaventura *Compend. Theol. Verit.* lib. 1. cap. 6. *Propter primum dicitur verbum Filius Patris.... Istud est Verbum essentialiter, & æternaliter genitum.*

DISSERTATIO III.

De concursu Divinæ Voluntatis in Filii Dei generatione, ad Textum notatum ex qu. 6. Sententiarum.

§. I.

Quid senserint Patres circa Quæstionem, an Pater scilicet voluntate genuerit Filium?

I. **D**IONYSIUS Petavius Theolog. Dogm. tom. 2. lib. 6. de Trin. cap. 8. à num. 1. hanc pertractat difficultatem; & quidem supponit, omnes Patres contra Arium convenire in hoc, quod non ex Decreto quodam liberæ voluntatis Pater Filium produxerit, prætendebat Arius; nihilominus aliqua voluntate Filium genuisse testantur aliqui, ut ibi num. 2. Marius Victorinus in primo adversus Arium dicens: *Est autem lumini, & spiritui imago, non à necessitate naturæ, sed à voluntate magnitudinis Patris... sic igitur voluntate Patris voluntas apparuit ipse logos, Filius.* D. Hilarius lib. de Synodis: *Sed hæc passionum non est in Deo Patre conditio; cum inenarrabili & perfectæ nativitate Filii nec voluntas sola genuit Filium, nec demutata aut coacta imperio naturalis legis essentia est, &c. sed ante tempora omnia Pater ex naturæ suæ essentia impassibiliter volens Filio dedit naturalis nativitatem essentia.* Idem in 3. de Trinit. ait: *sed incomprehensibiliter, inenarrabiliter ante omne tempus & sæcula unigenitum ex his, quæ ingenerata in se erant, procreavit: omne quod Deus est per charitatem atque virtutem nativitati ejus. impartiens. Et mox, productum sic esse Filium docet, ut voluit qui potuit, ut scit qui genuit.*

II. Ipsemet Hilarius ex omnipotentia Patris Filium productum cum aliis exponit ibidem; nam lib. 6. de Trinit. alloquens æternum Pa-

trem, ait: *Omnipotentem te scio, nec conscia tibi tantum atque ipsi unigenito tuo nativitatibus inenarrandae expecto rationem. Impossibile enim tibi nihil est, & genitum à te Filium omnipotentiae tuae virtute non ambigo. Ambigens enim jam omnipotentem te negabo. Bonum te etiam ex nativitate mea te didici: atque ob id non invidum te bonorum tuorum in unigeniti tui nativitate esse confido.* Petrus Chrysol. Sermon. 61. explicans Symbolum dicit: *Omnipotens potest omnia; & si omnia potest, quod in se, ex se, & semper habeat Filium, quis negabit?* D. Ambrosius lib. 4. de Fide cap. 4. concludit, *non fore omnipotentem Patrem si Filium generare non potuit sed creavit.* Idem lib. 5. cap. 7. *Si minorem generavit Deus Filium, minus contulit: si minus contulit; aut minus voluit, aut minus potuit. Sed nec infirmus nec invidus Pater, quia nec voluntas ante Filium, nec potestas.* Maximus Taurinensis Homil. de exposit. Symb. scribit: *Est namque per ingenitam Deitatem omnipotens, & per omnipotentiam Pater.* D. Augustinus lib. 3. con. Maximin. cap. 8. etiam docet ita: *Prorsus ad hunc articulum res colligitur, ut Deus Pater aequalem sibi gignere Filium, aut non potuerit, aut noluerit: si non potuit, infirmus; si noluit, invidus invenitur; Sed utrumque falsum est: Patri ergo Deo verus Filius aequalis est; & cap. 23. Tantum enim quantus est ipse, & tale qualis est ipse, si non potuit gignere, quomodo Deus est? Si noluit quomodo bonus est?* D. Basiliius adv. Eunom. lib. 2. scribit: *Si honestum & decorum est Dei beatitudini Patrem esse, quomodo ergo à principio, quod decebat, ipsi non aderat? Aut enim melioris ignorationi, aut impotentiae hunc defectum impugnant: Ignorationi quidem, si postea quod est melius adinvenis; impotentiae verò, si sciens atque intelligens quod optimum est, assequi non poterat.*

III. Hæc de Omnipotentia, ex qua citati Patres deducunt Filii generationem, adducta sunt, tum quia regulariter accipitur omnipotentia, ita ut ex voluntate exerceatur; tum etiam, ut videatur horum Patrum vestigia pressisse Lullum, dum ex omnipotentia Dei, bonitate absque invidia, similibusque perfectionibus argumentatur, ad productionem ostendendam in Deo; ex qua quidem potentia, bonitate, voluntate, aliisque similibus perfectionibus argumentantur alii Patres à Petavio usque ad n. 10. adducti. Verum est tamen ipsum Petavium num. 9. dicere, quod pleraque veterum loca nihil sic accipi prohibet, ita ut ex sensu opinioneque sua non loquantur, sed eo utantur, quod dant Adversarii, atque ex ipsorum eos oratione convincant: Verum, ut ait num. 11. *Extra controversiam ac per sese*
ita

ita quidam ex illis arbitrati sunt, non necessitate, sed voluntate genitum à Patre esse Filium; & ad hoc pertinere, ait, loca Hilarii & Ambrosii adducta. Et præter relata ex D. August. adjungit ipsum lib. de 23. quæst. ubi qu. 50. ait: Deus, quem genuit, quoniam meliorem se generare non potuit (nihil enim Deo melius) generare debuit æqualem; si enim voluit & non potuit, infirmus est; si potuit & non voluit, invidus est; ex quo conficitur æqualem genuisse Filium. Ipse Serm. 40. de tempore, cap. 6. probat Filium potestate & prudentiâ esse æqualem Patri; quippè injustus est Deus, si minori prudentiæ potestatem dedit æqualem. Si prudentiâ æquales sunt, sed minor est Filius potestate, invidus est Deus, quia æquali prudentiæ potestatem dedit minorem. Et lib. de natura boni, cap. 1. Quia justus est, ait, ei quod de se genuit, ea, quæ de nihilo fecit, non æquavit.

IV. Ad idem adducit Petavius D. Gregor. Nyssen. lib. 7. contra Eunom. pag. 206. cujus antea alia verba adduxerat, ubi ait: *Quippè intimam illam, nullo interposito, Filii cum Patre copulationem non excludere paternæ voluntatis actionem; tanquam naturæ quoddam necessitate ac citra voluntatem Filium habuerit: neque voluntatis actionem dirimere à Patre Filium, quasi intervallum quoddam inter ambos intercedens.* D. Basil. in calce, Homil. 29. ait: *Deus, qui concurrentem habet cum voluntate potestatem, dignum seipso genuit; ac cujusmodi volebat genuit.* Cyril. Alexan. lib. 9. Thesau. pag. 68. Cum Ariani genitum à Patre Filium cum Catholicis sentiant, ex eo illos arguit, quia consubstantialem negant, dicens: “Aut enim, quia non aliter potuit, talem ipsum genuit, aut quia voluit: si non potuisse dicant, pudeat illos tantam substantiæ Patris inferre contumeliâ, dum imbecillitatis eam arguunt. Sin alterum malunt, ut noluisse potius affirmant consubstantialem sibi generare Filium, alia ratione contumeliosi sunt, pravam ac turpissimam rem illi tribuentes, in melioribus faciendis negligentiam. Nam, si melius erat consubstantiale, quàm quod non est ejusmodi, nonne blasphemiam omnem superat dicere, substantiam divinam circa illa, quæ sunt præstantiora & congruentiora, pigrari; ac non potius id voluisse, quod melius est, quàm quod ita sese non habet? Atqui potest omnia facere Pater; & id mavult quod melius est; nihil, ergo prohibet consubstantialem esse Filium.

V. In idem collimant alii Patres dicentes, Patrem amore & charitate produxisse Filium, ut maximus Martyr. in cap. 2. de divin. Nomin. dicens: *Patrem enim ex charitate progressum ad distinctionem*

Hypostaseon. Cæsarius : charitatem Patris appellat Filium : Alii, voluntatem Patris, ut Faustinus ; Augustinus lib. 9. de Trin. cap. 10. Notitiam cum amore, vel amatam notitiam. Gregorius Nazian. dubitat, an generatio sit ipsa generans voluntas ; & Cyrillus in multis locis, dicit, Verbum esse voluntatem Patris viventem ac subsistentem. Richardus denique Victorinus, ait ibi Petavius num. 13. plenissimè ita sentit, & explicat duas divinas Personas (à prima) voluntate, & quadam omnipotentia, ac charitatis largitate productas ; & , præter alia toto opere de Trinitate exarata, lib. 3. c. 7. repetit, hinc oriri personarum pluralitatem, quod plenitudo bonitatis & charitatis, quæ inest plenitudini divinitatis, exigit ut condignum habeat, ut sit, quem possit & merito debeat ut se ipsum diligere. Si igitur primordiale personam veraciter constat esse summè bonam, nolle omnino non poterit, quod summa charitas exigit : Et si veraciter constat eam omnipotentem esse, quidquid esse voluerit, non poterit non esse. Exigente itaque charitate condignum habere velit, & exhibente potestate habebit quem habere placeat.

VI. Planè in his omnibus Patrum adductis testimoniis mira apparet B. Lulli cum ipsis consensio, cum eisdem omnino rationibus discurret de divina productione ; & licet plures Patres, ut à num. 14. eos citat Petavius, Filium voluntate Patris productum negent, ut quæ naturaliter extiterit ; at, ut ait ipse Petavius, num. 22. « Facile esse dicimus antiquos illos omnes inter se conciliare, qui autem Filium asserunt à Patre naturaliter ac sine voluntate genitum esse, aut non necessariò, sed voluntate. Nam utrique voluntatem illam rejiciunt à generatione Filii, quæ libera sit, & cum deliberatione atque utriuslibet potestate conjuncta, qualem ad producendas creaturas res habuisse Deum intelligimus quomodo possumus. Sed eam admittunt, quæ necessaria sit, neque naturalem oriundi modum excludat. Naturale id voco, non solum, quod naturæ consentaneum est, aut ex naturali principio oritur : ita enim & liberæ hominum electiones naturaliter fieri dicuntur, quia naturâ insitum est homini, ut liberè agat eligatque quod ei placitum fuerit. Verùm hujusmodi hoc appello, quod uni affixum, ac determinatum est, ut integrum non sit amplecti alterum. » Et in subsequenti- bus docet hanc necessitatem, neque ex indigentia esse, neque cum coactione ; neque esse illam, ut ait num. 25. « Quæ adjunctam non habet ejus, quod geritur, notitiam ac voluntatem : ut sunt naturales propagationes ab inanibus rebus, aut inanimatorum simili-
simili

» modo factæ : quales in Deo fuisse negant , qui , cùm essentia sua
 » simplissimus sit intelligendi actus & volendi , hoc ipsum quod gignebat intellexit ac voluit.

VII. D. Thomas 1. p. q. 41. art. 2. *Utrum actus notionales sint voluntarii ?* In Cor. ita scribit : « Respondeo dicendum quodd , cùm
 » dicitur aliquid esse , vel fieri voluntate , dupliciter potest intelligi :
 » uno modo , ut ablativus designet concomitantiam tantum , sicut
 » possum dicere quodd ego sum homo meâ voluntate , quia scilicet
 » volo me esse hominem , & hoc modo potest dici , quodd Pater ,
 » genuit Filium voluntate , sicut & est voluntate Deus , quia vult
 » se esse Deum , & vult se generare Filium. Alio modo sic , quodd
 » ablativus importet habitudinem principii , sicut dicitur quodd Ar-
 » tifex operatur voluntate , quia voluntas est principium operis , &
 » secundum hunc modum dicendum est , quodd Deus Pater non ge-
 » nuit Filium voluntate , sed voluntate produxit creaturam ». Et
 juxta hanc D. Thomæ Doctrinam communiter ejus discipuli , licet
 in generatione Filii negent voluntatem antecedentem , admittunt vo-
 luntatem concomitantem ; D. tamen Bonaventura in 1. dis. 6. q. 2.
 in resolutione ait , quodd voluntas potest dupliciter considerari , aut
 in ratione approbantis & diligentis , aut in ratione producentis : *Et*
hoc modo , aut , dupliciter , aut prout est principium distinctum contra
naturam. . . . aut prout est conjunctum. . . . Alio modo , prout vo-
luntas consideratur , ut principium conjunctum naturæ , potest esse du-
pliciter , quia tunc natura & voluntas sunt principium : aut igitur na-
tura est producens principaliter voluntate communicante , aut è conver-
so ; utrumque enim principaliter esse non potest. Si voluntas est princi-
pium cum communicante natura , sic est processio Spiritûs Sancti , qui
procedit per modum amoris , tamen similis in natura. Si verò natura est
principium cum communicante voluntate , sic est generatio Filii , qui
producitur , ut omnino similis , & per modum naturæ , nihilominus ut
dilectus , & ideo dicitur , quodd in eo sibi complacet Pater. Et 2. Petri 1.
dicitur Filius dilectionis. Ex quo patet , quodd D. Bonaventura tribuit
 voluntati aliquam rationem principii in generatione Filii.

VIII. Petavius quoque loc. cit. num. 20. ita scribit : « Porro cur
 » nostri voluntatem illam , quâ Pater generare vult Filium , con-
 » comitantem vocent equidem non video. Nam quomodo eam ex-
 » plicant , consequens potius videtur , quippè prius est ratione Deum
 » esse , quàm ipsum velle esse se : prius item bonus est , & justus ,
 » & sapiens , quàm se talem esse velit ; prius inquam non natura ,

„ sed ratione, quemadmodum prius est Pater, quàm Filius, neque
 „ eo sensu concomitanter existere cum Patre dicetur Filius, id
 „ enim esset origine, ac ratione esse simul. Multò minùs exempla
 „ de nobis vel Angelis petita congruunt, quæ & ab illis afferri so-
 „ lent. Neque enim concomitante voluntate vult homo esse Socrates,
 „ sed planè consequente; ut & Angeli, qui naturâ saltem prius
 „ sunt, quàm se esse intelligant ac velint. Quod ad Deum verò per-
 „ tinet, etsi naturæ, nedùm temporis, ordo sit nullus, quo prius
 „ esse dicatur Pater Filio, vel prius voluisse gignere, quàm gigne-
 „ ret: nihil tamen prohibet quin prior origine ac ratione sit in Pa-
 „ tre voluntas gignendi Filium, quàm Filius, quemadmodum prior
 „ est *intellectio*, quâ seipsum cognoscit Pater producitque Verbum,
 „ quàm ipsummet Verbum: prius item origine & ratione Pater est
 „ Deus, & Divinitas est in Patre, quàm communicetur Filio. Ita
 „ & voluntas gignendi Filii prius in Patre sit, quàm gignatur Fi-
 „ lius. Siquidem Dei essentia actus est simplex, ut intelligendi, sic
 „ volendi; & quidquid vult, actu vult secundùm essentiam citrà no-
 „ tiones ac proprietates, quæ secundùm essentiam minimè dicun-
 „ tur. Proindè, sicut Deus Pater, quoniam secundùm essentiam ac-
 „ tus est intelligendi & intellectio, totum id quod est. . . . compre-
 „ hendens, idèd prius ratione & se & Verbum cognoscit, quàm sit
 „ ipsum Verbum: ita, cum sit essentiâ suâ. . . . Sive actus volen-
 „ di, totum id amplectens, quod est, & cujus autor est, necesse
 „ est prius origine & ratione velit Filium ejusque productionem,
 „ quàm actu ipso sit Filius. Quocirca antecedente voluntate Pater
 „ vult Filium ejusque productionem, non comitante, solâ-ve, uti
 „ dicunt, complacentiâ, sicut antecedente intellectu seipsum om-
 „ niaque sua intelligit, quoniam utrumque essentia ejus est. Hoc
 „ confirmat Petavius autoritate D. Augustini, & aliorum. Et apud
 „ Suarez lib. 6. de Trin. cap. 3. num. 3. Scotus & Cajetanus dicunt,
 „ Patrem prius ratione velle generare, quàm generet, quamvis illud
 „ velle non sit principium generandi.

§. II.

*Doctrina Lulli in qu. 6. Sentent. notata est omninò conformis relatis
 Patrum documentis.*

IX. Laudatus Cenfor tertiam hanc propositionem notat ex qu. 6.
 Sentent. scilicet: *Pater tribus modis diligit: unus modus est communis*

scilicet tribus Personis ; alius est proprius secundum generationem ; alius proprius secundum spirationem. Primus modus est , &c. Secundus modus consistit in hoc , quod Pater diligit Filium naturaliter generare , quia si non ita esset , ipsum generaret contra suum velle , & tale diligere est proprium Patris.

Censura : Secundo modo intelligit Filium in divinis generari per amorem.

X. At quantum aliena sit Lulli Doctrina ab hujusmodi aliâ-ve Censurâ patet ex ipsomet integro textu. Itaque qu. 6. *Utrum Pater genuerit Filium de necessitate naturæ ?* Ita ad ejus solutionem discurrit „ Lullus : „ Eremita , Deus habet naturam , per quam naturaliter „ intelligit & diligit seipsum , aliàs si non haberet naturam , suum „ intelligere & diligere esset accidentale , & artificiale , quod esset „ malum contra bonum , & parvum contra magnûm , & in tempore „ contra æternum , & sic de similibus , quod est impossibile : Ergo „ Deus de necessitate habet naturam , &c. „. Postea secundum divinas dignitates ita discurrit , ut inferat in Deo debere esse distinctionem , & num. 2. ait : „ Veruntamen adhuc fuit admiratus & „ consideravit de quibus esset , & quæ esset illa distinctio , & sic „ Raymundus invenit , quod Deus in quantum intelligit semetipsum , naturaliter intelligat quod naturaliter possit de se bonificare , „ magnificare , &c. sicut intelligere : & sic producit de se bonificatum , infinitum , æternum , &c. quia ipsum non potest producere „ de alia essentia , cum nulla alia essentia nisi sua sit infinita , & „ æterna , & sic producus permanet imbonificabilis , &c. & innascibilis , & totus se bonificat , magnificat , &c. in producto , „ producendo ipsum de tota sua bonitate , magnitudine , &c.

XI. „ Et tunc Raymundus (subjungit num. 3.) percepit , quod „ in divino intellectu , quem ante consideravit communem , esset „ unus , proprius , intellectivus , personalis , existens ille idem productus , quem prius consideravit , ut ipse sit bonificativus , magnificativus , &c. & sic Raymundus habuit hoc quod desiderabat de „ distinctione , quæ est inter Patrem & Filium de necessitate naturæ , ut probatum est , cujus perplexitas evanuit , & Producentem „ appellavit Patrem , quia de se producebat , cum conveniat quod „ omne producus aliquid de sua essentia & natura de necessitate sit „ Pater , & de hoc experientiam habemus in plantis & in animalibus : & tunc de necessitate apprehendit Deum Patrem , qui intelligendo seipsum , naturaliter concipit & generat Verbum : quod

„ Verbum appellamus Filium, cum Pater & Filius relativè se habeant; & ad cuius Filii generationem naturaliter concurrunt omnes actus rationum Dei, ut Filius naturaliter sit bonus, magnus, sicut est sapiens, & sic de Patre: Unde, cum Raymundus hæc omnia vidit de necessitate rationis, tenuit affirmativam de supra dicta quæstione, ut supradictæ perfectiones sint in Deo, in quo essent in privatione, si negativa hujus quæstionis secundum veritatem esset tenenda.

XII. Ex toto hoc discursu patet assertio Lulli, quæ est resolutio præpositæ quæstionis, scilicet quodd Pater genuit Filium de necessitate naturæ; & quodd Pater naturaliter ipsum producit, & *quodd intelligendo seipsum naturaliter concipit & generat Verbum*, quod est Filius. Hoc probat Lullus ex eo quodd Deus, cum omnes suæ perfectiones sint æquales, debet habere intrinsecè naturale bonificare magnificare, &c. sicut habet intrinsecè naturale intelligere & amare; & quia Deus non potest seipsum bonificare, magnificare, &c. sicut se intelligere & amare, necessariò sequitur, quodd Deus de seipso bonificet bonificatum, & sic in Deo est produciens & productus, scilicet bonificans & bonificatus; & quia produciens de sua essentia & natura producit productum, idè produciens est Pater, & productus est Filius; & Pater est intellectivus, & Filius est ~~ius~~ Verbum, quatenus intelligendo seipsum naturaliter ipsum concipit & generat; & quia Pater est bonus, magnus, &c. & Filius per generationem produciatur etiam bonus, magnus, &c. idè ad Filii generationem naturaliter concurrunt omnes actus perfectionum Dei, quia Pater generando, ipsum bonificat, magnificat, &c. & hoc de necessitate naturæ.

XIII. Contra prædictam resolutionem ejusque rationem sic num. 4. arguit Eremita: „ Raymunde, secundum te sequitur quodd Sanctus Spiritus sit Filius, cum in prædicta generatione Dei ita naturaliter sit amare sicut intelligere; & intellectivus, quem appellas Patrem, est amativus, volens generare Filium, quia si nollet ipsum generare, non generaret: Et quia Sanctus Spiritus est per amorem & est intellectus per Patrem, sic Sanctus Spiritus est genitus sicut Filius; & quia hoc est contra fidem, scilicet quodd Sanctus Spiritus sit Filius, & cum Fides Catholica sit de rebus veris, concluditur quodd tua ratio sit falsa & nulla, & quodd negativa quæstionis sit tenenda.

XIV. At num. 5: „ Respondit Raymundus dicens, quodd amor

» Patris sit infinitus in magnitudine Bonitatis, Æternitatis, Potestatis, &c. Unde sequitur ratione talis Magnitudinis, quodd Pater diligat tribus modis, sine quibus suus amor non esset in prædicta Magnitudine: unus modus est communis, alius est proprius secundum generationem, alius proprius secundum spirationem. *Primus* modus est, sicut Pater, qui communiter se diligit per essentiam & naturam & per suam bonitatem, magnitudinem, &c. & sic de sua unitate, & talem modum communem habent Filius & Spiritus Sanctus, sicut omnes tres habent unam communem essentiam & naturam, & sic de una communi Bonitate, Magnitudine, &c. *Secundus* modus consistit in hoc quod Pater naturaliter diligit generare Filium, quia si non ita esset, generaret ipsum contra suum velle, & tale diligere est proprium Patri ratione cuius propriè & simpliciter diligit generare Filium de se ipso & de toto hoc quod habet, & sic consistit suus appetitus naturalis generandi, in quo sibi naturaliter respondent omnes actus divinarum rationum; sicut Bonitas, quæ requirit naturale bonificare, & magnitudo naturale magnificare, & sic de aliis: unde sequitur quodd prædictus appetitus sit diffusus per omnes rationes, ut sic per ipsum habeant appetitum ad generationem Filii, sicut habent instinctum (ut ita loquar) per intellectum ad eandem generationem, & sic magnitudo sufficit de se ipsa & de bonitate, æternitate &c. ipsius appetitus actu existentis æterni & infiniti. *Tertius* modus, quem Pater habet in diligendo, est per reflexionem amandi, diligendo Filium ratione bonitatis, magnitudinis, &c. Filii & sui ipsius; in quantum est bonus, magnus, &c. per generationem, & in hoc tertio modo participat Filius cum Patre diligendo Patrem & se ipsum cum toto hoc quod habet à Patre, & sic sufficit prædicta magnitudo, & sequitur alia ut sequatur spiratio per amorem, non per naturam, & talis amor est contemplatio & debita ratio, secundum quod in bonis moralibus significatum est per iustitiam, & charitatem; & per talem modum amoris tua ratio vel questio est soluta, alias divina Magnitudo non esset sufficiens divino amoris de se nec de aliis rationibus.

XV. Propter verba Lulli, quibus explicat secundum modum, quo Pater diligit, notavit hic Censor hanc quæstionem; at immerito, quia nullum est Verbum in tota hac solutione, quod iudicet aliam Doctrinam, quam quæ habetur ab omnibus, & præcipuè in relictis Patrum autoritatibus; & quidem *primò* ille primus modus di-

ligendi, quem habet Pater; scilicet communis per essentiam & naturam, ab omnibus admittitur, cum communis essentia Dei sit ipsamet voluntas infinita, ac proinde actus infinitus volendi & diligendi. *Secundò* quòd *Pater naturaliter diligit generare Filium*, est assertio, quam adstruunt omnes relati Patres à num. 1. & per ly *naturaliter* evitatur difficultas, ob quam multi Patres nolebant concedere Filium voluntate genitum, nè deliberationem aliquam in Filii generatione admitterent, & hoc ipsum dicit D. Bonaventura adductus num. 7. ratio autem, quam assignat Lullus, scilicet *quia si non ita esset, generaret ipsum contra suum velle*, est eadem, quâ citati Patres adducti sunt, ad dicendum quòd Pater voluntate genuerit Filium: Neque, quòd *Pater naturaliter diligit generare Filium* opponitur D. Thomæ adducto num. 7. qui admittit voluntate comitante Patrem genuisse Filium, cum in dicta Doctrina Lulli nihil sonet huic voluntati oppositum.

XVI. Haud aliud insinuat per subsequencia verba, quibus dicitur: *& tale diligere est proprium Patri, ratione cuius propriè, & simpliciter diligit generare Filium de seipso, & de toto hoc quod habet*; quia solus Pater diligit generare Filium de toto seipso, ac proinde tale diligere est proprium Patri, ut etiam innuunt Textus Patrum supra relati; ut autem cognoscatur, quòd tale diligere, quo Pater diligit generare Filium, non est cum deliberatione, nedum dicitur, quòd naturaliter diligit, sed etiam quòd in hoc diligere consistit appetitus naturalis generandi: Unde, si benè perpendatur hic Textus, nullam anterioritatem, nec rationis, concedit illi diligere ad generationem, quia nihil huiusmodi explicat; & ad summum posset dici quòd saltem ex hoc Textu videtur deduci, quòd Pater saltem priùs ratione diligit generare Filium, quàm ipsum generet; in hoc autem coincidit cum citatis Patribus, ex quibus Petavius num. 8. deducit hanc rationis prioritatem, quam etiam admittunt Scotus & Cajétanus citati ibidem.

XVII. Præter hunc modum voluntatis, quo Pater diligit generare Filium, alium actum, vel potiùs eundem alio modo explicatum, tacitè admittit Lullus, nempè illum, quo Pater volens volificat, ut ita dicamus, seu producit Filium volentem; quia cum, ut discurrit in verbis adductis num. 10. omnes dignitates concurrant ad generationem Filii, quod etiam repetit in solutione argumenti relata, num. 14. & hic concursus stet in hoc quod Pater bonus, magnus, &c. producat Filium bonum, magnum, &c. & ita Pater bonificet, magnificet,

magnificet, &c. Filium, quatenus illum producit bonum, magnum, &c. cum etiam Pater, qui est volens, producat Filium volentem, sicut Pater, qui est sapiens, producit Filium sapientem; idè ipsa generatio Filii, sicut est bonificatio, magnificatio, &c. Filii, id est productio Filii boni, magni, &c. ita est volificatio (utor hâc voce, ut clariùs intelligatur proportionatus actus) seu productio Filii volentis, & sapientificatio seu productio Filii sapientis; quia eodem modo Pater, producit Filium volentem & sapientem ac producit ipsum bonum, magnum, &c. & sicut in Patre bonitas est ratio cur producat Filium bonum, & magnitudo cur producat illum magnum, &c. ita voluntas in Patre est ratio cur producat Filium volentem, & sapientia est ratio cur producat illum sapientem; & sicut generare Patris est bonificare correspondens bonitati ipsius, & est magnificare correspondens magnitudini ipsius; ita ipsum generare est volificare correspondens ipsius voluntati, & est sapientificare correspondens ipsius sapientiæ.

XVIII. Unde hic actus, qui in generatione correspondet voluntati Patris, seu generatio prout est actus, quo Pater volens generat Filium volentem, est purus actus naturalis productionis, sicut actus correspondens bonitati, quo Pater bonus producit Filium bonum, est purus actus naturalis productionis; & ad hunc actum se habet voluntas ut natura, quâ producens se habet ad producendum sibi similem in natura, & propterea hoc actu Pater volens producit Filium volentem, sicut eodem actu, prout est actus naturalis correspondens bonitati, Pater bonus producit Filium bonum: atque ita non confunditur dictus actus cum actu voluntatis, quo Pater & Filius se mutuo amando spirant Spiritum Sanctum. Dictus autem actus correspondens voluntati, quo Pater volens producit Filium volentem, reverà non debet considerari ut actus distinctus ab illo *diligere*, quo Pater diligit generare Filium, sed ut idem actus diversimodè explicatus; nam, dum dicitur, quòd *Pater naturaliter diligit generare Filium*, non explicatur quòd per diligere illum, producat illum volentem; at quia illud diligere, quo Pater naturaliter diligit generare Filium, non est, ut ita dicam, purè speculativum & inefficax, ideo illud-met diligere est ipsa productio, seu ipse-met actus, quo Pater volens producit Filium volentem, sicut illud intelligere, quo Pater intelligit se esse de toto seipso generativum Filii, est ipsamet productio, quâ Pater generat Filium, & quâ Pater intelligens producit Filium intelligentem.

XIX. Benè consideratâ hujusmodi productione, puto nemini posse esse dubium, quòd in generatione Filii sit hujusmodi actus correspondens voluntati; & solâ difficultas est in modo explicandi illum per aliquod Verbum, ad quod pro nunc utor verbo *volificare*, quod de se significat producere volentem, sicut *sanctificare* (Joan. 10. 17. ut explicuimus tom. 2. cap. 2. à num. 14.) est producere Sanctum, *bonificare*, producere bonum, &c. Non inquam potest esse dubium, quòd detur hic actus correspondens voluntati Patris, quia non est dubium, quòd generatio est actus, quo Pater, qui est volens, producit Filium volentem, sicut est actus, quo Pater Sanctus producit Filium Sanctum, & quo Pater bonus producit Filium bonum; & consequenter, sicut generatio est actus suo modo correspondens reliquis Dei perfectionibus, ita suo modo est correspondens divinæ voluntati & intellectui; quia Pater generans Filium, cum ipsi communicet essentiam, & omnes divinas perfectiones, sicut producit illum ratione Sanctitatis Sanctum, ratione bonitatis bonum, &c. ita ratione voluntatis producit volentem, & ratione sapientiæ illum producit sapientem.

XX. Hunc actum voluntatis in generatione Filii videtur exprimere Apostolus Coloss. 1. 13. dicens: *Qui eripuit nos de potestate tenebrarum, & transtulit in regnum Filii dilectionis suæ, vel charitatis suæ*, ut legit Augustinus; qui lib. 15. de Trinit. cap. 19. postquam ostendit, quòd charitas appropriatur Spiritui Sancto, sicut sapientia Verbo, subjungit, quòd nihilominus Pater etiam est charitas: „Alio-
 „quin, si in illa Trinitate solus Spiritus Sanctus est charitas, pro-
 „fectò & Filius non solius Patris, verum etiam Spiritus Sancti Fi-
 „lius invenitur. Ita enim locis innumerabilibus dicitur & legitur Fi-
 „lius unigenitus Dei Patris, ut tamen & illud verum sit, quòd
 „Apostolus ait de Deo Patre: *Qui eruit nos de potestate tenebrarum,*
 „*& transtulit in regnum Filii charitatis suæ.* Non dixit Filii sui, quod
 „si diceret, verissimè diceret, quemadmodum, quia sæpè dixit,
 „verissimè dixit; sed ait Filii charitatis suæ. Filius ergo est etiam
 „Spiritus Sancti, si non est in illa Trinitate charitas Dei, nisi Spi-
 „ritus Sanctus. Quod, si absurdissimum est, restat ut non solum
 „ibi sit charitas Spiritus Sanctus, sed propter illa, de quibus sa-
 „tis differui, sic vocatur. Quod autem dictum est: *Filii charitatis*
 „*suæ*, nihil aliud intelligatur quàm Filii sui dilecti, quàm Filii pos-
 „tremo substantiæ suæ. Charitas quippè Patris, quæ in natura ejus
 „est ineffabiliter simplici, nihil est aliud quàm ejus ipsa natura atque

„ substantia , ut sæpè jam diximus , ac sæpè iterare non piget ; ac
 „ per hoc Filius charitatis ejus nullus est alius , quàm qui de substan-
 „ tia ejus est genitus.

XXI. In hoc discursu , ex eo Filius Patris dicitur Filius charitatis
 suæ , quia est Filius substantiæ & naturæ suæ , cùm charitas sit ip-
 samet substantia & natura , ac proinde , sicut Pater ratione suæ sub-
 stantiæ producit Filium , ita ratione suæ charitatis ; & sicut ipsa
 productio est actus correspondens naturæ ac substantiæ , ita est
 actus correspondens charitati ; ut amplius patet ex cap. 20. ubi
 sic scribit D. August. „ Quocircà ridenda est dialectica Eunomii ,
 „ à quo Eunomiani hæretici exorti sunt , qui , cùm non potuisset
 „ intelligere , nec credere voluisset , unigenitum Dei Verbum ,
 „ per quod facta sunt omnia , Filium Dei esse naturâ , hoc est de
 „ substantia Patris genitum : non naturæ vel substantiæ suæ sive
 „ essentiæ dixit esse Filium , sed Filium voluntatis Dei : acciden-
 „ tem scilicet Deo volens asserere voluntatem , quâ gigneret
 „ Filium , videlicet ideo quia nos aliquid aliquando volumus , quod
 „ antea non volebamus , quasi non propter ista , mutabilis intelliga-
 „ tur nostra natura , quod absit , ut in Deo esse credamus. Neque
 „ enim ob aliud scriptum : *Multæ cogitationes in corde viri , consilium*
 „ *autem Domini manet in æternum* ; nisi ut intelligamus sive creda-
 „ mus , sicut æternum Deum , ita æternum ejus esse consilium , ac
 „ per hoc immutabile , sicut ipse est. Quod autem de cogitationibus ,
 „ hoc etiam de voluntatibus verissimè dici potest : multæ voluntates
 „ in corde viri , voluntas autem Domini manet in æternum. Qui-
 „ dam , ne Filium consilii vel voluntatis Dei dicerent Unigenitum
 „ Verbum , ipsum consilium seu voluntatem Patris idem Verbum
 „ esse dixerunt. Sed meliùs , quantum existimo , dicitur consilium
 „ de consilio , & voluntas de voluntate ; sicut substantia de substan-
 „ tia , sapientia de sapientia , ne absurditate illâ , quam jam refelli-
 „ mus , Filius dicatur Patrem facere sapientem vel volentem , si non
 „ habet Pater in substantia sua consilium vel voluntatem „. Idem
 S. P. eodem lib. 15. cap. 7. ostendens , qualiter unaquæque Persona
 est memoria , intelligentia , & dilectio , ait de Filio : *Sua enim est*
& ipse memoria , sua intelligentia , sua dilectio ; sed ita se habere , de
Patre illi est , de quo natus est.

XXII. Cùm itaque juxta August. Filius sit voluntas de voluntate ,
 sicut est substantia de substantia , & sapientia de sapientia , profectò
 Pater aliquo actu correspondente voluntati ipsum producit volentem

seu ipsam voluntatem, sicut actu correspondente sapientiæ ipsum producit sapientem seu ipsam sapientiam. Præterea ex dictis cit. cap. 2. tom. 2. juxta multos Patres, Pater generando deificat & substantiat Filium, quia ipsum producit Deum & substantiam: proinde etiam ipsum volificat (vel dicatur alio termino) quatenus ipsum producit volentem. Ad hoc idem tendunt PP. Concilii Tolet. XIV. dum de Deo loquentes dicunt: *Voluntas genuit voluntatem, sicut & sapientia sapientiam*; quod explicantes in Conc. Tolet. XV. dicunt, *Nos autem secundum essentiam diximus; voluntas ex voluntate sicut & sapientia ex sapientia; hoc enim est Deo esse quod velle; hoc velle quod sapere: quod tamen de homine dici non potest, aliud quippe est in homine, id quod est sine velle, & aliud velle etiam sine sapere. In Deo autem non est ita, quia simplex ita natura est, & ideo hoc est illi esse, quod velle, quod sapere.*

XXIII. Hoc idem indicat Magister Sententiarum lib. 1. dist. 6. dicens: *Nec voluntate præcedente vel antecedenti (Deus Pater) genuit Filium, nec prius volens quàm generans genuit Filium, nec prius generans quàm volens genuit Filium; volens tamen genuit, sicut potens genuit, & bonus genuit Filium, & sapiens genuit & hujusmodi.* Si enim Pater sapiens & bonus dicitur genuisse Filium, cur non & volens? Cùm ita sit Deo idem esse volentem quod est esse Deum, sicut idem est esse sapientem quod est esse Deum. Dicamus ergo quia Pater, sicut sapiens, ita volens, genuit Filium, sed non voluntate præcedenti vel antecedenti. Profectò ratio Magistri videtur demonstrativa, quia idem est Deo esse bonus, sapiens, ac volens: unde si Pater bonus genuit bonificando seu producendo Filium bonum, volens genuit volificando, seu producendo ipsum volentem, sicut & sapientem; negat autem voluntatem antecedentem, quia non ex deliberatione genuit; dicit autem quodd volens genuit, quia ipsummet velle seu actus voluntatis producus volentem est ipsa generatio. Etiam Michael de Palacios in hanc Magistri dist. 6. eodem modo fatetur Patrem volendo generare Filium.

XXIV. Itaque ipsa generatio Filii, cùm fit actus, quo Pater Filio communicat totam suam essentiam, naturam, omnesque perfectiones, est actus, quo Pater communicat Filio suam voluntatem, sicut ei communicat suam bonitatem & sapientiam; & quia ipsa generatio est actus producendi, quo Pater producit Filium sub eadem essentia omnibusque perfectionibus, id est quo Pater ef-

sens (*), bonus, magnus, &c. Producit Filium *essentem*, bonum magnum, &c. ideo est actus, quo Pater volens producit Filium volentem; & sicut hæc productio est actus *essentiæ*, bonitatis, magnitudinis, &c. quatenus Pater ratione *essentiæ*, bonitatis, magnitudinis, &c. producit Filium *essentem*, bonum, magnum, &c. ita quatenus Pater ratione voluntatis producit Filium volentem, hæc productio, est actus voluntatis Patris, sive hic actus dicatur *velle*, *diligere*, *amare*, vel *volificare* (id est actus quo Pater volens producit Filium volentem,) & hoc est quod præten- dit Divus Augustinus lib. 15. de Trin. cap. 6. ubi explicans, quomodo in libris antecedentibus inquisierat Trinitatem, dicit, quod dum in lib. 8. mentem extulit ad contemplandam immutabilem summamque naturam, in charitate eluxit Trinitas, & ita scribit: *sed ubi ventum est ad Charitatem, & in Sancta Scriptura Deus dicta est, eluxit paululum Trinitas, id est amans, & quod amatur, & amor*; hic enim per *amantem* intelligit Patrem, per *quod amatur* Filium, & per *amorem* Spiritum Sanctum: unde cum *amatus* sit Filius, & Pater *amans*, & amatus habeat esse ab amante, aliquo actu amandi Pater amans producit Filium amatum.

§. III.

Immeritò dicitur in *relatâ Censurâ super notatum Textum*, Lullum intellexisse, Filium per Amorem generari.

XXV. Laudatus Cenfor deducit hanc Censuram ex illis verbis Textûs adducti, num. 14. ubi dicitur: *Secundus modus consistit in hoc, quod Pater naturaliter diligit generare Filium, quia si non ita esset, generaret ipsum contra suum velle, & tale diligere est proprium Patri*. Hic notandum est, quod in editione, quam vidit ipse Cenfor, dicitur, quod Pater diligit naturaliter generare Filium: quâ lectione ambiguum videtur, an *ly naturaliter* afficiat Verbum generare, an verò Verbum diligere; in editione verò Moguntina dicitur: *quod Pater naturaliter diligit generare Filium, & ly naturaliter determinatè*

(*) *Essens, essentem*. Hæ loquutiones propriæ sunt, ad faciendū breviusque uno verbo, explicandum, quidquid, essentialiter, realiterque est, aut existit: sive sit causa, aut principium essentialiter producens, &c. Sive effectus essentialiter realiterque productus: sicut & *possificare* & *possificatum*; utpotè *possificare* sit virtus Potestatis, & ejus operatio sive actio ut causæ, rem facientis *possibilem*, sive existentem: & *possificatum*, sit effectus jam existens, in sua naturali essentialique potestate operandi. Et similia, &c.

afficit Verbum *diligere*, & quidem conformius ad contextum, ubi hoc diligere explicatur esse appetitus naturalis generandi; & propterea intelligitur illud diligere esse actum naturalem voluntatis, seu esse actum voluntatis ut natura est; ac proinde ex illo non potest deduci, quòd Filius generetur per amorem.

XXVI. Deinde omnes quotquot §. 1. citati sunt, dicunt idipsum quòd Lullus, scilicet quòd Pater diligit generare Filium, immò aliqui apertè innuunt Patrem voluntate antecedenti velle generare Filium, & tamen non sequitur ipsos tenere, Filium generari per amorem: nec dissentit D. Thomas adductus, num. 7. quia dum dicit, quòd Pater voluntate concomitante genuit Filium, intelligit quòd eà voluntate Pater diligit generare Filium, quin tamen dici possit ipsum docere, quòd Filius generetur per amorem. Nec obstat quòd Lullus dicat, quòd *tale diligere est proprium Patri*, quia omnes, illud quaecumque diligere, quòd admittunt in generatione Filii, sive antecedens, sive concomitans, adstruunt esse proprium Patris; quia nulla alia Persona diligit, vel potest diligere generare Filium, nisi solus Pater; ac proinde hoc quaecumque diligere generare Filium, quòd omnes admittunt in generatione, sive antecedens, sive concomitans, sive subsequens, est proprium Patri, quin tamen per hoc eis possit attribui, quòd intelligunt Filium generari per amorem.

XXVII. Amplius fit evidens hunc non esse Lulli sensum ex contextu ejusdem Paragraphi; nam immediatè post verba notata subdit Lullus: *Et sic consistit suus appetitus naturalis generandi*: Unde, sicut in quolibet generante consideratur appetitus naturalis generandi, ita in divino Patre; & quia illud *naturaliter diligere generare Filium* est suus appetitus naturalis generandi, non potest dici, quòd per amorem generet; sicut etiam patet ex consequentibus, ubi dicitur, quòd sub hoc appetitu, bonitas *requirit naturale bonificare*; id est naturale producere boni, & *magnitudo naturale magnificare*, &c. quæ omnia purum appetitum naturalem designant, non amorem. Deinde in eodem paragrapho contra-distinguitur processio Spiritus Sancti, quæ est per amorem, à processione Filii; quia Spiritus Sanctus procedit, non per quaecumque diligere, sed per illud, *quòd est per reflexionem amandi*; hoc autem modo non procedit Filius: dicitur etiam quòd spiratio est *per amorem, non per naturam*; toto autem Textu adstruitur Filii generatio *per naturam*, & quòd ratione hujusmodi amoris distinguitur una productio ab alia; & quia pro-

duci per amorem, ex Theologorum sensu, intelligitur de amore, per quem procedere est proprium Spiritui Sancto, numquam concipi potest ex verbis Lulli, ipsum intelligere *Filium in divinis generari per amorem*.

XXVIII. Hoc apertè constat esse de mente Lulli in eodem libro Sententiarum, in quo sæpè explicat proprium procedendi modum Filii contra distinctum esse à proprio procedendi modo Spiritus Sancti; nam in qu. 4. ubi quærit *utrum ratio differentiae divinarum attributorum sit in Deo, vel in intellectu creato*. Clarè explicat qualiter omnes divinæ perfectiones se habeant ad productionem in Deo, ita ut omnes sint ratio producendi, & communicentur Personæ productæ, & quod tamen realiter non distinguantur, sic num. 3. ait: „ sicut „ Pater, qui ratione sapientiæ naturaliter concipit Verbum, & ad „ hoc concurrunt omnes aliæ rationes (perfectiones) essentiæ, cum „ Filius sit ita bonus per bonitatem, magnus per magnitudinem, „ sicut sapiens per sapientiam; & hoc idem est de Sancto Spiritu „ secundum, *processum amoris* „. Ex hoc autem patet, quòd productio Filii est, quatenus Pater ratione sapientiæ naturaliter concipit Verbum; productio verò Spiritus Sancti est per *processum amoris*, seu quia procedit per amorem: ita quòd utraque productio est actus omnium divinarum dignitatum, quia omnes sunt ratio producendi in utraque, & omnes æqualiter communicantur; cum hac tamen differentia, quòd ad generationem Filii omnes concurrunt sub ratione sapientiæ, quatenus Pater *naturaliter concipit Verbum*; ad spirationem verò Spiritus Sancti omnes concurrunt secundum *processum amoris*.

XXIX. Hæc distinctio utriusque processionis clariùs ibi elucescit ex objectione Eremitæ, ejusque solutione; nam num. 4. sic objicit Eremita: „ Raymunde, tu implicas contradictionem, in quantum „ dicis, quòd in rationibus Dei non fit realis distinctio, & dicis quòd „ Filius naturaliter sit genitus per sapientiam, & Sanctus Spiritus non, „ sed quòd sit *spiratus per amorem*; & quia est distinctio inter generationem & spirationem, & generatio est per sapientiam, & spiratio „ per amorem, de necessitate sequitur, quòd sit differentia inter sapientiam, & voluntatem, & per consequens inter alias rationes, „ quæ cum ipsis sunt idem in essentiæ, & natura; & quia talis contradictio non potest stare, tua ratio est inanis & nulla „. At num. 5. ita solvitur hæc objectio: „ Respondit Raymundus: in divinis „ primus motivus (ut ita loquar) incipit per naturam agendi, Deo

„ considerante cum intellectu suam potestatem , suam bonitatem ,
 „ suam magnitudinem , &c. & sic divino intellectu repræsentante
 „ Deo suas rationes & perfectiones , Deus intelligit se Patrem , pro-
 „ sequens illam repræsentationem , & est occasionatus ab omnibus
 „ suis rationibus , quod suus intellectus illi repræsentet & excitet
 „ naturam (ut ita loquar) ut natura & suæ rationes in se non sint
 „ otiosæ , sed ut prosequantur finem , in quo fine intellectus habet
 „ suum officium , scilicet intelligere , & voluntas suum , scilicet di-
 „ ligere , & quælibet est realis ratio quoad agere (hoc est quælibet
 „ in Deo est realis ratio agendi) & remanent idem numero per es-
 „ sentiam & naturam , & distinctio officiorum est per distinctionem
 „ generationis & spirationis , cum generatio sit per *influxum intellec-*
 „ *tus* , & non per refluxum ; spiratio autem per *influxum* , & *re-*
 „ *fluxum amoris* , & ad hoc communiter concurrunt omnes digni-
 „ tates , ut possit esse distinctio inter generationem , & spirationem
 „ sicut æternitas , quæ essentialiter & naturaliter conservat identita-
 „ tem numeri intellectus & voluntatis , & infinita potestas ponit dis-
 „ tinctionem inter officium intellectus & voluntatis sustentatum in
 „ Divinis Personis ; quæ distinctio est bona & magna , &c. quia cum
 „ illa distinctione rationes Dei sunt entia realia , & habent suos ac-
 „ tus in agendo intrinsecè , & sic de divina natura : Unde , cum
 „ hoc ita sit ; non sequitur quod in Deo sit contradictio , cum in
 „ ipso non sit distinctio secundum suam essentialem existentiam , sed
 „ secundum suam agentiam intrinsecam Personarum „ Eadem do-
 cet qu. 7. n. 1. q. 12. num. 3. & tota q. 13.

XXX. Eodem titulo utramque processionem distinguit Lullus ubi-
 que de eisdem agit ; fastidio tamen parcens , aliqua solum adducam :
 Itaque in disput. Fidei , & intellectus (tom. 4.) part. 2. num. 7.
 ad objectionem , quod Sanctus Spiritus etiam debet esse Filius , res-
 pondet ; *Non valet , quia Sanctus Spiritus est natura per essentiam amo-*
ris , & est spiratus à Patre & Filio per amorem. In lib. Proverbiorum
 (tom. 6.) part. 1. cap. 6. de Patre num. 1. ait : *Quia Deus intelli-*
git quod possit tantum de se ipso , quantus ipse est , ideo Deus Pater est
Pater sui Filii. cap. 8. num. 3. *Ita convenit quod sequatur Persona per*
amare , sicut per generare ; & num. 18. Quia Pater & Filius per amo-
rem se habent ad unum finem , ille finis est Sanctus Spiritus. Cap. 33.
 num. 13. *Pater in quantum intelligit se Patrem , producit Filium , &*
Filius in quantum se intelligit Filium , non producit Personam ; num.
13. Si Pater intelligendo se Patrem , produceret Sanctum Spiritum , Sanc-
tus

tus Spiritus esset Filius Patris ; num. 16. Si Filius intelligendo Patrem produceret Sanctum Spiritum , esset Pater Sancti Spiritus ; & num. 17. Quia Pater & Filius se contemplantur per amorem , & non per paternitatem , nec per filiationem , produciunt Sanctum Spiritum qui non est Pater nec Filius. Videatur etiam Lullus in Arb. Scient. in Arbor. Divinali , titulo de generatione & spiratione per totum .

XXXI. Planè , nedùm distinguit Lullus generationem à Spiratione , sed eo etiam titulo , quòd generatio est per intellectum , per sapientiam , per intelligere , per concipere Verbum , &c. spiratio autem est per reflexionem amoris , per amorem , per mutuum habitudinem Patris , & Filii in amore , &c. ex quibus omnibus , cùm constet juxtà ejus mentem esse proprium Spiritui Sancto procedere per amorem , sicut est proprium Filio procedere per intelligentiam , idèd nunquam potest ipsi attribui quòd intelligat *Filium generari per amorem* ex eo quod dicat , quòd *Pater naturaliter diligit generare Filium* , & quòd *talè diligere est proprium Patri* ; tum quia juxtà ipsum Pater non diligit generare Filium per amorem sed per intelligentiam ; tum etiam quia productio per amorem , saltem ex communi Theologorum sensu , significat modum proprium processionis Spiritus sancti , qui semper à Lullo ponitur distinctus à modo processionis Filii ; tum etiam , quia illud non significant hæc verba : *Pater naturaliter diligit generare Filium* ; tum quoque quia licèt dilectio , quâ Pater diligit generare Filium , concurrat ad Filii generationem juxtà omnes , & sit Actus quo Pater volens producit Filium volentem , illa dilectio vel actus non concurrat nisi ut actus naturalis producendi similem in natura , & sub intellectu tamquam principio *quo* proximo , non autem concurrat per modum amoris , & quatenus est principium *quo* , vel proprius actus notionalis , quo producitur Spiritus Sanctus , qualis amor significatur , dum absolutè dicitur productio *per amorem*.



D I S S E R T A T I O IV.

De propositionibus 4. 5. & 6. notatis in quæst. 7. 11. & 13.
ejusdem Libri Sententiarum.

§. I.

In propositione 4. ex quæst. 7. Lullus unicè docet, quòd potentia, seu potestas divina, est potentia generandi, & potentia spirandi; & ita eadem potentia, quæ aliunde est potentia generandi, quatenus est potentia spirandi, est una communis potentia spirativa.

I. **T**EXTUS notatus ad quartam propositionem laudati Cenforis est iste: *Potentia generandi in divinis absolutè se habet, in quantum constituit unam communem proprietatem spirativam inter Patrem & Filium. Quæst. 7. Sentent. num. 4.*

Censura: *Proprietas communis Patri & Filio spirativa videtur appellari potentia generandi.*

II. In hac quæstione 7. inquit Lullus: *Utrum potentia generandi in divinis dicat quid, vel ad aliquid?* Et licet in terminis sit eadem, ac illa, quam proponunt Doctores super Magistrum, longè tamen alio sensu eam tractat Lullus, ac Scholastici; nam isti per dictam quæstionem inquirunt, an potentia, virtus, vel principium quo generandi consistat in absoluto, nempe in divina essentia, vel in relatione Paternitatis, vel in utroque, secundum varias sententias; at Lullus per dictam quæstionem inquit, an potestas divina tantum sit potestas generandi, vel an præter generare se habeat ad aliquid aliud? Et resolvit quòd etiam se habet ad aliquid aliud, nempe ad spirare; & propterea ibi num. 1. dicit; “ Si Potentia diceret *quid*,
” esset absoluta simpliciter per generationem (id est, posità generatione, non esset potestas ad aliud) & non haberet se *ad aliquid*
” quoad Filium: & hoc idè quia Filius se non posset bonificare,
” nec magnificare in diligendo Patrem, & sic Filio deficeret magnitudo bonitatis, æternitatis, potestatis, &c. in hoc, quod non
” haberet proprium actum agendi in diligendo Patrem & seipsum,
” nec suam bonitatem, magnitudinem; &c. & sic in Filio omnes

» divinæ dignitates amitterent suos actus , & essent otiosæ , in quan-
 » tùm Filius non ageret cum ipsis ; quod est impossibile , cùm con-
 » veniat , quòd Filius sit ita bonus , magnus , &c. in agendo de bo-
 » nitate , magnitudine , &c. sicut Pater , ut illi non deficiat infinita
 » magnitudo bonitatis.

III. Ex hac doctrina deducit , quòd Filius simul cum Patre ,
 amando se invicem , spirat Spiritum-Sanctum , & ita subjungit : « Et
 » convenit , quòd ista tertia Persona sit in divinis inter Patrem &
 » Filium de necessitate , ut ipsorum amor non sit accidens , sed
 » substantia nec Filius otiosus , nec Pater injustus ergà Filium , nec
 » è conversò : ergo sequitur quòd ita *benè & perfectè conveniat divinæ*
 » *potestati , quòd se habeat ad spirationem* , sicut se habet ad generatio-
 » nem , & sic , Eremita. Respondeo ad quæstionem , quòd potentia gene-
 » randi dicat *ad aliquid* , & non *quid* ». Ex his verbis apparet sensus
 Lulli in hac quæstione , videlicet quòd agit de potestate Dei , quæ
 est potestas generandi & spirandi ; & quia hæc potestas non purè se
 habet ad generare , hoc est , non tantùm est potestas generandi , sed
 etiam spirandi , idèd hæc potestas , quæ est potentia generandi ,
 dicit *ad aliquid* , quia se habet ad spirandum , & non *quid* , quia
 non purè & unicè se habet ad generare.

IV. Objectio Eremitæ sic num. 2. proponitur : « Quidquid est in
 » Deo , vel est proprium , vel còmmune : proprium , sicut *Paterni-*
 » *tas* , *Filiatio* , & *passiva Spiratio* ; commune , sicut *Essentia* , *Na-*
 » *nura* , *Bonitas* , *Magnitudo* , *Æternitas* , *Potestas* , &c. ; & quia tu
 » dicis , quòd potentia generandi non dicat *quid* , sed *ad aliquid* ,
 » implicas contradictionem ; scilicèt , quòd potentia generandi , quæ
 » est absoluta , cum sit infinita , sicut divina bonitas , magnitudo , &c.
 » est absoluta , se habeat absolutè ad generationem , sicut divinus in-
 » tellectus , qui est idem cum ipsa : sed in quantum dicis quòd se
 » habeat ad spirationem , sicut ad generationem , dicis quòd non sit
 » absoluta , cum sit unus respectus in potestate generandi , & alius
 » in potestate spirandi , cùm sit distinctio inter generare , & spirare ;
 » & quia contradictio non potest stare , tua ratio nihil valet ». Er-
 num. 3. Ita Lullus respondet : « Eremita , concedo tibi , quòd *quid*
 » quid est in Deo , sit proprium , vel commune ; tamen distinguen-
 » dum est inter proprium & proprium , & commune & commune :
 » inter proprium & proprium , sicut inter Paternitatem & Fila-
 » tionem , & spirativam proprietatem , quæ est propria Patri & Fi-
 » lio ; inter commune & commune , sicut inter proprietatem spira-

Textus
prop. 4.

„tivam, quæ est communis Patri & Filio, & essentiam, bonitatem,
„magnitudinem, &c., quæ est communis omnibus tribus Personis.”

V. Immediate autem subjungit: “Undè, cùm hoc ita sit, poten-
„tia generandi se habet absolute, in quantum constituit unam com-
„munem proprietatem spirativam inter Patrem & Filium; & pro-
„priè, in quantum communis illa spiratio convenit soli Patri &
„Filio; & in hoc stat potentia communis & respectiva in prædicta
„generatione, in quantum per unum modum potentia est proprie-
„tas paternalis, & per alium filialis, & ipsa remanet una commu-
„nis indivisa, cùm Pater sit ipsa, & generando Filium de toto se-
„ipso, est Filius genitus de tota potentia, & idem sequitur suo
„modo de passiva spiratione, quam appellamus Sanctum Spiritum,
„qui est de Patre & Filio: ad quam potentiam se habet ita propriè,
„& communiter secundum modum passivæ spirationis, sicut se ha-
„bet ad activam spirationem suo modo: ergo potentia est in beatif-
„sima Trinitate secundum *quid* & secundum *ad aliquid*, ut proba-
„tum est.”

VI. Ex hoc toto integro textu patet, Lullum loqui de potentia
sive potestate Dei, quæ est unum ex communibus Dei attributis,
& secundum diversos modos fortitur varias appropriationes; & sic
eadem potestas est potestas generandi, & potestas spirandi, & quia
nedum est potentia generandi, sed etiam spirandi, ideo præter hoc
quod est potentia generandi, dicit *ad aliquid*, quia etiam est potestas
spirandi, & se habet ad spirare; & quia hæc potestas spirandi, seu
potentia spirativa, est communis Patri & Filio, & est ipsis propria,
ideo dicit Lullus in textu notato, & diffusè adducto num. 5. quod
potentia generandi, non quidem reduplicativè *quâ* generandi, sed
specificativè, id est potentia, quæ aliundè est potentia generandi,
*se habet absolute, in quantum constituit unam communem proprietatem
spirativam inter Patrem & Filium*; quia ratione divinæ Potestatis est,
in Patre & Filio una communis virtus spirativa, quæ sicut est ipsis
communis, ita est eisdem propria; & sic eadem, quatenus communis
ambobus se habet absolute, & quatenus per ipsam se habet ad spi-
rare est respectiva, seu se habet *ad aliquid*. Hoc videtur simile com-
muni sententiæ, quâ dicitur, quod potentia generandi est eadem ac
potentia creandi, ita tamen quod potentia quâ generandi est propria
Patri; quâ creandi est communis tribus Personis: & ita eadem po-
tentia generandi, non reduplicativè, sed specificativè sumpta,
constituit vel est una communis potentia creandi.

VII. Deinde juxta prædicta potest in alio sensu intelligi prædicta notata Lulli propositio; cum enim prætendat Lullus in hac quæstione, potentiam divinam non esse absolutam per generationem, sed etiam se habere ad spirationem, quæ spiratio non est nisi præsupposita generatione, potest dici, quod *potentia generandi*, quâ prius origine sunt Pater & Filius, Patre scilicet generante & Filio genito, constituit, non quidem formaliter & intrinsecè, sed tantum originativè, & per resultantiam, *unam communem proprietatem spirativam inter Patrem & Filium*; quia hæc communis virtus spirativa in Patre & Filio, resultat ex generatione, quatenus Pater per generationem dat Filio virtutem spirativam, & spirare Spiritum Sanctum necessariò præsupponit generationem: atque ita potentia generandi, quâ Pater gignit, & Filius gignitur, suo modo statuit & ponit, atque ita constituit in Patre & Filio unam communem proprietatem spirativam; & quia potentia generandi ad hanc spirationem quodammodo ordinatur, & ad ipsam necessariò consequitur ipsa communis virtus spirativa, propter hoc dicitur esse *ad aliquid*, & ipsam communem proprietatem spirativam constituere, hoc est, statuere in ambabus Personis, nam in Phrasi Lulli *constituere* non semper indicat constitutionem intrinsecam, sed etiam efficere, & activè influere, ut aliquid sit constitutum, ut infrà explicabimus dissert. 6. ad prop. 12.

VIII. Hoc videtur exprimere Manuel Calecas Græcus, disputans contra suam Nationem pro processione Spiritûs Sancti à Filio, apud Petavium Theolog. Dogm. Lib. 7. de Trinit. cap. 11, num. 11, ubi ait: *Unde, quia secundum id quod gignit, Patris Persona subsistit, per hoc ipsum quod gignit, emissor erit etiam Pater; ex quo jure dictus est emissor per verbum*; subjungit autem hæc Petavius: “ In quibus
 „ observandum hoc maximè est quod ait; Patrem per generationem,
 „ quam *generandi operationem* appellat, primò consistere, ac subsistere:
 „ tum per hanc primigeniam operationem cæteras producere, inprimisque *emissionem vel spirationem*. Quod non sic intelligendum est,
 „ ut ipsamet actio generandi per se ac *formaliter*, ut aiunt, sit spiratio, aut illius terminus, qua generatio est, sit Spiritus Sanctus;
 „ sed quod *prima forma vel actus Patris*, hypostasim cum essentia componens, est generatio sive relatio, ac Paternitas, quæ Personam ac substantiam Patris constituit, efficitque ut sit hic Deus.... sic
 „ in admirabili, & Sacro-Sancta Divinitate, quia Personæ primæ forma constituens est generatio, sive Paternitas, per quam illa
 „ subsistit, & est genitor, aut Pater; ab ea deinceps, & per eam

„ procedere dicitur , quidquid consequenter agit , quod etsi *forma*
 „ *vel notione* distinguitur ; ab illa tamen primaria , ceu radice pullu-
 „ lat & oritur ; quatenus ab illa , quæ per eam subsistit , persona
 „ proximè immediatèque producit. »

IX. Postea idem Petavius num. 12. hæc adjicit : « Itaque nemo
 „ dixerit , Patrem per spirationem generare Filium , aut genera-
 „ tionem ab spiratione proficisci : quemadmodum per generationem
 „ spirare , hoc est spirationem , proferre dicitur Pater , ut docet
 „ Calecas , quia spiratio neque propria est & formalis processio
 „ Filii , neque personam Patris constituit , à qua , ut hæc Persona
 „ est , Filius existit. At generatio , etsi non est propria Spiritus
 „ Sancti , & formalis productio , forma tamen est Personam Patris
 „ constituens , à qua jam per illam completa formataque communis
 „ cum Filio spirandi manat actio , ejusque terminus Spiritus Sanctus.
 „ At , cum , ut ante disputavimus , tam *mediate* quàm *immediate* Spi-
 „ ritus Sanctus à Patre procedat , utrobique generatio , sive Pater-
 „ nitas , ad illius productionem conferre , ex superioribus intelli-
 „ tur : Etenim *mediate* Pater Spiritum edit , quatenus Filius , qui
 „ ab illo substantiam , & spirationem accepit , communiter cum eo
 „ Spiritum producit ; hoc verò modo per generationem spirat Pater ,
 „ quia per Filium id facit , cui generatio nativitatem dedit. Imme-
 „ diata verò productio , quæ fit eoquod Pater ex se , & per suam
 „ Personam productionem attingit Spiritus Sancti , per genera-
 „ tionem nihilominus existit , ut paulo ante declaratum est ; quoniam
 „ per illam , ut formam , Patris persona subsistit. » Planè videtur
 in his quæ exponit Petavius , eundem contineri sensum , quem de-
 notata Lulli propositione explicuimus.

§. I I.

*Lullus in quinta Propositione ex qu. 11. sentit , Deum non esse in
 genere reali , sed tantum in genere purè intentionali , substantiæ ;
 quæ ratio substantiæ sic concepta , non est Deus.*

X. In quinta Propositione sic exponitur textus notatus : *Deus non
 est in genere quoad suam substantiam , quæ non est genus , sed est in
 genere , quoad substantiam , quæ est genus , quæ quidem substantia
 Deus non est , qu. 11. Sentent.*

XI. Cum hujus textus non inveniam censuram à laudato Censore

prolatam, sed tantum illum notasse, non video, quid erroris Theologici in ipso obfecerit; nam, Deum non esse in genere dicunt plurimi Patres, ut notat Petavius Theolog. Dogm. tom. 1. lib. 2. de Deo, cap. 5. at D. Damascenus Deum asserit contineri sub genere. D. Thomas par. 1. qu. 3. art. 5. negat Deum esse in genere; aliqui tamen Scotistæ, genus, & differentiam aliquo modo in Deo agnoscunt, eique distinctionem formalem attribuunt: unde five quoad primam partem, quâ negatur Deum esse in genere quoad suam substantiam, five in secunda, quâ dicitur esse in genere, five dum dicitur quoddam substantia, quæ est genus, Deus non est; nullum est erroris vestigium: quare solum videtur hic textus notari, propter contradictionem, quæ in ipso, sic à contextu avulso, apparet, quæ tamen in contextu nulla est, cum distinguatur substantia, quæ Deus est realiter, à substantia, quam intellectus ex sua imbecillitate concipit, ubi communem Deo & Creaturæ tanquam genus, & sub ipsa Deum concipit, quin Deus sit illa substantia concepta ut genus.

XII. Itaque Lullus qu. 11. Sentent. inquit: *utrum Deus sit in genere?* Et ad ejus solutionem num. 1. dicit differentiam, quæ est inter Deum & Creaturam, non esse aliquid realiter commune Deo & creaturæ, sed in Deo esse distinctionem realem, & in creatura esse quoque distinctionem realem, & quia in unoquoque extremo est realis differentia, quæ dicitur communis, quia realiter est in utroque sua differentia: concipit intellectus, unam ideam, similitudinem, vel speciem differentiæ, & sub ipsa, tanquam generali differentia, concipit esse Deum. Simili modo, cum Deus sit sua substantia, & creatura sit substantia, concipit intellectus unam speciem, ideam, & similitudinem substantiæ, sub qua Deum apprehendit, & immediate subjungit: „Sed sicut „differentia (id est distinctio) divinarum Personarum est differens „ab illa, quæ est creata per se, & è converso, sicut ignis, qui per „suam caliditatem est contra aquam, & sicut aqua quæ per suam „frigiditatem est contra ignem; sic Deus, per hoc quod est sub- „stantia, est differens ab illa substantia, in qua intellectus ponit „Deum, in quantum dicit vel intelligit, quoddam Deus sit substantia „(illa videlicet, quam uti genus apprehendit) & sic sunt duæ sub- „stantiæ, una est illa, quæ est Deus, alia est illa, quæ est genus: „unde, cum hoc ita sit per prædicta est declarata solutio questionis, „scilicet quoddam Deus non sit in genere quoad suam substantiam, quæ non „est genus, sed sit in genere quoad substantiam (illam scilicet quæ est „species, & similitudo in anima) quæ est genus, quæ substantia non

» *est Deus, cum omne genus sit supra aliud, vel sub alio*; sicut genus,
 » quod est supra species, & sicut substantia creata, quæ est sub ac-
 » cidentibus; & sic per unum modum negativa quæstionis est tenen-
 » da, & per alium, non.

XIII. Ex hoc textu apparet, quòd quia substantia Dei est per se primò distincta à substantia creata, substantia in Deo non est in genere realiter; & etiam quia genus est supra aliud, ut supra species, vel sub alio, ut est substantia creata sub accidentibus: quæ omnia repugnant substantiæ divinæ; & quia illa substantia generica, quam concipit intellectus ut genus, concipitur ut existens supra species, & distinguibilis per differentias; quæ omnia repugnant reali substantiæ Dei: ideò illa substantia generica non est Deus. Atque ita sensus Lulli est, quòd Deus non est in genere reali substantiæ quoad suam substantiam, quia ratio generis suæ substantiæ repugnat; est autem in genere intentionali substantiæ, quod concipit intellectus, & hæc intentionalis substantia, quæ concipitur ut genus, non est Deus; quia, dum concipitur ut genus, concipitur sub modis, & proprietatibus Deo repugnantibus.

XIV. Hæc ampliùs patent ex solutione argumentorum: nam n. 2. objicit Eremita: « Omne illud, quod non est substantia nec accidens, nihil est, & sic secundum te, Deus non est aliquid. Prætereà, si Deus non est in genere, non est in illa generali differentia, quam tu dicis, cum differentia sit genus, & sit posita in veritate secundum te, sicut creatio: unde sequitur, quòd Deus non differat à creatura, postquam non in genere differentiæ; quod est impossibile. Item, si Deus non est in genere, non est in relatione, nec de genere actionis, & passionis, nec in isto nunc, in quo sumus, nec in isto loco, vel in alio, & sic de similibus: unde, remotà relatione à Deo, non esset in Deo distinctio Personarum, & idem de remotione actionis & passionis, ratione cuius in Deo non esset generatio, & spiratio; & sic de nunc, & ubi, sine quibus Deus nobis non posset esse præsens, nec sua essentia posset nobiscum esse in eodem loco.

XV. Respondet Lullus num. 3. sic: « Ad hoc quod dicis, quòd omne, quod non est substantia nec accidens, non fit aliquid, verum dicis, sed propter hoc non sequitur, quòd Deus non fit aliquid, licet non sit ista substantia, quæ est genus (scilicet intentionale) & hoc, quia Deus est alia substantia, quàm genus, existens extrà genus, & non existens sub aliquo accidente; & Deus est

„ est substantia in hoc quod est per se existens : & sicut ipse , qui
 „ per suam coessentialem substantiam , quæ est eadem cum sua co-
 „ essentiali differentia , differt à substantia creata , sic cum sua co-
 „ essentiali relatione , productione , infinitate , æternitate , differt
 „ à creata relatione , actione & passione , loco , & tempore ; sed
 „ intellectus conjunctus ponit Deum in genere , ut per aliqua me-
 „ dia possit contemplari & attingere veritates , quas Deus habet in
 „ se , dicens quodd Deus sit in genere substantiæ , cum substantia sit
 „ per se stans , & dicit quodd sit in genere relationis , ut in ipso pos-
 „ sit attingere pluralitatem Personarum , & dicit quodd sit in genere
 „ actionis & passionis , ut in Deo intelligat suam operationem &
 „ productionem intrinsecam , & sic per consequens de tempore &
 „ loco , ut intelligat quodd Deus sit in isto instanti , in quo sumus ,
 „ per præsentiam , & extrà per æternitatem , & sic in loco , in quo
 „ sumus , per essentiam , & extrà locum per infinitatem .

XVI. Patet itaque sensum Lulli esse , Deum realiter non esse in
 illo genere substantiæ , nec aliorum prædicamentorum , quod in in-
 tentione vel specie intelligibili effingit intellectus , tanquam quid
 commune Deo & creaturæ ; & quia realis substantia Dei non for-
 titur illas condiciones , quæ apprehenduntur in illa substantia , quæ
 concipitur ut genus , idè substantia Dei non est illa substantia , quæ
 secundum intentionem vel speciem intellectus est genus : atque ita
 Deus non est in genere reali , sed in genere purè intentionali , quod
 sibi format intellectus , conjunctus ex sua imbecillitate , ut per aliqua
 media possit Dei veritates attingere ; idipsum videtur dicere D. An-
 selm. in Monolog. cap. 26. dicens : “ Sed si ratum est , quod de hu-
 „ jus naturæ simplicitate perspectum est : quomodo substantia est ?
 „ Nam , cum omnis substantia admixtionis differentiarum , vel mu-
 „ tationis accidentium sit susceptibilis hujus immutabilis sinceritas
 „ omnimodæ admixtionis , sive mutationis , est inaccessibilis : quo-
 „ modo ergo obtinebitur , eam esse quamlibet substantiam , nisi di-
 „ catur substantia pro essentia , & sic sit extrà , sicut est supra , om-
 „ nem substantiam ? Nam quantum illud esse , quod per se est quid-
 „ quid est , & de nihilo facit omne aliud esse , diversum est ab eo
 „ esse , quod per aliud fit de nihilo quidquid est : tantum omninò
 „ distat summa substantia ab his , quæ non sunt idem quod ipsa . Cum-
 „ que ipsa sola omnium naturarum habeat à se , sine alterius naturæ
 „ auxilio , esse quidquid est : quomodo non est singulariter absque
 „ suæ creaturæ consortio , quidquid ipsa est ? Unde , si quando illi

» est cum aliis, nominis alicujus communio : valde proculdubio in-
 » telligenda est diversa significatio »: Et cap. 27. » Constat igitur,
 » quia illa substantia nullo communi tractatu substantiarum in-
 » cluditur, à cujus essentiali communione omnis natura excluditur.

§. III.

*Lullus in propositione 6. ex quæst. 13. unicè docet, distinctionem inter
 Filium & Sanctum Spiritum esse aded perfectè bonam, æternam,
 &c. sicut est distinctio inter Patrem & Filium; non autem quòd in
 ipsis sit distincta bonitas, æternitas, &c.*

XVII. Textus in 6. prop. notatus ita se habet : *Inter Filium &
 Spiritum Sanctum distinctio esse non potest, nisi inter ipsos esset perfectà,
 & in ita magna bonitate, æternitate, & potestate, sicut est inter Patrem
 & Filium, & inter Patrem & Spiritum Sanctum, inter quos est proprietas
 distinctiva & constitutiva in subjecto personali. Quæst. 13. sentent.*

*Censura : Videtur dicere, esse distinctionem inter Filium & Spiritum
 Sanctum in bonitate, æternitate, & potestate.*

XVIII. Ob relatum textum attribuitur Lullo in hac Censura,
 sensisse in Filio & Spiritu Sancto esse distinctam bonitatem, potes-
 tatem, &c. quia dicitur distinctio esse in bonitate, æternitate, &
 potestate. Ante omnia tamen notandum est, aded repetere Lullum in
 suis Libris, in omnibus tribus Personis eandem esse essentiam, bonita-
 tem, potestatem, & sic de omnibus perfectionibus, quòd plures
 magni possent tomi confici ex hujusmodi autoritatibus; quia tamen
 ad intentum sufficit hoc ostendere ex hoc eodem Libro Sententiarum,
 & ibi passim habetur hæc doctrina, solùm adverto, quòd quæst. 4.
 num. 3. ait de divinis perfectionibus : *& relucet per distinctionem
 divinarum Personarum, cum qua ita sunt idem numero sicut cum essen-
 tia & natura, & quælibet ipsarum cum alia. Qu. 6. num. 2 & 3. asserit,
 quòd in Deo produciens produciunt productum de tota sua bonitate, magni-
 tudine, &c. & num. 5. sicut omnes tres (Personæ) habent unam com-
 munem essentiam & naturam, & sic de una communi bonitate, magni-
 tudine, &c. qu. 7. num. 3. Distinguendum est. . . . inter commune,
 & commune, sicut inter proprietatem spirativam, quæ est communis
 Patri & Filio, & essentiam, bonitatem, magnitudinem, &c. quæ est
 communis omnibus tribus Personis. Qu. 14. num. 5. Pater & Filius
 sunt ita uniformiter idem numero per spirativitatem, sicut sunt uniformiter*

idem numero per essentiam, naturam, bonitatem, &c. Et suprà dixerat, Patrem & Filium de hac eadem essentia spirare Sanctum Spiritum.

XIX. Præterea, q. 15. num. 1. docet, quodd producens in Deo producat bonum, magnum, infinitum, de infinita bonitate, & magnitudine: quod repetit in aliis numeris. Qu. 20. num. 3. ait: *Item in humana specie sunt plures homines, quàm tres, & differunt per essentiam & naturam, per ubi, per tempus, & sic de aliis, & sic de cæteris entibus creatis; sed de numero Dei non est sic, quia Pater, Filius & Spiritus Sanctus faciunt numerum, qui cum ipso numero, qui est Deus, convertuntur, & Pater est Deus, & Filius est Deus, & Spiritus Sanctus est Deus; & sic Deus, quoad Personas est tres, & quoad essentiam & naturam est unus Deus, & non plures; & hoc est quia Personæ non multiplicant tertium, sicut Pater, qui est Deus, & sic de Filio & Sancto Spiritu; & ratio est, quia non differunt in essentia, nec in natura, nec in attributis, & hoc est, quia Pater de toto seipso, & de omni eo, quod habet, producit Filium, & sic Filius est productus de tota essentia & natura Patris, & etiam de tota sua bonitate, magnitudine, &c. & sic de Spiritu Sancto producto à Patre & Filio.* Qu. 21. num. 2. *sed absolute omnes tres sunt unus Deus, una essentia & una natura, una bonitas, una magnitudo, &c.* Tandem qu. 32. num. 2. scribit: *Deus Pater est infinitus, & sic Deus Filius est infinitus, & sic de Sancto Spiritu; & licet unus non sit alius, non sequitur quod sint tres infinitates, sicut non sunt tres Deitates, nec tres dii, tres bonitates, nec tres magnitudines, &c. & hoc est, quia Filius est de toto Patre, & Sanctus Spiritus de toto Patre & Filio.* Eandem veritatem supponit Lullus in aliis quæstionibus, ubi agit de Deo.

XX. Cùm itaque adeò clara sit mens Lulli in hoc eodem Libro de identitate essentiæ, naturæ, bonitatis, magnitudinis, &c. in omnibus tribus Personis, postulat æquitas, ut non statim in malam partem accipiatur, si aliquid contrarium asserere videatur; attamen de ipso contextu qu. 13. ex qua desumptus est textus notatus, apparet longè alium sensum deberi illi textui, ac scribit laudatus Censor; nam ibi quærit Lullus: *Utrum Sanctus Spiritus realiter distingueretur à Filio, si non procederet ab eo?* Et ita num. 1. discurret: *Inter Filium & Sanctum Spiritum non posset esse distinctio, nisi ipsa inter illos esset perfecta, & in tam magna bonitate, æternitate, potestate, &c. sicut est inter Patrem & Filium, & inter Patrem & Sanctum Spiritum; inter quas est proprietas distinctiva & constitutiva in subiecto personali: ratione cujus proprietatis attributa possunt habere naturales actus, sicut*

Textus
prop. 6.

bonitas bonificare , magnitudo magnificare , &c. & quia distinctio non posset habere prædictam proprietatem inter Filium & Sanctum Spiritum , si Filius non spiraret Sanctum Spiritum , sic deficiente proprietate distinctiva & constitutiva , deficeret distinctio inter Filium & Sanctum Spiritum , ratione cujus negatio quæstionis est tenenda.

XXI. Sanè in toto hoc contextu nullum est indicium , quòd illa verba de distinctione perfecta , & in tam magna bonitate , æternitate , potestate , &c. debeant intelligi ita , ut distincta bonitas , magnitudo , & potestas sit in Filio ac in Spiritu Sancto : *primò* , quia distinctio inter Filium & Spiritum Sanctum debet esse in tam magna bonitate , æternitate , & potestate , sicut est inter *Patrem & Filium* , & inter *Patrem & Sanctum Spiritum* , constat autem ex toto libro , & signanter ex adductis num. 18. & 19. quòd distinctio inter Patrem & Filium , & Patrem & Sanctum Spiritum sit talis , quòd , non obstante distinctione , in Patre & Filio , & Spiritu Sancto sit eadem Essentia , Bonitas , Magnitudo , Æternitas &c. Atque ita verba Lulli directè excludunt distinctionem bonitatis , æternitatis , & potestatis inter Filium & Spiritum Sanctum. *Secundò* , in eodem contextu explicatur qualiter distinctio inter Filium & Spiritum Sanctum debeat esse perfecta , & in tam magna bonitate , æternitate , potestate , &c. sicut est inter Patrem & Filium , videlicet quia inter Patrem & Filium , & Patrem & Spiritum Sanctum , est proprietas distinctiva & constitutiva , ratione cujus proprietatis attributa possunt habere naturales actus , sicut bonitas bonificare , magnitudo magnificare , &c. Atque ita distinctio inter Patrem & Filium , & inter Patrem & Spiritum Sanctum est perfecta , & in bonitate , æternitate , &c. quia Pater ratione proprietatis distinctivæ , quâ scilicet producendo potest alium à se distinguere , potest bonificare , magnificare , &c. Filium & Spiritum Sanctum , eos à se distinguendo , & hoc modo attributa habent suos naturales actus , ut bonitas bonificare , magnitudo magnificare , &c. quatenus Pater ratione bonitatis bonificat , ratione magnitudinis magnificat , &c. Unde , cùm dicit Lullus , quòd distinctio inter Filium & Spiritum Sanctum debet esse perfecta , & in tam magna bonitate , æternitate , &c. sicut est inter Patrem & Filium , ex ipso contextu intelligitur , quòd in ipsa distinctione Filii à Spiritu Sancto bonitas , æternitas , potestas , &c. debent habere suos actus , ita ut , sicut Pater distinguit Filium à se , producendo ipsum bonum ratione bonitatis , & æternum ratione æternitatis , ita Filius distinguit à se Spiritum Sanctum , producendo ipsum bonum ratione bonitatis , æternum

ratione æternitatis, &c. & quia hoc non posset esse, nisi Spiritus Sanctus ab ipso procederet, idè non esset distinctus, nisi procederet.

XXII. Proindè planum est, sensum Lulli esse, quòd illa distinctio debet esse perfecta, & in tam magna bonitate, &c. id est adeò bona, æterna, & potens, sicut distinctio inter Patrem & Filium; & quia hæc talis est, quòd ad distinctionem Patris & Filii, Pater Filium producit bonum, æternum, potentem, &c. ita, ut distinctio Filii à Spiritu Sancto sit æquè perfecta, & æquè in bonitate, æternitate, &c. Filius debet ipsum producere bonum, æternum, &c. & hæc est distinctio perfecta in bonitate, æternitate, &c. Hoc præterquam quòd ex ipso patet contextu, ampliùs manifestatur ex simili modo loquendi in eodem libro in variis quæstionibus, ubi semper supponit, hanc distinctionem Personarum debere esse cum bonitate, magnitudine, &c. ita ut divinæ dignitates habeant suum actum, ut habeatur talis distinctio, & idè quæst. 14. ut probet quòd Pater & Filius debent dici unus spirator, & non duo, ita num. 2. discurre: *Adhuc dico tibi quòd inter Patrem & Filium sit proprietas distinctiva, ratione cujus unus distinguit alium unum à se, sicut Pater, qui generando Filium, ipsum distinguit à se ipso, & sicut inter Patrem & Filium est distinctio cum infinitate bonitatis, æternitatis potestatis, &c. sic per consequens inter ipsos est concordantia, quæ est æqualis distinctioni per infinitam bonitatem, æternitatem, potestatem, &c. Ubi distinctio & concordantia dicuntur esse cum infinita bonitate, &c. & per infinitam bonitatem, &c. quod idem est ac dicere quòd sunt infinitè bonæ, æternæ, &c. Atque adeò distinctio dicitur esse in magna bonitate, æternitate, &c. quia est bona, æterna, &c. quod autem est bonum, in bonitate & cum bonitate est bonum.*



D I S S E R T A T I O V.

De Propositionibus 7, 8, 9 & 10, notatis in Quæst. 16, 17 & 18,
ejusdem Libri Sententiarum.

§. I.

*Immeritò attribuitur Lullo in Prop. 7. ex qu. 16. quòd non agnoscit
amorem Dei naturalem.*

I. **A**D septimam, quam notat laudatus Cenfor, propositionem, sic textum adducit : *Nisi humana voluntas haberet habitum charitatis, non haberet naturaliter libertatem ad diligendum summam charitatem, imò esset pura passio mota, sicut instrumentum, ad diligendum Spiritum Sanctum, & hoc simpliciter sine merito.* Qu. 16. Sentent.

Censura : *Non videtur in nobis agnoscere ullum amorè Dei naturalem, qualis potest esse in peccatore attrito, sed solum omnem ex charitate.*

II. In hac qu. 16. occasione Litteræ Magistri, quærit Lullus : *Utrum charitas sit aliquid creatum in anima ?* Quemadmodum inquirunt communiter expositores ; & quia tractatur de charitate, & amore supernaturali, regulariter non fit mentio de amore naturali, sed tantum supernaturali : unde conformiter ad quæstionem Lullus ibi num.

Textus
prop. 7.

1. sic discurret : „ Cùm divina charitas sit amabilis cum magnitudine,
„ creavit in homine magnam voluntatem, ut haberet magnam ama-
„ tivitatem ad diligendum supremam charitatem, & sic suprema
„ charitas creavit & posuit in humana voluntate in potentia habitum
„ charitatis, ut, illo habitu deducto de potentia in actum per vo-
„ luntatem & summam charitatem, summa charitas esset multum
„ dilecta ab humana voluntate, aliàs summa charitas non satisfaceret
„ suæ magnæ amabilitati de creata voluntate ; quia, *nisi humana vo-*
„ *luntas haberet habitum charitatis, non haberet naturaliter libertatem*
„ *ad diligendum summam charitatem, imò esset pura passio mota, sicut*
„ *instrumentum, ad amandum Sanctum Spiritum, & hoc simpliciter*
„ *sine merito ; sicut martellus, qui est instrumentum simpliciter mo-*
„ *tum ad percutiendum clavum ; & sic Sanctus Spiritus esset contra*

„ suam magnam amabilitatem , & per consequens contra suam magnam bonitatem , virtutem , &c. quod est falsum , & impossibile , „ nec ullo modo est intelligibile : ergo concluditur , quod charitas „ in anima sit aliquid creatum.

III. Planè in hoc textu non agitur nisi de amore supernaturali , quo amatur Deus secundum suam supremam amabilitatem , quoad suam supremam bonitatem , virtutem , &c. secundum quam requiritur in voluntate magna amativitas , seu virtus proportionata ad amandum ; hæc autem virtus , quæ voluntas redditur amativa , est charitas habitus , quæ propterea creatur in voluntate , in potentia , hoc est in dispositione , ut reducatur ad actum per voluntatem , & per Deum ipsum : quare illa verba : *Nisi humana voluntas haberet habitum charitatis , non haberet naturaliter libertatem ad diligendum summam charitatem* , intelliguntur de dilectione superna ; quia , nisi in voluntate esset habitus charitatis , ipsa non haberet virtutem completam diligendi supernaturaliter Deum , quia deficeret ipsi supernaturalis virtus ad hanc dilectionem ; & ideò , si diligeret supernaturaliter sine dicta charitate , esset pura passio mota , & moveretur sicut martellus , qui est instrumentum simpliciter motum absque eo quod habeat virtutem in se ad illum motum ; quod autem ibi dicitur : *non haberet naturaliter libertatem ad diligendam summam charitatem* , non intelligitur de actu naturali dilectionis , ita ut sine habitu charitatis voluntas nullatenus possit diligere , atque adeo nec actum naturalem dilectionis habere , sed , cum ly *naturaliter* sumatur pro eodem ac connaturaliter , id est conformiter , & secundum naturam illius superioris ordinis , quo ordinatur voluntas ad supremum amorem Dei : tantum ibi intelligitur , quod voluntas non haberet libertatem connaturalem , eidem correspondentem , ad dilectionem supernaturalem , sed purè esset mota , sicut instrumentum , absque virtute correspondenti , quæ esset amativa in illo ordine. Similiter in toto contextu ex num. 2 & 3. apparet , in hac quæstione tantum esse sermonem de amore superno , juxta quæstionem propositam ; atque ita non est mirum ibi non loqui Lullum de amore naturali.

IV. Profectò eadem Censura , quæ contra Lullum , posset objici contra D. Angelic. 22. quæst. 23. art. 2. *Utrum charitas sit aliquid creatum in anima ?* Ubi sic discurrit : *Respondeo dicendum , quod Magister perscrutatur hanc quæstionem in dist. 17. lib. Sent. & ponit quod charitas non est aliquid creatum in anima , sed est ipse Spiritus Sanctus*

mentem inhabitans. Nec est sua intentio, quod iste motus dilectionis, quo Deum diligimus, sit ipse Spiritus Sanctus, sed quod iste motus dilectionis est à Spiritu Sancto, non mediante aliquo habitu, sicut à Spiritu Sancto sunt alii actus virtuosus mediantibus habitibus aliarum virtutum, puta Fidei, aut spei, aut alicujus alterius virtutis, & hoc dicebat propter excellentiam charitatis; sed, si quis rectè consideret, hoc magis redundat in charitatis detrimentum; non enim motus charitatis ita procedit à Spiritu Sancto movente humanam mentem, quod humana mens sit mota tantum, & nullo modo sit principium hujus motus, sicut, cum aliquod corpus movetur ab aliquo exteriori movente: hoc enim est contra rationem voluntarii, cujus oportet principium in ipso esse, sicut supradictum est. Unde sequeretur, quod diligere non esset voluntarium, quod implicat contradictionem, cum amor de sui ratione importet quod sit actus voluntatis. Similiter etiam non potest dici quod sic moveat Spiritus Sanctus voluntatem ad actum diligendi, sicut movetur instrumentum: quod etsi sit principium actus, non tamen est in ipso agere vel non agere. Sic enim tolleretur ratio voluntarii, & excluderetur ratio meriti; cum tamen supra habitum sit, quod dilectio charitatis est radix merendi, sed oportet, quod sic voluntas moveatur à Spiritu Sancto ad diligendum, quod etiam ipsa sit efficiens hunc actum; nullus autem actus perfectè producit ab aliqua potentia activa, nisi sit ei connaturalis per aliquam formam, quæ sit principium actionis: Unde Deus, qui omnia movet ad debitos fines, singulis rebus indidit formas, per quas inclinatur ad fines sibi præstitutos à Deo, & secundum hoc disponit omnia suaviter, ut dicitur Sap. 8. Manifestum est autem, quod actus charitatis excedit naturam potentiæ voluntatis: nisi ergo aliqua forma superadderetur naturali potentiæ, per quam inclinaretur ad dilectionis actum, esset actus iste imperfectior actibus naturalibus, & actibus aliarum virtutum, nec esset facilis, & delectabilis.

V. Si conferatur hic Textus D. Thomæ cum Textu allato Lulli, & iis quæ dicit num. 3. in eadem quæstione, videbitur Lullum ex Divo Thoma scripsisse hujus quæstionis resolutionem; quoniam utrobique eadem, quoad substantiam, est sententia, & eisdem fundamentis resolvit uterque dubium; & sicut Lullus nullum facit Verbum de amore naturali, ita neque D. Thomas; & ubi Lullus dicit: *Nisi humana voluntas haberet habitum charitatis, non haberet naturaliter libertatem ad diligendum summam charitatem*, D. Thomas scribit: *Nullus autem actus perfectè producit ab aliqua potentia activa, nisi sit ei connaturalis per aliquam formam quæ sit principium actionis:*

ex quo deducit, requiri in voluntate habitum charitatis, ut ei sit connaturalis & liber actus dilectionis Dei, & non sit sicut purum instrumentum motum ad aliquam actionem; ac proinde immerito notatur à laudato Censore relatus Lulli Textus. Cui confetire videtur D. Augustinus Trac. 87. in Joan. num. 1. dicens: *Hæc (charitate) diligimus invicem, hæc diligimus Deum, neque enim vera dilectione diligeremus invicem, nisi diligentes Deum; diligit enim unusquisque proximum tamquam seipsum; si diligit Deum: nam si non diligit Deum, non diligit seipsum.*

VI. Quod autem Lullus alibi, ubi se offert occasio, agnoscat amorem Dei naturalem, patet ex hoc eodem libro; nam quæst. 5. in anima rationali ex vi creationis ipsius agnoscit potentiam recolendi, intelligendi, & diligendi Deum, dicens num. 1. *Anima est substantia, quæ est creata ut recolat, intelligat, & diligat Deum; & de huiusmodi naturali dilectione, sicut & de naturali recollectione & intelligentia ejusdem agit in tota quæstione, quæ ostendit, memoriam, intellectum, & voluntatem esse potentias substantiales, & non accidentia animæ. Quod autem ante infusionem habitus charitatis agnoscat aliquam dilectionem Dei in peccatore attrito, patet quæst. 49. num. 2. ubi ait, quod peccator habeat libertatem intelligendi suum peccatum, & diligendi poenitentiam, & divinam misericordiam ita quod, si multiplicat suum intelligere in objectando Deum & sua attributa & vilitatem peccati, culpam, & poenam infernalem, & cælestem gloriam, & multum diligit agere poenitentiam de commissis, tunc se disponit ad habendam contritionem & poenitentiam. Unde agnoscit amorem aliqualem Dei sine charitate habituali, quæ ex quæst. 17. nequit in peccatore conjungi cum peccato in illis actibus præviis ad perfectam contritionem, quia sine aliquo amore esse non possunt. Quæst. 65. resolvit, quod Angelus naturali dilectione plus possit diligere Deum, quam seipsum. Quæst. 114. num. 1. supponit de quodam Milite Christiano, qui vivebat in peccato luxuriæ, quod rogabat Deum, ut ipsum liberaret ab illo peccato, & bellando cum Saracenis intendebat honorare, & exaltare Fidem Christi; & tandem captus à Saracenis decapitari magis elegit ad honorandam Christianam Fidem, quam vivere & esse Saracenus, & vituperare fidem; illi autem actus, saltem prævi ad Martyrium, non potuerunt esse sine aliquo amore. Quæst. 119. num. 2. docet, virtutes acquiras, quæ possunt ex ipso esse sine charitate, acquiri recolendo, intelligendo, diligendo Deum.*

VII. Frequentissime etiam in aliis libris docet, possibilem amo-

rem Dei naturalem, & omiſſis aliis in lib. de contemp. cap. 226. hunc ponit titulum: *Quomodo termini animoſitatis & fervoris hominis Chriſtiani poſſint eſſe majores & meliores in amando Deum, quàm termini cujuſcumque non Chriſtiani*; de hoc autem toto tractat capite, & ſaltem in non Chriſtiano ſupponit poſſibilem amorem Dei naturalem. Prætereà totâ diſt. 39. agit de amore, & multa interſerit de amore naturali Dei, ſignanter autem illum agnoſcit cap. 284. ſub hoc titulo: *Quomodo homines mundani habeant majorem amorem erga res mundanas, quàm erga noſtrum Dominum Deum*; & cap. 289. *Quomodo homo amet in hoc mundo, & in alio*; & cap. 294. *Quomodo homo amet amore ſenſuali; & amore intellectuâli*.

§. I L

Solum tenet Lullus in 8. propoſitione ex quæſt. 17. damnatum habere propter antiqua merita minorem pœnam accidentalem, id eſt magis remiſſam.

VIII. Ad propoſitionem 8. hic adducitur Textus & Cenfura.

TEXT. *Verumtamen propter antiquam charitatem homo mortuus in peccato ſic minorem habet pœnam in inferno, ſicut homo, qui primò lapſus in peccatum mortale poſtea decedit in charitate, puniri debet in Purgatorio, niſi in hac vita pœnitentiam egerit. Quæſt. 17. in fine.*

CENS. *Propoſitio declaratione & limitatione indiget, ſcilicet quoad primam partem.*

IX. Pro intelligentia ſenſûs Lulli notandum eſt, ipſum in hac q. 17. inquirere: *Utrum charitas augeatur per additionem novæ charitatis*? Et num. 1. reſolvere, quòd eſſentia habitûs charitatis, qui eſt habitus à Spiritu Sancto creatus in voluntate, non augetur, ſed tantum augentur actus ipſius, dum voluntas cum gratia Dei majores elicit actus charitatis. At num. 2. objicit Eremita quòd charitas amittitur per peccatum mortale, quando autem homo conteritur, & ponitur in Dei gratia, recipit novam charitatem à Sancto Spiritu; & quia revivifcit meritum antiquæ illius charitatis, quàm amiſit, recuperat homo eſſentiam illius antiquæ charitatis, & ſic ſequitur de neceſſitate quòd ex duabus eſſentiis fiat additio & multiplicatio, atque ita fit augmentum & additio charitatis quoad eſſentiam. Ad hoc reſpondet Lullus, quòd eſſentia primæ charitatis per peccatum mortale fuit reducta in nihilum, & noviter, quando homo ponitur in

gratia, non revertitur charitas amissa ad eundem numerum, sicut peccatum Luxuriæ, dum homo conteritur, reducitur in nihilum, & licet homo iterum redeat ad peccatum luxuriæ, non revertitur eadem luxuria, sed alia in numero sub eodem genere luxuriæ.

X. Posito dicto exemplo, scribit: „At simili de charitate (licet exemplum sit grossum) cum charitas sit donum datum à Sancto Spiritu, & luxuria sit habitus electus à voluntate: Unde, cum hoc ita sit, mea ratio stat, & tua nihil valet: *Verumtamen propter antiquam charitatem* (illam scilicet, quæ meritum acquisivit ante peccatum) homo mortuus in peccato sic habet minorem pœnam in inferno, sicut homo, qui fuit in peccato mortali, & est mortuus in charitate, debet puniri in Purgatorio, nisi in hac vita fecerit pœnitentiam. Planè, attentâ quæstione ejusque resolutione, apertè videtur hæc verba relata, quæ notavit laudatus Censor, solum esse dicta obiter & per excursionem ad alia, non autem ex professo, & ad intentum quæstionis, cum non conducant ad propositam quæstionem, nec ad solutionem argumenti propositi; unde magis in ea cadit benigna interpretatio. Nec dubium est circa secundam partem, quodd scilicet homo mortuus in charitate, si antea non satisfecit pro peccatis commissis, debet in Purgatorio puniri.

Textus
prop. 8.

XI. Itaque quoad primam partem dicti Textus, sensus Lulli videtur esse, quodd qui aliquando meruit per charitatem, & postea decedit cum peccato, propter illud prius meritum *habet minorem pœnam*, non quidem essentiælem, sed accidentalem; neque minorem quoad extensionem durationis infinitæ, sed tantum minorem quoad ejus intensiorem: hoc enim videtur conforme misericordiæ, & justitiæ Dei, quibus etiam quoad damnatos utitur, cum sit apud Theologos receptissimum, Deum punire infra condignum, & præmiare ultra condignum: Undè, cum merita peccatum præcedentia sint mortificata per peccatum, nihil sanè deserviant decedenti in peccato ad vitam æternam; quia tamen fuerunt Deo grata, & ab ipso acceptata, qui nihil in ejus obsequium factum relinquit absque aliqua possibili remuneratione, non videtur absurdum, quodd propter illa præcedentia merita aliquo modo mitius agatur cum damnato, quoad pœnam scilicet accidentalem & ejus intensiorem. Hoc idem videtur sensisse Divus Anselmus lib. Meditat. Meditatione 6. §. Cum itaque, pag. 301. dicens: „Item alii, etsi multa mala fecerant, multa etiam bona facere non omiserunt: quibus, vel, ut ex toto ipsa mala dimitterentur: promeruerunt, vel ut tolerabiliorem ipsam pœnam gehennæ ha-

„ beſent, ſibi acquiſierunt „. Et Chriſtus apud Sanctam Birgittam lib. 2. Revel. cap. 14. ait : „ Tribus enim generibus hominum amici „ mei ſuccurrere poſſunt ; primò damnatis . . . ſed potes quærere, „ quomodo quis poteſt ſuccurrere damnatis, cùm indigni ſint gra- „ tiâ, & impoſſibile eſt eis redire ad gratiam ? Ad quod ego volo „ reſpondere tibi. . . . quamvis enim & juſtitia mea, & malitia eo- „ rum indurata, præſinito tempore & præſcito damnandi ſunt, le- „ vius tamen ſupplicium fieret eis, ſi, per aliquem à malis aliquibus „ refrenarentur, & incitarentur ad aliquod bonum. Ecce quàm mi- „ ſericors ſum, etiam in damnatos.

XII. Hæc eadem videtur fuiſſe Magiſtri Sententia in 4. diſt. 15. ubi relato Auguſtini Textu : *Si quis non habens charitatem, quæ per- tinet ad unitatem Spiritûs, & vinculum pacis, quo Eccleſia connectitur, in aliquo ſchiſmate conſtitutus, ne Chriſtum neget, patitur tribulationes, famem, perſecutionem, vel flammâs, vel beſtias, vel ipſam Crucem timore gehennæ, nullo modo iſta culpanda ſunt, imò & hæc laudanda eſt patientia. Non enim dicere poterimus, melius ei fuiſſe, ut, Chriſtum negando, nihil horum pateretur, quæ paſſus eſt conſitendo, ſed æſtimandum eſt fortasſe tolerabilius eſſe futurum iudicium, quàm ſi, Chriſtum negando, nihil horum pateretur, ut illud, quod ait Apoſtolus ; ſi tradidero corpus meum, ita ut ardeam, charitatem autem non habue- ro, nihil mihi prodeſt ; nihil prodeſſe intelligatur ad regnum obtinen- dum, ſed ad extremi iudicii tolerabilius ſubeundum iudicium : ſubjun- git hæc verba : „ Ex his oſtenditur bona, quæ ſine charitate fiunt, „ prodeſſe quidem ad tolerabiliorem poenam ſentiendam, ſed non „ ad vitam obtinendam. Illa etiam, quæ in charitate quis facit ; ſi „ poſteà prolapſus fuerit, nec exſurrexit, non eſſe in memoria, „ Dei, Ezechiel dicit : Si averterit ſe juſtus à juſtitia, & fecerit ini- quitatem, nunquid vivet ? Omnes juſtitie ejus, quas fecerit, non recor- „ dabuntur : in peccato ſuo morietur ; & non erunt in memoria juſtitie, „ quas fecit. In cujus loci expoſitione Gregorius ait ; Hoc nobis ma- „ ximè conſiderandum eſt, quia, cùm mala committimus, ſine cauſa „ ad memoriam tranſacta bona revocamus, quoniam in perpetrati- „ one malorum nulla debet eſſe fiducia bonorum præteritorum : Intelligen- „ dum eſt hoc, ad vitam æternam percipiendam bonâ præterita non „ dare fiduciam ; etſi ad mitiorem poenam, alioquin præmiſſæ au- „ toritati Auguſtini obviaret : Bona ergo ſine charitate facta, & bona „ in charitate facta, quæ concomitatur mortalis culpa, quam non de-*

„ let sequens poenitentia, ad sensum mitioris poenae proficiunt, non ad
 „ vitae fructum.

XIII, Præterea, opera bona mortua seu elicita ab homine existente in peccato, sunt multò minoris æstimationis, quàm merita per peccatum mortificata, & tamen juxta multorum sententiam, illa bona opera mortua deserviunt, ut mitiùs puniatur in inferno, juxta relata à Magistro, Augustini Doctrinam; quantò ergo magis ad hoc deservient opera bona, viva & meritoria, quæ per peccatum fuerunt impedita, ne suum finem consequerentur? D. Bonav. in 4. dist. 15. art. 1. quæst. 6. *Utrum bona opera extra charitatem facta valeant ad tolerabiliorem poenam?* Respondet: „ Dicendum, quòd hujusmodi
 „ opera bona extra charitatem facta, quando bona fiunt intentione,
 „ valent ad multa. Ad temporalium multiplicationem. . . . *ad tolera-*
 „ *biliorem poenam æternam*, sicut dicit Augustinus, quòd valent, ut
 „ tolerabilior sit dānatio „. Subjungit Seraph. D. varios modos explicandi hanc Augustini sententiam, & ait: „ Idèò tertio dico quòd
 „ valent ad tolerabiliorem damnationem ex consequenti. . . . & ad
 „ vermem, quia minùs cruciabitur, & minorem habebit remorsum,
 „ quàm si opera illa non fecisset; non de illa culpa, quam commi-
 „ sit, sed de malis, quæ commisisset, & de bonis, quæ omisisset,
 „ si illa opera bona non fecisset.

XIV. D. Thomas 3. part. quæst. 89. art. 6. ubi quærit: *Utrum per poenitentiam etiam opera mortua vivificentur?* Cùm in argum. 3. sibi objecisset hanc D. Hyeronimi (in illud Aggei 1. *seminastis*, &c.) auctoritatem: *Si quando videris inter multa mala opera facere peccatorem quemquam aliqua, quæ justa sunt, non est tam injustus Deus, ut propter multa mala obliviscatur paucorum bonorum*: ita respondet: „ Ad tertium dicendum, quòd Deus recordatur bonorum, quæ quis facit
 „ in statu peccati, non ut remuneret ea in vita æterna, quod debetur solis operibus vivis, id est ex charitate factis, sed remunerat ea temporali remuneratione. . . . vel etiam hoc potest referri
 „ ad hoc quòd patietur tolerabilius judicium: unde dicit Augustinus in lib. de Patientia (cap. 26.) non possumus dicere schismatico meliùs fuisset, ut, Christum negando, nihil eorum pateretur, quæ passus est confitendo, sed existimandum est tolerabilius
 „ ei futurum judicium, quàm si, Christum negando, nihil eorum pateretur, ut illud, quod ait Apostolus: si tradidero corpus meum,
 „ ita ut ardeam, charitatem autem non habuero, nihil mihi prodest:

» intelligat, ad regnum coelorum obtinendum, non ad extremi supplicii iudicium tolerabilius subeundum.

XV. Similiter Bonacina, Tract. de poenitent. disp. 5. quaest. 6. sect. 4. Punc. 1. num. 2. post resolutionem, quod opera mortua non reviviscunt per subsequentem poenitentiam, sibi objicit quod, si ita esset, opera bona facta à peccatore nihil proderent: ad quod ait: « Respondeo hujusmodi opera bona nihil prodesse ad vitam æternam promerendam, multum verò prodesse ad alios fines. . . . » Tertio ad vitanda majora tormenta in inferno, quatenus per hujusmodi bona opera adimplentur divina praecepta, quorum violatione majora tormenta subeunda essent in inferno, quæ omnia his duobus versibus comprehendit Glossa cap. *Quod quidam de Poenit.* & remiss.

Quæ cum mortali bona fiunt, dant bona terræ.

Cor faciunt humile, minuunt tormenta gehennæ.

» Idem sentit. Sotus, Dist. 19. Quaest. 1. Art. 5. Henriquez, Coninch. Nugn. Zerola, & alii communiter. » Quare, si opera bona facta in peccato, quæ de se non sunt vitæ æternæ meritoria, profunt damnatis ad mitigationem poenæ, multò magis opera de se meritoria vitæ æternæ quia facta in charitate, proderunt ipsis, ut mitius patiantur, saltem quantum ad remissionem poenæ accidentalis.

XVI. Porro, non est dubium, magis prodesse alicui operam in charitate ab ipso factam, quàm suffragia ab aliis oblata, atque ita potius illa, quàm ista, valere debent ad poenæ æternæ mitigationem; & tamen ad hujusmodi poenæ mitigationem aliquam in damnatis valere vivorum suffragia, innuere videtur Augustinus in Enchiridio, Cap. 110. dicens: « Cum ergo sacrificia, sive Altaris, sive quarumcumque Eleemosynarum pro baptizatis defunctis omnibus offeruntur, pro valde bonis, gratiarum actiones sunt; pro non valde malis, pro pitiationes sunt; pro valde malis, etiam si nulla sunt adjumenta mortuorum, qualescumque vivorum consolationes sunt. Quibus autem profunt, aut ad hoc profunt, ut sit plena remissio; aut certè ut tolerabilior fiat ipsa damnatio. » Ad hæc ultima verba sequentem notam adjungunt Benedictini San - Mauriani: « Damnationem verò hinc pro purificatione eorum, qui post Purgatorii poenas salvandi sunt, accipiendum docuit Albertus Magnus in 4. Sent., Dist. 45. Art. 3. ad 1. eamque interpretationem probant.

» Magistri deinceps in eundem Sententiarum locum; Attamen Petrus
 » Lombardus eo loci Dist. 45. Cap. *Neque negandum est*, pro dam-
 » natorum quorundam, qui numquam liberandi sint, punitione ac-
 » cepit, quando subinde concludens dixit: *mediocriter malis suffra-*
 » *gantur ad pœnæ mitigationem*. Nam ab istis *mediocriter malis* pror-
 » sus secernit eos, qui à pœnis Purgatorii, sive celerius sive tardius
 » absolvuntur per Ecclesiæ preces, appellatque omnes hujus gene-
 » ris *mediocriter bonos*. Res patet per lectis ibidem capitulis: *solet*
 » *moveri, & sed iterum*. Hinc Glossa in 2. Quæst. 13. Cap. *tempus*,
 » hæc apposita est: *mediocriter malis profunt ad hoc, ut minus pu-*
 » *niantur, nunquam tamen liberabuntur*. Pro hac ipsa opinione ab
 » Alberto Magno citatur Præpositivus. In Gellonenfi Codice perve-
 » tuſto extat inscripta: *Missa pro cujus anima dubitatur*, in qua isthæc
 » legitur oratio: *Omnipotens & misericors Deus, qui habes potestatem*
 » *mortificare, & iterum vivificare, deducere ad inferos, & iterum redu-*
 » *cere, & vocas ea, quæ non sunt, tanquam ea, quæ sunt; cujus po-*
 » *testas est in Cælo, & in terra, & in mari, & in inferis plena assistit:*
 » *Te humiles trementesque deprecamur pro anima famuli tui, quam*
 » *traxisti de præſenti sæculo absque pœnitentiæ spatio, ut, si forsitan ob*
 » *gravitatem criminum non meretur surgere ad gloriam, per hæc sacra*
 » *oblationis libamina, vel tolerabilia fiant ipsa tormenta*. Adrevaldus,
 » Lib. de miraculis Sti. Benedicti c. 21. scribit, Floriacenses pro ani-
 » mabus prædonum in acie cæſorum præces ad Dominum fuisse,
 » quatenus, *etsi perpetuis non mererentur absolvi cruciatibus, saltem mi-*
 » *noribus mulctarentur à ſtricto judice pœnis*. » Idem docet D.
 » Chriſoſt. Hom. 3. in Epist. ad Philip. ſcilicet, fidelium præces, quæ
 » pro mortuis in Ecclesia fieri ſolent, exiguum aliquod damnatis
 » afferre ſolatium, prout refert Petav. Theolog. Dogm. tom. 3. lib. 3.
 » de Ang. cap. 8. num. 17. ubi, relata ſimili Sententia, D. Pru-
 » dentii, ſubdit: « De hac damnatorum ſaltem hominum reſpiratione
 » nihil adhuc certi decretum eſt ab Ecclesia Catholica ut propterea
 » non temere, tanquam abſurda, ſit explodenda Sanctiſſimorum
 » Patrum hæc opinio, quamvis à communi ſenſu Catholicorum hoc
 » tempore ſit aliena. » Ipſe etiam D. Auguſt. lib. 21. de Civitate
 » Dei, cap. 24. num. 3. ſcribit: « Sed quibus placet iſtam Sententiam
 » (*numquid oblivſcetur miſereri Deus, aut continebit in ira ſua miſeri-*
 » *cordias ſuas*) uſque ad illa impiorum tormenta protendere, ſal-
 » temſic intelligant, ut manente in eis ira Dei, quæ in æterno eſt
 » pronunciata ſupplicio, non contineat Deus in hac ira ſua miſera-

„ tiones suas , & faciat eos non tanta , quanta digni sunt , poenarum
 „ atrocitate cruciari , non ut eas poenas vel nunquam subeant , vel
 „ aliquando finiant , sed ut eas mitiores , quàm merita sunt eorum ,
 „ levioresque patiantur ; sic enim & ira Dei manebit , & in ipsa
 „ ira sua miserationes suas non continebit. Quod quidem non ideo
 „ confirmo , quia non resisto. „

XVII. Quod autem mortuus in peccato recipiat poenam in inferno secundum malitiam sui peccati , diffusè explicat Lullus in *Arb. scient. in Arbor. æviternali* per totam , & in quæstionibus ejusdem. In hoc autem Libro Sent. quæst. 134. num. 3. supponit , Deum omnes animas , quæ cum peccato à corpore recesserunt , punire poena damni , in quantum ipsas evacuat de illo fine & beatitudine , ad quam fuerunt creatæ ; & alibi docet majorem poenam damnatorum esse privationem visionis Dei , & in Lib. *de Doctrina puerili* , Cap. 67. *de damnatione* , & Cap. 98. *de inferno* , ad longum explicat utrasque poenas , earum æternam durationem , & gravitatem ; quid autem per se debeatur peccato , explicat lib. Prover. p. 3. cap. 81. *de peccato* , num. 2. dicens : *per peccatum perdit homo Deum , & æviternaliter habet poenam* ; & cap. 100. *de poena* num. 10. *Nulla poena est tam magna , sicut poena inferni* ; & num. 11. *Infernus est centrum omnium poenarum.*

§. III.

Docet Lullus in Propos. 9. ex quæst. 18. naturalem Animæ capacitatem totaliter repleri gloriâ , quæ eidem confertur secundum merita , non autem secundum naturalia.

XVIII. Textus adductus ad 9. Propos. sic ab eodem scribitur Censore : *Animæ non sunt æquales secundum existentiam , neque per consequens secundum operationem , sicut anima B. Petri , quæ major est , quàm anima B. Guillelmi ; quia , si æquales essent , plura inconvenientia sequerentur , cum in Patria non sit dare vacuum , quod esset , si animæ essent æquales , sicut anima Beati Guillelmi , quæ tantum gloriæ non meretur , sicut anima B. Petri ; & sic anima B. Guillelmi vacua gloriâ remaneret , ratione cujus vacuitatis plenam gloriam non haberet : & sic illa quantitas substantiæ , per quam majorem gloriam recipere posset , esset à Deo creata superflua , & impediret quod anima perfectam gloriam non haberet.* Quæst. 18. in principio.

Censura. ::

Censura : Probat *animas esse inæquales secundum essentiam*, nam nomine *existentiæ sæpè essentiam intelligit* : & in ea probatione videtur *supponere*, gloriam homini dari secundum naturalia, & ex naturalibus.

XIX. Non videtur hîc Censor notare in æqualitatem animarum secundum essentiam, quam probat Lullus, cum à pluribus, Autorib. defendatur, & præter alios, Tosca. Instit. Philos. tom. 7. tract. 11. lib. 1. cap. 2. prop. 7. ait : *Affero 2. omnes animas rationales non esse in se ipsis æqualiter perfectas*. Contraria etiam assertio damnata videtur ab Episcopo Parisiensi, qui, referente Henrico Gandav. Quodlib. 3. quæst. 5. declaravit quod opinio illa, quæ dicit, quod *inconveniens est ponere aliquos intellectus nobiliores aliis*, error est; quia sic anima Christi non esset nobilior animâ Judæ. Unde tota difficultas stat in hoc, quod Lullus videtur supponere, ut notat laudatus Censor, gloriam homini dari secundum naturalia, & ex naturalibus; at, pace tanti viri, immeritò hæc inuritur Lullo Censura, cum in hoc eodem textu & ubilibet profiteatur, gloriam homini, adulto scilicet, dari propter & secundum merita, quæ talia non sunt, nisi sub gratia & charitate supernaturali eliciantur : quod quidem, præter alios libros, in quibus hoc sæpè repetit, apertè docetur in hoc eodem lib. sentent. in pluribus locis.

XX. Nam in Prologo docet, quod charitas omnibus est necessaria ad salutem. Quæst. 3. probans quod frui est æqualiter actus intellectus & voluntatis, in responsione ad argumentum Eremitæ supponit, intellectum & voluntatem in hac vita per suos actus acquirere beatitudinem. Quæst. 16. num. 1. probat habitum charitatis esse aliquid creatum in anima à suprema charitate, quia aliter humana voluntas amaret simpliciter sine merito, sicut martellus, qui est instrumentum simpliciter motum ad percutiendum clavum; & idèd num. 3. ait, quod Sanctus Spiritus (creato habitu charitatis in anima) posuit in voluntate naturam, cum qua posset producere, ipsa coadjuvante, de potentia in actum, actum charitatis; & quæst. 17. num. 3. ait : Homo est creatus ad beatitudinem, ad quam tendit quando habet charitatem, & quando est lapsus in peccatum, charitas, quam habuit, non habet subiectum, in quo sit sustentata, quia, si haberet, peccator, qui esset in mortali peccato, mediante charitate participaret cum Sancto Spiritu, quod est impossibile, cum charitas sit suus effectus; & ibidem tenet, charitatem esse donum datum à Sancto Spiritu, & approbat quod num. 2. objicitur in argumento, scilicet quod homo, quando conteritur & satisfaciunt, & agit de virtutibus moralibus, recipit novam charitatem à Sancto

Spiritu, & voluntas recuperat vestigia primæ charitatis, ut non amittat meritum de bono, quod fecit sub umbra antiquæ charitatis quod quidem approbat, ita ut non intelligatur reverti ad eundem numerum illa prima antiqua charitas, sed alia in numero, quæ sit donum datum à Sancto Spiritu.

XXI. Præterea quæst. 33. num. 2. ait, quodd homo est prædestinatus secundum modum, per quem Deus agit in creatis mediatè; videlicet Deus prædestinavit B. Petrum sic cum bonis quæ fecit, & ratione meritorum illorum bonorum, sicut calefacit calefactum cum sole, & cum igne; & convenit quodd hoc ita sit ratione divinæ ordinationis, justitiæ, & sic de aliis suis attributis; etiam ratione liberi arbitrii B. Petri, & suæ justitiæ, prudentiæ, &c. aliis, si Petrus immediatè (id est sine meritis) esset prædestinatus secundum modum, per quem Deus immediatè (id est sine aliquo alio juvamine extraneo, ut ait num. 1.) agit in creatis, esset prædestinatus sine justitia, & ordinatione, & idem sequeretur suo modo de Juda, qui immediatè esset præstitus sine injuria suis & demeritis suorum vitiorum; quod est falsum & impossibile secundum divinam bonitatem, magnitudinem, &c. Similiter quæst. 4. Utrum præscientia meritorum sit causa, vel ratio prædestinationis salvandorum, vel utrum detur aliqua alia causa? num. 1. ait: sine qua (gratia Dei) nullus homo potest esse prædestinatus nec electus ad salvationem, cum merita, quæ sunt finita, non sufficiant ad acquirendam æternam beatitudinem datam per gratia, & per justitiam ratione meritorum; & num. 3. dicit: Quæ (merita) non possent esse sine divina gratia, & auxilio.

XXII. Deinde quæst. 49. num. 1. ait: Undè, sicut homo non posset generare Filium, nec planta plantam, in absentia influentiæ corporum cælestium, sic & multò magis peccator non potest se facere justum cum suo infirmo intelligibili & amabili, nisi gratia Dei superveniat, & nisi Deus sit coadjutor, quia nemo potest facere bonum sine gratia Dei; & num. 2. dicit, quodd, dum peccator habet contritionem, & poenitentiam, tunc venit gratia Dei cum misericordia & justitia sanans hominem, & tunc peccatum, quod antea erat dilectum, est oditum, & homo est curatus. Etiam quæst. 81. supposito quodd Deus Adamum & Evam creavit ad se memorandum, intelligendum, & amandum, num. 2. ait: Et quia homo non potest habere bonum, magnum, &c. recolere, intelligere, & amare sine virtutibus, Deus dedit animæ hominis virtutem & potestatem supra corpus, ut ipsum posset refrenare & ordinare, ut scilicet corpori posset acquirere meritum, & cum ipso habere

DISSERT. V. §. III.

magnam gloriam. Pariter, quæst. 86. num. 1. dicit: Virtus gratuita est fides, spes, charitas. . . . Item (num. 2.) prædictæ virtutes spectant ad meritum, quia ratione meriti (id est ad acquirendum meritum) sunt datæ, licet gratis sint datæ, & spectant ad meritum, quia, si non spectarent ad meritum, implicaretur contradictio, & ipsi credere sperare, & ipsi amare conveniret acquirere meritum, & non acquirere. & quæst. 92. num. 3. ait, quod sine charitate nullus homo possit habere salvationem. Etiam quæst. 103. num. 3. dicit, quod homines sint prædestinati secundum eorum merita.

• XXIII. Ulterius quæst. 113. num. 4. dicit esse impossibile, quod homo peccator per fidem informatam (hoc est informem) sibi acquirat utilitatem, scilicet salvationem. Quæst. 114. num. 1. quod per adventum gratiæ, de fide informatam fuit mutatus (peccator) in fidem formatam, & quod nisi ita esset, non acquisivisset meritum. Quæst. 115. n. 1. Spes est donum datum à Deo, ut homo supponat à Deo habere gratiam & misericordiam, & juvamen ad perficiendum bonum agere, & attingere suum finem; & num. 3. Et fortè Deus mutat illum hominem ad perficiendum aliud bonum ratione meriti, & spei, & similes vel nauta moriatur sperans in adiutorio Dei, Deus propter spem, quam habuit mortuus (simul cum charitate, ut supponitur) dat ei gloriam. Quæst. 132. num. 1. Deus per gratiam disponit peccatorem, qui est ligatus, ut se moveat ad bonas cogitationes, & ad peregrinationes, & ad faciendum Eleemosinas, & sic de similibus, ut liberè sit contritus, & agat pœnitentiam de commissis. Quæst. 133. num. 3. dicit ex aliorum narratione, quod Sancta Sophia habebat plus meriti per ædificationem Ecclesiæ Constantinopolitanæ in dando quolibet die denarium herbæ bobus, qui portabant lapides, quàm Imperator, qui ædificavit & perfecit totam Ecclesiam; & num. 4. Item dico tibi quod sicut unus homo cum charitate æquali (quoad essentiam) charitati alterius hominis plus posset acquirere de præmio, quàm alius, supposito quod magis agat de ipsa, sic à simili, &c. quæst. 136. num. 1. Homo in via, mediante gratia Dei, acquisivit præmium & beatitudinem cum sua anima, & cum suo corpore; & num. 5. Imò necessariò convenit, quod sit resurrectio, ut homo, qui acquisivit præmium, remuneretur, aliàs Deus non remuneraret illud idem in numero, quod acquisivit gloriam. & quæst. 137. num. 5. Et ideò, licet essentiæ habituum (Fidei, & charitatis) non sint æquales, tamen intellectus potest acquirere tantum præmii, credendo Articulos Fidei, & dirigendo voluntatem ad diligendum ipsos. . . . quantum voluntas

potest acquirere per diligere, & intellectum pungere ad credendum vel intelligendum.

XXIV. Ex dictis apertissime constat mens Lulli, videlicet quòd gloria datur secundum merita, & quòd homo in via acquirit meritum ejusdem gloriæ; hoc autem meritum unicè cum gratia Dei acquiritur, & mediantibus fide, spe, & charitate, quæ sunt dona à Deo data ad merendum; ita quòd non aliter prædestinatur homo ad gloriam, nisi ex meritis ejusdem prævisis: unde manifestum est, ejus mentem esse omnino alienam ab eo, quòd gloria, ut ipsi impingitur, homini detur secundum naturalia & ex naturalibus; ac proinde, si quid dixerit, quod contrariari videatur, juxta rectè Critices regulas debet intelligi conformiter ad ejus mentem adeò patenter in hoc eodem libro expositam. At neque in hac quæstione notata, per se ipsam expensa, & præcisivè à contextu aliorum quæstionum, habetur sufficiens fundamentum impingendi Lullo præsumtum errorem, ut manifestum fit ex ejus reflexione.

Textus
prop. 9.

XXV. Itaque in citata quæstione 18. Sent. quærit. *Utrum augmentum charitatis habeat finem?* Hoc autem inquit consequenter ad q. 17. in qua resolvit, quòd charitas potest augeri, non quidem per additionem essentiae habitus charitatis ad essentiam habitus charitatis, sed tantum per actus charitatis potest fieri hæc augmentatio: unde nunc inquit, an hæc augmentatio habeat finem; ad ejus autem resolutionem, ita num. 1. præmittit: *animæ non sunt æquales secundum existentiam* (id est secundum suum esse naturale) *nec per consequens secundum operationem; sicut anima B. Petri, quæ est major quàm anima B. Guillelmi, quia si essent æquales, sequerentur plura inconvenientia, cum in Patria non sit dare vacuum, quod esset, si animæ essent æquales, sicut anima Guillelmi, quæ non meretur tantum gloriæ, quantum anima B. Petri; & sic remaneret vacua gloria, ratione cujus vacuitatis non haberet plenam gloriam; & sic illa quantitas substantiæ, per quam posset recipere majorem gloriam, esset superflue creata à Deo, & impediret quòd anima non haberet perfectam gloriam, quod est impossibile.* Et num. 2. scribit: “ Et si dicis quòd Deus per gratiam impleat animam Guillelmi gloriâ, ut sit æqualis animæ B. Petri in plenitudine gratiæ & gloriæ, dicis quòd Deus faciat injuriam animæ B. Petri, in quantum illi dat plus gloriæ per gratiam, qui non meruit tantum gloriæ, quàm illi, qui meruit plus; quod est impossibile: per quam inæqualitatem est demonstratum,

quodd animæ sint inæquales, ratione cujus inæqualitatis respondeo ad quæstionem, &c.

XXVI. Scopus Lulli in hoc Textu est ostendere inæqualitatem animarum secundum esse naturale, quo dicunt capacitatem recipiendi gloriam; & ad hoc probandum supponit, quodd anima B. Guillelmi non habet tantam gloriam, quantam anima B. Petri; & hoc ided, *quia non meretur tantum gloriæ quantum anima B. Petri*, quid verò clarius dici poterat, ad ostendendum, quodd gloria datur secundum merita? Unde, cum expressè asserat, quodd anima quæ non meretur tantum gloriæ, quantum alia, non habet tantum gloriæ, quantum illa, evidens est, non intendere quodd gloria detur secundum naturalia & ex naturalibus, sed secundum merita: quæ quidem ex Doctrina ejusdem in hoc eodem libro, ut constat ex dictis à num. 16. non habentur, nisi ex Dei gratia & dono Sancti Spiritus. Similiter in verbis relatis ex num. 2. hujus quæstionis constat, gloriam dari à Deo ex meritis, & ita quodd Deus faceret injuriam, si daret plus gloriæ per gratiam illi, *qui non meruit tantum gloriæ, quam illi qui meruit plus*: ergo evidens est, Lullum sentire, quodd ex justitia gloria datur secundum merita; ita ut plus detur ex justitia illi, qui plus meruit; atque ita non datur secundum naturalia, & ex naturalibus.

XXVII. Supponit quidem Lullus, totam capacitatem naturalem animæ beatæ esse plenam gloriæ, aliàs anima esset vacua, & non esset perfectè beata, & ei deficeret complementum gloriæ; at hæc gloria, quæ eam replet, non datur ipsi, nisi secundum meritum, ita ut plus gloriæ detur illi, quæ plus meruit; & quæ, ut supponit tanquam exemplum, plus gloriæ habet anima, B. Petri, quàm anima B. Guillelmi, infert quodd anima B. Guillelmi est inæqualis animæ B. Petri in natura, & quoad esse naturale, secundum quod dicit capacitatem naturalem recipiendi gloriam; quia, cum utraque quoad capacitatem naturalem sit plena gloriâ, ut sit perfectè beata, minorem capacitatem habet & minus esse naturale illa, quæ minorem gloriam recipit, cum sit tota plena cum minori gloria, & alia non sit tota plena nisi cum majori gloria; & quia plenitudo majoris gloriæ est in majori anima, quæ plus meretur, & plenitudo minoris gloriæ est in minori anima, quæ minus meretur, ided gloria utrique datur secundum merita, & non secundum naturalia, & ex naturalibus.

XXVIII. At dices: juxta Lullum, animæ, quæ est major in ca-

pacitate naturali, datur in Patria tanta gloria, quanta requiritur, ut sit plena & non vacua; atque ita datur major gloria, quam animæ minori in capacitate naturali; & quia potest esse, quod anima major non meruerit tantam gloriam, vel etiam quod anima minor meruerit plus, vel æqualiter ac anima major, idèd tunc, cum anima major non meruerit tantam gloriam, illa major gloria non erit ex meritis, sed ex capacitate naturali, videlicet ut plena sit illa capacitas naturalis. Ad hanc tacitam in Textu citato objectionem Lullus in eadem quæstione, & quidem respondens ad aliam objectionem, prætendentem gratiam & charitatem in anima posse esse infinitam, satisfacit num. 5. dicens: *Et sic Sanctus Spiritus non limitat gratiam in anima quoad se, sed anima, quæ est finita, limitat ipsam in quantum non potest plus recipere secundum suam quantitatem naturalem, & virtutes acquisitas, & gloriam determinatam per justitiam Dei, & per suam providentiam, qui omnia creata sic mensurat, & comprehendit cum sua sapientia, sicut omnia quæ sunt in tempore, mensurat & comprehendit cum sua æternitate.*

XXIX. Hæc Lulli Doctrina alludit & coincidit cum illa plurium Theologorum, videlicet quod nedum merita, sed etiam ipsa prædestinati substantia & natura, sunt effectus prædestinationis, ita ut naturam ipsam & merita conferat Deus conformiter ad gloriam, quam unicuique prædestinavit; atque ita sensus Lulli est, quod ex divina providentia ita disponitur ordo rationalium creaturarum ad gloriam, quod natura ipsa importans naturalem capacitatem evehitur ad correspondentes virtutes ac merita, ut per justitiam conferatur eidem determinata gloria: non quod natura ipsa pura sit ad gloriam proportionata, vel ipsi aliquo modo debeatur, sed ita regitur per providentiam, ut consequatur per gratiam illa merita, propter quæ ipsi conferatur illa gloria, quæ plena & completa fit tota naturalis capacitas animæ; atque ita, licet anima major in natura, quamvis propter libertatem possit magis vel minus mereri, imò minus mereri, quam anima minor in natura, ut dirigitur tamen & gubernatur sub infallibili Dei scientia & providentia, ita de facto meretur, omninò liberè & absque ulla constrictione, ut conferatur ipsi gloria secundum merita, quæ plena, completa, & satisfacta sit ejus naturalis capacitas recipiendi gloriam; & hoc modo, licet detur animæ tanta gloria, quanta est ejus naturalis capacitas, non datur ei secundum naturalia, & ex naturalibus, sed secundum merita per gratiam acquisita.

XXX. Hic modus discurrendi de hominibus videtur conformis modo discurrendi de Angelis, quem habet D. Angel. 1. part. quæst. 62. art. 6. ubi quæritur. *Utrum Angeli sint consecuti gratiam secundum quantitatem suorum naturalium?* Et in corpore ita scribit: “ Respon-
 „ deo dicendum, quodd rationabile est, quodd secundum gradum na-
 „ turalium Angelis data sunt dona gratiarum, & perfectio beatitu-
 „ dinis: cujus quidem ratio ex duobus accipi potest; primò quidem
 „ ex parte ipsius Dei, qui per ordinem suæ sapientiæ diversos gra-
 „ dus in Angelica natura constituit, sicut autem natura Angelica
 „ facta est à Deo ad gratiam & beatitudinem consequendam, ita &
 „ gradus naturæ Angelicæ ad diversos gradus gratiæ & gloriæ ordi-
 „ nati videntur: utpotè, si ædificator lapides polis ad constituen-
 „ dum domum, ex hoc ipso quodd aliquos pulchrius & decentius
 „ aptat, videtur eos ad ordinationem partem domûs ordinare: sic
 „ igitur videtur, quodd Deus Angelos, quos altioris naturæ fecit,
 „ ad majora gratiarum dona & ampliorem beatitudinem ordinavit.
 „ secundò apparet idem ex parte ipsius Angeli; non enim Angelus
 „ est compositus ex diversis naturis, ut inclinatio unius naturæ im-
 „ petum alterius impediat aut retardet, sicut in homine accidit,
 „ in quo motus intellectivæ partis, aut retardatur, aut impeditur
 „ ex inclinatione partis sensitivæ; quando autem non est aliquid,
 „ quodd retardet aut impediat, natura in id secundum totam suam
 „ virtutem movetur; & idèd rationabile est, quodd Angeli, qui
 „ meliorem naturam habuerunt, etiam fortiùs & efficacius ad Deum
 „ sunt conversi: hoc etiam in hominibus contingit, quia secundum
 „ intentionem conversionis in Deum datur major gratia & gloria,
 „ unde videtur, quodd Angeli, qui habuerunt meliorem naturam,
 „ habuerunt plus de gratia & gloria. „

XXXI. Resolvit itaque D. Thomas, quodd Angeli consecuti sunt gratiam & gloriam secundum quantitatem naturalium, ita ut major in natura majorem habuerit gratiam & gloriam; non obstante quodd art. 4. resolvit, quodd Angeli meruerunt suam beatitudinem sub gratia, in qua fuerunt creati; atque ita etiam non repugnat, quodd homo habeat gloriam similiter proportionatam, suæ naturæ, ita tamen ut eam priùs mereatur. Nam ratio D. Thomæ pro Angelis idem arguit in hominibus, cum animæ humanæ etiam sint create ad gloriam, & Deus eis indiderit naturalem appetitum suæ beatitudinis; & etiam quia ex D. Thoma 3. P. quæst. 9. art. 2. ad 3. visio beata est secundum naturam hominis, in quantum scilicet secun-

dum naturam est capax ejus ; & 3. Part. quæst. 7. art. 9. ad 3. dicit ; quod plenitudo gratiæ attribuitur animæ Christi secundum capacitatem creaturæ : & consequenter anima , quæ major est à Deo creata , ad majorem gloriam est ordinata , sicut lapis pulchrius aptatus ordinatur ad decentiorem partem domus ; & hoc habet locum , tam si homines sint creati ad reparandas ruinas Angelorum , quàm si per se sint ad beatitudinem creati , sive ad utrumque ; quia , sicut debent Angelis suo modo æquari in gloria , sic videntur æquandi & proportionandi diversitati naturæ eorum , ut perfecta sit eorum coordinatio. Non me latet Divum Thomam oppositum sentire de hominibus in hoc articulo ; at eadem ratio , quæ probat de Angelis , concludit de hominibus ; disparitas autem , quam assignat D. Thomas ex eo : quod homo est compositus ex diversis naturis ; non autem Angelus , solum probat , quod homo non ita promptè , & secundum totam activitatem naturæ rationalis potest ferri in Deum , sicut Angelus , & quod non debuit beatificari statim post primum actum , sicut Angelus : At totum hoc non impedit , quin anima in majori perfectione creatâ , sit ordinata ad majorem gloriam , & quod hæc eidem conferatur conformiter ad majora ejus merita , quæ acquirit major ejus natura.

XXXII. Imò videtur hoc conformari eidem Doctori Ang. in 1. Sent. dist. 17. quæst. 3. *Utrum charitas detur secundum capacitatem naturalium ?* Nam in corpore ita scribit : *Respondeo dicendum quod , cum Deus habeat æqualiter ad omnia , oportet quod diversitas donorum receptorum ab ipso attendatur secundum diversitatem recipientium ; diversitas autem recipientium attenditur secundum quod aliquid est magis aptum & paratum ad recipiendum.* Posito autem quod anima differenter se habet ad perfectiones acquisitas , ad quas se habet activè , & ad infusas , ad quas tantum se habet passivè , concludit : *Unde operationes animæ se habent ad perfectiones infusas solum sicut disponentes. Dicendum est igitur quod mensura , secundum quam datur charitas , est capacitas ipsius animæ , quæ est ex natura simul & dispositione , quæ est per conatum operum ; & quia secundum eundem conatum magis disponitur natura melior , idè qui habet meliora naturalia , dummodo sit per conatus , magis recipiet de perfectionibus infusis , & qui pejora naturalia , quandoque magis recipiet , si adsit major conatus.*

XXXIII. Ex hac D. Thomæ Doctrina observare licet , primò , ipsum admittere in animabus gradus naturarum , ita ut una sit major quàm alia , quia una est alia melior & secundum Phrasim Augustini

in spiritualibus, idem est melius ac majus; *Secundò* quòd mensura, secundùm quam datur charitas, est animæ capacitas, quæ est ex natura simul & conatu operum; *Tertiò* quòd natura melior pari conatu magis disponitur; & *Quartò* quòd natura melior pari conatu magis recipit de perfectionibus infusis, quàm natura inferior. Si ergo in distributione charitatis attenditur à Deo differentia naturæ, ita ut illam distribuatur cum attentione ad ipsam, taliter quòd, quamvis ex parte ipsius naturæ requiratur conatus, sub pari tamen conatu majorem recipit natura superior, quàm inferior; eadem ratione in distributione gloriæ attenditur natura, ita ut natura melior majorem gloriam consequatur per majorem charitatem, quam habuit merendo ipsam gloriam, quin per hoc gloria detur secundùm naturalia, sicut secundùm ipsam non datur gratia.

XXXIV. Hanc eandem distributionem gratiæ ac meritorum atque gloriæ cum attentione ad diversitatem graduum naturæ in animabus, quemadmodùm in Angelis, persuadet ipsa Hyerarchia seu ordo beatarum animarum in Patriâ: siue ipsæ evehantur ad Hyerarchias Angelorum, siue constituent distinctam Hyerarchiam. Ratio est, quia hic ordo beatarum animarum est perfectus: unde, cum natura se habeat tamquam fundamentum & materia, cui superstruitur domum gratiæ, tamquam quid perfectivum ejusdem; distributio donorum gratiæ in illo ordine beatarum animarum videtur debere cadere super ordine naturarum, ut perfectus ordo probetur. Hæc est eadem ratio, quæ de Angelis discurrit Div. Thom. in 2. Sent. dist. 9. quæst. 7. *Utrum distinctio ordinum sit à natura?* Nam in corpore ait: *Respondeo dicendum quòd donum gratiæ est perfectivum naturæ, & ideo distinctio ordinum est per diversum donum gratuitum, sicut per principium formale, & per diversum donum naturale, sicut per principium quasi materiale & dispositum: Unde definitio ordinis utrumque complectitur, comprehendens principia formalia & materialia: sic ergo quodam modo à principio creationis fuit distinctio ordinum, non tamen secundùm ultimum complementum.* Adedq; cum ordo complectatur naturam tamquam quid materiale, & donum gratuitum tamquam quid formale, videtur ordinem beatarum animarum etiam esse secundùm ordinem, similem ordini Angelorum; cum ipsæ sint spirituales, creatæ ad Deum videndum, & æquali objecto beatitudinis fruantur ac Angeli.

XXXV. Itaque, sicut pro diversitate & ordine naturæ Angelorum, Deus ex sua sapientissima ordinatione eisdem distribuit dona gratiarum & merita, propter quæ eisdem contulit gloriam correc-

pondentem (& quodammodò proportionatam) eorum naturæ , meritis ornatae , & sic evasit ordo eorum undique perfectus , & satiata fuit tota eorum capacitas consequendi Deum , quo fuerunt completè beati : sic similiter ex sapientissima Dei providentia actum est in animabus beatis (salva differentia in modo operandi , & consequendi merita , propter animarum unionem cum corpore) atque ita , ut esset perfectus ordo animarum sanctarum , & ipsæ plenè & perfectè essent beatæ , ita ut esset satiata tota earum capacitas ; attenta earum naturæ majoritate & minoritate distribuit eis Deus majoritatem & minoritatem gloriæ , utque eam consequerentur , proportionata merita distribuit : non quod natura ipsarum de se sit proportionata & exigit gratiam vel gloriam , vel quòd ipsi debeatur , vel quòd per se debeat esse illarum mensura , vel ullatenus in ipsas per se influat natura ; sed quia pulchritudo ordinis earum ex sapientissima Dei providentia petit easdem ita distribui , ut majores ex Dei gratia majora consequantur merita cum omnimoda libertate , ita ut minora potuerint consequi , imò & nulla ; ut sic majorem consequantur gloriam , quâ totaliter satietur tota earum capacitas .

XXXVI. Huc videtur conducere doctrina Eminentissimi Sfrondati in *Nodo prædestinat.* p. 1. §. 1. n. 19. vers. 3. *Tertiò denique* , pag. 93. ubi scribit : “ Respondetur , Deum ad diversissimos gradus gloriæ , ” & per diversissima quoque media , juxta infinitæ providentiæ suæ ” sapientissimas regulas homines destinasse ; nec enim minor in ordine supernaturali , quàm naturali , varietas est . Inter tot stellarum , gemmarum , florum , plantarum , brutorum , volucrum , hominumque millia nullum alteri simile ; alia species , alius color , alia figura , aliæ dotes , aliæ facies , alii mores sicut ergo infinita Dei perfectio , causa est varietatis in bonis naturæ , ita quæ in bonis gratiæ ; & idè alia gratia est quæ datur Petro , alia quæ Paulo , alia quæ Judæ , sic tamen alia , ut omnibus ad benè operandum accomodatissima sit , non secus ac in magno exercitu , & à peritissimo Duce , non omnibus eadem arma tribuuntur , sed aliis gladius , aliis lancea , aliis tela , aliis faces ; omnia tamen ad pugnandum & vincendum aptissima : quod ergo militibus sunt alia arma , hoc sunt Christianis aliæ gratiæ . ” Sic planè ex ordinatissima sua providentia , quâ prædestinatos deducit Deus ad gloriam , & determinatum ejus gradum , in quo plenè & perfectè satietur eorum capacitas consequendi Deum , distribuit omnibus convenientes gratias , quibus merita comparent , & sic juxta merita præmiuntur .

XXXVII. Eandem distributionem gratiæ & gloriæ, attento diverso naturæ gradu, exponit Franciscus-Georgius Venetus Minorita. Lib. *de Harmonia mundi*, cant. 3. tom. 2. cap. 2. ubi contra Aristotelicos probat inæqualitatem animarum, quam confirmat ex condemnatione Episcopi Parisiensis relata num. 19. & ex illo Sapient. 8. 19. *Puer eram ingeniosus, & sortitus sum animam bonam*, meliorem videlicet, quam multi alii, & post alia ait: "Observe precor Apostoli verba, *dedit*, inquit, *alios fieri Apostolos, alios Prophetas, alios Evangelistas & Doctores, ad consummationem Sanctorum in opus ministerii, in adificationem corporis Christi*: si enim dedit aliquos fieri Apostolos, nonne distinguit Apostolicatûs donum à dispositione intrinseca quâ dedit eos convenienter assumi ad Apostolatûm? Quod nisi dedisset, ad ipsum gradum minùs convenienter fuissent assumpti. Quàm optimè in hoc negotio loquitur Gregorius: conveniunt, inquit, Angeli similiter & homines in muneribus, sicut & in donis aut gradibus naturâ tributis." Et tandem de gradibus in humana anima ait: "Quos gradus Hyeronimus vires nuncupat" dicens, super illud de quinque talentis datis unicuique secundum propriam virtutem: non pro largitate & paritate alteri plus, & alteri minus, tribuit, sed pro accipientium viribus." Ibid. cap. 3. probans, æquissimè Deum, tum dona naturalia, tum supernaturalia, distribuere, præter alia scribit: "His igitur naturâ differentibus assignata sunt dona varia, unicuique secundum propriam virtutem & dispositionem, quibus etiam præmia redduntur secundum opera ipsorum, proportionem tamen geometrica, quæ non est penès numerum, sed penès proportionem proportionum: ut quæ sit proportio munerum ad munera & meritorum ad merita, eadem sit proportio præmiorum ad præmia."

XXXVIII. Planè inæqualitatem visionis in Patria, licèt hæc ex communi Patrum assensu secundum merita tribuatur, à paucis eorum explicari unde proveniat, fatetur Petavius, Theolog. Dogm. tom. 1. lib. 7. c. 10. num. 5. subjungit tamen: "Unum hoc paucos ex illis animadverti dicere, pro mentis, ac cognoscentis facultatis conditione visionis istius, & eorum, quæ unâ percipiuntur, varietatem & inæqualem perfectionem existere; nam Cyrillus Hierosolymitanus in *Catechesi* 6. ubi de Beata Dei contemplatione loquitur, postquam illa scripsit, quæ nos supra ex eo descripsimus, Angelos Deum intueri, quatenus capere ipsi queunt, ac solum unigenitum Filium cum Spiritu Sancto perfectè conspicere;

„ superioris autem ordinis Angelos, veluti Thronos & Dominatio-
 „ nes, plenius videre quàm inferiores, ut sunt Angeli & Archan-
 „ geli: deinceps disparis illius contemplationis causam hanc subjicit,
 „ quòd unicuique, *quantum capax est*, *revelatur à Filio & Spiritu*
 „ *Sancto Deus. Tùm verò unicuique Angelorum*, ait, *pro modulo vi-*
 „ *rium revelat cum Spiritu per Spiritum Sanctum unigenitus.*

XXXIX. Subdit immediatè Petavius: „ Ita Gregorius Nazianze-
 „ nus, Orat. 34. Angelos, *prout illorum est ordo*, *plùs minùsve Deum*
 „ *cernere*, non sine dubitatione scribit: sic Dionysius in cap. 1. de
 „ divinis Nominibus; *si quid sapientissimæ, ac verissimæ Theologiæ*
 „ *Decreto Fidei est habendum*, *pro ratione uniuscujusque mentis*, *di-*
 „ *vina revelari*, & *inspici*, *asserit*; eò quòd divina illa & principalis
 „ bonitas, *præ modi*, *ac mensuræ servatrice justitia*, *immoderatum*
 „ *omne*, *tamquam id*, *quod capi non potest*, *secernit*. Qui locus infig-
 „ nis est, in quo, uti Maximus observat, de Angelis non minùs quàm
 „ de hominibus loquitur, imò de illis præsertim, quoniam mentes
 „ propriè vocantur Angeli. Igitur beatis mentibus, *pro cuiusque mo-*
 „ *dulo ac facultate perspicua Dei illuminatio tribuitur*, ait Maximus:
 „ quod est justitiæ proprium; *hujus enim est*, *pro cuiusque merito ac*
 „ *dignitate partiri*. Quocirca modum omnem superat quidem Dei cog-
 „ nitio, Nos autem modo, *ac mensurâ opus habemus*. Nam si immo-
 „ deratè nobis revelaretur, *ab interitu servari non possemus*: uti neque
 „ corporis oculus si totum solem reciperet. Idem etiam & in cap. 9.
 „ de Coeles. Hierarch. tradit Dionysius: *Pro intelligibilium oculo-*
 „ *rum, visionumque dissimilitudine*, *divini splendoris ac radii communi-*
 „ *cationem esse diversam*. Epiphanius denique in Hæresi Audianorum,
 „ divinæ voluntati ac potentiæ diversos illos divinæ visionis gradus
 „ assignat.

XL. Præterea nota est Scotistarum sententia, ut videri potest
 apud Mastrium in 1. Sent. disp. 6. à quæst. 6. quòd videlicet, ne-
 dum intellectus creatus per potentiam naturalem, elevatam tamen,
 & ut causa principalis effectivè producit visionem beatificam, sed
 „ etiam, ut ipse Mastrius resolvit quæst. 7. intellectus perfectior cum
 æquali lumine gloriæ producit perfectiorem & intensiorem visionem:
 ex quâ sententia nedum apparet inæqualitas animarum in perfectione
 naturali, vel inæqualitas capacitatis videndi Deum, sed etiam quòd
 intellectus præditus naturali majori capacitate, supposito lumine
 gloriæ, perfectiorem & intensiorem habet visionem; atque ita ma-
 jorem formalem beatitudinem, quæ in hujusmodi visione consistit;

& hoc potius coheret cum sententia Lulli supra, num. 25. exposita, secundum sensum, quem ibi Mastrius num. 196. ex Vulpe & Pontio refert, videlicet quod *infimum lumen gloriæ sufficiens est ad elevandum intellectum quantumcumque perfectum secundum omnem gradum activitatis suæ*; ac proinde quicumque intellectus humanus in Patria cum lumine sibi dato, sive aliis sit æquale, sive inæquale, secundum omnem gradum activitatis suæ videt Deum: atque ita naturalem capacitatem complet visio Dei, supposito lumine gloriæ, quia, ut ait Mastrius ibid. *lumen requiritur, ut intellectus per ipsum constitutur in ordine agentis supernaturalis; quare semel eo informatus, cujuscumque sit gradus, potest exire in actum cum tali vel tanta expressione*: Unde subinfert postea; *licet perfectio specifica actûs, quatenus est supernaturalis, commensuranda sit juxta perfectionem habitûs elevantis, tamen perfectio gradualis, de qua hic est sermo, commensuranda potius videtur juxta virtutem, & activitatem intellectûs elevati, quam juxta activitatem habitûs elevantis.*

XLII. Profectò videri potest ipse Mastrius ibi, num. 201. ubi probat repugnare, beatum pro sua majori activitate non elicere majorem Dei visionem; quod ostendit in duobus Beatis habentibus æqualia merita, sed inæquales potentias; quia non posset tunc fieri absque innaturalitate, violentiâ, ac miraculorum fictione, quod habens perfectiorem potentiam, non eliceret perfectiorem visionem; impediretur enim, *ne Deum videat, ac diligat conatu suæ activitati proportionato*; & concludit; *satiùs est dicere, intellectum & voluntatem perfectiorem, etiam suppositâ meritorum ac luminis, & charitatis æqualitate, de facto perfectiorem quoque elicere visionem, & fruitionem, correspondentem perfectioni potentiæ; ita enim dicendo, salvatur tum ordo naturæ, qui postulat, ut unaquæque causa permittatur agere secundum gradum activitatis suæ, tum ordo gratiæ & gloriæ, quæ non destruunt naturam, sed potius perficiunt.*

XLII. Tandem, num. 202. sic scribit Mastrius: “ Sed urgent ad-
 ” versarii, unum absurdum ex hoc dicendi modo sequi majus om-
 ” nibus illis, quia secundum scripturas & Patres visio datur, ut
 ” merces meritis correspondens, & unicuique secundum proprium
 ” laborem, 1. Corint. 3. quod confirmat Concilium Florentinum
 ” dicens: visionem esse perfectiorem pro ratione meritorum; sed
 ” juxta hanc secundam assertionis partem aliquid visionis non datur,
 ” ut merces, nec ob merita, sed potius ob vim naturalem; quod
 ” Pelagianorum, & Beguardorum favet errori; quare Suarez pu-

» tat, hunc dicendi modum esse parum tutum, & fidei principiis minus
 » conformem, cap. 21. cit. num. 5. Verum, si rite perpendamus,
 » quo sensu visio dicatur merces meritis correspondens, & quo
 » sensu dicamus in casu inæqualitatis potentiarum aliquid visionis
 » correspondere perfectioni naturali potentiae, quod non esset ex
 » meritis, satis constabit; nullum ex nostra sententia sequi absur-
 » dum, & praesertim in sensu, quo possit favere Pelagianis aut Be-
 » guardis; & quidem argumentum, quatenus intendit inducere hoc
 » absurdum, multa falsa continet, quae à nobis non admittuntur;
 » Primum enim falsum est, excessum illum perfectionis in visione ita
 » à nobis adscribi naturae, ut nullo modo fundetur in gratia, nam
 » semper supponimus donum gratiae, quo per lumen intellectus ele-
 » vetur ad visionem, quo sensu non tribuitur naturae nudae & sim-
 » pliciter sumptae, ut asseriebant praefati Hæretici, sed naturae ele-
 » vatae per divinam gratiam donantem lumen. Secundò non ita as-
 » signamus hunc excessum naturae correspondentem, quasi intellec-
 » tus per suam naturalem virtutem aliquem gradum visionis attin-
 » gat, in quem non influat lumen, quia, ut constat ex superius dic-
 » tis, intellectus cum lumine non sunt partiales causae, partialitate
 » effectus, sed solum partialitate causae, ita ut nullus sit gradus in
 » visione, in quem simul non influat intellectus & lumen, ex Scoto
 » 1. d. 17. q. 9. G. & V: Unde intellectus maioris virtutis eodem
 » prorsus lumine, quo deterior producit pauciores, producit plu-
 » res, sic, ut in omnes & singulos influat lumen, modo explicato
 » num. 196. quare, cum dicimus excessum illum correspondere ac-
 » tivitati intellectus, non est in eo sensu intelligendum, quasi in
 » eum non influat lumen, sed quatenus in omnes fortius influit in-
 » tellectus, quam lumen, qua praecise de causa excessus ille dicitur
 » correspondere activitati intellectus, non luminis. Tertiò, cum in
 » sacris litteris visio dicitur merces & praeium, planè non ita de-
 » bet intelligi, ut secundum se totam in omnibus sit merces pro-
 » prii laboris, etenim in Pueris baptizatis nullam rationem merce-
 » dis proprii laboris habet, nec in adultis quoad illum gradum, qui
 » correspondet gratiae sacramentali; ex quo deducitur opus non esse
 » ut tota visio respondeat solis meritis propriis ipsius Beati, sed vel
 » propriis, vel Christi ex opere operato applicatis, ut Lusitanus ad-
 » vertit quaest. 11. cit. à num. 35. ubi tandem concludit num. 48.
 » excessum in visione correspondentem meliori virtuti respondere
 » meritis Christi, quibus nobis meruit plures praedestinationis effec-

„ tus inter quos à Theologis enumeratur præstantia & subtilitas in-
 „ genii , quoniam , sicut Deus suâ providentiâ eam prædestinavit ,
 „ ut melius suæ vocationi occurreremus ad majorem gloriam , ita
 „ etiam ut per eam majorem haberemus visionem.

XLIII. Et num. 203. sic scribit idem Mastrius : “ Itaque , cùm
 „ omnes prædestinationis effectus pendeant ex meritis Christi, ut est
 „ communis Theologorum Doctrina , quamvis visio sub hac ratione
 „ non habeat rationem mercedis , nihilominus habet rationem be-
 „ neficii nobis à Deo collati ex Christi meritis , ex quo fit , visio-
 „ nem huic naturæ præstantiæ correspondentem , non præcisè cor-
 „ respondere naturæ , ut natura est (videtur addendum , *sed ut est*)
 „ divinitus ordinata , ut per eam supernaturaliter elevatam major
 „ conferatur visio ; ex quo tandem constat quantum distet sententia
 „ nostra ab errore illorum Hæreticorum , gratiam negantium ; non
 „ enim nos negamus gratiam , sed cum gratia salvamus naturam ;
 „ neque enim gratia , aut gloria destruit naturam , sed potius per-
 „ ficit & extollit ; constat etiam , quàm oscitanter dixerit Suarez
 „ nostram sententiam esse principiis Fidei parum consonam , etenim
 „ Scripturæ , Concilia , & Patres solum docent unicuique dandam
 „ beatitudinem secundum sua merita , aded ut non detur tantum
 „ propter merita , sed etiam cum proportionem ad merita , & quod
 „ majora fuerint merita , majorem quoque futuram beatitudinem ;
 „ quod planè totum concedit sententia nostra ; non tamen docent
 „ ex solis meritis propriis habere quod sit major , quia talis majo-
 „ ritas attendi etiam potest ex meritis Christi , & ex ipsa natura , non
 „ quidem nudè sumpta , sed ut est divinitus ordinata , ut per eam
 „ supernaturaliter elevatam major conferatur visio ; itaque etiam in
 „ sententia nostrâ , beatitudo est merces correspondens meritis pro-
 „ priis in adultis , & datur major vel minor pro ratione meritorum ;
 „ aded ut non detur minor unquam quàm sit meritorum dispositio ;
 „ non tamen semper opus est totam habere rationem mercedis &
 „ præmii proprii laboris , totamque correspondere meritis pro-
 „ priis ; nam secundum aliquem gradum potest etiam correspon-
 „ dere meritis Christi , etiam secundum illum , qui dicitur corres-
 „ pondere majori activitati intellectûs , & sic semper verum erit di-
 „ cere in aliquo sensu , quod beatitudo datur propter merita , &
 „ cum proportionem ad merita , vel propria vel Christi nobis appro-
 „ priata ; atque ex his patet , quo sensu intelligendæ sint major &

» minor in argumento assumptæ ; quod adversarii adeo exaggerant ;
 » quasi nostrum assertum sit contra Fidem.

XLIV. Hæc fanè evincunt quàm absque ulla erroris umbra dixerit Lullus in cit. quæst. sent. Animam majorem habere in Patria majorem gloriam , ut tota sua capacitas esset plena , & nullo modo vacua ; non quidem ex naturæ exigentia & debito , sed secundum merita , ita ut Deus ex sua sapientissima providentia , sapientia , & justitia , gloriam determinatam animæ destinaverit , attentâ naturali capacitate meritis ornatâ ; atque ita distribuit dona , & gratias , ut merita consequatur , quibus ei talis gloria conferatur , quâ sit plena & satiata tota ejus capacitas Deum videndi & consequendi ; nedùm enim , ut constat ex dictis de mente Lulli à num. 20. secundum merita , quæ talia solum sunt est gratia , confertur determinatus gloria gradus ; sed etiam in Patria , nedùm supponit charitatem supernaturalem in voluntate ad amandum Deum , sed etiam ibidem quæst. 138. requirit lumen gloriæ in intellectu , ut Deum videat , cum intellectus non possit habere vigorem per se , sed Deus dat ei lumen gratiæ & veritatis , sub quo est passivus ad attingendum illam supremam visionem , in qua est activus. . . . aliàs si intellectus in Patria esset activus sine prædicta passione (id est sine lumine , quod passivè recipit) non esset dispositus nec proportionatus & ordinatus ad attingendum supremam visionem , nec per consequens haberet perfectam beatitudinem ; quæ quidem beatitudo ex quæst. 137. æqualiter consistit in actu intellectus illuminati per dictum lumen , & voluntatis elevatæ per supremam charitatem. Quod autem merita , quæ consequuntur homines in hac vita , sint tanta & determinata secundum Dei providentiam & sapientiam , & quidem cum attentione & correspondentia ad naturalem capacitatem , docet D. Bonaventura in 1. dist. 17. q. 4. de augmento charitatis quantum ad terminum , *utrum habeat statum vel terminum , ultra quem non possit augeri ?* In cujus resolutione sic scribit : « Respondeo dicendum , quod status est in augmento » charitatis secundum omnem modum , secundum quem convenit » esse statum & perfectionem in motu augmenti. Augmentum autem , sicut patet in corporalibus , habet statum à tribus , videlicet à virtute agente , & potentia fuscipiente , & formâ perficiente : » sicut est in homine , cujus augmentum stat , quando virtus caloris & carnis secundum speciem non potest amplius convertere , » quàm deperdatur ; quando potentia humidi radicalis non potest » plus extendi ; quando corpus perfectum est secundum quod congruit

„gruit perfectioni animæ: sic dicendum, quod charitas stat à parte
 „virtutis agentis; sed hujusmodi status potest esse dupliciter, nam
 „illa virtus, aut est operans naturaliter, aut à proposito; si natu-
 „raliter, tunc stat, quando non potest amplius; si à proposito,
 „tunc stat, quando non disponit amplius; & hoc modo stat chari-
 „tatis augmentum, cum deventum est ad mensuram, quam mensus est
 „Deus homini secundum distributionem suæ sapientiæ, & ideo, licet
 „virtus augmentans sit infinita, tamen operatur secundum dispositionem
 „sapientiæ limitantis effectus varios secundum quod placet sibi; non
 „enim operatur secundum omnimodam possibilitatem. Stat etiam à
 „parte suscipientis, quia sicut dicitur Matthæi, 25. dedit unicuique
 „secundum propriam virtutem. Unde, sicut ex D. Bonav. cha-
 „ritas habet determinatum augmentum, secundum quod dispositum
 „est in divina sapientia & secundum potentiam suscipientis, ita &
 „meritum, quod non est nisi secundum charitatem. Etiam ipse Divus
 „Bonaven. in 2. dist. 9. quæst. 3. *Utrum secundum majorem capacita-
 tem naturalium dentur à Deo majora dona gratuita?* Resolvit, quod si
 „ly secundum, dicat dispositionem congruitatis: sic, ubi non est obstacu-
 „lum, secundum omnes verum est, scilicet dari majora dona gratuita se-
 „cundum majorem capacitatem naturalium, quia naturalia bona de
 „congruo disponunt ad gratiam; si verò ly secundum dicat dispositio-
 „nem necessitatis, docet esse erroneam in hoc sensu affirmativam par-
 „tem propositæ quæstionis. Consequenter ex mente Divi Bonaven-
 „turæ, licet non sit necesse quod dona gratuita & augmentum cha-
 „ritatis conformentur capacitati naturali, ita ut ei debeant cominen-
 „surari, tamen secundum Dei providentiam & sapientiam, ubi non
 „est obstaculum, determinantur & conferuntur dona gratuita & aug-
 „mentum charitatis, & consequenter ipsum meritum, quod pendet
 „ex charitate, cum attentione ad naturalem capacitatem, ita ut na-
 „tura per dona sibi collata evehatur ad illam charitatis mensuram,
 „quam mensus est Deus homini secundum distributionem suæ sapientiæ;
 „& hæc quidem est illa ipsa Doctrina, quam tradit Lullus in locis
 „citatis.

XLV. Neque ex eo quod Deus secundum suam providentiam &
 sapientiam unicuique determinaverit gradum gratiæ, augmenti cha-
 ritatis, & meriti, sequitur aliquod inconveniens adversus libertatem
 hominis, & ejus potentiam merendi, ut docet Eximius Suarez, lib.
 1. de Prædest. cap. 10. ubi resolvit: *Decretum gratuitum, quod Deus*
habuit de æterna felicitate plurimum Angelorum & hominum, fuisse de-
 Tom. III.

*finitum quoad personas & gradus gratiæ, & gloriæ; nam, num. 8. contra definitum gradum gratiæ uniuscujusque Personæ, qui est idem ac definitus gradus meriti, sic objicit, & respondet: „Potest verò
 „quis objicere, quia sequitur pervenire hominem aliquando in hac
 „vita ad eum statum gratiæ, in quo jam non possit crescere, nisi
 „mirum si ad definitum gradum attingat. Imò etiam sequi, per
 „Deum stare; quominus homo sanctior fiat, quam sit de facto;
 „quia quantumvis homo conetur, nunquam poterit excedere gradum
 „sibi definitum. Sed hæc facilia sunt consideranti voluntatem
 „illam Dei non impleri, nisi per sapientem providentiam ejus, per
 „quam ita disponit uniuscujusque actiones & vitæ progressum, ut
 „tunc vita finiatur, quando impletur mensura ejus, & ideo ad pri-
 „mam illationem absolute est neganda sequela, quia quamdiu homo
 „in hac vita vivit, potest crescere in gratia; & prædestinatio non
 „impedit hoc, imò juvat; quòd autem vita finiatur simul cum ter-
 „mino prædestinationis, hoc non repugnat cum illo principio. Et
 „eodem modo respondendum est ad alteram partem, in executione
 „semper esse parata homini auxilia, quibus possit operari & cres-
 „cere quantum voluerit, imò raro aliquem adæquatè respondere
 „vocationibus Dei, & nihilominus has vocationes & auxilia non
 „æqualiter omnibus dari, sed juxta mensuram divinæ voluntatis, &
 „dispositionis uniuscujusque, quoad plura eorum, licet non quoad
 „omnia. Patet itaque non repugnare quòd Deus unicuique secun-
 „dum suam sapientissimam providentiam determinaverit gradum me-
 „riti, quem est acquisiturus correspondentem ad gradum gloriæ sibi
 „definitum; & unumquemque à Deo ita gubernari, ut liberè acqui-
 „rat illum meriti gradum, nec majorem nec minorem, qui propor-
 „tionatus est gradui gloriæ sibi definito: quid ergo mirum quòd Deus
 „ita gubernet naturas rationales, ut majores liberè majus meritum ac-
 „quirant, & minores minus; ut conferatur ipsis proportionatus glo-
 „riæ gradus, quo unaquæque ita gloriâ compleatur, ut omnino maneat
 „satiata ejus naturalis capacitas attingendi Deum. Hoc potissime vi-
 „detur ita debere esse in sententia ponentium in anima appetitum na-
 „turalem videndi Deum; hic enim appetitus non videretur plenè sa-
 „tiatus, nisi secundum totam suam capacitatem attingerent Deum.*

XLVI. Porro hæc Lulli cogitatio potissime habet locum in sen-
 tentia ponente prædestinationem ante prævisa merita, vel præcise
 ab ipsis; nam, si Deus pro sua pura gratuita voluntate prædestinat
 ad tantam gloriam, & ex hac voluntate prædestinante, tanquam à

causa, procedunt natura, gratia, dona, & merita prædestinati, nihil videtur conformius rationi, & pulchritudini ordinationis rerum, quam quòd, attenta magnitudine gloriæ prædestinatæ, conferat correspondentem magnam naturam, eamque ornet correspondentem magnis gratiis & donis, quibus mediantibus conferat merita, ut gloria prædestinata, juxta illa magna merita, magnæ conferatur naturæ, quæ sic totaliter satiatur; & propterea dicit Lullus in textu hujus quæstionis, Deum scire gradum perfectionis naturæ, ejus meritorum, & gloriæ, & ita per providentiam disponere, ut natura altior, correspondentia habeat merita ex divina gratia, ut ei ex justitia altior conferatur gloria, quâ fit totaliter plena & non vacua, plenè satiata, & nihil esuriens, si autem tota capacitas naturalis animæ non repletur gloriâ, anima non esset perfectè & completè beata; quia naturalis appetitus beatitudinis, quem plurimi D.D. agnoscunt in anima, est juxta ejus naturalem capacitatem, & est tantus, quanta est capacitas; atque ita, nisi daretur gloria pro dicta capacitate, ita ut tota repletur, non satiaretur appetitus naturalis, & consequenter non esset perfecta gloria, nec esset plenum gaudium: Unde eximius Suarez, lib. 3. de prædestinationis effectibus, cap. 7. num. 8. ait: "Cum Paulus præordinatur ad beatitudinem, non præordinatur sola Pauli substantia, quasi metaphisicè spectata, sed ut phisicè capax est ultimæ felicitatis, quo modo includit suas proprietates, præsertim intellectum & voluntatem, quæ sunt veluti subiectum proximum recipiendæ beatitudinis." Et postquam num. 10. resolvit, quòd bona indoles seu complexio apta ad virtutem, quatenus pendet ex speciali providentia, dici potest effectus prædestinationis, num. 11. ita subjungit: "Neque hinc sequitur vocationem aut gratiam congruam dari homini propter bonum ingenium aut idoleam, &c. sed potius sequitur, vel ingenium vel talem dispositionem datam esse tali homini, ut esset capax vel idoneus ad talem gratiam suscipiendam." Et in fine ait: "Ita ergo datur prædestinatio naturæ accomodata per modum subiecti aut fundamenti: illi autem adjungitur ex eadem prædestinatione & liberalitate Dei auxilium accommodatum, quo elevetur & constituatur quasi integrum principium operis meritorii, aut dispositivi ad alios effectus prædestinationis. Neque hoc est alienum à Doctrina Augustini, nam libro de bono perseverantiæ, cap. 14. dicit: in quorundam hominum ingenis esse has, vel illas proprietates, ratione quarum ita sunt dispositi, ut si talia signa illis applicentur, mo-

„veantur ad fidem, & non cum aliis, & Deus illis applicat talia
 „signa accommodata, si eos diligit, non quidem propter eorum
 „ingenium aut dispositionem, sed ex sua gratia, & liberalitate,
 „accommodando, ut sic dicam, gratiam naturæ, non ex merito,
 „vel debito naturæ, sed ex Dei benevolentia.”

XLVII. Nec difficultatem ingerere debet, Deum pro naturæ
 sublimitate vel gradu gratias & dona distribuere, & merita corres-
 pondentia conferre, ex sua quidem benignissima voluntate, sapien-
 tissima providentia, & decentissima ordinatione, non autem ex
 ulla naturæ exigentia, debito, vel ipsius apta dispositione, ut tandem
 sublimiori naturæ sublimiorem ex meritis conferat gloriam: non in-
 quam, hoc in hominibus repugnat, sicut non repugnat in Angelis,
 juxta D. Thomam supra relatum num. 26. quia utrique sunt ratio-
 nales, Dei capaces & ad eandem beatitudinem creati, quamvis
 diversis modis & mediis ad illam deducantur; & sanè hanc diversam
 donorum & meritorum distributionem pro naturæ diversitate, quam-
 vis solùm ex benignissima, & ordinatissima Dei voluntate, innuit
 illa Parabola Mátthæi 25. 15. & *uni dedit quinque talenta, alii au-*
tem duo, alii verò unum, unicuique secundum propriam virtutem,
 quòd, ut hìc advertit à Lapide, legit Arabicus: *juxta posse virtutis*
sue; & Syrus: juxta facultatem suam; nam, ut explicat ipse à Lapide,
secundum propriam virtutem idem est, *ac potestatem, robur, vires;*
 & talenta significant dona virtutum, dona gratis data, dona naturæ;
 idèd autem dicitur: *secundum propriam virtutem, quia gratias gratis*
datas, & status. *sæpè Deus viribus naturæ cõtemperat;* inde ta-
 men non sequitur, ut subjungit: “Singulis conferri Dei dona secun-
 „dum meriti modum, quod Calvinus Catholicis hìc per calum-
 „niam affingit; aliud enim est naturam capacem esse donorum Dei,
 „aliud, mereri dona Dei; aliud, posse habere charitatem, aliud, ha-
 „bere charitatem, quemadmodum docet Prosper, lib. 2. *de vocat.*
 „*gentium.* cap. 2. ubi illud: *secundum propriam virtutem,* interpre-
 „tatur, *secundum propriam & naturalem possibilitatem:* sicut & aliud
 „est esse habilem aptumque ad accipienda Dei dona, aliud ea
 „mereri.”

XLVIII. Unum hìc pro Coronide advertere lubet, quòd animas
 rationales affiqui specificè distingui autumant, alii verò solùm indivi-
 dualiter, ita tamen ut in sua latitudine sit earum gradualis distinc-
 tio, taliter quòd una sit alià naturaliter perfectior, sicut de Angelis,
 juxta varias sententias dicitur; præscindendo autem ab hujusmodi

inquisitione (à qua etiam hinc Lullus præscindit , cum solum intendat gradualem perfectionem animarum , quam omnes admittunt) notare oportet , sublimitatem vel depressionem naturæ in anima rationali non esse metiendam ex habilitate , vel inhabilitate nativa , quam habet in corpore ; quia hoc est omnino accidentale animæ , & pendet à dispositione corporis ; unde non pensanda est altior in natura anima illa , quæ vel subtilem habet intellectum , vel alias naturales habilitates ostendit ; cum sæpè alia nobilior sit , quæ ob indispotionem corporis similes exercere nequit habilitates : atque ita , cum finis præcipuus , ad quem Deus creat animas , sit Dei consecutio , à posteriori illa pensanda est excelsior in natura , quæ altius Deum consequitur , & quam Deus ad altiora virtutum provehit incrementa , ut ex justitia sublimior ei conferatur gloria ; ad hanc enim parum faciunt naturales habilitates , nisi ex Dei gratia subserviant ad merita consequenda ; & sic etiam ex majoribus meritis major à posteriori potest inferri anima ; nam hoc modo videtur dicere Apostolus 1. Corint. 1. 27. *sed quæ stulta sunt mundi elegit Deus , ut confundat sapientes ; & infirma mundi elegit Deus , ut confundat fortia ;* quia , sicut , eò quia Deus est finis animæ , tota ejus perfectio est pensanda ex capacitate eum obtinendi , ita illa , quæ magis ad ipsum conducunt , sunt ea , ad quæ magis est ordinata anima , & quæ magis ejus perfectionem ostendunt ; sola autem Dei sapientia cognoscere potest mirabilem ipsius ordinationem , quâ animam naturâ sublimem despicabili innectat corpori , & parum aut nihil ferè quoad naturalia luceat ; prout aliæ minus sublimes vivacitatem exerunt in hac vita. Unde D. Augustinus , lib. 8. de Civit. Dei , cap. 15. n. 2. ait ; *sed fieri posse , ut inferius corpus anima melior inhabitet , deteriorque superius.*

§. I V.

Docet Lullus in Prop. 10. ex quæst. 18. quod quantitas naturalis animæ limitat charitatem , ne sit infinita ; non autem eam limitat quoad gradus latitudinis ejusdem.

XLIX. Ad propositionem decimam , quam notat , sic textum citat , & Censuram innectit , laudatus Cenfor : *Anima , quæ est finita , limitat ipsam charitatem , in quantum plus recipere non potest secundum suam quantitatem naturalem. quæst. 18. circa finem.*

Censura : Indicat charitatem recipi in anima, secundum potentiam animæ naturalem.

L. Tantum abest Lullus ab eo, quod charitas secundum potentiam animæ naturalem recipiatur in ipsa, id est, quod ex ipsius exigentia, vel ex ejusdem proportionem, ac concordantia ad charitatem, hæc ipsa recipiatur: quin potius ubique docet oppositum; &, omissa adductione textuum ex aliis libris, ex hoc eodem libro abunde hoc constat; nam quæst. 16. num. 1. docet, charitatem esse habitum creatum in anima à Sancto Spiritu, ut anima possit Deum diligere eum merito, ita tamen quod à summa charitate & ab anima reducit ad actum ille habitus in ipsa creatus; & num. 3. dicit, quod Sanctus Spiritus posuit in voluntate naturam, cum qua posset producere, ipsa coadiuvante, de potentia in actum, actum charitatis; & illa natura, quæ est ex parte voluntatis sic est passiva sub summa charitate ad recipiendum suum vestigium, & similitudinem, sicut cera sub sigillo ad recipiendum vestigium & similitudinem sigilli. Quæst. 17. tenet, quod charitas est donum datum à Spiritu Sancto; & quod lapsus in peccatum non habet subiectum, in quo sit sustentata charitas; quod idem repetit quæst. 19.; & quæst. 86. docet quod charitas est virtus gratuita; & gratuito facere gratiam non spectat ad meritum quoad ipsum, qui facit gratiam; quia, si spectaret, gratia gratis facta non esset hoc quod est.

LI. Præterea quæst. 116. num. 1. ait: charitas est donum à Deo datum, ut homo cum ipsa reducat specifica bona ad communem, ut possit diligere Deum & suum proximum, & est donum datum à Deo cum divina bonitate, magnitudine, &c. Quæst. 119. ait: quod Sanctus Spiritus dat charitatem homini, ipsa creata de nihilo in subiecto, scilicet in voluntate hominis. quæst. 122. num. 1. dicit: Quod homo existens in mortali peccato non est dispositus ad recipiendum gratiam, cum non sit contritus, nec agat poenitentiam; sic Deus non posset infundere gratiam; quia, si posset, posset in ipsum infundere charitatem, & ipsam associare cum culpa & peccato in eodem instanti, quod est impossibile; sed Deus per gratiam (actualement) disponit peccatorem, qui est ligatus, ut se moveat ad bonas cogitationes, & ad peregrinationes, & ad faciendum elemosinas, orationes, & sic de similibus, ut liberè sit contritus, & agat poenitentiam de commissis; & tunc si hoc facit, in illo instanti, in quo hoc facit & incipit, iustitia, & misericordia Dei remittunt culpam, & gratia infundit charitatem in subiectum ordinatum & bene dispositum. Quare si charitas est creata, tanquam donum gratuitum à Deo collatum, nullam dicit dependentiam à natura voluntatis; & si aliquando præ-

requiritur dispositio, ad hoc ut detur, prout in peccatore, illa dispositio, licet consistat in actibus voluntatis, ortum tamen ducit à gratia Dei, hominem movente ad contritionem, & sic non datur charitas secundum potentiam animæ naturalem; nec actus eliciuntur secundum naturæ dispositionem, sed secundum influxum Spiritus Sancti.

LII. Hoc amplius patet in eadem quæst. 18. notata, in qua Lullus cum aliis Scribentibus in Magistrum inquit: *Utrum augmentum charitatis habeat finem?* Quod idem est ac quærere, an charitas possit augeri in infinitum: circa quod variant Auctores; & negantes, ut observat Palacios in 1. Sent. dist. 17. dispu. 7. nedum ex eo quod charitas sit creatura, deducunt non posse excrefcere in infinitum, sed etiã ex eo quod capacitas animæ, in qua recipitur, sit finita; concedunt tamen dicti Auctores, Deum, quantum est de se, illam posse augere in infinitum; charitas verò ex sua propria ratione, & ratione limitationis sui subiecti, in infinitum nequit excrefcere, prout docet Alensis ab eodem citatus. Cum hæc DD. catervâ sentit Lullus in præfenti quæstione, & quidem supponit, Deum quantum est de se, posse augere charitatem in infinitum, sicut quantum est de se, potest illam facere æternam; quia verò charitas est creatura, cui repugnat infinitas, sicut æternitas, infinita esse non potest; ex alio etiã titulo repugnat infinitas charitati, videlicet quia recipitur in potentia naturali animæ, & quia hæc potentia est finita, & tantum potest finitum recipere, ideo hæc naturalis potentia limitat charitatem, non quidem quoad gradus possibiles intra latitudinem charitatis secundum rationem finitæ charitatis, sed tantum limitat ipsam ne excrefcat in infinitum, & continet vel detinet ipsam in ratione charitatis finitæ.

LIII. Unde in textu hujus quæstionis, post verba ex ejus num. 1. & 2. relata supra, numero 21. quæ sunt mera præsuppositio ad decisionem quæstionis, num. 3. scribit, *quod charitas possit augeri usque ad finem determinatum in hac vita, secundum quod anima est capax ad recipiendum charitatem à Sancto Spiritu, ut supra significatum est* (videlicet quæst. 16. & 17. in quibus resolvit, charitatem esse donum creatum & datum à Sancto Spiritu) *verumtamen quoad Sanctum Spiritum semper potest augeri, sed non quoad subiectum, sicut, & multo magis, ignis potest multiplicare flammam, habendo sufficientiam lignorum, sed deficiente materia deficit ignis. Augmentationem verò charitatis dicimus, quæ consistit per agere, ut supra in decima septima quæstione dictum est.* Ex his verbis constat, terminum determinatum, quem in

hac vita supponit in charitate, esse illum, qui non permittit illam reddi infinitam, quamvis illam in infinitum possit ex se augere Spiritus Sanctus; atque ita quoad subiectum deficit augmentum infinitum, id est, quoad ipsam charitatem, quæ requirit terminum determinatum, ut finita remaneat; & quoad animam recipientem, quæ tantum habet capacitatem finitam.

LIV. Clarius hoc exprimitur in objectionis solutione, nam num. 4. sic objicit Eremita: "Charitas infusa in animam est donum, & effectus Sancti Spiritus datus per gratiam cui ipsi placet; & quia Sanctus Spiritus est infinitus, potest ultra metas voluntatis communicare gratiam, & augmentare in infinitum; & sic Sanctus Spiritus non mensurat charitatem secundum subiectum, sed secundum suam infinitam amabilitatem, ratione cujus augmentum charitatis non habet finem; at num. 5. ita respondet Lullus: *Nullum ens creatum potest tantum gloriæ (in manuscripto antiquo melius dicitur: tantum gratiæ) recipere, quantum ens increatum influere; quia, si posset tantum recipere, finitum posset esse infinitum, quod est impossibile; & sic Sanctus Spiritus non limitat gratiam in anima quoad se, sed anima, quæ est finita, limitat ipsam, in quantum non potest plus recipere secundum suam quantitatem naturalem, & virtutes acquisitas, & gloriam determinatam per justitiam Dei, & per suam providentiam, qui omnia creata sic mensurat & comprehendit cum sua sapientia, sicut omnia, quæ sunt in tempore, mensurat & comprehendit cum sua æternitate: Unde, cum hoc ita sit, tua ratio non valet.*

Text. prop.
10.

LV. Profectò totus discursus huius textus tendit ad ostendendum, juxta titulum quæstionis, quòd augmentum charitatis habet finem, seu quòd charitas in infinitum non potest augeri; atque ita tota limitatio, quam adscribit charitati, est, ne excrescat in infinitum, licet Deus quoad se possit illam pro sua infinita potestate, in infinitum augere; & propterea dicit in verbis relatis, ex quibus laudatus Censor extraxit notatam propositionem, quòd Sanctus Spiritus quoad se non limitat gratiam charitatis, sed anima, quæ est finita, limitat ipsam, quoad finitudinem scilicet, & ne excrescat in infinitum, in quantum non potest plus recipere secundum suam quantitatem naturalem; cum enim anima sit finita, sua quantitas naturalis est finita, & sua capacitas recipiendi charitatem est finita, ac proinde non potest anima recipere charitatem infinitam, licet Deus quoad se possit illi dare; & propterea ratione naturalis capacitatis animæ limitatur charitas

charitas ad finitudinem, ita quod non possit prætergredi rationem finitæ, & reddi infinita.

LVI. Quare evidens est, Nullum solum intendere capacitatem naturalem animæ limitare charitatem in hoc quod sit finita, & non perveniat ad infinitudinem, non autem ipsam limitare quoad gradus infra latitudinem finitæ charitatis, ut innuere videtur laudatus Censor in relata Censura, ita ut naturalis capacitas exigat determinatum gradum augmenti charitatis, hoc autem ita esse constat; *Primò*, quia de tali augmento nullum est verbum in tota quæstione, sed tum in titulo, tum in resolutione, objectione, & ejusdem solutione, agitur de augmento infinito charitatis; *Secundò*, quia hæc quæstio est relativa, uti expresse refertur, ad quæst. 17. in qua agitur de augmento charitatis intra suam latitudinem, & absolute ibi resolvit Lullus, quod charitas quoad essentiam non augetur, cum sit una simplex essentia; augetur autem quoad actus, hoc autem augmentum quoad actus, quod est augmentum intra latitudinem charitatis finitæ, absolute dicit esse in voluntate absque ulla limitatione ad naturalem capacitatem; *Tertiò*, quia in adducta solutione dicit, quod sicut, licet Deus quoad se, possit dare gloriam infinitam, & tamen eam non potest recipere creatura, ita est de charitate: hoc autem solum tendit ad explicandum finitudinem charitatis, sicut gloriæ; prout etiam illud, quod objicitur de infinita Dei amabilitate; & quod sicut æternitas Dei comprehendit & mensurat omnia quæ sunt in tempore, ita ut ipsa non possint esse æterna; ita sapientia Dei sic comprehendit & mensurat omnia creata in sua finitudine, ut ipsa non possint esse infinita; atque ita charitas creata non potest in infinitum augeri.

LVII. Præterea limitatio illa non attribuitur soli quantitati naturali animæ, sed aliis plurimis, nam dicitur: *sed anima quæ est finita, limitat ipsam, in quantum non potest plus recipere secundum suam quantitatem naturalem, & virtutes acquisitas, & gloriam determinatam per justitiam Dei, & per suam providentiam*: atque ita, licet capacitas naturalis animæ limitet, suo modo tantum limitat, id est passivè & ut subjectum recipiens; concurrunt etiam virtutes, quia cum ipsis augetur etiam, vel non augetur charitas; gloria etiam determinata per justitiam ac providentiam Dei concurrit etiam ad hoc, ut charitas & gratia animæ non excedat in infinitum, sed sit proportionata gloriæ, quæ non est infinita, sed determinata; & ex his omnibus concluditur, quod augmentum charitatis non potest esse infinitum, sed semper debet manere, quantumcumque augeatur, sub finitudine & limitatione.



LVIII. Hæc sanè est Doctrina Lulli quoad scopum tituli hujus quæstionis de impossibili infinitate in augmento charitatis ; pro eo tamen , quòd fortasse videbitur innuere de fine determinato , ad quem de facto augetur charitas intra suam latitudinem , ut videatur , an hoc limitatum augmentum inducat naturalis capacitas animæ , notandum est , ipsum quæst. 16. & 17. adstruere charitatem habitua-lem , seu habitum charitatis , esse creatum in anima tanquam do-num à Deo datum , & ut accidens in subjecto , ita ut hæc charitas habitualis , sit simplex essentia , subjectata , & recepta in anima ; charitas autem actualis , seu actus charitatis , est actus voluntatis , quæ est naturalis potentia , inductus & formatus charitate , ita quòd ipsemet actus charitatis est actus utriusque , scilicet voluntatis & ha-bitûs charitatis , quo voluntas est informata ; quia ex ipso , quæst. 16. num. 1. *Suprema charitas creavit , & posuit in humana voluntate in-potentia habitum charitatis* (id est taliter , ut posset deduci ad actum) ; modus autem , quo deducitur ad actum *est per voluntatem & per sum-mam charitatem* ; quia , nisi sic esset , voluntas non haberet liberta-tem ad diligendum summam charitatem , imò esset pura passio mota ; sicut instrumentum , & sine merito ; & etiam , num. 3. respondens ad objectionem , ait , quòd Spiritus Sanctus per seipsum solum creat in voluntate habitum charitatis , & sic *posuit in voluntate naturam , cum qua posset producere , ipso coadjuvante , de potentia in actum , ac-tum charitatis , & illa natura , quæ est ex parte voluntatis , sic est pas-siva sub summa charitate , ad recipiendum suum vestigium & similitudi-nem* ; atque ita naturalis virtus voluntatis informatæ habitu charita-tis cum juvamine & gratiâ Sancti Spiritûs elicit actum charitatis.

LIX. Prætereà notandum est ex ipso , quæst. 17. ubi inquit : *Utrum charitas augeatur per additionem novæ charitatis ?* Quòd charitas po-dest quidem augeri , at hoc augmentum non potest esset quoad essen-tiam habitûs charitatis , ita quod addatur essentia ad essentiam , sed tantum potest esse quoad actus , id est , possunt augeri actus charita-tis , seu actus voluntatis charitate formati ; & sicut essentia volun-tatis non augetur , sed tantum ejus actus , ita essentia habitûs cha-ritatis non augetur , sed tantum ejus actus. Tandem notandum est , quòd in hac quæst. 18. ubi agit de augmento finito vel infinito cha-ritatis , intelligit de prædicto augmento quoad actus charitatis , ut expresse notat num. 3. dicens : *Augmentationem autem charitatis di-cimus , quæ consistit per agere* (id est per actus) *ut supra in decima septima quæstione dictum est* : atque ita eà omnia ; quæ in hac q. 18.

explicat de augmento charitatis, non intelliguntur de habitu charitatis, sed de actu ejusdem, qui est actus ab ipsa voluntate elicited.

LX. Unde, licet certum sit, quod habitus charitatis, cum sit donum à Deo creatum, non pendet à naturali capacitate voluntatis, actus tamen charitatis, cum sit elicited, à naturali potentia, licet aliunde informata charitate, & adjuta à Deo pendet, à naturali potentia; atque ita, prout de facto contingit, verum est quod ait Lullus in Textu relato, num. 49. *quod charitas possit augeri usque ad finem determinatum in hac vita secundum quod anima est capax ad recipiendum charitatem à Sancto Spiritu*; quia, cum actus charitatis non pendeat à solo Deo, sed sit actus elicited ab anima adjuta Deo, & secundum conatum animæ evadat actus, cum Deus ipsam non constringat, talem actum charitatis recipit à Deo, qualis est capax anima secundum suum conatum & influxum, quem præbet sub adjutorio Dei; & licet Deus quoad se plures & plures actus & majores possit influere, quia tamen voluntas debet cooperari, ideo limitatio actuum, seu limitatio augmenti charitatis, provenit ab anima, quæ sic limitat gratiam & charitatem quoad actus, *in quantum non potest plus recipere* (ut ait ibi, num. 5.) *secundum suam quantitatem naturalem*, quæ ulterius & ardentius non conatur, & virtutes acquiritas, &c.

LXI. Similiter ac Lullus discurret D. Bonaventura in 1. dist. 17. art. 2. quæst. 4. in responsione dicens: *Sic dicendum est; quod charitas stat à parte virtutis agentis. . . si naturaliter, tunc stat, quando non potest amplius, & hoc modo stat charitatis augmentum, cum devenerit ad mensuram, quam mensus est Deus homini secundum distributionem suæ sapientiæ, & ideo licet virtus augmentans sit infinita, tamen operatur secundum dispositionem sapientiæ limitantis effectus varios secundum quod placet sibi.* Idem in 2. dist. 9. quæst. 3. *utrum secundum majorem capacitatem naturalium dentur à Deo majora dona gratuita?* In responsione ait: *Ad prædictorum intelligentiam est notandum, quod gratiam dare secundum majorem capacitatem naturalium potest intelligi tripliciter: aut ita quod hoc quod est secundum dicat efficaciam causalitatis, & sic secundum omnes falsum est, quia naturalia non sunt causa gratiæ. Aut ita quod dicat dispositionem congruitatis, & sic, ubi non est obstaculum, secundum omnes verum est, quia naturalia bona de congruo disponunt ad gratiam. Aut ita quod dicat dispositionem necessitatis, & sic secundum communem opinionem est falsum, & à Doctoribus reprobatur, secundum hoc procedit D. Bonavent. resolutio.*

& ad primum, ita respondet: *Ad illud ergo quod obijcitur in contrarium, quod dedit unicuique secundum propriam virtutem, dicendum, quod secundum dicit ibi solummodò causam disponentem de congruo. Et iterum virtus ibi vocatur conatus cordis, qui non solum dicit capacitatem, sed etiam actualem præparationem.*

D I S S E R T A T I O V. I.

De Propositionibus 11. 12. & 13. notatis ex quæst. 21. 22. 16.
33. & 38. Libri Sententiarum.

§. I.

Juxta Lullum in propositione undecima ex quæst. 21. Pater, Filius, & Spiritus Sanctus non sunt alius, & alius Deus, sicut Martinus & Guillelmus, sunt alius & alius homo, sed tantum sunt alia & alia individua substantiæ rationalis naturæ, seu alia & alia Persona.

I. **S** EQUEMTEM Textum loco undecimo notat laudatus Censor, ex quæst. 21. Lib. Sentent. videlicet: *Prætered unus, duo, tres, in divinis dicunt rem absolutam, sicut Guillelmus, qui absolute est unus homo, & Martinus alius; & oportet quod hæc alietas remaneat simpliciter inter Guillelmum Patrem, & Martinum Filium, cum Guillelmus sit unus individuus, & Martinus alius, & unus sit unus homo, & alius, alius homo; sed in Beatissima Trinitate non est sic simpliciter, sed secundum quid, sicut Pater, qui absolute est unum individuum, Filius aliud, & Spiritus aliud.* quæst. 21. Sent. num. 2.

II. Quamvis non inveniam huic Textui annexam Censuram, primum est ideo notari, quasi Lullus videatur asserere, quod, sicut Guillelmus est unus homo, & Martinus alius homo, sic Pater est unus Deus, Filius alius Deus, cum dicatur Pater esse *absolute unum individuum, Filius aliud, & Spiritus aliud*; at quam immeritò hoc de Lullo præsumatur, ostenditur ex ipso contextu, qui aperte monstrat talem non esse Lulli sensum. In notata quæst. 21. inquit Lullus: *Utrum isti termini, unus, duo, tres, in divinis dicant rem relativam, vel absolutam?* Hæc autem quæstio refertur ad quæst. 20. in qua quæritur: *Utrum in Deo sit numerus?* Quam resolvit Lullus af-

firmativè , quia in Deo sunt tres Personæ distinctæ , & sic in Deo numeratur una Persona, duæ Personæ , & tres Personæ ; advertit tamen , num. 3. quòd inter numerum , qui est in Deo , & inter numerum , qui est in creaturis , est magna differentia ; quam præter alia sic explicat eodem num. 3. dicens : Item in humana specie sunt plures homines , quàm tres , & differunt per essentiam (individualement) & naturam , per ubi , per tempus , & sic de aliis ; & sic de cæteris entibus creatis numeratis ; sed de numero Dei non est sic , quia Pater , Filius , & Sanctus Spiritus faciunt numerum , qui cum ipso numero , qui est Deus , convertuntur (id est sunt idem ac Deus , qui est unus numero Deus) ; & Pater est Deus , & Filius est Deus , & Sanctus Spiritus est Deus , & sic Deus quoad Personas est tres , & quoad essentiam & naturam est unus Deus , & non plures , & hoc est , quia Personæ non multiplicant (non componunt) tertium , sicut Pater , qui est Deus , & sic de Filio , & Sancto Spiritu ; & ratio est , quia non differunt in essentia nec in natura , nec in attributis .

III. In relatis verbis sensus Lulli est , quòd numerus , qui est in Deo , quo numerantur : *unus* , *duo* , *tres* , tantum est quoad Personas , quatenus numeratur una Persona , duæ Personæ , tres Personæ ; non autem est quoad essentiam & naturam , quatenus non numeratur unus Deus , duo Dii , tres Dii , quia tres Personæ , sicut sunt una essentia & natura , ita sunt unus Deus ; & hoc est ad differentiam numeri creati V. G. in genere humano , in quo , nedum numerantur tres Personæ , sed etiam tres homines , quia in Personis humanis est distincta individualis essentia & natura . Hoc posito , ad solutionem prædictæ quæst. 21. *Utrum unus , duo , tres , in divinis dicant rem relativam vel absolutam ?* Sic num. 1. discurret Lullus : “ Eremita , utrumque potest dici , sed diversimodè , ut in prædicta quæstione (scilicet q. 20.) significatum est . Relativè sic : ” unus Pater , unus Filius , unus Sanctus Spiritus , cum unus non possit esse sine alio ; convenit etiam quòd dicant rem relativam , ” ut in ipsis possit esse distinctio , concordantia , principium , & æqualitas , quæ non possunt esse sine relatione .

IV. Ex hoc discursu apparet , quòd sensus hujus quæstionis est , an illud , quod numeratur per istos terminos : *unus* , *duo* , *tres* , secundum suum esse , sit res relativa tantum , vel absoluta tantum , vel utrumque ; & quia resolvit Lullus , id , quod numeratur , esse utrumque , ex hoc quòd Personæ divinæ sint id quod numeratur per dictos terminos , ut ostenditur q. 20. in verbis ex ipsa adductis , mani-

Textus
prop. 11.

festatur Personas divinas esse rem relativam ; num. autem 2. ostendit eas esse rem absolutam per hæc verba : *Præterea unus, duo, tres, in divinis dicunt rem absolutam, sicut Guillelmus, qui absolute est unus homo & Martinus alius, & convenit quod hæc alietas remaneat simpliciter inter Guillelmum, qui est Pater, & Martinum suum Filium, cum Guillelmus sit unus individuus, & Martinus alius, & unus sit unus homo, & alius, alius homo ; sed in Beatissima Dei Trinitate non est sic simpliciter, sed secundum quid, sicut Pater, qui absolute est unum individuum (hoc est res individua, vel substantia individua rationalis naturæ) Filius aliud, & Sanctus Spiritus aliud, sed absolute Pater non est unus Deus, nec Filius alius, & sic de Sancto Spiritu, sed absolute omnes tres sunt unus Deus, una essentia, una natura, una Bonitas, una Magnitudo, &c. & quod hoc sit verum, est significatum in prædictis quæstionibus.*

V. Sanè ex ultimis verbis hujus Textus, quæ reticuit laudatus Cenfor in Textu relato, num. 1. & ad quæ videtur non intendisse animum, sustollitur tota difficultas, quæ, ipsis omissis, apparebat, quamvis hoc idem quodammodo innuatur per illa verba : *sed in Beatissima Trinitate non est sic simpliciter, sed secundum quid* ; & ut clariùs videatur, animadvertendum est sensum relati Textus in exemplo, quod adducit esse, quodd, sicut Martinus & Guillelmus, qui numerantur per *unus*, & *duo*, unusquisque dicitur homo, & Guillelmus est unus individuus, & Martinus est alius individuus, quomodo uterque est res absoluta : ita Pater, Filius, & Spiritus Sanctus, qui numerantur per *unus*, *duo*, *tres*, unusquisque est Deus, & Pater est unum individuum, id est rationalis naturæ individua substantia, seu res individua ; Filius aliud individuum, id est alia res individua, & similiter Sanctus Spiritus : quo modo sunt res absoluta, & sic Personæ, quæ numerantur, sunt *diversimodè*, ut notat in principio quæstionis, res absoluta, & res relativa ; at in exemplo adducto, ut explicat ipse Lullus, est magna differentia inter Guillelmum & Martinum, ac Patrem, Filium, & Sanctum Spiritum quoad numerari, quia Guillelmus est unus homo, & Martinus est alius homo ; Pater autem non est unus Deus, & Filius alius, & Sanctus Spiritus alius, quia *absolute omnes tres sunt unus Deus, una essentia, & una natura* : atque ita comparatio in exemplo, proposito non tenet *simpliciter*, sed *secundum quid*, prout explicatum manet.

VI. Nec debet scrupulum ingerere, Lullum dicere in adducto textu, quodd Pater *absolute est unum individuum*, Filius *aliud*, &

Sanctus Spiritus aliud, quia *ly individuum* non sumitur pro termino secundæ intentionis, illo videlicet, quod subiacet speciei, sed eo modo, quo correspondet Personæ, quæ dicitur *individua substantia*, vel res individua, vel sumpto grammaticaliter *ly individuum* pro re in se indivisa & distincta ab alia. Hæc intelligentia patet ex contextu, ubi bis repetitur, quodd hæc quæst. 21. intelligitur juxta quæst. 20. ubi apertè dicitur quodd isti numeri intelliguntur de Personis, *sicut in Deo sunt*, ut ait num. 1. una *Persona*, *duæ Personæ*, & *tres Personæ*; & in decursu quæstionis probat, quodd quia in Deo sunt distinctæ Personæ, numerantur in ipso *unus*, *duo*, *tres*; & ibi, ut retulimus num. 2. ponit illam differentiam inter Personas humanas, quæ numerantur, & Personas divinas, quodd Personæ humanæ, quæ numerantur per *unus*, *duo*, *tres*, nedum sunt una, duæ, tres, Personæ, sed etiam unus, duo, tres homines; in Deo autem non est sic, quia, licet sint duæ, & tres Personæ, non tamen sunt duo, nec tres Dii, quia sunt eadem essentia & natura. Præterea, q. 105. num. 1. ait: *Christus secundum quod est Deus, est individuum*, & sic expressè sumit individuum in Deo pro eodem ac Persona.

VII. Demum ferè omnes Scholastici, agendo de Persona in Deo, & applicando definitionem Personæ à Boëtio traditam, nempe *rationalis naturæ individua substantia*, quamlibet divinam Personam, ut individuum agnoscunt in sensu Boëtii: unde Castilla, in Speculo Theolog. Baconicæ, tom. 3. tract. 10. de Trinit. quæst. 19. num. 516. explicans datam definitionem, ait: *per ly individua non intelligitur individuum intentionale & logicum, nec individuum existentiae in actu, qualis est substantia essentialiter completa in esse naturæ, ut est ea, quam verbum assumpsit, sed individuum subsistentiae in actu ultimo, & in omni ratione substantiæ completum, hoc est ulterius incommunicabile*: Hoc modo D. Bonaventura in 1. sent. dist. 25. art. 1. quæst. 2. tractans de eadem definitione in Deo, num. 18. ait: *Ad illud, quod obijcitur: substantia individua, dicitur in recto, dicendum, quodd numeratur sicut Persona; quia, sicut dicit Anselmus, plures substantiæ sunt individua, sicut plures Personæ*; & ibidem, num. 16. agnoscit individuationem in Deo quoad personas, dicens: *sed individuatō vel distinctio est in Deo per solam originem, & quia Persona oritur se ipsa, &c.* Anselmus etiam in monolog. cap. 78. approbans posse dici in Deo tres Personas, sive substantias, dicit; *quia Persona non dicitur nisi de individua rationali natura, & substantia principaliter dicitur de individuis, quæ maxime in pluralitate subsistunt.* D. Thomas quoque, part.

1. quæst. 30. art. 3. ad 3. ait : *individuum verò Deo competere non potest, quantum ad hoc quòd individuationis principium est materia; sed solum secundum quod impertat commutabilitatem (forte incommunicabilitatem.)*

VIII. Porro, quòd hanc quæstionem, ut præmonuimus, exagitet Lullus eo sensu, videlicet an illud, quod numeratur in Deo, quoad se sit absolutum, vel relativum, vel utrumque; non verò, an numerus sit quoad rem absolutam, patet ex decursu textûs, quem exposuimus; ubi ex eo probat dictum numerum dicere rem relativam, quia Personæ, quæ solæ numerantur, sunt quid relativum; & ideò dicere rem absolutam, quia unaquæque Persona est Deus: unde, quia negat numerari Deum, essentiam, naturam, &c. Dei, non intelligit esse absolutum Dei numerari, sed tantum Personas, quæ simul sunt quid absolutum & relativum. Hoc amplius patet ex solutione objectionis, quæ num. 3. prætendit repugnare, quòd *unum absolutum sit unum non absolutum, seu relativum; & quia in Deo est una absoluta essentia, natura, &c. sequitur quòd in Deo non sit aliquid unum, quod non sit absolutum*: cûi, num. 4. respondet, quòd est differentia inter modum, qui est in creaturis, ac in Deo, sicut Martinus & Guillelmus, qui non possunt esse unus homo, una essentia, bonitas, &c. In Deo autem Pater, & Filius, & Spiritus Sanctus, qui numerantur, sunt unus Deus, una essentia & natura; & sic qui numerantur sunt res relativa & absoluta; numerus autem non cadit in absolutum, quia non sunt duo, nec tres Dii, sed unus Deus, sicut cadit in absolutum Martini & Guillelmi, qui non sunt unus homo, sed duo homines.

§. II.

Quoad Prop. 12. ex quæst. 22. Pater productivè seu activè constituit & distinguit Filium, generando ipsum; & Pater & Filius activè constituunt & distinguunt Sanctum Spiritum, spirando ipsum; non formaliter & intrinsecè.

IX. Ecce textum, qui adducitur ad hanc 12. Propositionem:
 „ Pater constituendo Filium determinatum, distinguit Filium à seipso :
 „ Pater & Filius constituunt Spiritum Sanctum, & à seipsis ipsum distinguunt. Quæst. 22. sent. num. 1.

X. Lullus in notata quæst. 22. inquit : *Utrum eadem proprietas sit*


fit distinctiva, & constitutiva divinarum Personarum? Hoc autem pertractat valde diverso sensu à communi schola, in qua agitur de formali constitutivo, ac distinctivo; Lullus verò agit de constitutivo & distinctivo activè seu productivè, videlicet an eadem proprietas sit activè & productivè distinctiva, & constitutiva Personarum, ut patet ex textu, ubi dicit, *Quòd eadem proprietas sit distinctiva, & constitutiva divinarum Personarum, sed diversimodè secundum quòd requiritur, quòd sit distinctio inter generationem, & spirationem; sicut proprietas distinctiva & constitutiva, quæ sunt eadem cum divina Paternitate, quæ simpliciter est una proprietas personalis, & est distinctiva in quantum Pater à se distinguit Filium, & est constitutiva, in quantum Paternitas constituit Patrem generando Filium, ut sit Filius, ita quod Filius non sit Pater, nec Sanctus Spiritus: & sic Pater constituendo (id est, producendo Filium constitutum) Filium determinatum, distinguit (productivè) Filium à seipso, & à Sancto Spiritu; & Pater & Filius constituunt (producant in suo esse) Sanctum Spiritum, & distinguunt (productivè) illum à se ipsis; & sunt una & eadem proprietas distinctiva & constitutiva (activè scilicet spiratio activa) spirando Sanctum Spiritum; & talis proprietas distinctiva & constitutiva differt secundum quid ab illa quæ est in generatione, cum ista sit singularis Patri, & illa communis Patri & Filio.*

Text. prop.
12.

XI. Sanè ex toto hoc contextu apertum est, Lullum agere de proprietate constitutiva, & distinctiva, non in sensu formali, quo communiter intelligitur in schola, sed in alio sensu, videlicet activè, & productivè, & solum innuit constitutionem formalem, dum dicit de paternitate: *& est constitutiva, in quantum Paternitas constituit Patrem generando Filium*: quo indicat Filium & Spiritum Sanctum simili modo constitui; at ex præcipuo textus scopo clarum est, ibi agi de constitutivo, & distinctivo productivè: atque ita apertè, patet, quòd dum dicit: *Pater constituendo Filium determinatum*, idem est ac dicere, Pater producendo Filium determinatum in suo esse constitutum. Dum etiam ait: *distinguit Filium à se ipso & à Sancto Spiritu*, idem est ac *producit distinctum*. Et eodem modo intelligitur, dum dicit, Patrem & Filium constituere Sanctum Spiritum, videlicet quòd producant ipsum in suo esse constitutum, & à se-ipsis distinctum: unde inspecto toto textu, nullum est erroris periculum. Planè non est alienum sumere ista verba: *constituere & distinguere* activè, & non purè formaliter, prout in schola; nam in scriptura sacra activè sumitur, Gen. 17. 5. ubi dicit Deus ad Abraham: *Patrem*

multarum gentium constitui te. Psalm. 2. 6. Ego autem constitutus sum Rex ab eo super Sion Montem Sanctum ejus. Psalm. 8. 7. de homine dicitur : Constituisti eum super opera manuum tuarum. Hæbr. 1. 2. Novissimè locutus est nobis in Filio, quem constituit hæredem universorum, per quem fecit, & sæcula ; & Ecclesiast. 15. 14. Deus ab initio constituit hominem, & reliquit eum in manu consilii sui. Etiam D. Athanas. Orat. 4. contra Arianos pag. mihi 227. ait : Quoniam autem Filius est imago Patris, necessarium est cogites Deitatem & proprietatem Patris ipsam essentiam, Filii constipere. Et hoc est, quod ait : qui cum in forma Dei esset, nec non & illud : Pater in me. Non autem ex parte aliqua forma Deitatis conficitur, sed ex integra Deitate Patris essentia Filii consurgit, & solidus Deus.

XII. Distinguere etiam apud scholasticos non tantum formaliter, sed etiam activè sumitur in Deo ; ut sufficienter exprimit D. Bonaventura in 1. Sent. dist. 14. art. 1. quæst. 1. in responsione, ubi, ut explicet qualiter Personæ sint distinctæ, manente naturâ indistinctâ, hæc scribit : “ Notandum, sicut vult Richardus, quoddam distinctio ” per qualitatem, & distinctio per originem. Distinctio per qualitatem est in creaturis distinctio per originem, est, cum unus ” producit, & alter producit. Et quemadmodum distinctio per ” qualitatem vera distinctio est, & secundum rem, ita distinctio per ” veram originem vera est distinctio ; sicut enim unus non potest simul esse albus & niger ; ita non potest unus & idem producere ” se ipsum ; quoniam ergo in divinis intelligitur esse vera origo, ” idè intelligitur ibi esse vera distinctio ergo, cum ibi est ” vera origo, ibi fit vera distinctio. ” Clarius loquitur ipse S. Doctor ibidem dist. 9. quæst. 2. *Utrum generatio in divinis sit Personarum distinctiva ?* Quam resolvit affirmativè, & certè ibi & in toto discursu ly *distinctiva* sumitur activè, non formaliter. Similiter utitur dicto verbo *activè* subtilis Scotus in 1. dist. 7. quæst. unica, num 12. §. *Hoc etiam arguitur, ubi scribit : Ergo ad propositum, cum generatio sit assimilativa, quatenus eadem natura communicatur ; distinctiva, quatenus est geniti distincti à generante distincto, &c.*



§. III.

Per agere Deum mediatè, solum docet Lullius in Prop. 13. ex quæst. 16.

33. & 38. Deum agere cum creatura, movendo & juvando ipsam; non autem Deum immediatè non attingere effectus creaturarum.

XIII. Ad decimam tertiam notatam propositionem hos textus adducit & Censuram subnectit laudatus Cenfor. "*Deus in creaturis agit duobus modis, scilicet immediatè & mediatè. Immediatè, quando creat creaturam sine instrumento & aliquo juvamine extraneo, &c. Agit in creaturis mediatè, sicut in igne cum sole multiplicans calorem ignis in calefacto; & hoc, quod Deus agit, est coadjuvamen soli, igni, & calefacto; & hoc, quod sol facit in igne, & ignis in calefacto, est natura, sive actus naturalis, & sic de aliis rebus naturalibus, quæ ita indigent adjutorio Dei in agendo, sicut in gubernando. Quæst. 33. Sent. in principio.*"

"Item: *Deus agit in rebus creatis duobus modis: immediatè, quando creaturam producit de non esse ad esse; mediatè, quando cum una creatura conservat aliam, sicut Deus, qui cum motu Cæli, qui est creatura, conservat motum elementorum, & elementorum, qui etiam est creatura. Quæst. 38. Sent. in principio, & quæst. 16. num. 3.*

"Censura: *videtur significare, Deum non agere immediatè in omnes effectus, nisi tantum in creatione rerum, sed in aliis effectis mediatè tantum, quatenus dedit virtutem causis secundis, easque gubernat, ut colligitur ex quæst. 44. in responsione ad Eremitam, ubi sic ait: Sol agit in hortum mediatè, dando suam similitudinem & virtutem veneri, & venus illam dat mercurio, & mercurius lunæ, & luna elementis, & ipsam dimittunt usque ad hortum successive. Ad hunc igitur modum videtur sentire, quod Deus agit mediatè in omnibus, præter in creatione rerum.*"

XIV. Profectò, dum hanc Censuram reflecto, nescio quo Spiritu ductus eam laudatus Cenfor protulerit, cum aded expressè declararet Lullus quomodo accipiantur ly *immediatè & mediatè*, videlicet, Deum dici immediatè agere, quando solus & absque concursu creaturæ agit; mediatè verò, quando cum creatura agit, & utitur ejus ministerio, & concursu, quin tamen hæc mediatio excludat immediatum influxum Dei, tum in actionem creaturæ, tum in ejus effectum; quinimò ipsimet textus producti supponunt & adstruunt hunc immediatum Dei influxum. Hunc quoque immediatum Dei influxum

in hoc eodem libro sæpè exponit Lullus, ut quæst. 2. num. 3. ubi ait : *Præterea Deus est subiectum Theologiæ, quoad determinatum finem, in hoc quod est finis omnium creaturarum, quas creavit ad se : quæst. 10. num. 3. ait, quod ignis, qui est creatus à Deo, est causa secundaria combustionis, vel calefactionis, & prima causa cum secunda naturaliter comburit lignum ; quæst. 15. num. 1. supponit, Deum producere lapidem, plantam, hominem, &c. dicens : unde sequeretur, quod Deus cum bona & magna potestate magis propriè se haberet ad producendum partem, quàm totum, & lapidem, quàm plantam ; & plantam, quàm Asinum ; & Asinum, quàm hominem. Quæst. 22. exponit universalem Dei causalitatem num. 7. Dicens : Quidquid Deus agit, agit secundum sua attributa, & secundum quod partes mundi sunt capaces & dispositæ, quod attributa Dei in ipsis agant, sicut totum universum est dispositum, quod à divina sapientia intelligitur ; & postea ait quod homo moraliter bonus bonificatur à divina bonitate ; & infra dicit, quod Deus magnificat montes, arbores, equos, & homines.*

XV. Præterea hanc universalem Dei causalitatem, dum agit cum creaturis, exponit ipse q. 51. *Utrum Angelus per solam potentiam intellectivam, & volitivam moveat corpus ?* Ubi præmissis num. 1. variis habitudinibus creaturarum in quodam triangulo consideratarum, transit tandem ad triangulum de Deo, Angelo, & corpore, & subnectit hæc verba : *Dum sic considerabat. (Raymundus) ipsos triangulos dixit, quod Deus moveat Angelum, ut Angelus moveat seipsum ad bonum, magnum, &c. recolere, intelligere, & amare ; & propositis aliis, quæ Deus movet, unum videlicet cum alio, sic num. 2. scribit : Dum Raymundus sic consideravit, quod Deus sit primus motor movens unum immediate, & mediate unum cum alio, ut dictum est, dixit quod Deus moveat Angelum, ut Angelus moveat corpus, ut Deus moveat corpus cum Angelo, aliàs Deus non comprehenderet omnes modos movendi, quod est impossibile, cum Deus sit supremus motor, & perfectus in omnibus motibus : ergo Deus movet corpus cum Angelo ; unde sequitur quod Angelus movet corpus cum Deo ; & concludit quod Angelus non tantum movet corpus cum potentia intellectiva, & volitiva, sed movet ipsum cum Deo. Similiter respondens ad objectionem, quæ supponens, quod potentiæ Angeli sint motæ à Deo in movendo corpus, prætendit quod potentia intellectiva, & volitiva tantum moveant corpus, quia per se sufficiunt ad effendum principales motui corporis, cum natura non requirat vacuum nec superfluitatem secundum primam ordinationem, quæ est inter primam causam & effectum : Respondens inquam,*

ad hoc num. 5. ait: *Non est comparatio inter motorem, qui movet immediate, & motorem, qui movet mediatè, qui motus est ab alio; & quia Deus movet immediate, est magis principalis motor in movendo corpus, quàm Angelus, cum Deus immediate moveat Angelum, & mediatè corpus, ut cum Angelo moveat corpus: unde sequitur quòd Angelus principalius moveat per Deum, quàm per semetipsum, vel quàm per suas partes, cum simpliciter sit motus à Deo.*

XVI. Deinde quæst. 58. num. 2. dicit: *Inter Deum & creaturam est differentia. . . & participant sicut causa & effectus, & illa participatio est perfectà, cum Deus sit causa perfectà, per quam sequitur perfectum creatum.* Quæst. 94. docet, Deum existere in omnibus creaturis *præsentialiter, potentialiter, & essentialiter.* Quæst. 136. ait, quòd omnia corpora *ad suum servitium (Christi) sint creata.* Ipse in Lib. Principiorum Philos. dist. 1. quæ est de prima causa nempe Deo, declarat ejus universalem causalitatem; & omittis aliis, quibus in toto libro exponit ejus universalem influxum ad omnia, ibi tit. de conditionibus, §. *Secunda conditio* ait, primam causam esse omnium perfectionem & finem, & quòd omnia veniunt ad perfectionem & finem, ad quem veniunt, per influentiam & perfectionem ipsius primæ causæ. Solum ex lib. quæstionum per Art. demonstrat. solub. omittis aliis, videri potest quæst. 167. *Quomodo Deus moveat omnia?* Ubi, præter alia, num. 1. dicit: *Deus igitur est immobilis, & ipse est motor omnium finitorum & principiatorum;* & num. 2. *Et ita modus motus, per quem Deus movet omnia, consistit in hoc, quòd divinæ dignitates (bonitas, sapientia, voluntas, potestas) attingunt de motu eorum;* & num. 3. *Ita & multò melius divina potestas facit, quòd omnes creaturæ sint passivæ, & sint passivæ potentiæ, tanquam materia sub imperio divinæ voluntatis, sive naturaliter, sive supernaturaliter;* & num. 4. *modus, per quem Deus movet hominem de bono in bonum, est per meritum & gratiam; & modus, per quem movet hominem de malo in bonum, est per gratiam.* Etiam in lib. de Asc. & Desc. Intell. dist. 9. de Deo, tit. de Actu Dei, num. 1. ait de actibus Dei, quòd sunt causas actuum creaturarum, *sicut bonificare divinum quod. causat bonificare creatum. . . & intelligere increatum, intelligere creatum, & velle increatum, velle creatum, &c.* lib. de efficiente & effectù per totum probat contra quemdam Averroëstam, quòd Deus est efficiens, & totum universum est effectus ejus; & in decursu nedum probat, quòd Cælum est effectus Dei, sed etiam ejus motus, homo, imaginativa, sensitiva, &c. Tandem in lib. de Articulis Parisiis damnatis impugnat plures Averroëstas

præstendentes, Deum non causare effectus inferiores: quorum error ipsi in hac censura imputatur.

Text. prop.
13.

XVII. At quid egemus aliis Doctrinis, cum ipsimet Textus adducti, & eorum contextus ostendant manifestam laudati Censoris æquivocationem; nam in notata quæst. 33. ubi quæritur: *Utrum prædestinatus de necessitate salvetur?* Ad ejus solutionem præmittit Lullus, quod Deus duobus modis agat in creaturis scilicet immediate, & mediate: immediate quando creat creaturam sine instrumento, & sine aliquo alio juvamine extraneo, creans hoc, quod vult creare, secundum ideam in qua habet hoc, quod orat ab æterno, ut in vigesima octava quæstione dictum est; quod esse creatum differt ab idea, in quantum est productum & creatum ex nihilo. Mediate agit Deus in creaturis, sicut in igne multiplicans cum sole calorem ignis in calefacto, & hoc quod Deus agit, est juvamen soli, igni, & calefacto, & hoc quod sol facit in igne, & ignis in calefacto, est natura, vel actus naturalis, & sic de aliis rebus naturalibus, quæ ita indigent adjutorio Dei in agendo, sicut in gubernando. Apertè hic declaratur quod Deum agere mediate, est Deum agere cum creatura, ita tamen ut Deus agat concursu simultaneo, qui clariùs non potest exprimi, quàm cum dicat, quod hoc, quod Deus agit est juvamen soli, igni, & calefacto; qui enim juvat, simultaneè concurrat; & cum calefactum sit effectus solis & ignis, agit illud Deus cum suo juvamine concurrente cum sole & igne; imò in hoc Textu ponitur generalis Doctrina, quod omnes res naturales indigent adjutorio Dei in agendo; hoc autem Dei adjutorium quid aliud esse potest, quàm concursus simultaneus? Itaque sol, & ignis calefaciendo calefactum, per naturam, vel naturaliter, agunt; Deus autem, ipsos coadjuvando, liberè, & artificialiter agit.

XVIII. Præterea ex solutione quæstionis, ad quam præsupponitur relata Doctrina, apparet quàm immeritò dicto textui affigatur præfata Censura; nam ibi dicitur de homine prædestinato, quod sit prædestinatus secundum modum, per quem Deus agit in creatis mediate, videlicet Deus prædestinavit Beatum Petrum sic cum bonis quæ fecit, & ratione meritorum illorum honorum, sicut calefacto calefactum cum sole, & igne: Unde, sicut gloria, ad quam est prædestinatio, immediate est ab influxu Dei, licet cum meritis prædestinet, & ita etiam ut merita, cum quibus prædestinat, sint à Deo juvante: ita calefactum est immediate calefactum à Deo, licet Deus cum sole, & igne calefaciat. Quare ad intelligentiam hujus Textus & aliorum, quos opponit laudatus Censor, notandum est, quod agere immediate & mediate

dupliciter accipi potest: *Primò*, ex parte causæ, ita ut illa *immediatè* agat, quæ sola, & sine medio ac concursu alterius agit, ut Deus dum creat, & facit miracula, & alia quæcumque causa, quæ sola producat; *mediatè* verò agit illa causa, quæ concursum alterius admittit. *Secundò*, ex parte virtutis seu influxûs accipi potest agere *immediatè*, & *mediatè*; & tunc causa *immediatè* agit quando sua virtus seu influxus attingit effectum ipsum, & ponit illum in esse, sive agat sola, sive cum concursu alterius; *mediatè* verò, quando ejus virtus & influxus non attingit effectum, sed agit circa aliud, quod ex propria virtute effectum ponit; & sic Angelus movens orbem *mediatè* agit in sublunariis: & aqua movens rotam, quæ movet molam, *mediatè* molit triticum; Lullus verò tantum in primo sensu ait, Deum agere *immediatè*, creando, vel alia solus faciendo; & *mediatè*, dum concursum admittit creaturæ.

XIX. Amplius hoc ostenditur ex alio textu, quem citat laudatus Cenfor, ex quæst. 38. ubi inquit Lullus: *Utrum creatio & conservatio sint idem?* Nam ibi num. 1. sic scribit: *Deus agit in creaturis duobus modis, immediatè, & mediatè, ut in 33. quæstione diximus: immediatè, quando producit creaturam de non esse in esse; mediatè, quando cum una creaturâ conservat aliam; sicut Deus, qui cum motu Cæli, qui est creatura, conservat motum elementorum, & elementatorum, quæ etiam sunt creaturæ, & sic de similibus: unde secundum diversos respectus unum est creatio, & aliud conservatio, sicut creatio Cæli & conservatio Cæli: creatio Cæli est creatura, cum Cælum de non esse sit productum in esse; & conservatio est alia creatura, cum qua Deus conservat & gubernat Cælum; & quia creatio ita est per creare creaturam, quæ conservat aliam creaturam, sicut est per creare illam creaturam, conservatam: ergo sequitur, quod creatio & conservatio sint idem.* Ecce hîc dicit Lullus, quod, quamvis Deus cum unâ creaturâ conservet aliam, creat tamen creaturam conservatam, illamque conservat, quia creatio, & conservatio sunt idem: ac proindè, quod Deus agat *mediatè* in creaturis, non infert ipsum *immediatè* per suum influxum non attingere creaturam, in quam agit cum alia.

Alius Text.
prop. 13.

XX. Similiter quæst. 16. quam citat laudatus Cenfor, ubi quærit Lullus: *Utrum charitas sit aliquid creatum in anima?* Postquam ostendit, quod charitas est habitus creatus in anima, & positus in ipsa potentia, ita quod reducatur ad actum per voluntatem, & per summam charitatem; objicit Eremita, quod, si ita esset, voluntas eliciendo, actum charitatis esset causa suæ charitatis, & non Sanctus

Alius Textus
prop.
13.

Spiritus; & respondet ad hoc Lullus num. 3. dicens: *Deus duobus modis agit in creatis, immediate scilicet & mediatè: immediate in creando, cum Deus sine instrumento & medio producat creaturam de non esse in esse: unde secundum talem modum producendi Deus creat habitum charitatis in potentia, sicut habitum caliditatis in igne simplici (quem, creando ignem, produxit); mediatè, sicut Deus posuit in natura ignis, quod per se naturaliter calefaceret in subiecto, in quo calefactibile sit dispositum; sic à simili Sanctus Spiritus posuit in voluntate naturam, cum qua posset producere, ipso coadiuvante, de potentia in actum, actum charitatis, & illa natura, quæ est ex parte voluntatis sic est passiva sub summa charitate ad recipiendum suum vestigium & similitudinem, sicut cera sub sigillo, ad recipiendum vestigium & similitudinem sigilli: Unde, sicut sigillum addit in cera vestigium litterarum, quod non erat in actu, in deducendo ipsum de potentia ad actum, sic & multo magis Sanctus Spiritus addit in voluntate actum charitatis, quem actum non habebat, dum erat in potentia; quem actum convenit esse aliquod ens creatum in anima, cum nulla additio possit esse, nisi sit additum aliquod ens creatum.*

XXI. Ecce iterum in hoc textu, ad quem provocat laudatus Censor, tractat Lullus de agere Dei *immediate*, & *mediatè*, & expresse ait, Deum agere *immediate*, dum solus creat habitum charitatis in voluntate; agere verò *mediatè*, dum facit voluntatem informatam habitu charitatis elicere actum charitatis, deducendo ipsum de potentia ad actum; expresse autem docet, quod Deus per suum influxum attingit suum actum charitatis, quia num. 1. tenet, quod habitus charitatis reducitur *de potentia in actum per voluntatem, & per summam charitatem*; tum quia hoc num. 3. docet, voluntatem producere actum charitatis; *ipso Sancto Spiritu coadiuvante*; quod illa natura, quæ est ex parte voluntatis ad producendum actum, *est passiva sub summa charitate, sicut cera sub sigillo; & quod sicut sigillum addit in cera vestigium litterarum, sic Sanctus Spiritus addit in voluntate actum charitatis, quem actum non habebat, dum erat in potentia.* Unde, cum nemo ambigere possit, quod sigillum *immediate* imprimat litteras in cera, ita nemo ambigere potest, Spiritum Sanctum, in sensu Lulli, *immediate* producere actum charitatis, quem dicit addere voluntati, & esse ens creatum.

XXII. Nec juvat ipsum Censorem doctrina, quam de agere *immediate* & *mediatè* tradit Lullus quæst. 44. ad quam ipse provocat; nam ibi probat Lullus, Angelum debere esse in illo loco, in quo operatur, ita quod non potest operari, nisi in loco, in quo est, quamvis

quamvis non sit collocatus, nec contineat subiectum: Eremita verò obijcit, quòd sicut sol influit in hortum, licèt non sit essentialiter in ipso, & sicut faber facit clavum, licèt non sit in loco clavi, ita Angelus potest agere, licèt non sit in loco, in quo agit. Ad hoc Lullus, num. 3. sic respondet: *Unum agere est illud, quod est sine medio, & aliud est illud, quod est cum medio: illud agere, quod est sine medio, est sicut manus fabri, quæ immediate movet martellum, excludo tamen animam fabri; illud agere, quod est cum medio, est sicut motus clavi, qui est a manu movente martellum: & sic per talem modum respondeo tibi; unde, sicut convenit quòd manus fabri sit in loco, in quo est manica martelli ratione tactus immediati, sic convenit quòd Angelus sit in loco in quo agit, quando immediate agit in subiecto; sed sicut sol., qui agit in horto mediate, dando suam similitudinem & virtutem veneri, & venus dat illam mercurio, & mercurius lunæ, & luna elementis: quam similitudinem & virtutem elementa recipiunt superius in concavitate lunæ, & deprimunt ipsam usque ad hortum successive, sic Angelus potest stare cum voluntate fabri in uno loco & immediate movere, ut voluntas moveat manum martini & manus martellum, & martellus clavum: & sic per talem modum concedo tibi, quòd Angelus essentialiter per medium possit esse in uno loco, & sua operatio in alio.*

Alius Text.
prop. 13.

XXIII. Sanè inspecto toto hoc textu, ad quem provocat laudatus Censor, amplius miror, ipsum tulisse relata Censuram, cum evidens sit valde diverso sensu sumi hîc terminos *sine medio*, & *cum medio*, ac sumuntur in relatis textibus termini *immediate* & *mediate*; nam hîc agitur de mediatione & immediatione locali, & in relatis textibus agitur de mediatione & immediatione causarum, sumptis pro simultate & solitudine earum, nec in hoc textu illud agere cum medio, aut sine medio, vel per umbram Deo attribuitur: unde ineptè doctrina hujus quæstionis producit ad expiscandum sensum Lulli in aliis relatis quæstionibus, in quibus determinatè agit de Deo, & explicat, quo sensu agat Deus mediatè cum causis secundis, videlicet concurrendo cum ipsis ad earum actiones & effectus, quos per suam productionem immediate attingit: quinimò hæc doctrina devolvitur contra præfatum Censorem, nam, licèt faber mediatè, id est, mediante manu & malleo, faciat clavum, tamen quatenus causa immediate ipsum facit: similiter Deus, licèt mediantibus causis secundis, agat, tamen est causa immediata effectuum ipsarum. Præterea, licèt sol per tot media influat in hortum ob suam distantiam, & quoad hoc agat mediatè, tamen in linea causæ est causa

immediata, quatenus suam virtutem transmittit, quia licet dentur aliæ concausæ, tamen per suum influxum attingit effectum ipsum, sicut homo generans hominem, qui, licet per varia influat media, tamen est immediata causa hominis, geniti: si ergo juxta laudatam Censorem sensus Lulli est, quod Deus influit in effectus creaturarum, sicut sol in effectus elementatos, Deus in sensu Lulli immediate, immediatione influxus, attingit effectus creaturarum.

XXIV. Itaque, si sensus Lulli satis clarus non apparet in notatis quæstionibus, facile intelligi potest ex aliis plurimis supradictis, & adhuc fortè clariùs ex q. 55. ubi eosdem terminos explicat; nam, posita resolutione dictæ quæstionis, videlicet quod Angelus superior illuminat inferiorem; objicit Eremita, quod si ita esset, beatitudo Angelorum inferiorum non consisteret simpliciter in visione Dei, nec Deus solus sufficeret ad beatificandum ipsum. Ad hoc autem num. 4: respondet Lullus: „Eremita in 51. q. (cujus sensum & „verba retulimus num. 15.) dictum est, & etiam in pluribus aliis „quæstionibus, quod Deus in suo effectu agit mediatè & imme- „diatè; & in quantum agit immediate, non indiget habere medium „nec instrumentum ad beatificandum Angelos, sed quia nullus An- „gelus potest agere *sine divino adjutorio*, nec *sine Deo potest habere „naturale agere*, unus Angelus agit cum adjutorio Dei in alio; sci- „licet illuminando & diligendo, & hoc est necesse, ut in partici- „patione unius Angeli cum alio possit esse *divinum agere*; alias eo- „rum participatio non esset perfecta in Beatitudine, sed vacua. Hic sanè explicatur, Deum agere immediate in Angelum, beatifi- cando ipsum se solo in visione intuitiva, agere autem mediatè, dum cum Angelo superiori illuminat inferiorem; at hoc ita fit quod actus Angeli tam superioris quàm inferioris est ab influxu Dei, quia neuter *potest agere sine divino adjutorio*, nec *sine Deo potest habere naturale agere*; & in hac participatione unius Angeli cum alio est *divinum agere*.

XXV. Similiter q. 75. ut probet quod luminaria Coeli in suis or- bibus moventur propriis motibus, explicat quomodo *prima causa naturaliter movet secundam causam mediante propria proprietate*, & *proprietate appropriatâ*; explicat etiam quomodo Deus per se ipsum producit res de non esse in esse, & facit miracula, & quomodo mo- vet ad opera artificialia: quo posito, manifestat; Deum, mediante proprio & naturali motu solis & aliorum corporum coelestium, cau- sare effectus sublunares juxta ordinem, quem *divinae dignitates habent*

in causis secundariis & in suis effectibus : quò ostenditur dictos effectus esse etiam à Deo immediate, licet ab eo sint quoque mediantibus coelestibus corporibus. Tandem q. 134. ut probet spiritus separatos cruciari igne corporeo, sic num. 1. discurret: "Deus in hac vita agit" immediate, & mediate, ut in pluribus locis supradictum est: "quando agit immediate, agit supra naturam, sicut sunt creare, & "facere miracula; quando agit mediate, agit sicut quando cum sole "multiplicat caliditatem ignis . . . & per tale agere deducit Deus "naturalem actum in naturalibus: unde, sicut Deus in hac vita agit "duobus prædictis modis, sic in alia vita potest agere ad placitum "cum ipsis, cum sit ita potens in alia vita, sicut in hac: ergo Deus "potest cum corporeo igne cruciare separatum malignum spiritum". Hic videtur aperte quòd Deus agit mediate, dum cum igne corporeo cruciat spiritus separatos; quo nonobstante ipse cruciatus est à Deo immediate inflictus, ut docet Lullus num. 2. dicens, divinam justitiam sic eos punire; num. 3. quòd sic divina justitia facit vindictam; & etiam quia ille cruciatus non est ex natura ignis, sed est *pœna supernaturalis*, ac proinde immediate est à Deo.

XXVI. Itaque evidens est, in sensu Lulli idem esse Deum agere immediate, ac Deum solum agere; agere autem mediate esse idem, ac agere cum creatura, ipsam movendo, dirigendo, & adjuvando, & cum tale agere mediate sit propriè Deum simultaneè concurrere, & simultaneus Dei concursus immediate attingat effectus causarum secundarum: ideo, licet dicat Lullus, Deum modo dicto agere mediate; non negat ipsius immediatum influxum in omnes creatos effectus, cum nullibi sit aliquod indicium hujus negationis. Notandum est autem, quòd prædicta Lulli explicatio de agere Dei immediate & mediate frequentissima est apud Autores; imò processiones divinæ per dictos terminos explicantur à Patribus, ut videri potest apud Petavium lib. 7. de Trinit. cap. 11. nam Filium dicunt immediate procedere à Patre, quia ab ipso solo oritur; Spiritum autem Sanctum procedere mediate, quia procedit à Filio habente à Patre virtutem spirandi, qui tamen per hoc negent, Patrem immediate producere Spiritum Sanctum.

XXVII. Imò secundum eandem Lulli acceptionem usurpantur dicti termini à D. Bonaventura in 2. Dist. 14. art. 3. q. 1. ubi quaeritur: *utrum primum mobile moveatur à Deo immediate tantum, an mediante aliquâ virtute creatâ*? Et sic scribit: "Respondeo: ad prædictorum intelligentiam est notandum, quòd in omni operatione

„Deus operatur intimè & immediatè, cùm Dei voluntas, sicut dicit
 „Augustinus, & habitum est in primo libro, sit prima, & summa
 „causa omnium specierum & motionum. In aliquibus autem sic
 „operatur, ut ipse sit tota causa; in aliquibus sic operatur &
 „moveret, ut virtutem agendi & movendi communicet creatu-
 „ræ sed est quæstio, utrùm motus primi mobilis sit
 „à Deo tanquam à tota causa, an simul cum virtute divina movente
 „moveat aliqua virtus creata, & ad istam quæstionem satis de plano
 „responderi potest. . . . quod Deus primum mobile movet *mediate*
 „aliqua virtute creata, sicut & alia mobilia. „Expressius autem
 idem Bonaven. in Compendio Theolog. verit. lib. 2. cap. 1. ubi ait:
Deus enim dupliciter operatur; aliqua namque facit mediante natura,
& hæc fiunt successive; aliqua facit per se immediatè, ut creare, peccata
dimittere, gratiam infundere, & huiusmodi, & talia fiunt in continenti,
& perfectè, & completè.

D I S S E R T A T I O VII.

De Propositionibus 14. 15. 16. 17. & 18. ex Quæst. 38. 41. 45. 48.
 & 49. Libri Sententiarum.

§. I.

In 14. Prop. ex Quæst. 38. dicitur calor naturalis esse de esse essentiæ ho-
minis, quoad statum viventis naturaliter, licet non sit de essentiæ
phica & metaphisica ejusdem.

I. **D**ECIMO-QUARTO loco notat laudatus Censor hæc verba:
De esse essentiæ hominis est suus calor naturalis, & sua vegeta-
tiva; quæ seipsum conservat ad vivendum; coadjuvantibus illis, quæ
de extrâ veniunt. Quæst. 38. circa finem.

II. Quod videtur in hoc Textu notari, est quod calor naturalis,
 qui est accidens, sit de esse essentiæ hominis; at ex contextu facile
 percipitur qualis sit intelligentia, quæ profectò est recta; nam ibi
 respondet Lullus ad objectionem, quæ num. 2. dicitur, quod nulla
 creatura conservat seipsam, nec est per se conservata, quia nullum
 ens potest conservare seipsum cum esse suæ essentiæ; & ad hoc n.
 3. respondet Lullus, quod hoc est verum in corruptibilibus, & exem-

plificat in homine dicens : *Sicut homo, qui non potest conservare semetipsum cum esse suæ humanitatis simpliciter, cum indigeat habere cibum & potum, aërem & plura similia; verumtamen calor naturalis est de esse suæ essentiae, & sic de sua vegetativa, cum qua conservat seipsum ad vivendum, & adiuvantibus illis, quæ de extra veniunt: unde sequitur quod homo habeat in se virtutem conservativam, quæ est pars esse suæ essentiae, sic deputata ad conservationem, sicut voluntas ad volendum, & oculus ad videndum; & quia illa potentia conservativa est creatura, sequitur quod conservatio sit creatura.*

Text. prop. 14.

III. Manifestum est ex toto hoc contextu, quod scopus Lulli in eo est ostendere, quod homo in statu hujus vitæ habet in se virtutem creatam, quâ naturaliter potest cum juvamine aliorum se in statu naturali viventis conservare, ac proinde non loquitur de esse suæ essentiae physicae, vel metaphysicae, prout regulariter considerant Philosophi, sed tantum de esse suæ essentiae quoad statum naturalem, in quo statu absque dubio conservatur cum calore naturali, & vegetativa, quibus transmutat cibum & potum in substantiam hominis, & ad hoc esse vivum naturale hominis essentialiter requiritur calor naturalis, licet sit accidens, sicut alia plura accidentia, ut motus cordis, sanguinis, & plura alia, quia deficiente calore naturali, deficit vita hominis; si tamen insistas impertinenter, quod ibi loquatur Lullus saltem de essentia physica hominis, dico, quod per calorem naturalem, sumendo abstractum pro concreto, intelligitur calidum naturale, seu illa elementalis substantia, cui est proprius calor naturalis; hæc autem substantia, est de essentia physica hominis, cum elementa formaliter & essentialiter constituent corpus hominis, sicut & aliud quodlibet elementatum.

§. I I.

Quoad Propositionem 15. ex Quæst. 41. docet Lullus quod Deus, ut Autor naturæ, & potestate ordinatæ, non potest Angelum destruere, bene tamen potestate absolutæ.

IV. Ex sequenti Textu notat laudatus Censor propositionem 15. nempe : *Quam scilicet contradictionem Deus facere non potest, scilicet, quod Angelus sit annihilatus & æviternatus simul, & semel. Sed Deus bene potest annihilare equum Martini, & sic de aliis corruptibilibus, quæ in æviternitate non sunt posita; sed illa quæ sunt posita in æviternitate*

Deus annihilare non potest, postquam illa vult esse æviterna. Quæst. 41. Sent. circa finem.

Censura: Docet, Angelum eo quod sit ævitermus, à Deo annihilari non posse; quia contradictionem dicit.

V. Quin recurramus ad contextum, aperta & intelligentia verborum relatorum ex eorum reflexione; Primum enim ponit Lullus, quod sit contradictio, quod *Angelus sit annihilatus & ævitermus simul & semel*; & sanè hæc est vera contradictio, Angelum enim esse ævitermum est Angelum existere in sua æviterna duratione, Angelum verò annihilari est, reduci in non esse; seu non existere; & quia idem simul & semel existere & non existere, est vera contradictio, est certè vera contradictio Angelum simul & semel esse ævitermum, & annihilari; hæc autem contradictio non est absoluta, sed ex suppositione, videlicet ex suppositione quod existat ævitermè, licet quod existit ævitermè, absolute possit annihilari; & ita solum stat contradictio in hoc, quod simul & semel existat ævitermè, & annihiletur: unde male infert laudatus Censor, *Angelum eo quod sit ævitermus, à Deo annihilari non posse, quia contradictionem dicit*; quia ex contradictione conditionata transit ad absolutam, & ex non posse ex suppositione transit, ad non posse absolutum; nam in Textu non negatur, Deum absolute posse annihilare Angelum ævitermum, sed tantum ex suppositione quod Angelus existat ævitermè, Deum non posse facere, quod simul & semel existat ævitermè & annihiletur. Deinde in ultimis verbis citati Textus dicitur: *Sed illa, quæ sunt posita in ævitermitate, Deus annihilare non potest, postquam illa vult esse æviterma*: ex quibus evidens est, non loqui Lullum de potestate Dei absoluta, sed de potestate Dei ordinata ad voluntatem volentem illa durare ævitermaliter; & certum est, Deum hanc potestatem non posse illa annihilare, quamvis hoc possit absolutam potestatem; laudatus tamen Censor affigit Lullo negare potestatem absolutam, cum aded patenter loquatur de ordinata.

VI. Ad clariorem tamen intelligentiam, notandum est, Lullum in citata quæst. 41. inquirere: *Utrum verum sit mensura habens partem post partem, vel sit tota simul*? Et num. 1. resolvit quod Angelus est mensuratus cum mensura indivisibili & immobili & inalterabili, & ideo illa mensura est sine parte post partem non simul existens: & illam mensuram vocans ævum vel ævitermitatem, & Angelus in ipsa existens est ævitermus. Ex hac resolutione patet, Lullum agere de statu naturali Angeli, & de duratione, quæ si naturaliter competit secundum

suam naturam spirituales, quatenus videlicet, ut ait in probatione, est substantia spiritualis non habens partem post partem; ratione cuius non potest transire in motum. . . . Unde, cum Angelus non transcat in motum, quoad se non transit in tempus. Contra hanc resolutionem & rationem sic num. 2. objicit Eremita: « Item dico quod secundum » tuam rationem Deus non posset annihilare Angelum, postquam » esset positus in natura æternitatis, quod est valde inconveniens, » cum Deus sit ita potens in reducendo totum universum creatum » ad non esse, sicut fuit potens in creando ipsum de non esse ad esse.

VII. Hæc sanè obiectio videtur agere de potestate Dei naturali, seu de potestate Dei ut auctoris naturæ, cum impugnet durationem Angelo ex sua spirituali natura correspondentem: quare num. 3. ita respondet Lullus: Item ad hoc quod dicit, quod Deus non posset annihilare Angelum positum in æternitate, male dicis respectu contradictionis, quam contradictionem Deus non potest facere, scilicet quod Angelus sit æternatus & annihilatus simul & semel, sed Deus bene posset annihilare equum Martini, & sic de aliis corruptibilibus, quæ non sunt posita in æternitate, sed illa quæ sunt posita in æternitate Deus non potest annihilare, postquam vult quod ipsa sint æterna. Si conferatur hæc responsio cum resolutione, ejus ratione, & contraria obiectio-
ne, clarè videbitur, hîc tantum agi de potentia Dei ordinaria, vel de potestate Dei auctoris naturæ, quatenus videlicet creatâ in Angelis naturâ spirituali, & datâ ipsis juxta hanc naturam æternitate, quæ est duratio sine fine, utpote immobilis, & inalterabilis, non potest Deus, ut Autor naturæ & conformiter ad exigentiam naturæ Angelicæ, ipsos annihilare, seu destruere; est enim naturalis contradictio quod Angelus ex natura sit durabilis sine fine, & ex natura destructibilis; & hæc est contradictio, quæ ponitur in Textu, scilicet quod Angelus sit æternatus & annihilatus simul & semel.

Text. prop. 16.

VIII. Profectò in obiectione prætenditur, quod Deus potest reducere totum universum creatum ad non esse; & quia in toto universo aliqua sunt æterna, ut sunt Angeli, & alia temporalia, ut sunt corruptibilia: respondet Lullus, quod corruptibilia, utpote ipsis ex natura non correspondet æternitas, sed temporalitas, possunt naturaliter destitui; æterna autem, cum ex natura sua sint æterna, & durabilia sine fine, non possunt à Deo naturaliter destitui; essent enim naturaliter indestructibilia, & naturaliter destructibilia, quod est contradictio; & quia ex libera Dei voluntate sunt posita æterna in æternitate, & data est eis natura, quâ naturaliter sint in-

destructibilia, ideo postquam Deus vult quod ipsa sint æterna, non potest ea annihilare, potestate videlicet ordinatâ ad huiusmodi voluntatem, quæ vult æterna sine fine permanere, sicut vult corruptibilia temporaliter tantum durare.

IX. Porro quod Angeli, etiam respectu Dei Autoris naturæ, sint indestructibiles, est Doctrina valde probabilis & eam expressè tenet Eximius Theologus Eusebius Amort, Theol. Eccle. tom. 1. tract. de Angelis, disput. 1. quæst. 3. ubi pag. 109. conclusione 4. ait: *Dico 4. Angeli etiam sunt immortales ex sua natura respectu Dei: conclusio est contra Vasquez, qui, licet admittat Angelos esse immortales comparatos ad alias creaturas, id tamen negat si comparentur ad Deum; & hoc probat Amort, quia Angeli ex sua natura exigunt à Deo autore naturæ conservari ob ordinem, harmoniam, ac proportionem universi. Si tamen quis impertinenter contendat aliter debere intelligi verba Lulli, facilis est explicatio, prout diximus num. 5. illa enim contradictio inter esse æternatum, & annihilatum, non est absoluta, sed conditionata; atque ita illud non posse, quod ad ipsam sequitur, non est non posse absolute, sed ex suppositione. Tandem, quod ex mente Lulli Deus absolute possit annihilare Angelum, & quamcumque creaturam, repetit pluries in lib. de Articulis damnatis ab Episc. Parisiensi, impugnans hunc, & consimiles Averroistarum errores; sicut etiam in lib. de infinita, & ordinata potestate: Unde lib. de Deo & Christo, part. 1. q. 2. num. 5. ait, quod Angelus indiget gratiâ Dei, & sua sustentatione, & sic de mundo, qui deveniret in nihilum, nisi Deus sustentaret ipsum; & in Arte Gen. ult. part. 8. sect. 2. cap. 3. n. 24. quærit: quid habet æternitas in alio? Et respondet, quod habet potestatem annihilandi quicquid est, eo quia sua potestas infinita est.*

§. III.

Rectè censet Lullus in Prop. 16. ex Quæst. 45. Angelum & animam componi ex propria spiritali materia; non autem eâ, quæ est subiectum transmutationum; operationem autem eorum extrinsecam esse accidentalem, & non permanentem.

X. Textus & Censura ad propositionem 16. apud laudatam Censorem hæc est: *consideravit Raymundus investigationem, quam fecit, ut materiam in Angelo posset invenire, & dixit, quod omne bile, quod invenit in primis principiis, ex quibus Angelus constituitur est, sicut intelligibile,*

elligibile, amabile, &c. faciunt & constituunt unam materiam Angeli, & per consequens quod omnes tivi, qui coëssentiales sunt in Angelo, sicut intellectivus, amativus, &c. faciunt & constituunt unam formam Angeli; & quod omnia are, sicut intelligere, amare, &c. quæ sunt ex essentia formæ & materiæ, sunt una connexio & unus actus, per quem forma Angeli & materia se invicem conjungunt, & tertium constituunt, & componunt, quod est substantia Angeli. Quæst. 45. Senten. num. 5.

Censuræ: Operationem Angeli dici esse substantiam Angeli, sicut & de anima hominis dixerat; & Angelum esse compositum ex materia & forma, modo quo Textus explicat.

XI. Miror, laudatum Censorem hanc duplici notâ, tamquam Theologica Censurâ, indigitasse relatum Textum, cum tantum videatur notari posse Angelum componi ex materia corporea, vel eâ, quæ generationi, & corruptioni est obnoxia; nam plures sunt Autores Catholici, qui materiam sumptam in aliquo peculiari sensu attribuant Angelis; Lullus autem nec materiam corpoream, nec eam quæ est subdita generationi & corruptioni attribuit Angelis, neque adhuc materiam in sensu regulariter accepto, sed concedit Angelo materiam & formam in sensu peculiari, ut patet ex eodem Textu. De operatione etiam Angeli, & aliorum quorumcumque agentium disputant Philosophi, & plures negant eam esse entitativè distinctam à substantia operante, ac proinde tenent realiter esse eandem, ac ipsa substantia, cujus est operatio; neque Lullus in dicto Textu dicit operationem Angeli esse substantiam Angeli; operatio enim est illud exercitium, quo aliquid agit extra se; at in dicto Textu nec ullum est verbum de hujusmodi exercitio: agit sanè de intelligere & velle intrinsecis, at hujusmodi sic inspecta non sunt operationes Angeli; nec sunt ipsa substantia Angeli, licet intrinsecè ad ipsum spectent, sed sunt constitutiva intrinseca ejusdem substantiæ.

XII. Antequam Lulli sensum exponam, notandum est, plures esse, qui Angelis & animabus attribuunt materiam, ut videri potest apud Petav. de Theol. Dogm. tom. 3. lib. 1. de Angelis, cap. 4. & quidem de animabus apertè fatetur D. Augustinus apud ipsum, lib. 7. de Gen. ad lit. cap. 6. & Boëtius ibidem, lib. de Unitate, & uno, qui post longum discursum de Angela & anima, concludit: Quorum unumquodque est unum conjunctione materiæ, & formæ; nec tamen assentior Petavio n. 3. dicenti: quocirca materiam eandem omnino corporatarum rerum, & spirituum sive intelligentiarum, animarum.

que censet esse Boëtius ; nam ex verbis ipsius , quæ allegat , hoc non concluditur , sed tantum esse unam proportionaliter , imò videtur exprimi varietas materiæ in utrisque ; ut clarius explicat ipse Boëtius , lib. *de duabus naturis & una Persona Christi* , ibidem relatus , dicens : *Omne corpus , quod in generatione , & corruptione subsistit , communem videtur habere materiam ; sed non omne ab omni , vel in omni , vel facere aliquid , vel pati potest. Corporea verò in incorporea nullâ ratione poterunt permutari , quoniam nulli communi materiæ subiecta participant , quæ susceptis qualitatibus in alterutram permutetur. Omnis enim natura incorporeæ substantiæ nullo materiæ nititur fundamento ; nullum verò corpus est , cui non sit materia subiecta ; & mox : Nec verò fieri potest , ut incorporalia in sese commixtione aliquâ permutentur ; quorum enim communis nulla materia est , nec in se verti nec permutari queunt. Nulla autem est incorporalibus materia rebus : non poterunt igitur in se invicem permutari.*

XIII. Per relata verba non recedit Boëtius , ut opinatur Petavius , à Sententia , quam statuerat in lib. *de unitate* , & uno , sed illam explicat : itaque negat Boëtius eandem esse materiam in corporibus & spiritibus ; negat quoque eandem esse materiam in spiritibus , quæ se habeat ad modum materiæ corporalium , ita ut in ipsa fiant generationes , corruptiones , ac permutationes , quemadmodum in corporalibus : atque ita non negat materiam utcumque in ipsis , sed tantum illam , quæ generationi , ac corruptioni sit obnoxia. Materiam etiam Angelis attribuit , apud eundem Petavium , Autor Libri *de Mirabilibus Sacræ Scripturæ* , cap. 1. Rupertus quoque , lib. 2. de *Victoria Verbi Dei* , cap. 12. Angelos de materia creatos existimat ; & idem deducit Petavius ex Divo Bonaventura in Opusculo 2. inscripto : *Luminaria Ecclesiæ* , serm. 4. qui etiam in 2. dist. 3. *Materiam in corporeis , ac spiritualibus rebus eandem prorsus esse definit , adeoque numero unam.* At D. Bonaven. ibi , art. 1. quæst. 3. ubi agit de unitate materiæ secundum numerum , videtur solum agere consequenter ad quæst. 2. ubi quærit : *Dato quod Angelus habeat compositionem ex materia & forma , largè sumpto nomine materiæ ad omne potentiale , quod cum alio venit ad constitutionem tamquam fundamentum rei , quæritur de illa materia : utrum sit eadem cum materia corporalium ?* Et solum resolvit esse eandem secundum considerationem metaphysici ; ac proinde unitas numerica , quam illi attribuit in quæst. 3. non est unitas individualis , sed unitas correspondens illi materiæ , quæ modo dicto est una.

XIV. Ad scopum autem præsentis difficultatis expressè docet D. Bonaventura, loc. cit. quæst. 1. *quòd illa positio videtur verior esse, scilicet quòd in Angelo sit compositio ex materia & forma; quærit enim Utrum Angelus sit compositus ex diversis naturis, scilicet ex materia, & forma?* Et, adductis rationibus pro utraque parte, & libratis earum momentis, ante resolutionem, ut certum asserit, *quòd Angelus compositus est compositione multiplici*; quibus explicatis, supponit in Angelo non esse compositionem ex partibus quantitativis, neque ex & heterogeneis, neque ex natur acorporali & spiritali; quantum autem ad compositionem ex materia & forma, sic discurrit: *Sed, sicut ostensum est supra, cum Angelo sit ratio mutabilitatis, non tamen ad non esse, sed secundum diversas proprietates; sit iterum ratio possibilitatis, sit iterum ratio individualitatis, & limitationis, postremò ratio essentialis compositionis secundum propriam naturam; nec video causam, nec rationem, quomodo defendi potest quin substantia Angeli sit composita ex diversis naturis, & essentia omnis creaturæ per se entis, & si composita est ex diversis naturis illæ duæ naturæ se habent per modum actualis, & possibilis, & ita materiæ & formæ, & ideo illa positio videtur verior esse, scilicet quòd in Angelo sit compositio ex materia, & forma.* Tandem ad auctoritates D. Augustini & Boëtii, prætendentes in Angelis non esse materiam, respondet, eos loqui de materia, quæ est principium transmutandi; & ad alia, quæ obijciuntur de simplicitate Angeli absque ulla materia, respondet quòd nulla creatura est actus purus, & ideo oportet, quòd habeat possibilitatem; quod habeat fundamentum, quia limitata; & quòd in suo esse sit composita; ac proinde quòd includat suam materiam.

XV. Præterea refert Petavius cit. lib. 7. *de Angelis*, cap. 4. à num. 4. Platoniorum sententiam de materia in spiritalibus, eò quia in ipsis est potentia, & subjectum, & quia est aliquid dicens informitatem, quod formatur per formam: refert alios è contra, qui adeò simplices putant Angelos, quòd neque qualitatum sunt susceptibiles, quos reprehendit, & num. 13. tenet, hanc propositionem: *Quòd in substantiis separatis nulla est possibilis transmutatio; nec sunt in potentia ad aliquam, aut ad aliud, quia æternæ sunt & immunes à materia*; fuisse damnatam à Stephano Episcopo Parisensi: ex qua videtur fulciri sententia ponens in Angelis materiam. D. Thomas, quem citat ipse Petavius, expressè, in part. 1. quæst. 50. art. 2. tract. de compositione in Angelis ex materia & forma, & repulsa opinione Avicembron, quòd eadem sit materia corporaliū, & spiritalium,

probat impossibile esse, substantias spirituales habere qualemcumque materiam, eò quia intellectio est operatio immaterialis; atque ita solum videtur excludere ab ipsis materiam, qualem esse constat in corporibus; at ipse, quodlib. 3. art. 20. ubi quærens, an anima sit composita ex materia & forma, dicit, *Quòd si materia dicatur omne illud, quod est in potentia quocumque modo, & forma dicatur omnis actus, necesse est ponere, quòd anima humana, & qualibet substantia creata, sit composita ex materia & forma si verò materia propriè accipiatur pro illo, quod est potentia tantum, sic impossibile est, quòd anima humana sit composita, ex materia & forma; & ad objectionem propositam respondet, quòd materia & forma sunt prima principia in genere substantiæ mobilis; atque ita compositio ex ipsis solum est in substantiis mobilibus.*

XVI. Ex dictis aliisque, quæ afferri possent, constat, materiam & formam variis modis accipi posse: unde D. Thomas & alii, qui substantiis spiritualibus negant materiam, eam accipiunt pro ea, quæ est pura potentia, & est subiectum naturalium mutationum. Eodem sensu loquuntur qui eisdem negant materiam, eò quòd sint substantiæ immateriales, quia immateriales dicuntur eò quòd sunt expertes materiâ, eâ scilicet, quæ quantitate afficitur, & sub diversis dimensionibus ad individua derivatur, atque ita eorum sententia apertè non pugnat adhuc cum sententia Divi Bonaventuræ, nec aliorum ponentium in substantiis spiritualibus materiam, non quidem dimensionibus obnoxiam, vel mutationibus subiectam, sed tantum in eo sensu, quo est quid perfectibile & actuabile per formam propriam dictarum substantiarum. Unde Salmatic. tr. 7. *de Angelis*, dist. 1. dub. 3. §. 3. referunt quòd Angelos componi ex materia & forma spiritualibus tenent Alens. 2. p. q. 20. memb. 1. in fine, & quæst. 44. memb. 2. D. Bonaventura in 2. dist. 3. art. 1. quæst. 1. & 2. Richar. ibidem, art. 1. quæst. 2. & art. 2. quæst. 1. & 2. Aureolus, apud Capreol. in 2. dist. 3. quæst. 1.

XVII. Quare, omissis aliis acceptionibus, ad exponend. Lulli sentent. notandum est quòd materia & forma, prout ad invicem se habent ad constitutionem entis naturalis, generaliter sic accipi possunt ut materia sit illa ratio intrinseca enti naturali, quæ est perfectibilis & passiva sub ratione activa & perfectiva; forma autem est illa ratio intrinseca enti naturali, quæ est perfectiva & activa ad esse ipsius. In hoc generali sensu materia nihil dicit de naturali transmutabilitate, nec de aptitudine ad dimensionem quantitatis; forma quoque nihil

importat de educibilitate ex materia, vel de aliis, quæ formis in sensu Aristotelico attribuuntur; sed materia purè intelligitur totalis ratio passiva & perfectibilis, forma verò totalis ratio activa & perfectiva in ente naturali. Solum in hoc sensu admittit Lullus in substantiis spiritualibus creatis compositionem ex forma & materia. At, ut intelligatur in quo determinatè consistat hæc materia & forma, notandum est, in Angelo, anima rationali, & quacumque alia substantia creata, esse bonitatem, magnitudinem, durationem, potestatem, reliquasque perfectiones, quæ sunt similitudines perfectionum Dei; cum enim Deus omnia ad sui imitationem produxerit, in omnibus produxit perfectiones suis similes, in quibus creaturæ ipsum imitentur; & sicut bonitas, magnitudo, & reliquæ divinæ perfectiones sunt Deo essentielles, ita bonitas, magnitudo, & cæteræ perfectiones substantiarum spiritualium, de quibus solum pro nunc agemus, sunt eisdem essentielles. Dictæ perfectiones in Deo sunt omninò idem absque ulla reali, adhuc formali, distinctione, & propterea Deus est summè simplex; at perfectiones spirituum creatorum sunt realiter inter se distinctæ, ac propterea substantiæ spirituales non sunt summè simplices, sed ex eisdem realiter componuntur.

XVIII. Cum solum sit animus ostendere probabilitatem doctrinæ Lullianæ, non est opus omnia prædicta manifestare, & sufficiet pro nunc ex Patribus ostendere distinctionem perfectionum in substantiis spiritualibus, ac consequenter earum ex eisdem compositionem; nam apud Petavium de Theolog. Dogmat. tom. 1. lib. 2. de Deo, cap. 2. à num. 3. summa Dei simplicitatem plures probant ex eo, quod proprium sit ei nullam partium concurrentiam, nullam simplicium coherrentiam habere, atque ita in creatis substantiis quibuscumque debent dari partes & simplicia quædam principia, ex quibus coalescant. Deinde à num. 5. adducit varios, qui tanquam Deo proprium adstruunt, quod in ipso substantia, potentia, sapientia, &c. sint idem omninò, ut est Richardus à Sancto Victore, lib. 1. de Trinit. cap. 12. Cassiodorus, lib. de anima, cap. 9. & Cyrill. Alexandrinus, qui lib. 1. in Joan. cap. 9. ait: *In compositione esse id omne, quod inest in creatura, cernimus, nihilque, in ipsa simplex.* Ex D. Augustino, lib. 11. de Civit. Dei, cap. 10. probatur ibi, n. 7. summa Dei simplicitas, quia scribit: *Idè simplicem dici, quia quod habet hoc est; tum, tract. 20. in Joan. sic: Deus cui non est alia substantia ut sit, & alia potestas, ut possit.* D. Gregor. lib. 18. Moral. cap. 27. ait: *Habet viam sapientia, sed non aliud habet, & aliud est; quippe*

cui hoc est esse quod vivere ; & D. Bernard. serm. 80. in cant. dicit : *Sola summa & increata natura hanc sibi vindicat meram singularemque suæ essentiae simplicitatem , ut non aliud , & aliud ; non alibi quoque & alibi , sed ne modo quidem & modo inveniantur in ea. Nempè in semet manens , quod habet , est ; & quod est , semper , & uno modo est. In ea , & multa in unum , & diversa in idem rediguntur ; ut nec numeratione rerum sumat pluralitatem , nec alterationem de varietate sentiat.*

XIX. Præcipue autem docet ipse Petavius ibidem, cap. 6. juxta plurimos PP. Deum esse expertem compositionis , quia ipse est sua bonitas , magnitudo , sapientia , &c. ita ut hoc sit Dei peculiare ; unde ibi , num. 7. D. Augustinus , lib. 5. de Trinit. c. 10. ait : *in rebus , quæ participatione magnitudinis magnæ sunt , quibus est aliud esse , aliud magnas esse , sicut magna domus , & magnus mons , & magnus animus : in his ergo rebus aliud est magnitudo , aliud quod ab ea magnitudine magnum est Deus autem , quia non ea magnitudine magnus est , quæ non est quod est ipse , ut quasi particeps sit ejus Deus , cum magnus est , alioquin illa erit major magnitudo , quàm Deus hoc & de bonitate , & de æternitate , & de omnipotentia Dei dictum sit , omnibusque omnino prædicamentis , quæ de Deo possunt pronuciari.* Hanc eandem sententiam ex Augustino tenent , ut ibi notat Petavius , Alcuinus , Anselmus , Bernardus , Richardus , Fulgentius & alii , ex quibus Fulgentius , lib. Resp. ad Inquisit. Ferrandi. Inquisit. 2. ait : *Hoc esse catholicæ veritatis , ut , cum in Deo divinitatem , magnitudinem , bonitatem , virtutem & quælibet alia in his quæ ad se propriè dicuntur , nominamus , non istis diversis nominibus , quædam diversa , sicut in homine , qui subjacet qualitati , sed unum illud , quod est essentia , vel natura , certissime noverimus.* Similiter , cap. 7. ostendit ex PP. Petavius , Deo proprium esse , quod nulla sit in ipso perfectionum distinctio. Tandem D. Anselmus in Monologio , & D. Bernardus , lib. de considerat. infinitam Dei perfectionem colligunt ex eo quod sua magnitudo sit sua bonitas , sua virtus , sua sapientia , &c. & è converso.

XX. Hinc deducitur distinctio perfectionum in Angelo , quia , si sua bonitas esset sua magnitudo , potestas , virtus , &c. & è converso , utraque esset infinita , quia esset omnis perfectio ; & bonitas , nedum esset magna & potens , sed esset ipsa magnitudo & potestas , quod est proprium Dei : unde , cum dictæ perfectiones sint in Angelo distinctæ , & ad invicem mutuo agant , & patiantur , nam bonitas est magna per magnitudinem , & magnitudo bona per bonitatem & non per se , idèò verè & realiter bonitas est bonificativa magnitudinis ,

& magnificabilis à magnitudine, sicut magnitudo est magnificativa bonitatis, & bonificabilis à bonitate: quare, quia non potest esse eadem simplex ratio activa, & passiva, cum utraque sit finita, & quodam modo opponantur, ideo unaquaque est ratio activa, & ratio passiva, & consequenter est actus, quo ratio activa agit in passivam, & passiva patitur ab activa; ac proinde in bonitate est quid bonificativum, quid bonificabile, & quid quod est actus, seu bonificare; & quia idem similiter est in omnibus Angeli perfectionibus, quæ ad invicem, ad esse Angeli, mutuo agunt, & patiuntur; ex omnibus rationibus passivis fit una totalis ratio passiva, & hæc dicitur materia; ex omnibus activis fit una totalis ratio activa, & hæc dicitur forma; & ex omnibus actibus fit unus totalis actus, seu una totalis connexio, ex quibus omnibus componitur Angelus.

XXI. Hæc, quam exposuimus, est doctrina, quam communiter tradit Lullus, & eam in quæst. 45. sentent. notata, in qua quærit: *Utrum Angelus sit compositus ex forma & materia?* Specificat in Angelo quoad intellectum & voluntatem: unde, num. 1. ostendit, quod quælibet creata perfectio naturaliter appetit agere cum sua propria qualitate, & num. 2. transiens ad Angelum, discurret: *Quod Angelus naturaliter intelligat, & quod illi sit magis naturale intelligere, quàm igni calefacere, cum sit nobilior substantia per suam bonitatem, magnitudinem, &c. quàm ignis per suam bonitatem, magnitudinem, &c. quod non esset, si suus intellectus non haberet proprium intelligibile sibi consubstantiale* (id est propriam rationem passivam ad suum esse spectantem) *in quo imprimeret intelligibilitates aliorum ensium* (id est, in quo alia entia redderet intelligibilia) *quæ intelligit, deducendo eorum intelligibilitates de potentia in actum.* Hoc idem dixit de voluntate, & memoria Angeli, ut in 29. & 30. quæst. significatum est.

Textus
prop. 16.

XXII. Subjungit, num. 4. sic: *Raymundus adhuc consideravit, quod de necessitate conveniat, ratione magnitudinis Angeli, quod in ipso sit consubstantiale magnificabile, per quod Angelus possit habere magnum intelligere, recolere, & amare, aliàs magnitudo haberet naturam sui contrarii, quæ est parvitas, & potestas esset magna per suum possificabile, & intellectus esset magnus per suum intelligibile, & sic de magnitudine voluntatis, & memoriæ: Unde sequeretur quod esset magna quoad alias rationes, & parva quoad seipsam, quod est impossibile: Ergo Angelus habet consubstantiale magnificabile per suam magnitudinem, & per consequens bonificabile per suam bonitatem, & durabile per suam dura-*

tionem virtusificabile per suam virtutem, verificabile per suam veritatem, glorificabile per suam gloriam.

XXIII. Postea, num. 5. transit ad resolvendam questionem dicens :
 » Raymundus consideravit investigationem, quam fecit, ut in An-
 » gelo posset invenire materiam; & dixit quoddam *omne bile*, quoddam invenit
 » in primis principiis, ex quibus Angelus est constitutus, sicut intelli-
 » gibile, amabile, &c. faciant & constituent unam materiam An-
 » geli, & per consequens, quoddam *omne tivum*, quod est coëssen-
 » tiale Angelo, sicut intellectivum, amativum, &c. faciant, &
 » constituent unam formam Angeli, & quoddam *omne are*, sicut intel-
 » ligere, amare, &c. quæ sunt ex essentia formæ & materiæ, sint
 » una connexio, & unus actus, per quem forma & materia Angeli
 » se invicem conjungunt, & constituunt & componunt tertium,
 » quoddam est substantia Angeli composita & congregata ex ipsis; &
 » ipse Angelus per suam formam in sua propria materia acquirit ex-
 » traneas intelligibilitates, & alia objectabilia per suum actum intrin-
 » secum, scilicet intelligere, amare, & recolere, & ipsa accidenta-
 » liter induit de similitudinibus supervenientibus, ut possit habere
 » habitum scientiæ & charitatis, & conservare illos habitus in sua
 » memoria; & per consequens suum intelligere, recolere, & amare
 » cum prædictis habitibus accidentaliter bonificare, magnificare, &c.

XXIV. Ex his liquidò patet, quodnam genus materiæ admittat
 Lullus in Angelis, videlicet illam rationem passivam, quæ integratur
 ex omnibus rationibus simplicibus passivis omnium suarum perfec-
 tionum, ex quibus constituitur; ac proinde sumit materiam in sensu
 generalissimo pro ratione passiva & perfectibili: unde nec admittit
 materiam adhuc in illo sensu, quo Boëtius & D. Bonaventura ex
 num. 12. 13. & 14. videntur eam admittere, tanquam naturam
 quamdam, quæ sit potentia ad formam, quæ ut alia natura habetur :
 ad modum quo in corporalibus sumuntur materia & forma; quia mate-
 riam dicit Lullus totalem rationem passivam naturæ Angelicæ, quæ
 ratio passiva non est natura, sed pura ratio passiva naturæ. Patet
 etiam, quoddam non sumit materiam in eo sensu, quo communiter negat-
 ur in Angelis, dum immateriales substantiæ afferuntur, quia ab his
 sumitur pro materia dimensionibus subiecta, qualis non est materia
 Angelis à Lullo concessa. Neque est materia transmutationibus sub-
 jecta, ut respondet Lullus in citat. quæst. num. 7. ad objectionem
 Eremitæ, addens etiam, quoddam non omnis materia importat gene-
 rationem & corruptionem, ut patet in materia corporum coelestium :

ac proinde manifestum est, nulli criminationi obnoxiam esse sententiam Lulli, dum Angelis, & animabus attribuit materiam, non utcumque, sed spirituales & consistentem in ratione passiva intrinseca ipsorum. Pro quo etiam videri possunt dicta tom. 2. cap. 14. §. 2.

XXV. Malè tamen ex hoc textu infert laudatus Censor secundam partem suæ Censuræ relatæ num. 10. nempe quod Lullus *operationem Angeli dicit esse substantiam Angeli, sicut & de anima hominis dixerat*; nam illud *intelligere*, & *velle*, quæ agnoscit in intellectu & voluntate, uti connexionem, & actum, videlicet intelligere inter intellectivum, & intelligibile coessentialia & consubstantialia intellectûs, & velle inter volitivum & volibile voluntatis, dicuntur actus intellectûs & voluntatis, quatenus sunt actus, quo activum perficit & agit intrinsecè in passivum sibi coessentialiale, & per accidens & secundariò in passivum extraneum & accidentale; non autem sunt operatio intelligendi & volendi, quia hæc operatio non est actus coessentialis intellectûs, & voluntatis, sed est actus accidentalis, ut indicat in relato textu, dum dicit quod Angelus suum intrinsecum intelligere, amare, & recolere accidentaliter induit de similitudinibus supervenientibus, ut possit suum intelligere, recolere, & amare accidentaliter bonificare, magnificare, &c. quatenus videlicet, habitis speciebus, & receptis in intelligibili, recolibili, & amabili, intellectivum, recolitivum, & amativum cum suo actu coessentiali format ex eisdem speciebus suum accidentale intelligere, recolere, & amare, quæ est operatio intelligendi, recolendi, & amandi, quæ est accidens, ac proinde operatio Angeli non est sua substantia, sed est accidens in ipsa Angeli natura.

XXVI. Ad hoc intelligendum notanda est doctrina ipsius Lulli, quantum ad operationem intelligendi, & consequenter recolendi, & volendi, quam habet anima in via, & etiam in Patria quoad alia objecta præter Deum, sicut & etiam Angelus quoad alia objecta præter Deum: nam omnia alia objecta intelligit anima per speciem, ut advertit in hoc eodem libro Sententiar. quæst. 3. num. 2.; quæst. 5. num. 5. & 7.; quæst. 47. per totam; quæst. 82. per totam; & quæst. 140. in qua docet, quod anima separata alia objecta, præter Deum, intelligit per species; similiter docet de Angelis, quod alia objecta præter Deum intelligunt per speciem, ut quæst. 46. ubi probat quod Angelus seipsum non intelligit per suam essentiam, sed per speciem, quæst. 54.; quæst. 55.; quæst. 59. & quæst. 64. ubi

resolvit, quod Angelus intelligit per species innatas. Cum itaque tam Angelus quam anima per species intelligent. præfata objecta, propterea operatio intelligendi, memorandi, & amandi eadem objecta, est accidentalis, & non pertinet ad substantiam & essentiam intellectus, memoriæ, & voluntatis, ut explicat in eisdem locis citatis; nam, licet intellectus habeat intelligere, seu actum coessentialem & consubstantialem, quo mediante activum coessentialiale agit in passivum coessentialiale, ex quibus est constitutus intellectus, & licet etiam ipse intellectus utatur eodem intelligere, seu actu coessentiali, sicut etiam suo intellectivo & intelligibili coessentialibus, ad eliciendum ex præfatis speciebus suam operationem intelligendi, hæc tamen operatio intelligendi, seu intelligere, quod ex speciebus deducitur, est accidens quoddam superveniens, & non spectat ad essentiam & substantiam intellectus.

XXVII. Unde in quæst. 5. Sent. citata, cum exposuisset Lullus esse in intellectu consubstantiale intelligere, quod est connexio & actus inter intellectivum, & intelligibile consubstantialia, sic num. 6. objicit Eremita: "si verum esset hoc, quod tu dicis, intellectus" conjunctus semper intelligeret, in hoc quod in se habet consubstantiale intelligere; & sic homo qui dormit, aut est ebrius, semper intelligeret, quod est impossibile; ad hanc autem objectionem ita num. 7. respondet Lullus: "Eremita, non bene intellexisti hoc, quod dixi, cum intellectus, dum est in via, non possit intelligere sine phantasmate, sicut oculus, dum est in tenebris, non potest videre sine luce; sed sicut oculus, qui est in tenebris, est dispositus (ex parte sui) ad videndum, sic intellectus est dispositus ad intelligendum." His verbis docet Lullus, quod intellectus cum suo intellectivo, intelligibili, & intelligere consubstantialibus habet ex parte sui quidquid requiritur ad intelligendum; & quia non potest intelligere sine phantasmate, vel specie, non intelligit per dictum intelligere consubstantiale, sed, dum habet speciem, & in suo intelligibili consubstantiali facit illam intelligibilem, ex ea generat & elicit actum accidentalem intelligendi, mediantibus suo intellectivo, intelligibili, & intelligere consubstantialibus; & illud intelligere accidentale est tanquam indumentum consubstantialis intelligere, & est expressum ad instar ejusdem, tanquam medium conjunctionis inter intellectum, & objectum intelligibile; ac proinde nullo fundamento attribuit Lullo præfatus Censor operationem intelligendi esse substantiam Angeli.

XXVIII. Notanter dixi num. 26. quòd in Angelo & anima rationali beata, actus intelligendi omnia objecta, præter Deum, est actus accidentalis : quam exceptionem exposui, quia juxta Lullum, actus, quo Deus beatificè intelligitur, est ipsemet actus coëssentialis, seu ipsum intelligere consubstantiale intellectus, non quidem nudè, & in sua natura sumptum, sed prout terminatum ad Deum sibi intimè præsentem ut intelligibilem, mediante lumine gloriæ, & omni illo supernaturali influxu, quem explicat Lullus in eodem libro Sent. quæst. 3. 69. 137. & 138. sicut in aliis pluribus ex supra citatis ; quia, cum Deus immediatè, & per se, & ut intelligibilis sit intimè præsens intellectui absque specie media, per hoc quòd intellectus suum intelligere consubstantiale dirigit & terminet ad Deum sibi intimè præsentem, ipsum beatificè intelligit, & habet beatitudinem in altiori gradu perfectionis, cum per suum actum consubstantialem, non autem accidentalem, sit beatus.

XXIX. Hæc autem Lulli sententia, quòd actus intelligendi beatificè, tam in Angelo, quàm in anima, sit ipse actus consubstantialis intellectus, modo explicato, multum abest, ut erroris notâ configi possit, imò, quamvis hoc dixisset de actu intelligendi in via, & de actu intelligendi, quo alia objecta, præter Deum, intelliguntur in Patria ab Angelo & anima, nulla esset ratio hoc notandi ; nam, præterquam quòd, quantum ad operationem aliarum causarum, nota est sententia Scoti, & Scotistarum, quòd scilicet ad absolutum in causa immediatè sequitur absolutum in effectû, ut explicat Mastrius tom. 2. Theol. disput. 1. quæst. 4. art. 1. num. 134. expressè Duhamel *Philosoph. vet. & no. tom. 3. de Metaphysica, tract. 2. quæst. 8. de actione*, ponit hanc conclusionem : *Actio non est entitas ab agente, & termino distincta* ; & ibi loquitur præcipuè de actionibus transeuntibus, ac etiam obiter de immanentibus : Unde, object. 3. quâ objicitur : “ Actus voluntatis sæpè est supernaturalis : ergo actus voluntatis est quid à voluntate ; seu à causa, distinctum : “ respondet : “ Actionem voluntatis dici & esse supernaturalem, quia ex natura voluntatis & propriis viribus non profluit, cum voluntas ad eam eliciendam indigeat auxilio, seu actuali, seu habituali altioris ordinis, non enim actio id habet ex voluntate præcisè, ut facultas est naturalis, sed ut est evecta ad nobiliorem statum ; quemadmodum eadem est vitalis, & libera, præcisè ut à voluntate proficitur : itaque actio est supernaturalis, ut est ab auxilio Dei, quod naturæ nostræ non debetur, & libera est, quatenus à voluntate ma-

„ nat : adeò ut solæ formalitates , reales quidem , sed non entitates
 „ quædam , actionem naturalem à supernaturali secernant.

XXX. Circa hoc idem , Tosca, in Comp. Philos. tom. 2. tract. 2. de *Metaphysica intentionali* , lib. 4. cap. 2. prop. 32. sic scribit : *Affero 1. actionem non esse accidens aliquod absolutum & entitativum , sed dumtaxat modum , agentis , videlicet & termini ; & postea affero 2. actionem ab agente & termino distinctione illâ , quam modalem appellant , distingui.* Signanter autem quoad actus animæ rationalis ipse Tosca, tom. 7. tract. 11. de *Metaphysica reali* , Lib. 1. cap. 3. prop. 10. scribit : *Actus non sunt aliquæ entitates ab omni substantia realiter entitative distinctæ , sed dumtaxat animæ motus.* Ad objectionem secundam , quâ objicitur , quòd nisi actus importaret aliquid supra animam , anima semper esset in actu omnium suarum operationum , respondet , quod ut anima fit operans non requirit aliquam entitatem superadditam , sed sufficit aliquid modale ; quod idem respondet , dum objicitur quòd anima , quæ est indifferens ad cognoscendum , vel non cognoscendum , debet per aliquid determinari , nam ait determinari per modum : ac proinde in prædictorum & modernorum sententia , actus animæ consistit in ipsa animæ substantia sic , vel sic modificata , atque ita actus animæ solum propter illum modum distinguitur ab animæ substantia.

XXXI. Nihil ergo mirum , si asseruisset Lullus , ipsam animæ substantiam sub modo quodam determinato esse ipsam operationem intelligendi , & volendi ; at hoc non asseruit , sed tantum , quòd intellectu est quoddam coëssentiale & consubstantiale intelligere & actus , quo ratio intellectiva intrinsecè , & essentialiter agit in rationem intelligibilem : hoc intelligere per se non est actus ille , quo intelligimus res exteriores , sed tantum deservit , ut eo mediante , formet intellectus actum accidentalem intelligendi ; in Patria autem , quia Deum cognoscimus sine specie , non requiritur actus accidentalis , sed ipsummet intelligere coëssentiale , prout ad Deum terminatum , est actus intelligendi Deum beatificè. Planè hic actus coëssentialis & intrinsecus cuilibet virtuti substantiali creatæ videtur esse de mente Patrum Græcorum , prout explicat Petavius Theolog. Dogm. tom. 1. lib. 5. cap. 10. ubi explicans ex Damasceno varias actionis notiones , num. 2. colligit quòd actus virtutis naturalis seu energia est duplex : *alia , inquit , naturâ insita , & est prima omnium & perpetua ac nunquam interrupta naturæ motio : quâ desinente , natura occidit , quia sine illa esse nunquam potest. . . . ab hoc fonte actiones reliquæ pro-*

fluant. Et quidem hic explicandi modus coincidit cum actu illo coëssentiali, quem ponit Lullus, quo mediante, omnes actiones procedunt à virtute activa.

XXXII. Hoc amplius patet ex Maximo Martyre ibid. num. 4. qui apud Euthymium in Panopl. part. 1. tit. 3. ait: *Omnis substantia proprium secum terminum inferens, hoc est diffinitione circumscripta, principium est ejus motionis, quæ secundum vim ac potestatem consideratur illa posterior.* Rursus substantialis omnis ad operationem motio sita est in medio: nam consideratione est, tum substantia posterior, tum actione prior. Expressius autem apud Petav. ibi, num. 5. loquitur in disput. contra Pyrrhum Monothelitam, nam motiones illas substantiarum vocat *substantiales operationes*; & quærens: *Utrum in ipsa ratione substantiam constituyente sit energia, an ex iis, quæ sunt extranea?* Respondet, quodd illa substantialis operatio, non extranea sit, sed ipsam constituat substantiam, quandoquidem sine operibus quidem natura potest esse; sine operatione autem naturali non potest esse natura, neque cognosci; & tandem ibi concludit Petavius, hoc esse Damasceni, & Maximi dictum: *Nullam sine energia & naturali operatione, vel existere vel cognosci posse naturam, ac tantummodo id quod nihil est, motione illa & actione carere*; quibus consentit Clemens Alexand. in 2. Stromat. dicens: *In operatione extantiam cognosci.* De hoc eodem tractat Petavius tom. 4. lib. 8. cap. 1. per totum, ubi expressiora ex Græcis adducit documenta adstruentia, actum substantialem & essentialem in unaquaque substantia: quæ omnia coincidunt cum doctrina Lulli, imò satis innuunt illa correlativa coëssentialia, quæ in unaquaque substantiali virtute agnoscit Lullus, ac proinde immerito notavit Lullum præfatus Censor super operatione intellectus Angeli, & animæ rationalis. Vide infra dist. 3. dissert. 4. à num. 1.

§. I V.

Hominem quoad naturam esse Angelo absolute nobiliorem non adstruit Lullus in Prop. 17. ex Quæst. 48. sed tantum excedere Angelum extensivè, ratione corporis, quod non est in Angelo.

XXXIII. Ad 17. propositionem hunc Textum adducit laudatus Censor: *Eremita, dico tibi, quodd in quolibet homine, supposito quodd peccatum originale nec actuale esset in ipso, natura humana avantagium haberet super naturam Angelicam.* Quæst. 48. Sent. num. 4.

Censura : *Ait, hominem existentem sine peccato esse nobiliorem Angelo quoad naturam ; quia quantum ad animam est æquè spiritualis atque Angelus ; & præterea habet corpus ; & sic est nobilior per intensum, & extensum simul, quàm Angelus : sic loquitur Lullus.*

XXXIV. De hoc puncto egimus fusissimè tom. 1. cap. 14. ad articulos 33. & 40. Eymerici : Unde illuc remittimus, ad hujus difficultatis enodationem. Obiter tamen advertimus, Lullum in quæstione notata non asserere quemlibet hominem esse nobiliorem Angelo quoad naturam, ut innuit laudatus Censor, sed tantum quodd in quolibet homine, supposito quodd in ipso non esset peccatum originale, nec actuale, natura humana avantagium haberet super naturam Angelicam quoad animam, & tantum concludit ; quodd *humana natura in aliquibus hominibus* (non dicit in omnibus) *quoad se, remota à peccato originali, possit esse nobilior, quàm natura Angeli.* Avantagium autem illud, quod concedit humanæ naturæ supra Angelicam, limitatur ad modum quo anima per corpus sibi unitum plures conjungit perfectiones in homine, quas Angelus, utpotè corpori non conjunctus, habere non potest ; atque ita nec est notà dignum illud avantagium animæ concessum, neque ex ipsa Textu deducitur absolute nobilior humana natura in omnibus hominibus, quàm Angelica.

XXXV. Hoc ampliùs fit patens ex textûs consideratione, nam Lullus dictâ quæst. 48. inquit : *Utrum natura humana in Christo sit nobilior, quàm natura Angelica secundum quod consideratur in puris naturalibus ?* Resolvit num. 1. partem affirmativam ; Eremita autem, num. 2. varia proponit argumenta, quia scilicet Angelus per se est Persona, & non est impeditus ad recolendum, intelligendum, & amandum, sicut anima hominis, quæ etiam per se non est Persona ; ad quod Lullus num. 3. respondet, & sub. litt. C. ita subjungit : *Item dico tibi, quodd in quolibet homine, supposito, quodd nec peccatum originale nec actuale esset in ipso, natura humana haberet avantagium super naturam Angelicam quoad animam, cum sit substantia spiritualis, & ex similibus principiis, ex quibus est Angelus, videlicet ex substantiali bonitate, magnitudine, &c. Unde sequitur, quodd humana natura animæ sit ita intensa in spiritualitate, sicut natura Angeli, & sit magis extensa per conjunctum, scilicet per corpus humanum, cum quo naturaliter participat, & ipsum informat & perficit, & corpus est suum naturale instrumentum, & movet ipsum augmentando, & alterando de uno ubi, in aliud ; movet etiam potentiam imaginativam ad imaginandum, sensitivam ad sentiendum, vegetativam ad vegetandum, & elementativam ad*

elementandum, & hoc naturaliter: & idè natura hominis est magis extensa quàm natura Angeli, qui extra se nihil agit naturaliter: unde, cum natura plus dicat in uno subiecto per intensum, & extensum, quàm per intensum tantum, secundum prædictum modum est possibile, quòd humana natura in aliquibus hominibus, quoad se remota à peccato originali, possit esse nobilior, quàm natura Angeli.

XXXVI. Ex hoc Textu apparet, quòd de natura aliquorum hominum asserat Lullus, quòd possit esse nobilior, quàm natura Angeli, de quo vide dicta Tom. 1. cap. 14. Avantagium autem illud, quod concedit naturæ humanæ supra Angelicam, cum limitetur ad operationes corporales, quas exercet anima per corpus, ad quas non potest Angelus devenire, eò quia non est conjunctus, non denotat excessum absolutum humanæ naturæ supra Angelicam, sed limitatum: ac proindè immeritò notatur; cum ab omnibus concedi debeat, utpotè per se patens. Sic D. Bonaven. licèt in 2. dist. 1. art. 2. quæst. 2. teneat, quòd Angelus est creatura superior homine in naturæ dignitate, tamen, dist. 16. art. 2. q. 1. *Utrùm ratio imaginis principalius reperiatur in Angelo, quàm in anima?* In responsione refert, quòd *quidam voluerunt dicere, quòd creaturam magis esse ad imaginem Dei, dici potest dupliciter: vel extensivè, vel intensivè: si extensivè, sic dixerunt quòd homo magis repræsentat Deum, quàm Angelus, quia in pluribus, ratione corporis sibi uniti, utpotè spiritualibus & corporalibus, & in modo existendi in rebus, & secundum etiam modum producendi res. . . . si autem dicatur una creatura magis esse ad imaginem, quàm alia intensivè, quia expressius repræsentat, sic dicunt Angelum magis esse ad imaginem Dei, quàm sit homo.*

XXXVII. Sanè hunc dicendi modum probabilem reputat Sanctus Doc., in quo extensivè tribuitur homini idem excessus, qui à Lullo; & licèt hunc modum dicendi reprobet, quoad hoc; quòd per illum excessum extensivum dicatur esse magis in homine imago Dei, quàm in Angelo, non tamen negat illum excessum, & quoad aliam partem de majori imaginis ratione intensivè, sic eam reprobatur: *Similiter quòd dicatur universaliter expressior esse imago Dei in Angelo quàm in anima propter majorem dignitatem naturæ, hoc non videtur consonare Glossæ, quæ dicit super illud 2. ad Hæbr. ei, qui modicum minoratus est ab Angelis, ibi dicit Glossa, quòd natura mentis humanæ, qualem Christus assumpsit, solus Deus major est. Et Augustinus hoc innuit in pluribus locis; & piè creditur & communiter sentitur, quòd Virgo Maria magis inter omnes Angelos accedit ad Deum. His verbis*

confirmat Bonaventura totum Lulli textum, num. 36. relatum, videlicet de excessu extensivo naturæ humanæ supra Angelicam, & quòd in aliquibus hominibus, Christo scilicet & Beata Virgine Maria, de quibus videtur loqui Lullus in citato textu, natura humana possit esse nobilior, utpote magis ad Deum accedens, quàm natura Angeli. Postea idem S. Doc. ad explicandam suam sententiam, supponit eundem excessum extensivum in homine, prout retulimus citata tom. 1. cap. 14. familia Docet S. Doc. in 3. dist. 2. art. 1. quæst. 2. ubi tractat de majori congruitate hominis vel Angeli ad hypostaticam unionem, & respondens ad argumenta, sic ait: *Ad illud ergo, quod primò opponitur, quòd Angelus ratione spiritualitatis plùs convenit cum Deo, quam homo, dicendum est, quòd etsi plùs conveniat intensivè, non tamen plùs extensivè; homo enim convenit in spiritualitate, ratione animæ, & corpus superadditum facit ad conformitatis majoritatem, & sic utraque, videlicet spiritu & corpore, major sit representatio exemplaritatis divinæ.*

XXXVIII. Eundem excessum hominis supra Angelum exprimunt plures Patres apud Petavium, *Theolog. Dogmat.* tom. 3. *de opific. sex dier.* lib. 2. ubi loquens de imagine Dei in homine, cap. 3. à num. 5. refert tenentes solum in homine esse Dei imaginem, ob dominatum & principatum in mundo, imò, num. 6. refert, Macarium in Hom. 15. hominem anteferre Angelis, & Damascenum, lib. *de duabus Christi voluntatibus tenentem*, hominem magis esse ad imaginem Dei, quam Angelum, quoniam Angelus naturali servo caret, neque naturaliter Dominus est. Ab hoc non abscedit ipse Petavius, qui, cap. 4. probat quòd totus homo, vel imago Dei, vel ad imaginem Dei factus debet dici, non autem sola rationalis anima; & hoc propter perfectionem, quam totus homo, ex corpore & anima conflatus, involvit; isto enim modo quid peculiare habet, quod non Angelus, ac proinde Angelum excedit.

§. V.

In decima-octava. Propositione docet Lullus, quòd peccatorem, non sè avertentem à peccato, sed eidem adhærentem, non potest Deus juvare, juvamine effectivo, quo eum justum faciat de peccatore.

XXXIX. Hunc textum adducit laudatus Censor ad propositionem 18. & adjunctam Censuram: *Neque Deus peccatorem juvare potest, dum*

dum suum intelligibile & amabile sunt infirma ; & hoc est, quia Deus participare non potest per suam bonitatem & virtutem cum malitia & vitio. Quæst. 49. sent. num. 2. in fine.

Censura : Videtur indicare peccatori existenti in peccato non posse dari auxilium, ut ab illo resurgat, quia præjudicaret suæ bonitati Deus, communicando cum malitia.


XL. De hoc egimus tom. 2. cap. 24. ad art. 60. Eymerici, ut autem breviter videatur, Lullum non intendere sensum, quem opponit laudatus Cenfor, notandum est, Lullum, notatâ quæst. 49. inquirere *Utrum malus Angelus possit pœnitere ?* Ad cujus solutionem primò advertit, quòd gustus infirmus non potest deservire ad verum judicium de dulcedine pomi, dum est infirmus, quia per infirmitatem organi est ligatus; atque ita prius debet sanari, ut rectè dulcedinem pomi percipiat. Deinde scribit, num. 1. sic: *In 3. quæstione significata est solutio quæstionis metaphorice sic: homo existens in peccato mortali habet infirmitatem in suo proprio intelligibili & amabili. . . . & hoc est propter peccatum, per quod sua creata objecta sunt deviata à fine illius peccatoris, à quo gratia Dei est absentata propter peccatum; unde, sicut homo non posset generare filium, nec planta plantam in absentia influentiæ corporum cœlestium, sic & multò magis peccator non potest se facere justum cum suo infirmo intelligibili & amabili, nisi gratia Dei superveniat, & nisi Deus sit coadjutor, quia nemo potest facere bonum sine gratia Dei, nec Deus potest juvare peccatorem, dum suum intelligibile & amabile sunt infirma; & hoc est quia Deus per suam bonitatem & virtutem non potest participare cum malitia & vitio, nec Deus potest agere contra suam justitiam.*

Text.
prop. 18.

XLI. In hoc textu apertè supponit Lullus, Deum posse conferre auxilium peccatori, ut se faciat justum; quod magis ostendit num. 2. ubi considerat magnam ligationem peccatoris in absentia gratiæ Dei, cum tamen peccator habeat libertatem pœnitendi; quia: „ Si „ peccator multum multiplicat suum intelligere in objectando Deum, „ & sua attributa & vilitatem peccati, &c. . . . tunc se disponit ad „ habendam contritionem, & pœnitentiam, & tunc venit gratia „ Dei cum misericordia & justitia, quæ de proprio amabili peccatoris, sic removet characterem peccati, per quem est amatum, „ sicut gustativus removet amaritudinem pomi de suo gustabili per „ sanitatem organi, quæ evenit; & tunc peccatum, quod antea erat „ dilectum, est odium, & homo est curatus. „ In hoc textu docet, hominem posse pœnitere, & hoc cum auxilio Dei, quia, ut dixit num.

1. *nemo potest facere bonum sine gratia Dei, & nisi Deus sit coadjutor; quia tamen homo non potest poenitere nec converti, dum amat peccatum, ideo dum amat peccatum, Deus ipsum non potest juvare, hoc est, ipsum convertere, & facere justum; sumitur enim juvare ex contextu, non pro auxilii collatione, sed pro ejus effectu seu conversione, & justificatione; intelligibile autem & amabile dicuntur infirma, dum amatur peccatum; quia, ex ultimis textus verbis, curatur homo, dum peccatum quod antea erat dilectum, est odium. Præterea in eadem questione supponit, peccatorem per auxilium Dei posse poenitere, dum à contrario sensu, ex eo quod homo possit poenitere, ostendit dæmonem poenitere non posse.*

XLII. Unde tantum intendit Lullus, quod Deus non potest quoad effectum juvare, id est, convertere & justificare peccatorem, dummodò ipse amet peccatum, & ipsi adhæreat, ac non poeniteat, prout quæst. 79. num. 2. explicat dicens: *Sicut homo existens in peccato mortali, qui à Deo non potest recipere misericordiam sine contritione, licet Deus quoad se illi possit parcere.* Huic simile est quod de Christo dicitur Marci 6. 5. *& non poterat ibi virtutem ullam facere; videlicet non poterat in sua Patria ullum facere miraculum, non quia ei deficeret potestas, sed quia nolebat, vel non decebat ingratis civibus illa conferre beneficia, ut exponit à Lapide, apud quem Victor Antiochenus sic scribit: Quia enim ad impetrandam sanitatem utrumque coire debet, nimirum eorum, qui curâ egent, fides, & illius rursus, qui curaturus est, virtus: si alterum horum defuerit non temerè sanitatis beneficium obveniet.* Adeoque, cum etiam ad peccatoris justificationem requiratur ejus averfio à peccato, & influxus Dei illum justificantis, dum ipse non se avertat à peccato, imò eidem adhæreat, non potest illum effectivè juvare, seu donare illo juvamine, quo reapse in justificatione ponatur. Unde D. Greg. Hom. 31. in Evang. scribit: *Vocat (Dominus) sed non erigit, quando per ejus gratiam illuminamur, sed exigentibus nostris meritis adjuvari non possumus.*



DISSERTATIO VIII.

De sensu Lulli circa remanentiam panis in Eucharistia, in Prop. 19. ipsi oppositam, ex quæst. 126. 127. & 129. lib. Sent. ubi exponantur varii textus ex aliis libris deprompti in idem coincidentes.

§. I.

Ostenditur B. Lullum tenere eandem Catholicam de Sacro-Sancto Eucharistia Doctrinam, quam Ecclesia, præcipue in Concilio Tridentino, profutur.

I. **D**OCTRINAM Catholicam de Sacro Sancto Eucharistiae Sacramento exponit Concilium Tridentinum, sess. 13. &, quoad præsens institutum, his præcipue canonibus, videlicet, *Can. 1.* „ Si quis negaverit in Sanctissimo Eucharistiae Sacramento contineri verè, realiter, & substantialiter Corpus & Sanguinem, unà cum anima & divinitate, Domini nostri Jesu-Christi, ac proinde totum Christum; sed dixerit tantummodò esse in eo, ut in signo vel figura, aut virtute, Anathema sit. *Can. 2.* Si quis dixerit in Sacro Sancto Eucharistiae Sacramento remanere substantiam panis & vini, unà cum Corpore & Sanguine Domini nostri Jesu-Christi, negaveritque mirabilem illam & singularem conversionem totius substantiæ panis in Corpus, & totius substantiæ vini in Sanguinem, manentibus dumtaxat speciebus panis & vini; quam quidem conversionem Catholica Ecclesia aptissime transubstantiationem appellat, Anathema sit. *Can. 4.* Si quis dixerit, peractâ consecratione in admirabili Eucharistiae Sacramento non esse Corpus & Sanguinem Domini nostri Jesu-Christi, sed tantum in usu, dum sumitur; non autem antè, vel post; & in hostiis, seu particulis consecratis, quæ post Communionem reservantur, vel super sunt, non remanere verum Corpus Domini, Anathema sit. „

II. Tota hæc eadem doctrina datur à B. Lullo in libris omnibus, quibus agit de Eucharistia, ut ostendendum suscipio ex variis, quos ad manum habere potui. Itaque in arte compendiosa inven. veritatem (tom. 1. edit. Mogunt.) dist. 2. part. 2. pag. 25. quæst. 7. de Sacra-

mento Altaris, quæst. *Utrum panis Hostiæ consecrata, efficiatur verum Corpus Christi?* Resolvit affirmativè, & quinque probat rationibus, in quarum *ratione primæ*, ait: "Quia majorem potestatem recolit memoria in Deo, cum sub forma panis & vini facit stare carnem, quàm faceret, si sensualitas videret & sentiret, quòd panis alteraretur ex forma panis in formam & materiam carnis." *Ratione 3.* scribit: "Cum Corpus consecratum est in Altari, tunc movetur bellum inter sensus sensuales, & intellectuales, & inter hoc quod est substantiale, & accidentale; quia sensualitates affirmant panem, quia sentiunt formam panis; sed intellectualitates affirmant veram carnem, quia memoria recolit & intellectus intelligit, quòd per illud Sacrificium tam miraculosum & virtuosum Deus & suæ Cæmeræ (suæ perfectiones) melius recoluntur, intelliguntur, & diliguntur . . . & quia accidentia, quæ sensibus repræsentant, nihil sunt ratione hujus quod significant, quia non habent subiectum in quo consistant . . . Ideo memoria recolit, quòd sensus intellectuales sunt fortiores contra sensuales, quàm è converso." Et tandem concludit Lullus: *Sic forma panis nihil est in hostia consecrata, quia forma panis est alterata.* Eandem quæstionem iterum proponit, & affirmativè resolvit, & probat ibid. dist. 3. part. 2. quæst. 10. pag. 32. Idem pariter ostendit lib. de *Princip. Theolog.* (tom. 1.) part. 1. dist. 6. de *Sacram.* pag. 19. tit. de *Sacris. Altar.* quod esse probat quatuor rationibus; & præter alia, *ratione 1.* ait: *quòd est Sanctum Sacrificium Altaris, cum Hostia ritè consecrata transubstantiatur in veram Carnem & Sanguinem.*

III. Idem, lib. 4. *Demonstration.* (tom. 2.) cap. 20. de Sacrificio Altaris, num. 1. hæc habet: "Et ideo voluit (Deus) quòd Hostia consecrata transubstantiatur in veram Carnem Jesu-Christi, & quòd sine ulla divisione Jesus-Christus sit in Cælo, & in quolibet loco, in quo sacrificatur, uno & eodem tempore." & num. 3. "Supremum bonum vult, quòd vera Caro, & verus Sanguis sint sub forma (specie) panis per influentiam supremæ virtutis conjunctæ & unitæ cum illo Sanguine & Carne Jesu-Christi." etiam, num. 5. "Scis-ne quare supremum bonum faciat miracula? Ad demonstrandum quòd sit Dominus naturæ, ad demonstrandum quòd singulis diebus faciat hoc in Sacrificio Altaris, quod non potest facere natura, quia natura non potest facere substantiam sine accidentibus, nec accidentia sine substantia; & quia majus miraculum quod sit, est, si Hostia transubstantiatur in carnem, per hoc quod est majus

» miraculum, & quod fit sæpius, & quòd fit in pluribus locis, supre-
 » mum bonum voluit demonstrare, se esse Dominum naturæ. »
 Num. quoque 7. « Unde, si tu es Præbyter, & dicis verba quæ
 » conveniunt Sacrificio Altaris, quantuscumque peccator sis, totum
 » hoc non obstat, quòd Hostia *non transubstantietur* in Corpus Jesu-
 » Christi, quod est majus, quàm omnes aliæ creaturæ (ob unio-
 » nem scilicet cum verbo) & finit se comedi & tractari à te, & si
 » tu es ægrotus, finit se portari ad tuam Cameram, & finit se tibi
 » præsentari. »

IV. Pariter, lib. super Psal. *Quicumque vult salvus esse* (tom. 4.)
 part. 35. pag. 25. tit. *de Eucharistia*, Eremita quidam, *Blanquerna*
 nomine, qui toto libro repræsentatur instruens quemdam Tartarum,
 sic eum, num. 4. alloquitur: « Nam Dominus Jesus-Christus consti-
 » tuit hoc Sacramentum, quod vidisti super altare, quod est Corpus,
 » & Sanguis ejus, sicut ipsemet dixit, & voluit, ut illud fiat sum-
 » mum opus supra cursum naturæ. » Contra hoc tamen, num. 6. sic
 objicit Tartarus: « Mihi videtur impossibile, quòd sub modico pane
 » possit esse homo perfectus & integer in quantitate; præterea quòd
 » in eodem tempore possit essentialiter esse in diversis & pluribus
 » locis: similiter, quòd accidentia possint esse sine substantia, & è
 » converso. » At num. 7. respondet *Blanquerna*, quòd *videtur impossi-*
bile illud Sacramentum secundum cursum naturæ; cognoscitur verò possi-
bile hoc Sacramentum progrediens ex influentiis summi operis & infimi:
 » Quod ideo est, quia sicut homo habet manus ad palpandum,
 » pedes ad ambulandum, &c. sic & multò melius habet Deus boni-
 » tatem ad bonificandum, & magnitudinem ad magnificandum, &
 » sic de aliis; unde, sicut materia habet appetitum patiendi, ut de
 » ipsa fiat quidquid forma appetit, ita natura habet passionem ad
 » patiendum illam operationem, quam divinæ dignitates de ipsa
 » volunt agere. »

V. Similiter, lib. disput. Fidel. & Infidel. (tom. 4.) part. 5. de
 Sacramentis, num. 1. Catholicus dicit: « Quia Deus potest plus age-
 » re de natura & in natura & supra naturam, si Sacramentum Eu-
 » charistiæ est, quàm si non est, quia facit quòd creatura panis *tran-*
substantietur in Hominem-Deum, videlicet Jesum-Christum; &
 » facit quòd superentur tempus & locus, & quantitas, & cætera ac-
 » cidentia naturæ. » At num. 2. sic objicit Infidelis: « Manifestum
 » fit est, quòd quodcumque aliqua substantia transmutatur in aliam,
 » impossibile, quòd, facta transmutatione; remaneant accidentia

„ substantiæ, quæ transmutatur, quia sic essent accidentia sine sub-
 „ jecto, quod est manifestè impossibile; sed si prædictum Sacramen-
 „ tum est in Veritate, substantia panis, & vini transmutantur in sub-
 „ stantiam carnis, & sanguinis, permanentibus accidentibus panis &
 „ vini sine substantia panis & vini, quod est manifestè impossibile :
 „ Ergo prædictum Sacramentum Eucharistiæ non est ». Catholicus
 „ verò immediatè respondet : « Divina Sapientia attingit, quodd Di-
 „ vina Potestas possit agere supra creatam naturam, cum attingat
 „ ipsam potestatem in magnitudine bonitatis, virtutis, & perfectio-
 „ nis ; eodem modo similiter Divina Voluntas attingit ipsammet Po-
 „ testatem : igitur sapientia scit, & voluntas vult, quodd sua potestas
 „ possit supra naturam, sicut cogere quodd *accidentia stent sine subiecto*,
 „ & cætera supernaturalia... & ita fit supra naturam, ut prædictum est.

VI. Præterea, num. 4. sic insurgit Infidelis : « Si in Sacramento
 „ Eucharistiæ, sicut Christiani tenent, substantia panis transubstan-
 „ tiatur in corpus veri hominis, videlicet Jesu-Christi, sic necessariò
 „ sequitur, cum Corpus istius Hominis, videlicet Jesu-Christi, contine-
 „ tur sub certa & determinata quantitate, aut quodd corpus illius aug-
 „ mentetur ultra metas quantitatis humani corporis, & hoc etiam
 „ in tantum posset augmentari, quantum universa substantia panis
 „ posset sufficere ad transubstantiandum ; & sic non esset vera tran-
 „ substantiatio, quia expellit ipsum Corpus Christi à quantitate hu-
 „ mani corporis, & sic facit quodd sit imperfectus homo, quod est im-
 „ possibile : aut convenit, quodd, *factâ transubstantiatione*, tota illa
 „ substantia, quæ superfluit ultra quantitatem humani corporis, de-
 „ veniat in nihilum, quod est impossibile : Ergo Sacramentum Eu-
 „ charistiæ non est ». At Catholicus immediatè ita respondet : « Cum
 „ transubstantiatio panis in Corpus Jesu-Christi veri hominis sit su-
 „ pernaturalis operatio, & conveniat quodd hæc fit, ut jam proba-
 „ tum est ; dico quodd illa substantia panis sine quantitate ipsius pa-
 „ nis transeat in substantiam Corporis Jesu-Christi, videlicet in ve-
 „ rum corpus hominis, qui est Jesus-Christus ; & ita est impossibile,
 „ quodd Corpus Christi augmentetur, cum sine quantitate (noviter
 „ adveniente) fit impossibilis augmentatio.

VII. Insuper, num. 7. sic discurret Catholicus : « Necessariò con-
 „ venit, quodd sit Sacramentum Eucharistiæ, & hoc manifestatur
 „ isto modo : divina potestas est tanta in actu bonitatis, magnitudi-
 „ nis, &c. quodd conveniat, quodd agat omnibus modis operandi,
 „ qui cedunt in summam nobilitatem & perfectionem dignitatum.

„ Dei, & actus eorum, ut ipsa potestas nullo modo, quo possit
 „ agere bonum, justum, magnum, &c. sit otiosa; & sic necessariò
 „ convenit, *Primò* quòd totus Deus Pater, qui est ipsa tota potes-
 „ tas, generet de tota ipsa potestate Deum Filium. . . . *Secundò* au-
 „ tem Deus operatur alio modo extra se; & *primò*, operando crea-
 „ turas de nihilo, videlicet creando, ita quòd *essentia nihili*, ut ita
 „ loquar, *non remaneat in illo aliquo*, quod est creatum. . . . *Secundò*
 „ est alia operatio potestatis, &c. Dei, & hæc est mirabilis in mag-
 „ nitudine potestatis, &c. videlicet unire in uno supposito. . . . Deum
 „ & creaturam, videlicet Deum & hominem, *remanente naturâ*
 „ *utriusque in illo supposito* integrâ & perfectâ & *intransmutatâ*, ut
 „ jam supra probatum est. *Tertiò* est alia operatio, quam Deus de-
 „ dit creaturæ naturæ, & etiam Artificibus, videlicet operari aliud de
 „ alio, *permanente essentiâ & naturâ operabilis tunc in operato*, & in
 „ ipso operabili existente nihil secundum speciem vel figuram in qua
 „ priùs erat; & in hac operatione assimilatur ipsa natura operatio-
 „ nibus suæ causæ, quantum potest. *Quartò* convenit quòd etiam di-
 „ vina potestas agat aliam operationem, quia aliter esset insufficiens
 „ magnitudini bonitatis, &c. videlicet quòd de alio fiat aliud, *non*
 „ *permanente essentiâ nec naturâ factibilis in facto*, sicut essentia ni-
 „ hili, ut ita loquar, non permanet in aliquo creato: ipso factibili
 „ etiam, postquam est factum, id est *transubstantiatum*, existente ni-
 „ hil secundum speciem (substantiæ) & figuram, in qua priùs erat,
 „ sicut supradictum est; & hæc talis operatio est Sacramentum Eu-
 „ charistiæ: Ergo illud Sacramentum est, aliàs quoad istum modum
 „ operandi divina potestas esset defectiva in actu nobilitatis, hono-
 „ ratis, magnitudinis, &c. quod est impossibile; quia sic ad istum
 „ modum implicaret in se potentiam (id est potentialitatem) quod
 „ est impossibile: ergo prædictum Sacramentum est.

VIII. Idem Lullus Disput. cum Hamar Saraceno (tom. 4.) part.
 2. in ejus par. 2. cap. 2. fig. 14. de Eucharistia, pag. 38. sic loqui-
 tur: „ Et in ipso Sacramento est major participatio, & majus fig-
 „ num divinæ potestatis, charitatis, & humilitatis inter Deum &
 „ hominem, quæ potest esse in via; nam Deus communicat suam
 „ infinitam potestatem finitæ potestati Presbyteri, quòd ipso possit
 „ de pane facere carnem, & de vino sanguinem, sine generatione
 „ & digestionem & compositionem *panis cum carne, & vini cum sangui-*
 „ *ne*, & substantiæ cum accidente, & quòd idem homo, videlicet

» Christus, fit in eodem tempore in Cœlo & in multis locis in terra,
 » & hoc Sacramentaliter.

IX. Idem in Lect. Art. invent. & Tab. gener. (tom. 5.) dist. 3.
 part. 1. quæst. 5. de Sacramento Altaris , per decem quæstiones agit
 diffusissimè de hoc Sacramento , explicans omnia , quæ de ipso do-
 cet Ecclesia, ex quibus aliqua delibabo. Itaque , quæst. 1. *Utrum sit*
Sacramentum Eucharistiæ ? Partem affirmativam variis probat ratio-
 nibus , & num. 4. sic ait : « Major potestas boni , quam Deus po-
 » test dare homini , est illa , quam tribuit in Sacramento Altaris ,
 » dando Presbytero potestatem , quòd de pane possit sanctificare
 » Corpus Christi , *transubstantiando* substantiam panis in carnem , &
 » vini in sanguinem Christi , & possit *remove*re *ab accidentibus panis*
 » & *vini eorum propria subiecta* , & in illo Sacramento vincere na-
 » turam loci , quantitatis , temporis , ponderositatis , & figuræ ».
 Quæst. 2. *Quid est Sacramentum Altaris ?* num. 1. scribit : « Et ideo
 » est hoc Sacramentum in tanta potestate virtutis , quòd non possit
 » esse major , quoniam homo cum potestate Dei habet tantam vir-
 » tutem , quòd panem *transubstantiet* in Corpus Jesu-Christi , & vi-
 » num in ejus sanguinem , & efficiat quòd *accidentia panis & vini*
 » *sustententur sine proprio subiecto* , & sine multiplicatione Corporis
 » Christi & ejus sanguinis.

X. Præterea ibidem , num. 2. ait : « Quia ratione magnæ concor-
 » dantiæ , quam (*Deus & Homo*) habent , efficit homo de pane
 » carnem Jesu-Christi , & de vino sanguinem hîc inter nos , Christo
 » existente in Cœlo & in nobis , & carne existente in hostia , & con-
 » secrato sanguine existente sanguine in Calice & in Corpore , ita
 » quod differentia loci ibi non potest contradicere » . Et num. 5. «
 » Nam quæ fides potest esse major , quàm credere , quòd panis *con-*
 » *vertatur* in Corpus Christi , & vinum in sanguinem , vidente &
 » tangente homine accidentia panis & vini , & non vidente & tan-
 » gente accidentia Corporis Christi ; & quod Christus , qui est in
 » Cœlo , existat in tam parva quantitate , sicut est hostia ; & quòd
 » in uno & eodem tempore fit in Cœlo & in terra » . Etiam num.
 7. ait : « Nam Christus habet tam magnam charitatem erga nos ,
 » quòd toties ipsum possimus habere quoties ipsum volumus habere
 » & recipere , & sumendo ejus corpus & sanguinem , sumimus ejus
 » animam conjunctam cum illo corpore ; & sumendo ejus humanita-
 » tem , sumimus ejus Deitatem , quæ illi humanitati est conjuncta ;
 » & quando sumus infirmi , ipse venit ad nos ; & quanta est ejus
 » virtus ,

» virtus , tantum se nobis tribuit. « Et num. 12. dicit : » Quia in
 » Sacramento Altaris principiat virtus potestatis , in quantum vir-
 » tus verborum de pane facit carnem , & de vino sanguinem. «
 Omitto reliqua , advertens quod ferè in omnib. 200. §§. hujus quæst.
 5. eadem repetitur doctrina.

XI. Idem *Lib. Proverb.* (tom. 6.) part. 3. cap. 21. de Sacra-
 mento Altaris , num. 6. ita habet : *In Sacramento Altaris Deus cum*
sua voluntate facit de pane carnem & de vino sanguinem , & Presbyter
cum suis verbis. Num. 7. *Presbyter cum suis verbis movet voluntatem*
Dei ad volendum in uno momento carnem de pane , & sanguinem de
vino. Num. 8. *Presbyter , cum potestate Dei , facit quod vinum , quod*
est in calice , fiat sanguis Christi , & panis , qui est in hostia , fiat caro
Christi. Num. 9. *Presbyter , cum potestate Dei , facit sanguinem , qui est*
in calice , esse in carne , quæ est in hostia. Num. 11. *Presbyter , cum*
potestate Dei , quam Deus illi dedit , facit accidentia esse sine substantia.
 Num. 13. *Presbyter , qui facit quod panis transubstantietur in substan-*
tiam Corporis Jesu-Christi , non addit aliquid in illa ; & generatis ma-
teria panis non perditur (non in nihilum reducitur) sed transmateria-
tur in materiam Corporis Christi. Num. 15. *In Sacramento Altaris Pres-*
byter vincit naturam temporis , loci , quantitatis , coloris , saporis , pon-
derositatis , & motus ; & facit de natura quod vult. Et num. 19. *Pres-*
byter portat Jesum-Christum quod vult , & deponit illum ubi vult.

XII. Idem *Lib. de 1. & 2. Intentione* (tom. 6.) cap. 5. pag. 15.
 Tit. *de Sacrificio* , num. 3. sic scribit : « Amabilis Fili , Sanctum
 » Corpus Nostri Domini Jesu-Christi est in Cœlo , & in omnibus
 » aliis locis , in quibus est consecratum per virtutem verborum ; &
 » ideo in sacrificio vincitur tempus & quantitas , motus & locus ;
 » quia uno tempore est in diversis locis , & sub modica quantitate
 » hostiæ est tota Persona Jesu-Christi , quæ est major quàm quanti-
 » tas hostiæ » ; & num. 4. ». Nam per hoc quod hostia non muta-
 » tur de colore , nec quantitate , nec de sapore , quamvis sub illa
 » sit forma & materia carnis , apparet in sensualitate (in sensuum
 » perceptione) quod intellectualitas , quæ credit , *illam hostiam esse*
 » *Corpus Jesu-Christi* , non sit in veritate : Unde , si tu Fili , ten-
 » taris à tali tentatione , recurre ad divinam potestatem , quæ potest
 » facere omnia.

XIII. Idem *Lib. Arbor. Scientiar. in Arbor. Apostolic.* in ejusdem
Foliis , Tit. *de Eucharistia* , præter alia sic , num. 4. scribit : « In Sa-
 » cramento Altaris participant Deus & Homo in magnitudine potest-

» tatis, quoniam magna est potestas, quam Deus dat Presbytero,
 » qui de pane facit carnem, & de ita pauco pane ita magnam car-
 » nem, sicut est caro Christi, quæ magna est in quantum conjuncta
 » est cum Deitate; & idem est de vino & sanguine; & magna po-
 » testas est illa, quam Presbyter habet in loco, ubi facit Sacramen-
 » tum, quoniam in illo loco de vino facit Sanguinem Christi, qui
 » est in Cœlo». Etiam Lib. de *Doctrina Puerili*, part. 3. cap. 25. de
Sacratissimo Sacramento Altaris, num. 1. ait: *Hoc est Hostia consecrata*
transubstantiata in veram Carnem Nostri Domini Jesu-Christi; & num.
 10. *Scias Fili, quod Deus vult, te credere, quod Corpus Jesu-Christi*
est sub specie Hostiæ consecratæ, & ita est sicut Deus tibi præcipit cre-
dere. Etiam lib. *Blanquerna*, lib. 5. c. 120. de septem Sacramentis,
 num. 4. dicit de Dei perfectionibus, quod sunt adeo magnæ, quod
sciunt, volunt & possunt, quod sub forma panis sit vera caro & verus
sanguis Sanctissimi Corporis Jesu-Christi; & num. 5. quod, *Magnam*
potestatem ostendit Deus faciendo accidentia esse sine substantia, & sub-
stantiam sine accidentibus. Tandem lib. *Clericus*, part. 3. de septem Ec-
cles. Sacram. cap. 28. de *Sacramento Altaris*, num. 1. dicit: « Sa-
 » cramentum Altaris, est signum Incarnationis Domini Nostri Jesu-
 » Christi, qui facit ipsum Sacramentum esse id quod est, quia dat
 » potestatem Presbytero, panem per verba, quæ dicit, in suam car-
 » nem transubstantiandi, & vinum in suum sanguinem.

§. I I.

Exponuntur textus notati cum eorum Censura, & demonstratur Lullum
in eisdem non sentire substantiam panis remanere in Eucharistia.

XIV. Textus, ex quibus deducitur laudati Cenforis propositio
 19. Lullo impacta de remanentia substantiæ panis in Eucharistia,
 eorumque Censura, sic ab ipso proponuntur: Primus textus: *Cum*
in Beatissima Trinitate, sit generatio, & spiratio sine motu, loco, &
tempore, & quantitate, & sic de consimilibus, quæ sunt de sensitivo,
& imaginativo, à simili in Altaris Sacramento, quod fit per transla-
tionem panis in Corpus Christi, & sic de vino in suum sanguinem; sub-
stantiâ panis, & sic de vino, dimittente sua accidentia, & existente sub
accidentibus Corporis Christi, consistit sine motu locali, & augmenta-
tione quantitatis, & successione temporis; & talis operatio est illud spe-
culum, in quo magis repræsentata est operatio Sanctæ Trinitatis, q. 126.

Secundus textus : *Quando dicitur : hoc est Corpus meum , in pronomine hoc , non est substantia panis in Corpore Christi realiter , sed significativè , neque in hoc verbo est , neque in hoc nomine corpus , sed in hoc pronomine meum. Quæst. 127.*

Tertius textus : *Verumtamen secundum aliud instans eveniens eadem substantia panis post transubstantiationem factam in Corpus Christi , potest in aliud Corpus transmutari , scilicet in Corpus panis , & recipere prima accidentia , quæ dimisit sine subiecto. Quæst. 129.*

Censura : Ex prædictis textibus colligitur , Lullum sensisse , substantiam panis secundum suum esse remanere post consecrationem in Eucharistia certò quòdam modò. Ex primo quidem textu colligitur , quia ait , substantiam panis & vini existere sub accidentibus Corporis Christi. Ex secundo autem , quia dicit non ante , sed post pronomen meum , substantiam panis , esse in Corpore Christi realiter. Et ex tertio , quia asserit , eandem substantiam panis , post transmutationem in Corpus Christi posse in aliud Corpus transmutari , & recuperare accidentia dimissa , sicut substantia argentea sciphi , quæ figuram dimissam recuperare potest.

XV. Sanè Beatus Lullus , ut evidenter constat ex §. 1. non obiter & perfunctoriè , sed ex professo , operosè & ex animi sententia in omnibus libris profitetur in Eucharistiæ Sacramento eandem transubstantiationem , quam docet Ecclesia Catholica , eamque explicat , sicut omnes Doctores catholici ; nam docet , quòd tota panis substantia convertitur & transubstantiatur in Corpus Christi , ita ut accidentia panis & vini maneant sine subiecto ; & quòd Christus verè & realiter est in Sacramento sub speciebus Eucharisticis , quam doctrinam variis loquendi modis , & explicationibus adornat , ut ibi num. 2. dicens , quòd *forma panis nihil est in Hostia consecrata , quia forma panis est alterata in Corpus Christi ; & quòd accidentia non habent subiectum , in quo consistant ; num. 5. quòd accidentia extent sine subiecto ; num 7. comparans operationem , quâ fit Eucharistia , cum aliis Dei operationibus , ad differentiam Incarnationis , quæ fit remanente naturâ utriusque (Hominis videlicet & Dei) in illo supposito integra & perfectâ & intransmutata ; ad differentiam quoque operationis naturæ & artificum , quæ fit , permanente essentia & natura operabilis in operato , dicit de operatione , quâ fit Eucharistia , quòd de alio fit aliud , non permanente essentiâ nec naturâ factibilis (id est panis , ex quo fit Corpus Christi) in factò ; & taliter quòd ipsum factibile , nempe panis , postquam est factum , id est , transubstantia-*

tum, existit. nihil secundum speciem & figuram, in qua prius erat; id est nihil est panis quantum ad essentiam & naturam panis; & propterea subiungit, quod ad differentiam aliarum operationum hæc transubstantiatio est similis creationi: sicut essentia nihili, ut ita loquar, non permanet in aliquo creato; id est, sicut in creatione ex nihilo, essentia nihili non permanet in creato, ita in transubstantiatione, quæ ex pane fit Corpus Christi, essentia panis non permanet in Corpore Christi factæ ex pane. Num. 8. quod fit transubstantiatio sine generatione, & digestionem, & compositionem panis cum carne, & vini cum sanguine, & substantiæ cum accidente, ad differentiam scilicet naturalium transmutationum; si autem in Eucharistia maneret substantia panis & vini, saltem daretur compositio panis cum carne, & vini cum sanguine, & substantiæ cum accidente. Num. 19. quod remouentur ab accidentibus eorum propria subiecta, ita quod accidentia panis & vini sustententur sine proprio subiecto: num. 11. quod Præbyter facit, accidentia esse sine subiecto; & quod faciendo quod panis transubstantietur in substantiam Corporis Christi; non addit aliquid in illa substantia Corporis Christi; adderet autem, si panis substantia secundum suum esse permaneret.

XVI. Unde, cum aded clarè, & distinctè profiteatur Lullus transubstantiationem, ita ut panis taliter convertatur, quod nihil maneat de ejus substantia, sed tantum maneat accidentia, quæ sine subiecto remanent: iustum est & rationabile, quod quæcumque locutio obiter ab eo exposita, quæ videatur prædictæ opponi doctrinæ, in bonum sensum accipiat, ut est omnium approbata critices & æquitatis regula; quia mens cujusque Authoris deprehendi debet, non ex eo, quod obiter scribit, sed ex doctrina ex professo, & operosè tradita: quare, cum manifestè constet de sententia Lulli super totali panis transubstantiatione, juxta eam debent intelligi quæcumque circa hoc mysterium proferat. Profectò eximius Suarez, tom. 3. in 3. part. disput. 49. sect. 2. circa finem, insurgit contra Bellarminum attribuentem Ruperto Abbati Tuitiensi errorem de impanatione per hypostaticam unionem, & præter alia sic scribit: “ Deinde censeo, „ non fore reprehensione dignum eum, qui varia hujus Authoris „ (Ruperti) dicta observando, eum pie interpretari studuerit; „ sunt enim in prædictis ejus locis multa, quæ indicare possunt, „ illum non habuisse erroneum sensum; primò & præcipuè, quia „ sæpè utitur nomine conversionis, maximè Joan. 6. ubi sæpius, „ & verissimè & elegantissimè explicat hoc mysterium; & tractans

» illa verba : *Pater meus dat vobis panem de Cælo verum*, dicit, *panem*
 » *in veram substantiam Corporis Christi divina virtute converti*. Quòd
 » verò non loquitur de pane, quòd fiat Corpus Christi ratione
 » unionis, patet, tum quia idem dicit de vino, scilicet verti in
 » sanguinem : quod per solam unionem non posset esse verum ; tum
 » etiam quia dicit, illud Corpus esse ipsum, & quod de Cælo des-
 » cendit, & sumptum est ex Virgine, quia Christus dixit : *Hoc est*
 » *Corpus*, *quod pro vobis tradetur* : quod etiam non potest verificari
 » de corpore panis ratione unionis, ut nos etiam supra argumenta-
 » bamur.»

XVII. Deinde subdit immediatè Suarez : « Prætereà ibidem dicit,
 » Hæreticos decipi, eò quòd panis & vinum nihil de externa specie
 » mutarint : propter quod putant non esse verè facta Corpus &
 » Sanguinem Domini; & subdit, *crede quia panis iste sensibilis & vi-*
 » *num, quamvis nihil de exteriori specie mutatum sit, in alium tran-*
 » *sierunt, & in illum cibum potumque conversa sint, qui Angelorum*
 » *viçtus est*. Denique tractans eadem verba : *panis, quem ego dabo,*
 » *caro mea est*, inquit; *panem, ut vitam det æternam, in carnem suam*
 » *transmutari*; nomina autem conversionis & transmutationis non
 » videntur cum hypostatica unionem quadrare: nunquam enim ille
 » dixit, humanitatem esse conversam in divinitatem propter hypos-
 » taticam unionem : videtur ergo posse piè explicari, suppositis præ-
 » dictis ejusdem Authoris verbis, & conjecturis, si distinguamus in
 » pane substantiam, & speciem sensibilem, & intelligamus Christum
 » esse factum panem, non materialem, sed panem vitæ, assumendo
 » panem, non quoad substantiam, sed quoad speciem sensibilem,
 » quam sibi aliquo modo univit. Unde in citato loco Exodi apertè
 » dicit, *panem secundum exteriorem speciem, quæ sensibus subjicitur,*
 » *non mutari*: quod inferiùs explicans, dicit, panem non esse mu-
 » tatum in carnis saporem, nec vinum in sanguinis horrorem. De-
 » nique non minùs expressa videntur verba Theodoreti; & tamen
 » piè exponimus propter alias ejusdem sententias : cur ergo non po-
 » terit idem fieri in Ruperto. »

XVIII. Hæc gravissimè Eximius Doctor pro Ruperto Abbate,
 quem egregiè vindicavit Gabriël Gerberonius Benedictinus Congre-
 gationis Sancti Mauri : cur ergo non poterit idem fieri in B. Lullo?
 Cùm tamen non sint adeo gravia loca, quæ de Lullo afferuntur,
 quantum ea, quæ contra Rupertum allegantur; & fortè Rupertus
 non adeo clarè totalem panis transubstantionem explicuit, ut Lullus,

prout vidimus totò §. 1. Unde non possum sufficienter mirari, Censorem laudatum attribuere Lullo errorem de permanentia substantiæ panis secundum suum esse post consecrationem in Eucharistia, tanquam ab ipso expositum in hoc libro, *Quæst. super Lib. Mag. Sentent.* Cum fortè nullibi clariùs loquatur Lullus de totali panis transubstantiatione; nam in quæst. 125. 126. & 129. quas citat idem Censor, apertissimè docet totalem transubstantionem panis in Corpus, & vini in Sanguinem Christi, ita quod accidentia panis, & vini maneant sine subiecto; & signanter quæst. 129. num. 1. dicit: *Unde quando sacramentaliter fit transmutatio de substantia panis in Corpus Christi, fit formaliter & materialiter, ut tota essentia substantiæ panis transmutetur, aliàs non posset fieri totaliter nec substantialiter.* Cum itaque adeo apertè fateatur Lullus, quòd in transubstantiatione Eucharistica fit transmutatio formaliter & materialiter, ita ut tota essentia substantiæ panis transmutetur, aliter non posset fieri transmutatio totaliter nec substantialiter, qualiter debet fieri: iudicet sincerus Lector, quomodo potest ipsi attribui doctrina de permanentia substantiæ panis in Eucharistia.

XIX. At quàm immeritò hæc doctrina ipsi attribuatur, ampliùs patebit ex debita reflexione textuum, ex quibus prælaudatus Censor infert notatam propositionem; & quidem præmoneo, Lullum in eodem lib. *Sentent.* quæst. 125. quærere: *Utrum Sacramentum Altaris sit possibile?* Cumque hanc quæstionem excitet super Magistrum *Sentent.* idipsum intelligit per Sacramentum Altaris, quod Magister in 4. à dist. 8. Resolvit Lullus prædictam quæstionem affirmans, num. 1. quòd *Sacramentum Altaris sit possibile, quoad Deum, & impossibile quoad creaturam;* & subjungit, quòd, si ex impossibilitate quoad creaturam absolutè non potest esse, *potestas creaturæ per suam impossibilitatem posset esse inobediens, & potens contra divinam infinitam potestatem, quod est impossibile.* Postea, num. 2. probat esse possibile per hæc verba: „ Præterea divina sapientia potest intelligere transubstantiationem panis in Corpus Christi, & sic de vino in sanguinem; & idem potest velle divina voluntas, & per consequens divina potestas possificare (ad effectum deducere) & perficere, cum divina potestas sit ita magna in posse, sicut divina sapientia in scire, & divina voluntas in velle: unde sequitur, quòd Sacramentum Altaris sit possibile. „ Et num. 4. respondens ad objectionem Eremitæ, docet hoc Sacramentum esse possibile *supra natu-*

ram : atque ita planum est , Lullum docere , Sacramentum Altaris esse possibile per transubstantiationem.

XX. Prælaudatus Censor, ex quæst. 126. *Utrum Sacramentum Altaris debeat esse ?* Debitò scilicet decentiæ & morali , desumit primum textum , num. 14. adductum , ex quo deducit notatam propositionem ; pro clariori tamen intelligentia integrè illum expono : itaque Lullus , ut probet Sacramentum Altaris debere esse , num. 1. ostendit , quòd *omne illud , per quod divina Trinitas magis potest intelligi ab humano intellectu , debet esse* , quò positò , num. 2. sic scribit “ Item „ dixit Raymundus , quòd major similitudo beatissimæ Trinitatis , „ *quoad modum* consistat per Sacramentum Altaris , cum in beatissi- „ ma Trinitate sit generatio , & spiratio sine motu , loco , tempore , „ & quantitate , & sic de similibus , quæ sunt de sensitivò & imagi- „ nativò (id est per sensum , & imaginationem percipiuntur) à si- „ mili in Sacramento Altaris , *quod fit per transubstantiationem panis in Corpus Christi , & sic de vino in suum sanguinem , substantiâ panis , & sic de vino , dimittente sua accidentia , & existente sub accidentibus Corporis Christi* , transubstantiatio consistit sine motu locali ; & „ augmentatione quantitatis , & successione temporis ; & talis operatio est illud speculum , in quo magis præsentatur operatio Sanctæ „ Trinitatis , in qua motus , tempus , quantitas , locus & cætera his „ similia , non habent locum , nec possunt habere : ergo sequitur , „ quòd tale speculum & tale signum debeat esse , ut plura bona inde „ sequantur , ut supradictum est , & nullum malum. „

Text. prop.
19.

XXI. Profectò obvius sensus in hoc textu est , prout ad præsentem spectat scopum , quòd per transubstantiationem substantia panis relinquit sua accidentia , & fit Corpus Christi , taliter quòd , cum ipsa prout transubstantiata sit ipsum corpus Christi , quod existit sub suis accidentibus : ipsa transubstantiata & facta Corpus Christi existit sub ejus accidentibus : quod , ut clariùs pateat , notandum , quòd hic textus in editione Panormitana anni 1517. quâ videntur usi fuisse Censores Romani , habet *per translationem* , ubi ex editione Moguntina moderniori dicitur , *per transubstantiationem* , in illa etiam obscurus est aliquantulum sensus , quia omittitur dictio *transubstantiatio* ante verbum *consistit sine motu* , &c. ex cujus omissione non habetur perfectus sensus , prout in Moguntina. Hòc posito , manifestum est , intentum principale hujus textus esse , manifestare , quòd sicut in Deo est generatio & spiratio sine motu , loco , & aliis accidentibus , sensu & imaginatione perceptibilibus , ita in Sacramento Altaris fit transubstan-

tiatio panis in Corpus, & vini in Sanguinem Christi, sine motu locali & augmentatione quantitatis ac successione temporis; & quia hujusmodi transubstantiatio est operatio magis repræsentans & significans operationem Dei ad intrā in Sancta Trinitate; idē debet esse hoc Altaris Sacramentum; quia, ut, num. 1. ostendit, debet esse illud, per quod divina Trinitas magis potest intelligi.

XXII. Deinde explicat Lullus in hoc Textu ipsam transubstantiationem, per quam fit Sacramentum Altaris, & resultantiam, quæ ad ipsam consequitur, videlicet, quod substantia panis transubstantiatur, & convertitur in Corpus Christi, relinquendo ex vi conversionis suæ accidentia: *Substantiā panis, & sic de vino, dimittente suā accidentia*; & ex hac conversione resultat, quod substantia panis, quæ per transubstantiationem est facta ipsummet verum Corpus Christi, quod existit sub suis accidentibus, quatenus est transubstantiata, quo modo est ipsummet Corpus Christi, est sub accidentibus Corporis Christi; propter quod dicit; *& existente* (substantiā transubstantiatā & factā Corpus Christi) *sub accidentibus Corporis Christi* cum enim, ut sæpē docet ex supra adductis cum Catholica Ecclesia, maneant in Eucharistia accidentia panis, & vini sine subiecto, substantia panis in actu transubstantiationis dimittit seu relinquit suā accidentia, quæ manent in suo esse, & ipsa transmutatur & convertitur in aliud, videlicet in Corpus Christi; & postquam est transubstantiata & conversa in ipsum, est facta Corpus Christi per suā conversionem in illud; & quia sic est Corpus Christi, quod existit sub suis accidentibus, ideo ipsa sic, id est, ut transubstantiata & facta Corpus Christi, existit sub accidentibus Corporis Christi; nam, ut infra manifestabimus ex Patribus, est phrasis usitatissima in Ecclesia, quod panis consecratus, transubstantiatus seu conversus, est ipsum verum Corpus Christi, quod existit sub suis accidentibus: ac proinde verissima est Lulli locutio, quod in transubstantiatione substantia panis dimittit suā accidentia, & quatenus transubstantiata, quo modo est ipsum Corpus Christi, existit sub ejus accidentibus, prout Cajetanus, in 3. part. quæst. 75. art. 2. §. *Ad tertium autem*, explicat, dicens: *Habemus, non quod panis, sed id, quod fuit panis, est ubi est Corpus Christi; quia est ipsum Corpus Christi verum, quod est in Cælo; & ex hac parte concedendum est, quod conversum acquirit conditiones ejus, in quod est conversum; nec potest hinc inconveniens aliquod inferri.*

XXIII. Ex hoc manifestè patet, Lullum in dicto Textu, dum loquens de transubstantiatione dicit, substantiam panis, dimissis suis accidentibus

eidentibus existere sub accidentibus Corporis Christi, ex quo in citata Censura, num. 14. deducitur propositio erronea sibi impacta, non loqui de substantia panis absolutè, nudè, & in natura panis sumptâ, sed de substantia panis consecratâ, transubstantiatâ, conversa in Corpus Christi, seu facta Corpus Christi: Unde, cum propositiones debeant ex Autoribus erui, attento contextu, & ejus modificationibus, ex dicto integro Textu solùm potest erui hæc propositio: *Substantia panis consecrata, vel transubstantiata, vel conversa in Corpus Christi, est sub accidentibus Corporis Christi; vel est Corpus Christi*: quæ quidem est Catholicissima; non autem illa, quam intulit laudatus Censor; videlicet tenere Lullum *substantiam panis secundum suum esse remanere, post consecrationem in Eucharistia certo quodam modo novo*; quia, ut est evidens ex dictis, non asserit Lullus, substantiam panis secundum suum esse existere sub accidentibus Corporis Christi, sed tantum substantiam panis transubstantiatam & factam Corpus Christi existere sub ejus accidentibus, quod est verissimum; nec in toto contextu, nec in totis quinque quæstionibus hujus libri, in quibus agit Lullus de Eucharistia, est ullum vel leve indicium de remanentia substantiæ panis *secundum suum esse in Eucharistia*; imò præterquam quod, ut est evidens ex dictis, in oppositum est perpetua Lulli sententia, contrarium clarè deducitur ex hac eadem quæstione, & infra deducetur ex consequentibus; nam in adducto Textu asseritur vera transubstantiatio panis in Corpus Christi: quomodo autem esset transubstantiatio, si panis substantia remaneret secundum suum esse? Præsertim cum ex dictis explicet Lullus hanc transubstantiationem per hoc, quod, ad differentiam aliarum operationum, non remaneat essentia & natura transubstantiabilis; & asserat ita esse, ut tota essentia substantiæ panis convertatur in Corpus Christi. Prætereà in hoc Textu asseritur, accidentia remanere sine subjecto, quia ea relinquit substantia panis dum transubstantiatur: quomodo ergo substantia panis secundum suum esse potest remanere? Deinde in eadem quæstione, num. 3. dicitur, quod in *Altari est Christus sacramentaliter presens*: ubi ergo potest esse substantia panis? An ergo erit Christus cum ipsa, & compositus cum eadem? Quorsum ergo tantus apparatus, quo Lullus explicat transubstantiationem, conversionem, transmutationem, & translationem substantiæ panis? Sanè si maneret substantia panis secundum suum esse, transubstantiatio non esset transubstantiatio, nec conversio, &c.

XXIV. Non deducitur etiam relata Censoris propositio ex secundo

Tom. III.

Y

Textu, quem, num. 14. citat ex q. 127. ejusdem libri; ubi quæritur: *quid demonstrat hoc pronomen hoc, cum dicitur: Hoc est Corpus meum?* Nam num. 1. resolvitur, quod "quando dicitur hoc pronomen *hoc*, ipsi *hoc* est demonstrans; & *est* & *Corpus* dicunt demonstrare; & demonstrabile stat in prædicto pronomine *hoc*, & demonstratum stat in ultimo pronomine *meum*, quod in eodem instanti stat cum *transubstantiatione panis in Corpus Christi*: ideo hoc pronomen *hoc* demonstrat, quod hic panis sit *transubstantiabilis in corpus Christi* in ultimo pronomine demonstrato per primum prolativè, & significativè: quibus verbis intelligitur, quod, cum verba consecrationis sint effectiva transubstantiationis, ly *hoc* demonstrat panem transubstantiabilem, in eodem instanti, quo dicitur pronomen *meum*, esse transubstantiatum in corpus Christi; & quia dicta verba nedum sunt effectiva, sed etiam assertiva, & demonstratum per ipsa, stat in pronomine *meum*, quod in eodem instanti stat cum *transubstantiatione panis in corpus Christi*; ideo prolativè & significativè pronomen *hoc*, ordinatum & relatum ad pronomen *meum*, demonstrat corpus Christi, quatenus in ipsum est transubstantiatus panis per dicta verba; si enim hæc proferrerentur super alia substantia, & non super pane, qui solus ex Christi institutione est transubstantiabilis, non demonstraretur corpus Christi, nec fieret in ipsum transubstantiatio.

XXV. Postea, n. 2. sic scribit Lullus: "Item quando dicitur *hic est homo*, *hic* significat hominem qui est in illo instanti, in quo est pronomen; sed ipse homo non est demonstratus ante *est*, sed post ipsum *est*, cum *est* indigeat habere unum instans, & *homo* aliud; à simili quando dicitur: *hoc est Corpus meum*. " Id est, Corpus Christi non est demonstratum, ut dixit, num. 1. nisi in instanti, quod dicitur pronomen *meum*, & propterea subjungit immediatè: "Sed talis similitudo non est similitudo simpliciter, sed secundum quid; quia hoc nomen *homo* & suum subjectum, scilicet verus homo, sunt in eodem instanti, & *est* & verus homo sunt in alio instanti, in quo non est hoc nomen *homo*:" Unde hæc est differentia inter hanc propositionem: *hic est homo*, & verba consecrationis: *hoc est Corpus meum*, quod verus homo, qui est demonstratus per illam, licet adhuc non sit demonstratus dum dicitur *hic*, sed solum dum dicitur *est homo*, existit tamen in instanti, quo dicitur *hic*, & in alio instanti, quo dicitur *est homo*; Corpus Christi verò, quod est demonstratum per verba consecrationis, non existit, ut terminus

transubstantiationis panis, dum dicitur pronomen *hoc*, nec alia verba est, & *Corpus*, sed tantum dum dicitur pronomen *meum*; & propterea subdit Lullus: *Ita, quando dicitur: hoc est Corpus meum, in hoc pronomine hoc non est substantia panis in Corpore Christi (id est non est transubstantiata in Corpus Christi) realiter, sed significativè, nec in hoc verbo est, nec in hoc nomine Corpus, sed in hoc pronomine meum; quia, ut dixit, num. 1. pronomen meum stat in eodem instanti cum transubstantiatione panis in Corpus Christi.*

2. Text.
prop. 19.

XXVI. Ex ultimis verbis textus relati deducit laudatus Censor notatam propositionem, quia dicit (Lullus) non ante, sed post pronomen meum, substantiam panis esse in Corpore Christi realiter; at, cum, ut explicetur quid demonstret pronomen *hoc* simul cum aliis verbis subsequenter, agat Lullus de tempore vel instanti, quod fit transubstantiatio panis in Corpus Christi per verba consecrationis, ut patet ex toto textu; & hæc non fiat nisi in instanti, quo dicitur pronomen *meum*, ideo dicit, quod nisi in hoc pronomine *meum* non est substantia panis in Corpore Christi realiter: quæ verba, qui sincerè expendere velit juxta contextum, non intelliget, nisi quod solum prolatò hoc pronomine *meum* realiter est transubstantiata & conversa substantia panis in corpus Christi: ac proinde juxta sinceram intelligentiam, de substantia panis, nudè, absolute, & in sua natura accepta, non dicitur esse in corpore Christi realiter; sed tantum de substantia panis consecrata, transubstantiata, & conversa in corpus Christi affirmatur esse in corpore Christi realiter, tanquam in termino, in quem est conversa; quia per conversionem est facta ipsummet corpus verum Christi; atque ita non secundum suum esse naturale panis, sed quatenus conversa est in corpore Christi; dicitur autem esse modò dictò realiter in corpore Christi, prout ly *realiter* contra ponitur ly *significativè*, quia dum verba proferuntur, ante pronomen *meum* solum significatur substantiam panis esse transubstantiandam; dum autem dicitur pronomen *meum* fit realiter ipsa transubstantiatio, & quia tunc substantia realiter est transubstantiata in corpus Christi; tunc, quatenus transubstantiata, est in corpore Christi realiter, in quod est conversa.

XXVII. Quod autem mens Lulli non fuerit, substantiam panis secundum suum esse manere in corpore Christi, præter supra adducta de mente ipsius super totali substantiæ panis conversione in corpus Christi; juxta quæ, secundum rectæ critices regulas, debent ejus verba obiter dicta interpretari, manifestum fit ex eadem quæf-

tione, & verbis ex ea relatis; nam in eis supponitur & affirmatur vera transubstantiatio, quæ per se pugnat cum remanentiâ substantiæ panis. Deinde ibidem, num. 3. sic objicit Eremita: „ Quando „ Præbyter dicit hoc pronomen *hoc*, in illo instanti, in quo hoc „ dicit, non est facta transubstantiatio; & sic videtur, quod *hoc* de- „ monstret panem realiter, & non corpus Christi; unde sequitur „ quodd *est*, & *Corpus meum*, non concordent cum hoc pronomine „ *hoc*, nec sint consequentia ipsius, nec cum ipso participant, cum „ sit differentia inter panem, & corpus Christi; & ideo hoc prono- „ men *hoc* non demonstrat corpus Christi, sed panem, qui panis „ est in eodem instanti cum hoc pronomine *hoc*: Unde sequitur quodd „ Præbyter non dicat verum, quando dicit *hoc*, scilicet *hoc* panis „ est corpus meum. „ At, num. 4. ita respondet Lullus: „ Sicut in „ Sacramento Altaris color, sapor, figura, & quantitas, significant & „ demonstrant panem quoad sensitivum, & imaginativum (id est, „ sensui & imaginationi percipientibus ea) sic in primo pronomine „ & ultimo successivè per *est* & per *Corpus*, significatum & demonst- „ ratum est corpus Christi quoad intellectivum (id est intellectui) „ in quo perficitur demonstratio, licet sit falsa significativè & de- „ monstrativè quoad supra dicta accidentia panis, quæ existunt sine „ subiecto, quæ falso modò quoad sensitivum, & imaginativum sig- „ nificant, se ipsa naturaliter esse in proprio subiecto; sed hoc pro- „ nomen *hoc*, & hoc verbum *est*, & hoc nomen *Corpus*, & hoc „ pronomen *meum*, significant, & verò modò & supra cursum na- „ turæ, intellectui corpus Christi, qui intellectus est fortior, verior „ & nobilior ad recipiendum veritatem & demonstrationem, quàm „ sensitivum, & imaginativum, quæ quoad eorum naturam frequen- „ ter decipiuntur; sed intellectus quoad suam naturam nunquam de- „ cipitur, immò quandoque attingit veritatem *supra suam naturam* „ *per fidem*; & ideo tua ratio non valet. „

XXVIII. Ex hac responsione *Primò* constat, duplicem esse signi-
ficationem & demonstrationem; unam ex parte accidentium, quæ
sensui & imaginationi significant, se ipsa esse naturaliter in proprio
subiecto, & hæc significatio & demonstratio est falsa, quia acciden-
tia falso modo significant se esse in proprio subiecto; alia signifi-
catio & demonstratio est ex parte verborum: *hoc est Corpus meum*,
quæ intellectui supra sensum & imaginationem significant & de-
monstrant corpus Christi supra naturam, atque ita demonstratum per
pronomen *hoc* est corpus Christi, & hæc significatio & demonstra-

tio est vera quoad intellectum, licet quoad sensum & imaginationem, percipientes accidentia, non appareat vera; quia licet, dum proferatur pronomen *hoc* & alia verba usque ad pronomen *meum*, non fit facta transubstantiatio, quia tamen ordinantur ad pronomen *meum*, in cujus prolatione perficitur significatio & demonstratio, & in instanti, in quo proferitur, fit transubstantiatio, ideo pronomen *hoc* cum aliis verbis demonstrat corpus Christi, prout in ipsum est transubstantiata panis substantia. *Secundò*, constat, substantiam panis quoad suum esse nullatenus manere, nedum quia accidentia panis *existunt sine subjecto*, sed etiam quia *falso modo* sensui & imaginationi *significant seipsa naturaliter esse in proprio subjecto*; atque ita ex toto contextu deducitur non manere substantiam panis in Eucharistia secundum esse suum, & solum ibi esse corpus Christi sub ejus accidentibus, quia solum corpus Christi est demonstratum per verba consecrationis, non autem panis substantia, ut prætenditur in objectione sibi proposita.

XXIX. Proinde ex sincera textus notati inspectione patet, Lullum, dum dicit, quod substantia panis est in corpore Christi realiter, tantum in hoc pronomine *meum*, solum & unice intendere, quod in eodem instanti, quo proferitur pronomen *meum*, substantia panis est transubstantiata in corpus Christi, non autem in instantibus antecedentibus, quibus proferuntur alia priora verba, quia in ipsis solum significatur esse transubstantiandam in pronomine *meum*, ad quod antecedentia verba ordinantur ad habendum perfectam significationem & demonstrationem; nihil autem cogitasse eundem Lullum de remanentia substantiæ panis in Corpore Christi cum contrarium doceat ejus perpetua & expressa sententia, juxta supra allegata, & contrarium pariter doceat in toto hoc contextu exposito. Si tamen quis insistere velit, quod quamvis hæc fuerit ejus mens, modus tamen loquendi in verbis à laudato Censore notatis, insinuat substantiam panis quodam modo remanere, cum dicat eam in pronomine *meum* esse realiter in corpore Christi, dico, quod ex contextu solum intelligitur substantiam panis transubstantiatam & factam corpus Christi esse in corpore Christi, ac proinde solum potest inferri, remanere substantiam panis prout transubstantiatam, non autem secundum suum esse; quia dicitur esse in corpore Christi tanquam in termino, in quem est conversa; atque ita dici potest remanere, non quia persistat suum esse, sed quia remanet terminus, in quem est transubstantiata: in quo tamen intelligitur id ipsum, quod omnes

Catholici dicunt, quia omnes conveniunt in eadem doctrina, quæ resultat ex toto Lulli contextu, prout manet exposita.

XXX. Multi etiam explicando, qualiter in transubstantiatione non annihilatur substantia panis, simili modo loquendi, immò fortè notabiliore, utuntur ac Lullus, ut Henric. Gandav. Quodlibet 9. quæst. 9. 9. Quodlibet 11. quæst. 4. & quodlib. 12. quæst. 10. ubi sic scribit :
 » Non est ergo dicendum simpliciter, quòd ista conversione facta,
 » substantia panis non manet, sicut nec est dicendum, quòd manet,
 » sed dicendum est, quòd quodammodò manet, & quodammodò
 » non manet. Nihil manet substantiæ, nec ipsa manet aliquid om-
 » ninò, vel quod priùs erat, vel quod postea facta est; nec tamen
 » annihilatur, quia manet in aliquo, quia in eo, in quod est con-
 » versa; quod tamen nec priùs erat, nec postmodum facta est. » Post-
 » eà in responsione ad primum argumentum ita habet : « Et quia
 » panis non annihilatur, manet quoque modo in eo, in quod conver-
 » titur, ut propterea videatur posse dici (quod tamen non assero)
 » quòd ly *hoc* dicendo *hoc est corpus meum*, non solum demonstrat
 » quod est sub speciebus pro instanti finitæ prolationis, & conver-
 » sionis factæ in ipsum corpus Christi, in quod facta est conversio,
 » secundum quod aliàs exposuimus; sed quod pro tempore prola-
 » tionis demonstrat substantiam panis pro ipsa, & in dicto instanti
 » demonstrat eam ut jam est conversa in corpus Christi, & sic non
 » pro substantia panis, sed tantummodo pro eo, in quod jam con-
 » versa est, in quo manet quoad hoc, quòd non annihilatur.

XXXI. Doctor Angelicus, 3. part. quæst. 75. art. 2. ad 3. ait :
 » Ad tertium dicendum, quòd licet post consecrationem hæc sit
 » falsa: *substantia panis est aliquid*, id tamen, in quòd substantia panis
 » est conversa, est aliquid, & idè substantia panis non est annihila-
 » ta. » Cajetanus ibi, relatis D. Ambrosii verbis ex cap. *Panis*. dist.
 » 2. de consecrat., videlicet : *si tanta vis est in sermone Domini Jesu, ut*
 » *inciperet esse, quòd non erat, quanto magis operatorius est, ut sint quæ*
 » *erant, & in aliud commutentur? Et sic quod erat panis, jam corpus*
 » *Christi est, quia sermo Christi creaturam mutat, &c.* sic advertit :
 » Ubi nota. Primò, ly *ut sint, quæ erant, & in aliud commutentur* :
 » hinc enim manifestè habes Ambrosium dicere, quòd sunt quæ erant
 » & in aliud sunt commutata; & hinc apparet figmentum esse dicere,
 » quòd quæ erant & in aliud sunt commutata, nihil sunt; nam si
 » sunt, ut Ambrosius asserit, sequitur quòd non sunt nihil. » Præte-
 » reà D. Thomas, ibidem, art. 4. ad 3. dicit. « Quòd virtute agentis fi-

„ niti non potest forma in formam mutari, nec materia in materiam,
 „ sed virtute agentis infiniti, quod habet actionem in totum ens;
 „ potest talis conversio fieri, quia utrique formæ, & utrique mate-
 „ riæ est communis natura entis, & id quod est entitatis in una po-
 „ test actor entis convertere in id, quod est entitatis in altera, su-
 „ blato eo per quod ab illa distinguebatur. „ Cajetanus prædicta ex-
 „ plicans verba sic scribit: „ Quod autem subditur: *sublato eo per quod*
 „ *ab illa distinguebatur*, proculdubio ad differentiam proprii distinc-
 „ tivi à communi natura entis subjunctum est. Sed hujusmodi diffe-
 „ rentia non consistit in hoc, quod entitas rei, puta panis, conver-
 „ tatur in entitatem alterius rei, puta corporis Christi, panis verò
 „ proprium constitutivum, per quod specie distinguitur ab altera re,
 „ puta corpore Christi non convertatur in alteram rem, puta corpus
 „ Christi, sed tollatur, non conservando ipsum in esse; sed consistit
 „ hujusmodi differentia in hoc, quod, dum tota res, quæ est panis,
 „ convertitur in corpus Christi, formalis ratio naturæ entis salvatur,
 „ formalis verò ratio proprii constitutivi & distinctivi panis non sal-
 „ vatur; post conversionem enim panis in corpus Christi, *panis en-*
 „ *titas conversa, entitas quædam est*, panis verò conversus, panis non
 „ est; sic enim verificatur, quod sit conversio entitatis in entitatem;
 „ sublato eo per quod distinguebatur.

XXXII. Denique Clariss. Berti de Theolog. disciplin. lib. 33.
 cap. 10. objec. 5. respondens ad argumentum ex Patrum verbis,
 qui videntur dicere in Eucharistia remanere panem, ut Ambrosius
 loco citato, à Cajetano, ita scribit: „ Respondeo juxta Patres re-
 „ manere panem & vinum in genere, & non in specie; & quod
 „ prior substantia non redigatur in nihilum, sed persistentibus acci-
 „ dentibus fiat corpus Christi. „ Itaque si juxta prædictos verificatur,
 quod panis substantia quodammodo manet, in eo scilicet, in quod
 est conversa; quod non est nihil, sed quodammodo est, quia id, in
 quod est conversa, aliquid est; & sic panis entitas conversa, entitas
 quædam est; & quod panis & vinum manent in genere, licet non
 in specie; quid mirum, si Lullus, ut explicaret realem panis conver-
 sionem solum fieri in instanti, quo in verbis consecrationis profer-
 tur pronomen *meum*, non autem dum antecedentia proferuntur
 verba, dixerit quod non in antecedentibus, sed in ipso pronomine
meum, est substantia panis in corpore Christi realiter, id est realiter
 est in ipsum transubstantiata; & sic dicere quod panis substantia,

non secundum suum esse, nec in sua natura & essentia, sed quatenus transubstantiata & conversa, est in corpore Christi?

XXXIII. Tandem, laudatus Censor notatam propositionem deducit ex alio Textu extracto ex q. 129 : *Utrum Deus posset transmutare substantiam panis eandem numero in plura Corpora?* Ut autem mens Lulli videatur, considerandus est integer Textus. Itaque, num. 1. sic discurret : “ Dixit Raymundus : in 63. questione (in qua resolvit, ” quod non sola materia est causa individuationis) solutio huius quæstionis est significata : Unde quando sacramentaliter fit transmutatio de substantia panis in corpus Christi, fit *formaliter & materialiter*, ut *tota essentia substantiæ panis transmutetur*, aliàs non posset fieri transmutatio substantiæ *totaliter*, nec *substantialiter* : & ideo Eremita, in illo instanti, in quo fit transmutatio, substantia transmutatur ad unum individuum tantum, scilicet ad corpus Christi, de pane in carnem, & ipsa substantia in illo instanti non potest transmutari in aliud corpus, quia ipsa substantia existens unum individuum per formam & materiam individuatam (per sui conversionem) in corpus Christi sacramentaliter & totaliter, non potest esse idem in pluribus corporibus individuatis ; aliàs, si unum individuum individuatam & transmutatum in aliud posset esse in eodem instanti transmutatum in plura individua, sequeretur contradictio, scilicet quod esset unum individuum & plura ; & ideo, Eremita, quoad talem transmutationem negatio quæstionis est tenenda.

XXXIV. Nota *primò*, quod hic Textus, quoad substantiam habetur eodem modo in citata editione Panormitana, licet aliquantulum confusus, dum loquens de transmutatione panis dicit, panem esse transmutatum & individuatam *in corpore Christi*, eum in hoc alio Textu dicatur *in corpus Christi*, nota *secundò* propositam quæstionem duplici sensu posse intelligi, an videlicet in eodem instanti & simul possit eadem substantia panis transmutari in plura corpora ; an verò in diverso instanti & successive : in adducto Textu, num. 1. resolvit Lullus negativè quoad primam partem ; in secundo autem numero infra referendo resolvit affirmativè quoad secundam. Nota 3. rationem, quâ fundat Lullus eandem substantiam panis non posse simul & in eodem instanti transmutari in plura corpora, esse, quia *tota essentia panis formaliter & materialiter*, ac proinde *totaliter* transmutatur in corpus Christi ; & quia ipsa substantia, quæ est unum individuum per formam & materiam, per conversionem sacramentalem individuatam *totaliter* in corpus Christi ; ita quod per conversio-

acm

æm fit ipsum Christi corpus, quod est unum individuum, propterea non potest simul transmutari, & individuari in plura corpora. Nota 4. Lullum tenere clarissime & ex professo doctrinam oppositam illi, quæ eidem tribuitur in præfata Censura; docet enim apertissime, panem *totaliter*, hoc est *formaliter & materialiter* transmutari in corpus Christi, ita ut *tota essentia substantiæ panis* transmutetur in ipsum corpus Christi: perpendat ergo sincerus Lector, quomodo possit sentire, substantiam panis secundum suum esse remanere in Eucharistia. Nonne æquitas postulat, ut quæcumque dicat subdubia, conformiter ad sententiam adeo claram intelligantur?

XXXV. Pro resolutione expositæ quæstionis quoad secundam partem, videlicet quodd eadem substantia panis successive & in diverso instanti potest transmutari in plura corpora, sic num. 2. scribit Lullus: *Verumtamen secundum aliud eveniens instans eadem substantia panis post transmutationem factam in corpus Christi, potest transmutari in aliud corpus, scilicet in corpus panis; & recuperare prima accidentia panis, quæ dimisit sine subiecto, sicut substantia argenti, quæ existeret sub figura scyphi, & fuit deducta in figuram cissorii, quæ potest reduci sub figuram scyphi, dimittendo figuram cissorii; non tamen sub figura primi scyphi, sed sub figura novi scyphi: & ideo eadem substantia panis potest dimittere panem, & transmutari in carnem Christi; & dimittere carnem Christi, & recipere speciem panis; non tamen primum panem, sed panem secundum & novum; & in ipso est incepta ad corruptionem panis naturaliter, tendente ipsa substantia panis ad aliam speciem per viam generationis, in quam naturaliter est transmutata (per novam scilicet generationem) sicut in speciem carnis Martini vel Guillelmi, vel canis, & sic de aliis comedentibus panem; & de hoc possumus habere experientiam, sicut Martinus, qui posset vivere, & pinguis fieri de pluribus hostiis, & panibus sacratis.*

3. Text.
prop. 13.

XXXVI. Ex hoc Textu, qui idem quoad substantiam est in citatis editionibus, licet non integrè adducto num. 14. à laudato Censore, infert ipse notatam propositionem; at, pace tanti viri, contrarium omninò inferri debet; & dimissa pro nunc explicatione, qualiter fiant vel fieri possint transmutationes, quas innuit Lullus in hoc Textu, de quibus infra, §. 4. à num. 50. est agendum; ac ad propositionem Lullo impactam propter relatum Textum unicè attendentes, notandum est, ut ex dicendis liquidè constabit, sensum Lulli hic unicè esse, substantiam panis primò converti in corpus Christi, & quod postea, dum corrumpuntur species sacramentales, fit nova

transmutatio in panem noviter productum, ut plures cum ipso sentiunt; panem quidem novum vergentem ad corruptionem, vel in quo jam est incepta corruptio; & quoddam postea ex hoc pane incepto corrumpi, fit nova transmutatio in carnem illius qui comedit hostiam sacram, qui sic nutritur; & quia hæc series & successio transmutationum incipit in substantia panis, & posteriores transmutationes connaturaliter consequuntur ad primam, ideo dicitur eandem substantiam panis primò transmutari in corpus Christi, deinde in novum panem, & tandem in carnem comedentis hostiam sacram: non quod eadem substantia panis secundum suum esse persistat in dictis transmutationibus, cum supponatur conversa in prima transmutatione; sed quia in ipsa eadem incipit prima transmutatio, ex qua connaturaliter sequuntur posteriores, dicitur ipsa in omnibus transmutari: sicuti dicimus, eandem herbam primò converti in carnem arietis ipsam comedentis, & postea in carnem hominis edentis carnem arietinam; non quia herba secundum suum esse subsistat, dum ex carne arietina fit transmutatio in humanam carnem, sed quia in ipsa incepta prima transmutatio, ex qua sequitur secunda; & sic de eodem rectè dicitur transmutari in varia corpora secundum transmutationes ad primam naturaliter consequentes.

XXXVII. Quoddam autem mens Lulli non fuerit, substantiam panis secundum suum esse remanere in Eucharistia ad sequentes transmutationes, nec hoc ex ejus verbis rectè inferatur, constat primò evidenter ex hac eadem questione, ubi num. 1. per verba adducta n. 33. dicit Lullus, substantiam panis *formaliter & materialiter*, ac proinde *totaliter*, converti in corpus Christi, ita ut tota essentia substantiæ panis transmutetur in corpus Christi: quomodo ergo ex mente Lulli potest remanere cum corpore Christi in Eucharistia panis substantia, quæ totaliter & essentialiter supponitur & affirmatur conversa? Huc accedit quoddam mens Lulli, ut ex supradictis evidenter constat, est, quoddam per transubstantiationem taliter convertitur substantia, quoddam nihil ipse maneat, & ipsa quoad suum esse nihil sit, ad differentiam aliarum operationum, ex dictis num. 7. & quoddam accidentia maneant sine subjecto. Secundò, quia in eodem Textu dicitur, quoddam *eadem substantia panis post transmutationem factam in corpus Christi, potest transmutari in aliud corpus, scilicet in corpus panis, & recuperare prima accidentia panis*: ex quo sequitur, quoddam non manet substantia panis in Eucharistia, quia, si maneret, cum substantia panis ex num. 1. hujus questionis sit corpus constans ex forma &

materia, non transmutaretur in aliud corpus panis, & recuperaret prima accidentia, quæ dimisit, sed idem corpus panis præexistens persisteret & perseveraret ad sequentes mutationes. *Tertiò*, dicit Lullus, fieri novi panis productionem, ut ex ipso incepto corrumpi, fiat nutritio hominis comedentis hostiam sacratam; si autem substantia panis primi conversi in corpus Christi maneret in Eucharistia, non requireretur novus panis, sed ipsa substantia præexistens per sui corruptionem nutriret hominem, in cujus carnem converteretur. *Quartò*, dicitur in hoc Textu, quòd substantia panis dum transubstantiatur dimittit ac relinquit sua accidentia: quomodo autem ea relinqueret, si cum ipsis persisteret in Eucharistia? *Quintò*, dicitur in eodem Textu, quòd accidentia manent *sine subiecto*: quomodo autem manerent sine subiecto, si persisteret cum ipsis in Eucharistia idem subiectum secundum suum esse?

XXXVIII. Hinc pronum est cognoscere laudatum Censorem non rectè intulisse notatam propositionem ex eo quòd dicat Lullus in hoc Textu, ut notat supra, num. 14. *eamdem substantiam panis post transmutationem in corpus Christi posse in aliud corpus transmutari*; quia secunda transmutatio in aliud corpus non est immediata, sed mediata; nec peragitur in substantia panis jam conversâ, tanquam termino à quo, sed in corpore in quod fuit transmutata; quia substantia panis *primò*, transmutatur in corpus Christi ut sacramentaliter existens; *secundò*, dum corrumpuntur species, corpus Christi, prout definens esse sacramentaliter, transmutatur in novum panem, quæ tamen transmutatio à Lullo nec dicitur conversio nec transubstantiatio, sed pura transmutatio; & *tertiò* novus panis transmutatur in carnem comedentis: atque ita dicitur, *eamdem substantiam panis transmutari*, mediata quidem transmutatione, quia in ipsa *eadem* incepit prima transmutatio, ad quam connaturaliter succedit secunda: sicut dicitur eandem herbam post transmutationem in carnem arietinam transmutari in carnem humanam. Nec juvat laudati Censoris intentum, quòd in Textu dicatur, *eamdem substantiam panis*, per novam transmutationem in corpus novi panis, *recuperare prima accidentia panis*, quæ dimisit *sine subiecto*; quia dicitur ipsam recuperare prima accidentia, non quidem in seipsa, sed in novo pane, in quem mediatè est transmutata: dicitur etiam eadem, non in individuo sed in specie, cum revertatur eadem species panis in novo pane in individuo; & tandem dicitur recuperare accidentia, quia in eadem incepit prima transmutatio, ad quam connaturaliter succedit secun-

da, in qua à novo pane recuperantur ipsa accidentia. Neque juvat exemplum, ut opponit laudatus Censor : *Sicut substantia argentea scyphi, quæ figuram dimissam recuperare potest* ; quia est purum exemplum, quod non tenet in omnibus, & solum adducitur ad explanandum mutationem successivam, quæ potest esse ; & simultaneam, quæ non potest esse, quatenus substantia argentea simul non potest esse sub figura scyphi & cissorii ; post transitum tamen à figura scyphi ad figuram cissorii, potest redire ad figuram scyphi, non quidem primi, sed novi : ita post transmutationem substantiæ panis in corpus Christi, quando per novam transmutationem redit panis, non redit tamen primus panis, ille scilicet, qui fuit conversus in corpus Christi, sed secundus & novus : Unde non intendit Lullus, quodd, sicut substantia argentea manens eadem in seipsa, à figura scyphi mutatur in figuram cissorii, & à figura cissorii in figuram novi scyphi : ita substantia panis manens eadem transmutetur in corpus Christi, & à corpore Christi in novum panem ; quia ex ipso, transmutatio panis in corpus Christi est substantialis, & ex hac eadem quæstione num. 1. fit formaliter & materialiter, ac totaliter, ita ut tota essentia substantiæ panis transmutetur : quod non evenit in mutatione substantiæ argenteæ. Deinde ex ipso Lullo juxta verba relata num. 7. per hoc differt transmutatio eucharistica ab aliis operationibus, & signanter ab artificiali, qualis est relata mutatio argentea, quodd hæc fit *permanente essentiâ & naturâ operabilis in operato* ; transubstantiatio verò fiat *non permanente essentiâ & naturâ factibilis in factò*, hoc est transubstantiabilis panis in corpore Christi, in quod est transubstantiatus : Unde, sicut ex eo quodd plures Patres & Doctores explicent hanc transubstantiationem ad modum quo substantia alimenti convertitur in substantiam aliti ; & quo virga Moysis fuit versa in Draconem, in quibus conversionibus eadem materia manet in termino à quo & ad quem, non tamen infertur ipsos tenere eandem materiam panis remanere in Eucharistia : ita neque ex Lulli exemplo infertur remanere in Eucharistia eandem panis substantiam quoad suum esse.

XXXIX. Tandem, ut facilius intelligantur transmutationes, quas innuit Lullus in notato Textu, & reliqua, quæ in ipso continentur, notandum, apud omnes esse difficillimam explicationem transmutationis panis in corpus Christi, & mutationis, quâ, dum corrumpuntur species sacramentales, succedit nova substantia. Conveniunt profectò omnes Catholici, & Lullus expressè docet, quodd tota substantia panis totaliter transubstantiatur in corpus Christi. Conveniunt etiam

omnes in hoc, quodd ex pane & vino consecratis potest homo vivere & nutrir, ut exponit Lullus in adducto Textu, & docet D. Thomas, 3. part. q. 77. art. 7. & cum ipso omnes ejus Discipuli, ac plures SS. Patres. Conveniunt quoque communiter omnes in hoc, quodd corpus Christi perseverat sub speciebus sacramentalibus, usque dum ipsæ corrumpuntur in stomacho. Conveniunt similiter in hoc, quodd, cum definit esse corpus Christi sub speciebus, fit aliqua mutatio, quam aliqui dicunt esse conversionem & transmutationem, imò transubstantiationem, in illam novam substantiam, quæ succedit: quia communiter supponitur, ad illam definitionem corporis Christi succedere novam substantiam, ut videri potest apud Suarez in 3. part. tom. 3. disp. 54. atque ita sensus multorum est, quodd, sicut panis transmutatur in corpus Christi, prout sacramentaliter existens, ita corpus Christi, prout sacramentaliter existens, transmutatur in corruptione specierum ad novam substantiam, quæ succedit. Difficultas, quæ omnes torquet, stat in explicatione, qualiter ibi succedit nova substantia, & fit hominis nutritio & augmentatio; Lullus innuit in hoc Textu, quodd, definente corpore Christi esse sub speciebus, fit productio novi panis, ex quo recipiens Eucharistiam nutritur & augmentatur, prout infra, §. 4. à num. 50. explanabo, sicut & relatas transmutationes.

XL. Ex hoc, ut puto, potest clariùs intelligi notatus Lulli Textus; nam quia, dum corrumpuntur species sacramentales, succedit juxta omnes, nova substantia, quæ juxta ipsum est novus panis, ideo rectè dicit: *Verumtamen secundum aliud eveniens instans eadem substantia panis, post transmutationem factam in corpus Christi (dum scilicet corrumpuntur accidentia, & fit nova transmutatio) potest transmutari in aliud corpus, scilicet in corpus panis (qui de novo tunc producit) & recuperare (in pane videlicet novo) prima accidentia, quæ dimisit sine subiecto (panis primus dum fuit conversus in corpus Christi) & ideo eadem substantia panis potest dimittere panem (per suū videlicet conversionem) & transmutari in carnem Christi (prout sacramentaliter existentem in Eucharistia) & dimittere carnem Christi (dum scilicet corrumpuntur accidentia, & definente ibi esse sacramentaliter carne Christi, fit transmutatio à carne Christi, prout sacramentaliter existente, ad novam substantiam) & recipere speciem panis (per hoc videlicet quodd tunc producat novus panis: qui, cum producat sub accidentibus inceptis corrumpi) ideo in ipso (substantia panis) est incepta ad corruptionem panis naturaliter, ten-*

dente tunc ipsâ substantiâ panis ad aliam speciem per viam generationi (quæ subsequitur ad ejus corruptionem) in quam (speciem) naturaliter transmutatur , sicut in speciem carnis Martini , &c. & hoc modo posset homo vivere & pinguis fieri de pluribus hostiis & panibus sacra- tis. Unde ex toto contextu patet quòd , quia omnes subsequentes mutationes & operationes connaturaliter consequuntur ad primam , in qua panis substantia fuit conversa in corpus Christi , ad ipsam pa- nis substantiam referuntur , & de ipsa dicuntur , mediâtè quidem & ratione corporis per mutationem ipsi succedentis ; non autem imme- diâtè & in seipsa , quia in prima mutatione supponitur totaliter con- versa , & quoad totam essentiam , & nihil proinde existens in seipsa.

XLI. Credo sanè hucusque dictis patere , non rectè deduci ex textibus notatis propositionem à laudato Censore notatam , videlicet *substantiam panis secundum suum esse remanere post consecrationem in Eucharistia certò quòdam modò novò* ; imò oppositum manifestè de- duci ex eisdem textibus , ad contextum & ad Lulli mentem adeò expressam collatis ; nam in primo textu , ut constat à num. 20. non debet intelligi , quòd substantia panis absolutè , nudè , & quoad suam naturam fit corpus Christi , & existat sub ejus accidentibus , sed quòd *substantia panis transubstantiata in corpus Christi est corpus Christi , & existit sub accidentibus corporis Christi* ; hæc autem propositio est vera & catholica , eamque omnes amplectuntur , ut scitè notat Bellarmi- nus , de controversiis tom. 2. contr. 3. de Sacram. Eucharist. lib. 2. cap. 6. in fine , ubi ad objectionem ex textibus D. Irenæi exprimen- tibus , panem esse corpus Christi , ut infra referemus , respondet : „ Irenæus non significat , panem simpliciter esse corpus Christi , „ sed panem , in quo gratiæ actæ sunt , id est , panem sanctificatum , „ & factum Eucharistiam , ut Justinus loquebatur : porrò panis fac- „ tus Eucharistia verè & propriè est corpus Christi. Similis locutio „ esset , si quis diceret : Virga Moysis conversa in draconem ambu- „ labat & comedebat ; & aqua à Christo in vipum conversa colorem „ & saporem vini habebat. „ ex hoc infero , quòd benè potuit dicere Lullus substantiam panis transubstantiatam in corpus Christi existere sub accidentibus corporis Christi. Ipse Bellarminus , ibid. lib. 1. cap. 14. §. *Decimus-tertius* , ad objectionem ex 1. Corinth. 10. & 11. ubi aliquoties Eucharistia vocatur panis , etiam post consecrationem , sic scribit : „ Respondent nonnulli , Eucharistiam vocari panem per „ tropum , quia fit ex pane , five quia antea fuit panis. Afferunt „ multa exempla scripturæ , ut quod Gen. 3. Eva dicitur os Adam ;

„Exod. 7. Virgæ conversæ in dracones adhuc vocantur Virgæ; quodd
 „Matth. 11. dicantur cæci videre, claudi ambulare; quodd Matth.
 „21. dicantur Publicani, & Meretrices præcedere in Regnum
 „Cœlorum: „Et hanc responsionem affirmat esse valde probabilem;
 qui etiam, lib. 3. cap. 18. §. *Hinc intelligimus*, dicit: *Verè enim dici
 potest: quod fuit panis, nunc est corpus Christi, licet omninò nihil ma-
 neat quod prius fuerit panis.*

XLII. Notata etiam propositio non deducitur ex textu relato,
 num. 25. nam, ut ibi constat, non intelligitur quodd substantia panis
 absolutè, & quoad suam naturam, sit in corpore Christi realiter,
 sed quodd *substantia panis transubstantiata & facta corpus Christi, est
 realiter in corpore Christi*; hæc autem propositio est vera & catholica,
 quia dicitur sic substantia esse in corpore Christi, quatenus est facta
 ipsum corpus, vel est in ipso, ut in termino in quem est conversa.
 Simili modo exponit Irenæum, lib. 4. contra hæres. cap. 34. & simile
 dictum Cypriani, lib. 2. Epist. 3. sapientissimus Gavardi, tom. 6. de
 Sac. Euchar. quæst. 3. art. 2. §. 1. pag. 311. dicens: *Ad Irenæum
 dicitur nihil aliud velle, nisi quodd Eucharistia componitur ex materia
 terrena, quæ transit & convertitur; & ex materia cœlesti, in quam con-
 vertitur. Idem asserit S. Cyprianus.* Neque sequitur eadem notata pro-
 positio ex textu relato, num. 33. quia, ut ibi constat, non intelli-
 gitur, quod substantia panis post suâ transmutationem in corpus Christi,
 immediatè & secundum suum esse transmutetur in aliud corpus panis,
 & postea in carnem comedentis Eucharistiam, sed mediatè tantum,
 & ratione substantiarum ad suâ primam transmutationem succeden-
 tium; & solum quia posteriores transmutationes connaturaliter con-
 sequuntur ad primam, in qua substantia panis fuit conversa in corpus
 Christi, ad ipsam substantiam referuntur omnes consequentes muta-
 tiones, & de ipsa dicuntur mediatè quidem, & ratione succeden-
 tium substantiarum ad ipsam. Tandem, nunquam potest Lullo attri-
 bui notata propositio ex consequentiis illatis ex ejus dictis; cum ipsa
 dicta ex contextu bonum habeant sensum, & Lullus neget conse-
 quentias, ut totaliter oppositas ipsius doctrinæ operosè & ex pro-
 fesso traditæ.

§. III.

Lulli loquendi modum conformem esse SS. Patribus, ostenditur.

XLIII. Nedum substantia doctrinæ Lullianæ vacat Censurâ; sed

etiam ejus loquendi modus in materia subiecta juxta contextum, quia similis est modo loquendi multorum Patrum, qui videri possunt apud eximium Joannem Gropperum Canonicum Coloniensem & Cardinalem designatum, Lib. de Eucharistia, art. 1. à cap. 28. & apud Bellarminum citatum: ex quibus S. Justinus Martyr. Apolog. 2. postquam breviter retulit modum, quo conficitur Eucharistia, ait: „ Si, qui apud nos Diaconi dicuntur, dant unicuique eorum, qui „ adsunt, percipiendum *panem, vinum, & aquam*, quæ cum gratiarum „ actione consecrata sunt . . . neque hæc, ut communem usitatum- „ que panem, usitatumque potionem capimus, sed quemadmodum „ per Dei verbum, homo factus Jesus-Christus Conservator noster, „ & carnem & sanguinem pro salute nostra habuit; sic etiam cibum, „ qui per preces sermonis, quem ab eo accepimus, consecratus „ est, & quò sanguis carnesque nostræ Communionem aluntur, Jesu- „ Christi ejus, qui homo factus est, & carnem, & sanguinem esse „ accepimus. „

XLIV. Tertullianus, lib. 4. *advers. Marcion.* sic scribit: „ Non „ intelligit Marcion panem fuisse veterem figuram corporis Christi „ dicentis per Jeremiam: adversum me cogitaverunt cogitatum, di- „ centes: *Venite conjiciamus lignum in panem ejus, scilicet Crucem in* „ corpus ejus. Itaque illuminator antiquitatum, quid tunc voluerit „ significasse panem, satis declaravit, *corpus suum vocans panem.* „ D. Irenæus, *advers. hæres.* lib. 4. cap. 32. scribit „ Eum, qui est „ creatura, panem accepit, & gratias egit dicens: hoc est corpus „ meum, & calicem similiter, qui est ex creatura quæ est secun- „ dùm nos, *suum Sanguinem confessus est*; & cap. 34. Quomodo „ autem constabit eis, *eum panem*, in quo gratiæ actæ sunt, *corpus* „ *esse Domini sui*, & calicem Sanguinis ejus, si non ipsum Fabrica- „ toris mundi Filium dicant? Et cap. 57. quomodo Dominus, si „ alterius Patris existit, hujus conditionis, quæ est secundùm nos, „ accipiens panem, *suum corpus confitebatur?* „ D. Ambrosius, lib. „ *de his qui myster. initian.* cap. 9. scribit: „ Ipse clamat Dominus Jesus: „ *Hoc est Corpus meum.* Ante benedictionem verborum cœlestium, „ *alia species nominatur*, post consecrationem, *corpus Christi signifi-* „ *catur.* Ipse dicit sanguinem suum. Ante consecrationem *aliud dicitur*, „ *post consecrationem, sanguis nuncupatur*, & tu dicis Amen, hoc est, „ verum est. „ Item, lib. 4. de Sacram. cap. 4. „ Sed panis iste, panis „ est ante verba Sacramentorum; ubi accesserit consecratio, de pane „ fit caro Christi: hoc igitur adstruamus, quomodo potest, *qui panis* „ *est*

„*est, esse corpus Christi* consecratione. „ Et cap. 5. „ Antequam con-
 „ secretur *panis est*; ubi autem verba Christi accesserunt, corpus est
 „ Christi. D. Hieron. in Ps. 109. scribit: „ Quomodo enim Melchi-
 „ sedech Rex Salem obtulit panem & vinum, sic & tu offeres corpus
 „ tuum & sanguinem, *verum panem, & verum vinum.* „ D. Cryso-
 „ st. in 1. Corinth. Homil. 24. ait: *quid est panis? corpus Christi.*

XLV. Theodoretus, *Dialog.* 2. loquens de pane & vino in Altari
 oblati, ait: „ Eranist. post sanctificationem autem, quomodo ea
 „ appellas? Ort. *corpus Christi & sanguis Christi.* „ D. Damascen. lib.
 4. de Fide Orthodox. cap. 14. „ Non est figura, *panis & vinum, corporis*
 „ & sanguinis Christi: absit enim hoc; *sed est ipsum corpus Domini*
 „ *deificatum*; ipso Domino dicente: *hoc est corpus meum.* „ Theophilat.
 in Matth. cap. 26. „ Porro dicens: *Hoc est corpus meum*, ostendit,
 „ quod *ipsum corpus Domini est panis*, qui sanctificatur in Altario,
 „ & non respondens figura. „ Præterea, cap. Ego Berengarius, dist. 2.
 de consecrat. ex Concil. Rom. sub Nicolao II. ita habetur: „ Pro-
 „ fiteor scilicet *panem & vinum*, quæ in Altari ponuntur,
 „ post consecrationem, non solum Sacramentum, sed etiam verum
 „ *corpus & sanguinem Domini Nostri Jesu-Christi esse.* „ Et in alio Con-
 cilio Rom. sub Gregorio V. Jussu Concilii aliam fecit idem Beren-
 garius professionem fidei sic: „ Ego Berengarius corde credo, &
 „ ore confiteor, *panem & vinum*, quæ ponuntur in Altari, per mys-
 „ terium sacræ orationis, & verba Nostri Redemptoris, substan-
 „ tialiter converti in veram & propriam ac vivificatricem carnem &
 „ sanguinem Jesu-Christi Domini Nostri, & post consecrationem,
 „ *esse verum Christi corpus*, quod natum est de Virgine. „

XLVI. In Liturgiis Græcis apud Cardinalem Cienfuegos, lib. *vita*
abscondita, disp. 15. sect. 4. §. 1. num. 60. Sacerdos post consecra-
 tionem panis & vini orat Deum, ut mittat Spiritum Sanctum, qui,
 ex Liturgia S. Jacobi, *sanctificet, & efficiat hunc panem corpus sanc-*
tum Christi tui, & Calicem hunc præciosum Sanguinem Christi tui; & ex
 Liturgia S. Marci: *& faciat panem quidem corpus, calicem autem*
sanguinem; ex Liturgia S. Chrysostomi: *fac quidem panem hunc præ-*
tiosum corpus Christi tui, quod autem in calice est isto, præciosum san-
guinem Christi tui; & ex Liturgia S. Basilii: *Atque faciat hunc*
panem corpus præciosum Domini Nostri Jesu-Christi, & calicem hunc
sanguinem præciosum. Apud Cienfuegos, ibidem, num. 62. Sanct.
 Cyrillus Hierosolim. Catech. 3. ait: *Panem post invocationem Spi-*
ritus Sancti non esse panem communem, sed corpus Christi. Eadem,

quæ in Liturgia Græca, reperiuntur in Missali Mosarabico, ut notat Cardinalis Bona, lib. 2. *de rebus Liturgic.* cap. 13. in dictis autem Liturgiis, ex Cienfuegos, ibidem, num. 68. corpus Christi vocatur panis, *ed quod fuerit, & ed quod persistant ejus accidentia*, uti & in Ecclesia latina post consecrationem nominatur, *tum panis sanctus, tum panis cælestis*; sicuti etiam, ex Bona, ibidem, cap. 9. num. 3, in Canone Missæ, panis ante consecrationem vocatur *immaculata Hostia*, quia futurus est corpus Christi, prout respondet Joannes Hostmeister ab eodem citatus: *Non panem & vinum vocamus immaculatam Hostiam, sed corpus & sanguinem Domini, quæ ex illis conficiuntur. Igitur non ob hoc, quod jam sunt, sed quod paulò post futura sunt, tali digna estimantur appellatione.*

XLVII. Ex citatis sanè Patribus & Liturgiis, constat, panem vocari corpus Christi, & corpus Christi, panem, quæ rectè intelliguntur, quia ex contextu, vel sensu ipsorum aliunde noto, agitur de pane sacramento, & sanctificato, vel ed quod fuerit panis, non autem de pane absolute & in sua natura sumptò: unde, cum Lullus, nec in citatis textibus, nec in aliis unquam dixerit panem absolute esse corpus Christi, vel corpus Christi esse panem simpliciter sumptum; & aliunde ex contextu, & ex aliis libris ejus constat, ipsum tenere totalem transubstantiationem substantiæ panis in corpus Christi, non rectè inferitur ipsum sentire, substantiam panis quoad suum esse remanere in Eucharistia, per hoc quod de substantia panis consecrata, ut expressè loquitur in textibus notatis, dicat existere sub accidentibus corporis Christi, & esse in corpore Christi; quia substantia panis consecrata, est ipsum Christi corpus, atque ita, sicut ipsum corpus, ipsa est sub ejus accidentibus; & sic est in ipso corpore tanquam in termino, in quem est transubstantiata; & quoad tertium textum, ex quo deducitur notata propositio, in quo agitur de transmutationibus, quæ fiunt post transubstantiationem Eucharisticam, infra à num. 50. videbitur plures celebres Doctores cum ipso convenire: unde immeritò notata fuit ejus doctrina, cum ex certa critices regula non debeant Autorum verba à textu avulsa simpliciter examinari, sed juxta contextum sunt perpendenda, & secundum modificationem, quæ ex contextu sunt affecta.



Elucidatur quod superest ex notatis Lulli textibus, sicut etiam aliqui alii ex variis libris deprompti ad Eucharistiam spectantes, ut omnis offendiculi scrupulus auferatur.

XLVIII. Contra relatum Lulli textum, num. 24. ex quæst. 127. libri *Sententiarum*; objici fortasse tentabitur, Lullum docere in verbis consecrationis pronomen *hoc* demonstrare panem, quia ibi dicit: *ideo hoc pronomen hoc demonstrat quoddam hic panis sit transubstantiabilis in corpus Christi in ultimo pronomine*; quod est contra communem Theologorum sensum. At ibi jam dictum est pronomen *hoc* significativè, & assertivè cum aliis verbis demonstrare corpus Christi, quatenus in ipsum est panis transubstantiatus; quia tamen dicta verba nedum significant, sed etiam efficiunt transubstantiationem, ideo sub hac ratione ly *hoc* quodam modo demonstrat panem prout fit corpus Christi per conversionem in ipsum; nisi enim super panem dicantur præfata verba, transubstantiationem non efficiunt, nec habent veram significationem, & sic de pane dicuntur quodammodo præfata verba, ut docet D. Cyril. Hierosol. Catec. 4. dicens: *Cum igitur ipse Christus sic affirmet atque dicat de pane: hoc est corpus meum, quis deinceps audeat dubitare*; & alii plures Patres: unde cum de pane dicantur, ly *hoc* demonstrat panem per transubstantiationem fieri corpus Christi; demonstratum autem per dicta verba significativè & assertivè, ut docet Lullus in citata quæstione, prout à num. 24. exposuimus, est corpus Christi.

XLIX. Præterea apud Suarez, tom. 3. in 3. part. disp. 58. sect. 7. varii sunt modi explicandi, quid demonstrat ly *hoc*; & multi fatentur demonstrare panem, cum quibus sentit D. Bonaventura, cujus sententiam approbat Palacios, in 4. dist. 8. disp. 3. à pag. 244. addens, quoddam Hugo Victorinus, lib. de *Sacram.* part. 7. cap. 9. dixit, panem esse corpus Christi, non per unionem, sed per transitionem (hoc est conversionem in corpus Christi) & in hoc idem, ait Palacios, conspirare D. Ambrosium. Clarissimus etiam Berti, lib. 33. de *Theolog. disciplin.* cap. 9. §. *Nunc ad argumenta*, sic scribit: "Et si quidem Catholici putant eò pronomine demonstrari panem, censent quoque ampliandam propositionem, ita ut sensus sit: *Hic panis, qui, loquente me, panis est, in termino prolationis est corpus*

» *meum*. Nullam proinde cum Hæreticis movebo quæstionem, an
 » verborum consecrationis panis sensus sit: *Hic, qui modò est panis, fit*
 » *corpus meum* aut *hoc* scilicet, *hæc res est corpus meum*, & in consecratio-
 » ne calicis: *hic est sanguis meus*, an verò: *hoc*, id est, *hæc res est sanguis*
 » *meus*; ac modò intelligatur sensu exposito, admittam utrumque.»

L. Adversus relata num. 33. objici etiam potest, esse contra communem Theologorum sensum doctrinam Lulli, quòd videlicet, dum corrumpuntur species sacramentales fiat transmutatio in novum panem. At circa hoc notandum est, quòd licet D. Thomas, *part. 3. q. 77. artic. 5.* impugnet reditum, tam ejusdem, quàm novæ substantiæ panis, addit tamen: *nisi fortè dicatur, quòd in ultimo instanti corruptionis specierum redit, non quidem substantia panis & vini (quia illud idem instans est, in quo primò habent esse substantiæ generatæ ex speciebus) sed materia panis & vini, quæ magis de novo creata diceretur, quàm rediens propriè loquendo; & secundùm hoc posset sustineri prædicta positió.* Unde non notat, licet impugnet, reditum substantiæ panis, saltem quoad hoc quod dicatur, de novo produci materiam panis & vini, quæ, cùm debeat esse materia specifica panis & vini, aliàs non magis esset materia panis & vini, quàm cujuslibet alterius, parum differt sententiã, quam non improbat D. Thomas, à productione novi panis, quam asserit Lullus. Deinde tanta est difficultas, ad explicandum qualiter corruptis speciebus sacramentalibus succedit ibi nova substantia, quòd in varias abierint Doctores vias; & sententiã, quam ibi exponit ipse D. Thomas, videlicet, quòd *in ipsa consecratione miraculosè datur quantitati panis & vini, quòd sit primum subjeetum subsequentiũ formarum*, communiter rejicitur apud Suarez.

LI. Attamen sententiã, de reditu substantiæ panis nobilem habet Patronum, referente Palacios in 4. dist. 12. §. *Est autem*, nempe Innocentium Papam, lib. 4. de *Offic. Miss.* cap. 11. eamque amplectitur Alensis, *part. 4. quæst. 40. memb. 2.* & ipsam valde probabilem censet D. Bonaventura in 4. dist. 12. ar. 2. *quæst. 1.* Hanc opinionem etiam tenet citatus Joannes Gropperus Cardinalis designatus in egregio opere de Eucharistia, art. 1. cap. 54. pag. 198. ubi ad objectionem sui temporis Lutheranorum, videlicet, Eucharistiam aliquando à muribus corrodi, corrumpi, & cremari, & cùm hoc non possit in vero Christi corpore fieri, solùm verificari potest de pane, qui propterea debet dici non esse in Christi corpus conversus: respondet, eorum scomma: « *hæc me ratione non absurdè posse*

„ refellere ut dicam, quamdiu externa panis species divino Myf-
 „ terio & Sacramento, ita ut instituta est, subservit, hoc est quam-
 „ diu venerabile Sacramentum eâ, quâ par est, reverentiâ asserva-
 „ tur, & externæ species manent incorruptæ eo animo, ut oppor-
 „ tuno tempore suscipiantur, esse illuc, & permanere corpus Christi;
 „ at verò, ubi illud divinum Sacramentum & Mysterium, quod
 „ eo nomine præparatum est, ut possit salutariter accipi, non eo
 „ studio asservatur neque sumitur, sed ob negligenter habitas exter-
 „ nas species, aut alioqui commodè sumi non potest, non debet id
 „ nobis videri incredibile, modò divinam pensitemus potentiam,
 „ Deum his casibus corpus suum à speciebus externis subducere,
 „ & pristinam panis naturam ad illas redire permittere: perindè ut
 „ Virgæ naturam, quæ jam in serpentem transierat, in id quod
 „ ante erat, jussit reverti, quando illa divina mutatio jam illos non
 „ erat usus habitura, quibus divinitus destinata fuerat. Ad hoc ci-
 „ tat D. Cyprianum, *serm. de lapsis*, & pag. 201. advertit, hunc
 panis reditum non ita necessariò fieri oportere, quin Deus pro di-
 vina sua virtute possit aliud efficere. Suarez, to. 3. in 3. par. disp.
 57. sec. 3. docens, dum corrumpuntur species, creari eandem nu-
 mero primam materiam quæ ante consecrationem fuit sub speciebus
 panis, dicit veterum Sententiam de reditu substantiæ panis interpre-
 tari posse de reditu ejusdem materiæ. Alii ex ipso, disp. 55. sec. 3.
 supponentes, ad definitionem corporis Christi sub speciebus fieri trans-
 mutationem, non admittunt redire substantiam panis ad nostram nu-
 tritionem, sed, ut ipse ait, *Aliqui moderni, ausi sunt concedere, cor-
 pus Christi converti & transubstantiari in nostram substantiam, quando
 illud communicamus*: quam sententiam, estò non amplectatur, di-
 cit posse confirmari ex Doctrina plurium Doctorum tenentium,
 posse corpus Christi, ut est in Sacramento, converti in aliquam
 substantiam, quin tamen suum proprium esse deperdat.

LII. Ut autem Lulli sensus in dicto Textu clariùs intelligatur,
 noto cum Doctoribus à Suarez relatis dictâ disp. 55. dum corrumpuntur species sacramentales & definit ibi esse corpus Christi, ac succedit nova substantia, fieri ibi aliquam mutationem, etiam in corpore Christi prout sacramentaliter existente, quatenus videlicet definit ibi esse sacramentaliter. Noto etiam ex ipso ibidem sec. 3. esse sententiam à multis Theologis receptam „ posse scilicet corpus
 „ Christi ut est in Sacramento, converti in aliquam substantiam,
 „ etiamsi in Cælo maneat; quod alii dicunt posse converti secun-

» dūm esse sacramentalē, quod hīc habet, etiam si non convertatur secundū esse simpliciter, quod habet in rerum natura, ita Paluda. in 4. dist. 11. quæst. 3. num. 23. Capreol. quæst. 1. art. 3. ad 1. Scoti, & ad 1. & 7. Durandi, contra secundam conclusionem; Cajet. hīc, quæst. 75. art. 4. ad 3. Durandi, & infra quæst. 77. non apparet autem (addit Suarez) quo alio modo possit converti corpus Christi in aliam substantiam sibi succedentem quam nunc fiat». Et sanē Cajetanus, loco citato à Suarez, possibilem reputat reconversionem corporis Christi in eundem panem. Noto quoque, Lullum mediā incidere viā, tenendo quodd, dum species sacramentales corrumpuntur, à corpore Christi, prout sacramentaliter existente sub illis, fit transmutatio in novum panem ibi succedentem, quæ tamen transmutatio nec est conversio, nec transubstantiatio, sed pura transmutatio; quia corpus Christi nec convertitur nec transubstantiatur in novum panem, sed ad ipsum corpus definens esse sacramentaliter ob corruptionem specierum, conaturaliter succedit novus panis, ut fiat hominis nutritio, vel aliæ operationes, quæ subsequuntur; quia ex ipso Lullo in *Lect. Ar. Inven. & Tab. gen.* dist. 3. par. 1. quæst. 5. in ejus quæst. 3. num. 12. corpus Christi non est transubstantiabile; & licet in citato Textu adducto num. 3. tantū exprimat novī panis productio ad recipientis nutritionem, cū tamen uniformis videatur debere esse mutatio ad omnes mutationes, quæ subsequuntur, videlicet dum generantur vermes, vel aliquid aliud generatur ad corruptionem specierum, videtur dicendum, quodd semper producit novus panis, ex quo cæteræ mutationes oriuntur: quare in materia explicatu difficillimā non improbabilem viam arripuisse videtur Lullus, ut ex dictis amplius apparebit.

LIII. De regressu in panis speciem non loquitur iterum Lullus, quantum observare potui, nisi in *Lect. Art. Inven. & Tab. gen.* dist. 3. part. 1. quæst. 5. de *Sacram. Altaris*, in ejus quæst. 3. de quo est *Sacram. Altaris*, num. 14. ubi loquens de substantia panis & vini, quæ per sui conversionem in corpus Christi relinquit sua accidentia, ita scribit: *Unde, quando accidentia, quæ dimittit, corrumpuntur, substantia revertitur in speciem in qua solebat esse (videlicet per productionem novi panis, & vini) & est corruptibilis sub illis primis accidentibus; & convenit quodd ipsa revertatur (quoad panem noviter productum) ad illa, quia sunt viciniora & propinquiora ipsi substantiæ (cū sint accidentia propria speciei panis) & de hoc habemus*

experientiam, in quantum homo naturaliter potest vivere de illis primis principiis tunc, quando Sacramentum est finitum; Eadem planè sententia continetur in hoc Textu, ac in relato num. 33. dicitur autem illa substantia, quæ fuit conversa in corpus Christi, reverti quatenus redit eadem species panis in novo individuo panis, quod noviter est productum; & probat, eandem panis speciem præ alia redire ad illa accidentia, quia illa, utpote accidentia specifica panis, sunt viciniora & propinquiora speciei panis; & quia inde homo posset nutriri, sicut nutritur, dum panem comedit, comprobatur reditus speciei panis in novo individuo, quod cum ipsis accidentibus inceptis corrumpi, etiam corrumpitur; & inde procedit hominis nutritio.

LIV. Iterum loquitur Lullus de hujusmodi nutritione in *Arb. Scient. in Arb. Apostolic.* in ejus foliis, part. 1. tit. de *Eucharistia*, ubi num. 3. ita scribit: *In Sacramento (Eucharistiæ) participat Deus, & homo in magnitudine durationis, quoniam valde magna est duratio & conversatio, quod Christus, qui est homo Deus, remaneat sine cremento & diminutione sui ipsius in Sacramento, homine recipiente illum Christum; qui non crescit per transmutationem substantialem panis in carnem Christi, nec vini in Sanguinem Christi; nec diminuitur in quantum ille, qui ipsum recipit, materiam (substantiam) panis transmutat in Christum (factâ productione novi panis) transmutat in carnem sui ipsius recipientis; & idem est de vino in sanguinem.* In hoc Textu compendiosè explicatur hominis nutritio ex pane consecrato, suppositis aliis, quæ alibi, precipuè in Textu relato num. 33. & 53. docet Lullus. Dum ibi dicitur *materiam panis* transmutari in Christum, non intelligitur *materia* in sensu physico, prout contradistinguitur à forma, sed generaliter pro eo, ex quo aliquid fit; atque ita hæc materia panis est idem ac substantia panis, quæ in Christum transmutatur; substantia autem seu materia panis in Christum transmutata dicitur transmutari in carnem recipientis Eucharistiam, quia, ut supra docuit ipse Lullus, dum corrumpuntur species in stomacho, producit nova substantia panis, ex qua nutritur homo, & quia hæc nova substantia panis est eadem in specie cum prima, & succedit ad ipsam, ideo illa substantia in Christum, transmutata transmutatur in carnem comedentis, non immediatè & per seipsam, sed mediatè quatenus ad ejus conversionem in corpus Christi subsequitur, dum accidentia corrumpuntur, transmutatio in novam panis substantiam, quam immediatè transmutat in suam carnem comedens panem con-

secratum ; Lullus autem hic sub compendio explicat hominis nutritionem , & ideo ad conversionem panis in Christum immediatè subnectit transmutationem in carnem comedentis , quia ex alibi dictis supponit alia prærequisita ; & consequenter neque intelligit in hoc Textu manere in Eucharistia substantiam panis , quæ convertatur in carnem comedentis , quia ex supradictis tota panis substantia , convertitur in corpus Christi ; ac proinde non manet , sed tantum , modo dicto , transmutari in carnem comedentis .

LV. De eadem nutritione iterum tractat , quamvis obiter , Lullus in *Disp. Fidel. & Infidel.* (tom. 4.) part. 5. de Sacramentis , num. 4. pag. 37. ubi , prout verba retulimus , num. 6. arguit Infidelis ; quod si substantia panis transubstantiatur in Corpus Christi , cum istud habeat determinatam quantitatem ad suam perfectionem , aut tantum augetur ex tanta panum transmutatione , ut excedat determinatam suæ perfectionis quantitatem , quod esse nequit ; aut , factâ transubstantiatione , tota illa materia , quæ superfluit ultra quantitatem determinatam corporis Christi , deyenit in nihilum . Ad utramque partem hujus dilemmatis respondet Lullus per verba ibidem relata : explicite quidem ad primam , & implicite ad secundam . Ad primam dicit , quod in supernaturali operatione transubstantiationis , substantia panis sine quantitate ipsius panis transit in substantiam veri corporis Jesu-Christi , & propterea non augmentatur ipsum corpus , quia sine nova quantitate est impossibilis augmentatio corporis ; & hac responsione implicite solvit secundam partem dilemmatis , quia , cum tota panis substantia sine quantitate convertatur in corpus Christi , sicut nihil in ipso augetur , ita nihil ipsi superfluit , & ita materia seu substantia panis non annihilatur , quia tota convertitur totaliter in corpus Christi . Post relata verba , addens Lullus aliam rationem , cur dicta panis substantia non annihilatur , immediatè subjungit . *Nec materia* (substantia videlicet panis) *annihilatur , quia convertitur* (non immediatè , sed mediatè , cum producitur nova panis substantia dum corrumpuntur accidentia , quæ nova panis substantia convertitur immediatè in carnem comedentis) *sine accidentibus ipsius Jesu-Christi in nutrimentum corporis hominis recipientis ipsum corpus Christi ; sicut prius conversa fuerat sine accidentibus panis in substantiam Jesu-Christi , ita quod anima vivat de transmutatione , & corpus de nutrimento .*

LVI. Profectò in hoc textu sub compendio explicat Lullus nutritionem , quam habet recipiens Eucharistiam , dum corrumpuntur species ;

species ; & supponens ac prætermittens mutationem , quæ , dum corrumpuntur species , fit in novam substantiam panis , ex qua immediate nutritur homo : hanc nutritionem immediate subnectit & refert ad substantiam panis , postquam est in corpus Christi conversa ; licet enim substantia panis in corpus Christi conversa , in ejus & omnium sensu , sit ipsum verum corpus Christi , non propterea sentit cum Autoribus supra , num. 51. relatis , qui dicunt corpus Christi converti & transubstantiari in nostram substantiam ; sed intelligit juxta ejus doctrinam supra operose expositam , videlicet quod prius , dum corrumpuntur species , fit transmutatio in novam panis substantiam , ex qua immediate fit nutritio , quam novam transmutationem , compendiose loquens , supposuit ex alibi dictis ; hanc autem nutritionem refert ad panis substantiam , quæ fuit conversa in Christi corpus , & de ipsa illam affirmat , tum quia in ipsa incepit prima transmutatio , ad quam , mediante alia , hæc ultima subsequitur ; tum etiam quia hæc nutritio fit ex eadem in specie substantia panis , licet non ex eadem in individuo , quia illa prima individua substantia panis fuit totaliter conversa in corpus Christi , atque ita illa substantia panis conversa in corpus Christi , sine accidentibus Christi convertitur (non immediate , & per se ipsam , quia per se ipsam nihil est , sed mediatè , videlicet mediante novâ substantiâ panis productâ , ad quam prius , dum corrumpuntur accidentia , fit nova transmutatio) in substantiam recipientis corpus Christi ; ac proinde non debet inferri quod illa prima substantia panis secundum suum esse permaneat , quia ex Lullo in hoc eodem libro & ex supra relatis totaliter transubstantiatur in corpus Christi , & nihil est quoad seipsam , sed per conversionem est ipsum corpus Christi verum.

LVII. Hoc , præterquam quod constat ex omnibus supra relatis Lulli textibus , sub omnimoda expressione manifestatur in subsequen-
tibus , ex quibus fit evidens , quod juxta ipsum substantia panis transubstantiata in corpus Christi jam non est panis substantia , sed tantum substantia Jesu-Christi. *In Lect. art. inven. & Tab. gen. Dist. 3. p. 1. q. 5. in ejus , q. 5. num. 1. scribit , quod per transubstantiationem substantia , quæ dimittit quantitatem panis & vini , non est alia substantia quàm substantia Jesu-Christi ; & num. 2. sic substantia panis & vini transubstantiata existit substantia Jesu-Christi. Et q. 9. num. 6. Et illa transubstantiata substantia est corpus Christi. Ex dictis constat quod transubstantiata panis substantia est ipsum corpus Christi , & quidem conformiter ad D. Thom. in 4. dist. 11. q. 1. art. 2. circa*

annihilationem panis, ubi ad r. ita respondet: „ Unde cum in hac
 „ conversione id quod est terminus à quo, scilicet substantiam panis,
 „ convertatur secundum se totum in terminum ad quem, scilicet
 „ corpus Christi, non quidem ut sit sub ipso, *sed ut sit ipsummet*,
 „ patet quod non est annihilatio substantiæ panis „. Quod autem jam
 non sit ibi panis & vinum docet Lullus, ibidem, q. 6. num. 6. dicens:
In Sacramento Altaris, odor panis & vini sustentatur in odorativo, &
in odorabilitate naturalis potestatis & virtutis, sed non in pane & vino,
quia, confectio Sacramentis, facta est transubstantiatio panis & vini;
 & num. 7. *Et gustabile est sapor, qui fuit panis & vini, antequam*
fuiſſet Sacramentum; & num. 8. *Quia tactus non tangit corpus Christi,*
quod non est tangibile sub tangibilitate panis & vini, postquam jam
facta est transubstantiatio tangit accidentia, quæ erant panis &
vini; & q. 7. num. 18. *Quia illa concordantia est de corpore transub-*
stantiato in aliam speciem, quæ non est panis & vinum, sed est corpus
Jesu-Christi: Si ergo substantia panis transubstantiata jam non est
 panis, sed corpus Christi, ipsa secundum suum esse & immediatè
 non convertitur in carnem recipientis Eucharistiam, sed mediatè,
 quatenus panis noviter productus per novam transmutationem sub-
 ſequentem convertitur in carnem recipientis; neque manet ipsa panis
 substantia secundum suum esse, sed solum manet substantia corporis
 Christi, in quam est conversa, & quia convertitur in corpus Christi,
 licet nihil sit secundum suum esse, propterea non annihilatur, ut
 cum omnibus docet Lullus in supra adductis. Præter hanc autem
 rationem, aliam subnectit in hoc textu, num. 55. relato, quia vide-
 licet convertitur in carnem recipientis Eucharistiam, modo expli-
 cato, id est, quia nedum convertitur in corpus Christi immediatè,
 sed etiam mediatè convertitur in carnem recipientis ipsum, quate-
 nus, dum corrumpuntur species, fit nova transmutatio in novum
 panem, qui immediatè convertitur in carnem recipientis Eucha-
 ristiam.

LVIII. Ex hucusque dictis explicatum manet, juxta Lulli sensum,
 qualiter fit nutritio recipientis Eucharistiam, & aliæ peraguntur ge-
 nerationes, quæ eveniunt, vel evenire possunt, dum corrumpuntur
 species sacramentales; videlicet, quia dum istæ corrumpuntur fit
 nova transmutatio in novum panem, ex quo, incepto corrumpi sub
 illis accidentibus, generatur per nutritionem caro recipientis, &
 aliæ oriuntur generationes; quia tamen in locis adductis, nec alibi,
 quantum observare potui, explicitè declarat Lullus, qualiter fiat hic

novus panis, an scilicet per creationem, an alio modo: absque violentia possunt ejus verba intelligi eo meliori sensu, quo, juxta catholicam Doctrinam intelligi possint, sive quod generetur per novam transmutationem novus panis, sive quod creetur; vel sensu accommodatiori ad Doctrinam eximii Suarez & aliorum Theologorum, quod creetur de novo eadem panis materia in illa nova transmutatione, ex qua affecta illis accidentibus, quæ corrumpuntur, fiat nutritio recipientis, & aliæ possibiles generationes: dico hoc posse intelligi in verbis Lulli; tum quia, dum loquitur de his subsequentibus generationibus, illas agnoscit sæpè in materia panis, noviter videlicet producta in transmutatione, quæ habetur, dum corrumpuntur species; tum etiam, quia, licet dicat Lullus quod tunc fit novus panis, ex quo habetur nutritio, cum tamen ille novus panis dicatur ineptus corrumpi, non incongruè potest dici materia panis noviter tunc producta per creationem, si hac intelligentia sit aptior ad sensum catholicum; cum enim Lullus explicitè hoc non declaret, æquitas postulat, ut intelligatur aptiori sensu, quem certè ejus verba non abhorrent, ut immunis habeatur ejus doctrina.

LIX. Si tamen Philosophari licet in re tam abstrusa, conabor eruere, quid, meo videri, dici possit conformius ad ejus mentem, examinatis aliis textibus, qui etiam aliquà indigent explicatione. Itaque in citata *Lect. art. inven. & Tab. gen. dist. 3. p. 1. q. 5. de Sacram. Altar.* in ejus, q. 7. *De tempore in Sacramento Altaris*, num. 11. ita scribit: *Substantia panis in Sacramento Altaris in illo tempore, quo dimittit accidentia panis, dimittit elementalem potentiam (videlicet generalem substantiam elementalem, seu chaos universale diffusum per totum lunæ concavum) quæ erat induta specie panis, & illa potentia est subjectum (non inhærentis, sed puræ continentiæ) accidentibus, quæ fuerunt panis, & generationi & corruptioni eorum; & ideo in illo tempore, quo est consumptum hoc Sacramentum, posset homo per magnam concordantiam virtutis & naturalis instinctus corporaliter vivere de illa elementali potentia (mediate quidem novo pane producto, ut supra est dictum) & de accidentibus sustentatis in ea (tanquam in continente) extra speciem panis; de Sacramento autem potest vivere rationalis anima cum concordantia virtutis, memorando & intelligendo, & amando illud Sacramentum.* Antequam explicem modum nutritionis, qui hic innuitur, ex potentia elementali, noto, Lullum in hoc textu solum intendere, quod substantia panis, dum convertitur in corpus Christi & relinquit accidentia panis, relinquit etiam poten-

tiam elementalem; id est substantiam generalem elementariam, quæ est chaos universale diffusum per totum concavum lunæ; in qua generali substantia continebatur substantia panis cum suis accidentibus: unde, cum remaneant ejus accidentia, dicta substantia elementalis tunc est subiectum continens ipsa, sicut ea continebat antequam substantia panis transubstantiaretur; & est subiectum concurrens ad generationem, & corruptionem eorum, & ad mutationes, quæ subsequuntur, ut postea explicabimus.

LX. Proinde, dum dicit Lullus in dicto textu, quod substantia panis in illo tempore, quo transubstantiatur & dimittit accidentia panis, dimittit elementalem potentiam, quæ erat induta specie panis, non intendit quod esse substantiale elementale panis remaneat, sicut remanent accidentia; quia, cum in ejus sententia, elementa sint formaliter in mixto, & ex ipsis substantialiter constituatur mixtum: esse substantiale panis, sicut & cujuslibet alterius elementati, consistit in quadam portione substantiæ elementalis informata formâ substantiali panis; ita ut illa portio elementalis substantiæ fit materia proxima formæ panis: unde, cum, ex ipsius sententia toties repetita, in transubstantiatione tota substantia panis formaliter & materialiter convertatur in corpus Christi, ideo non potest in dicto textu intelligere, quod esse substantiale elementale panis remaneat, imò præter supra adducta, in quibus ex ipsius mente constat materiam panis converti & non manere, in hac eadem quæst. 5. de Sacram. Altar. expressè fatetur quod esse elementale panis transubstantiatur, nam in ejus quæst. 9. num. 13. postquam exposuit modum, quo frumentum convertitur in carnem comedentis, ait: *Iste modus in vegetatione est figura, in qua repræsentatur modus Sacramenti Altaris, cujus modus est, quod elementatum, quod est sub specie substantiati panis, transubstantiatur in substantiam, quæ existat sub specie carnis, & hoc secundum modum removendi minoritatem ab illo elementato transubstantiato in corpus Jesu-Christi; & num. 18. Et per istum modum possumus considerare modum Sacramenti Altaris sustentatum in modo principiandi elementatum transubstantiatum in elementatum indutum corporalitate Christi: id est inesse elementatum corporis Christi; dicitur autem de potentia elementali, quam dimittit substantia panis, quod erat induta specie panis, non in sua generalitate, sed in sua portione, quam habebat in pane, & hæc portio est; quæ fuit transubstantiata.*

LXI. Dum etiam dicit in citato textu, quod illa potentia elementa-

lis est subjectum accidentibus, quæ fuerunt panis, non intendit quodd. fit subjectum inhæſionis accidentium, quod ipsa afficiant & informant; quia ex ipsius repetita sententia in relatis à num. 1. accidentia manent sine subjecto, & sæpè repetit in hac eadem quæst. 5. expressè, ut quæst. 2.^o num. 1. & quæst. 9. num. 20. quodd. accidentia manent sine proprio subjecto; quæst. 16. num. 4. extra substantiam; quæst. 3. num. 4. & 6. quodd. durant per se, & sunt separata à subjecto; quæst. 4. num. 3. & quæst. 6. num. 12. quodd. sustentantur in seipsis; & hoc, ut ait citatâ quæst. 3. num. 6. ideo est, quia subjectum, quod dimittunt accidentia, est transubstantiatum in corpus Christi. Hoc idem tenet ubicumque agit de hoc Sacramento, & signanter in lib. de articulis ab Episc. Parisiens. damnatis; nam ibi articuli 138. 139. 140. & 141. directè contra hoc Sacramentum statuunt, quodd. accidens non potest esse sine subjecto, ut artic. 141. ubi ponitur. quodd. Deus non potest facere accidens esse sine subjecto, nec plures dimensiones simul esse; hos autem omnes articulos impugnat Lullus, asserens quodd. Deus potest sustentare accidens sine subjecto, & hoc vult facere in Sacramento Altaris. Itaque substantia vel potentia elementalis, quam relinquit substantia panis, dum transubstantiatur, non est subjectum inhæſionis & informationis accidentium panis, sed purè subjectum continentiae in quo collocantur, ut explicat Lullus ibid. quæst. 8. ubi est Sacram. Altar. num. 5. dicens: accidentia, quæ substantia panis dimittit tunc quando transubstantiatur in corpus Christi, collocantur in elementalī potentia (seu chaos uniyersali) quam substantia panis dimittit, & in illa elementalī potentia (mediantibus accidentibus) collocatur transubstantiata substantia (quatenus est corpus Christi contentum sub illis accidentibus) & ideo corpus Christi, quod est in Cælo (mediantibus accidentibus panis) est collocatum in illa elementalī potentia (quia succedit ubi fuit substantia transubstantiata) quæ est in terra, ita quodd. corpus Christi non moveatur de Cælo; & num. 15. In Sacramento Altaris dimittit transubstantiata substantia vegetabilitatem panis in elementalī potentia (id est chaos uniyersali, cujus influxu erat vegetabilis) & in illo loco, in quo ipsam dimittit, remanet transubstantiata substantia (quatenus est facta corpus Christi, quod ibi succedit, & est) non conjuncta cum vegetabili potentia panis; quia corpus Christi non est vegetabile sub vegetabilitate panis.

LXII. Ad prædictorum & eorum, quæ circa textum, num. 59. relatum sunt dicenda, intelligentiam, sciendum est ex Lullo passim, & præcipuè in libro *chaos* quodd. substantia elementalis composita ex

quatuor simplicibus elementis est universalis potentia & primordialis materia omnium sublunarium, & ex ipsa & in ipsa fit omnis eorum generatio & corruptio : ipsa pervadit omnia, & in ipsa subsistunt omnia, sicut & quatuor elementa sensibilia, seu massæ elementales, quas sensibus percipimus : unde elementata non sunt aliud, quam portiones hujus elementalis substantiæ, quæ existens eadem essentialiter in omnibus, diversificatur in ipsis secundum formas & naturas eorundem : hanc universalem substantiam elementalem vocat Lullus chaos ; & istud chaos (ut ait lib. chaos, tit. de esse chaos, num. 2.) est illud subiectum, in quo & de quo sunt omnia entia naturalia sublunari circulo, continens in se omnia quinque universalia vel prædicabilia (scilicet realia) & decem prædicamenta, atque omnia semina causalia . . . de eo possunt omnia fieri per diversas transmutationes ; & tit. de tribus gradibus chaos, num. 1. scribit : In isto siquidem gradu primo ipsius chaos (videlicet universali elementali substantiâ per omnia diffusâ) creavit Deus quidquid est naturali in corpore physico, scilicet per modum potentialem, habitualem, dispositivum, appetibilem, &c. ut ipsum chaos agenti naturale sufficeret, accipiendo de ipso chaos quidquid ipsum agens indiget ad generationem & conservationem specierum. Unde, quia istud chaos seu elementalis substantia ex Lullo est subiectum, in quo & de quo sunt omnia entia naturalia, continens in se omnia, ita ut omnia sint in ipso sicut piscis in mari, ut sæpè explicat Lullus ; in ipsa continebatur & erat substantia panis cum suis accidentibus, & ideo, dum transubstantiatur, illam relinquit ; sed accidentia, quia non mutantur, remanent in ipsa, & ita ipsa est subiectum accidentibus, subiectum videlicet ea continens, sicut antea continebat ; & ideo in textu adducto, num. 61. dicitur quoddam accidentia, quando substantia panis transubstantiatur, collocantur, videlicet per se sola, in potentia elementali ; & quia accidentia manent immota, & corpus Christi, in quod panis substantia transubstantiatur, succedit ubi erat illa substantia, ideo corpus Christi ponitur sub illis accidentibus, & illis mediantibus est collocatum in illa elementali potentia ; quia tamen non componitur cum ipsa, nec modo naturali sicut elementata continetur in ipsa, non subicitur naturalibus mutationibus, quæ, ratione dictæ elementalis substantiæ, eveniunt corporibus elementatis.

LXII. Hæc elementalis substantia, cum sit subiectum, in quo & de quo sunt omnia entia naturalia, & de quo possunt omnia fieri per diversas transmutationes ; ideo in textu relato, num. 59. dicitur esse subiectum generationi, & corruptioni accidentium, videlicet generationi,

quæ fuit, dum ipsa fuerunt generata cum substantia panis in ipsa elementalī potentia; & *corruptioni* eorum, quæ futura est in eadem & mediante ipsa, sicut etiam *generationi*, quæ evenire potest ad ipsorum corruptionem, cum ex ejusdem influxu fiant omnia naturalia; & propter hoc dicit ibidem Lullus, quod, quando consumptum est Sacramentum, posset homo corporaliter vivere de illa elementalī potentia, & de illis accidentibus; quia tamen hæc corporalis nutritio hominis ex mente Lulli supra expressa, non fit nisi ex pane noviter producto, dum corrumpuntur accidentia, ideo hanc novi panis productionem videtur hic supponere Lullus ex alibi dictis, ad hominis nutritionem, & innuere modum, quo producitur, dum dicit, quod *per magnam concordantiam virtutis & naturalis instinctus* posset homo vivere de illa elementalī potentia. Ut hoc explicem, noto, ex ipso sæpissimè, & præsertim in libro *chaos*, tit. *de generat. & corrupt. chaos*, & tit. *de universali transmutat. chaos*, quod nedum generationes regulares, in quibus est determinatum agens particulare producens, fiunt ex influxu ejusdem chaos seu substantiæ elementalī, sed etiam irregulares, dum non adest particulare agens determinatum producens, ut dum ex corpore corrupto alia diversæ speciei generantur. Hæc irregularis generatio ex ipso Lullo fit, ratione instinctus & appetitus ejusdem elementalī substantiæ, quæ per se tendit ad generationem elementatorum; & ratione etiam instinctus & appetitus feminum causalium in ipsa contentorum, quæ ad eandem generationem inclinantur; & ratione concurrentiæ loci, temporis & aliorum comitantium, ita ut secundum majorem omnium concurrentium dispositionem ad unam speciem præ alia, fit unius individui specifici generatio præ alio.

LXIV. Unde, cum in dicto textu dicatur, quod hominis nutritio, & consequenter novi panis productio ad eandem prærequisita, fiat per *magnam concordantiam virtutis & naturalis instinctus*, & ipse Lullus eodem loco, quæst. 7. num. 16. dicat: *In Sacramento Altaris remanet naturalis instinctus in accidentibus, & in elementalī potentia (universali scilicet, in qua continentur) in illo tempore, quod facta est transsubstantiatio, & instinctus supra naturam remanet in transsubstantiatione; & ideo est major instinctus, qui est supra naturam in Sacramento, quàm naturalis instinctus*; quatenus ratione supernaturalis transsubstantiationis manent accidentia sine substantia panis, ad quam habent naturalem instinctum, & appetitum: videtur dicendum, quod, dum corrumpuntur accidentia, & definit esse sacramentaliter corpus

Christi, cum tunc non obstat transubstantiatio supernaturalis, reddit naturalis vigor instinctus & appetitus naturalis accidentium ad substantiam panis, & per magnam hujus instinctus & appetitus concordantiam cum instinctu & appetitu substantiae elementalis, habetur major dispositio & proportio ad generationem substantiae panis in illa accidentium corruptione, quam ad alterius substantiae generationem; & quia semen causale panis in elementali substantia simpliciter & confuse contentum, habet etiam modo dicto maiorem dispositionem, praeter alio quocumque semine causali, ut per suum instinctum & appetitum influat in generationem novi panis: ideo tunc generatur novus panis, & non alia substantia; & quia in accidentibus jam incepta est corruptio, generatur novus panis inceptus corrumpi, & ex ipso sic disposito generatur homo, recipiens Eucharistiam, suam carnem per nutritionem; vel alia generantur, quae solent & possunt ad corruptionem specierum sacramentalium evenire.

LXV. Praedicta omnia dicta sunt sine praepudio maioris intelligentiae, & solum quia mihi videntur conformiora doctrinae Lulli, dum agit de generationibus irregularibus, cum aliunde videatur supponendum ex ipso juxta supradicta, quoddum corrumpuntur species sacramentales, producitur novus panis vergens ad corruptionem, ex quo immediate fit hominis nutritio; quamvis ipse in variis locis supra citatis agens de hujusmodi nutritione, non exprimat productionem novi panis, quam ex aliis locis assertam tunc supposuit, tractans per compendium hujusmodi secretas operationes. Haec etiam novi panis generatio, prout exposuimus, videtur conformis Waldensi, tom. 2. de Sacram. cap. 62. qui, referente Michaeli Palacios in 4. dist. 12. disp. 2. dicit: „hominem posse nutriri ex speciebus sacramentalibus propter alteram ex duabus causis: vel quia „species sacramentales ex vi divinitus influxa illis, aut aeri, vel vaporis circumstanti, poterunt congregare vel humores in corpore, „aut aërem proximum per anhelitum; ex humoribusque hujusmodi, „vel ex aëre, attracto per virtutem specierum apta fit materia, quae „transmutetur à calido naturali, unde fiat nutritio „. Hic modus nutritionis possibilis consideratur à Waldensi, qui videtur similis modo quem insinuat Lullus in variis locis, in quibus non explicat ante nutritionem fieri novum panem, ex quo fit nutritio; connaturalius tamen videtur fieri nutritio, prout explicuimus, quam ut explicat Waldensis, & quam dicunt plures Thomistae apud Suarez in 3. par. tom. 3. disp. 57. sec. 3. videlicet, quantitatem hostiae consecratae converti

verti in novam materiam, ex qua fit nutritio; solo tamen, apud ipsum, ait, novam materiam congenerari, & ex ipsa fieri nutritionem; & sic admittit generationem novam.

LXVI. Rediens iterum ad explanandos Lulli Textus circa Eucharistiam, prænoto, quod ipse non intendit remanere aliquam materiam vel substantiam panis post transubstantiationem, eò quod hanc aliquoties explicet ad modum, quo panis convertitur in carnem comedentis, in qua conversione remanet materia; quia hoc est purum exemplum, quod non tenet in omnibus; & aliunde explicat differentiam, quia sacramentalis transmutatio fit sine digestionem, alteratione, augmentatione, quantitate, &c. quæ interveniunt ad humanam nutritionem ex pane; & propterea sacramentalis transmutatio est majus miraculum, & major transmutatio, quam alia quæcumque ex ipso in *Lectur. Ar. inven. & Tab. gener. dist. 3. part. 1. quæst. 5. in ejus quæst. 2. num. 18. & adeo perfecta*, quod non potest imaginari, ex quæst. 3. num. 18. & propterea sæpè dicit, ut ibi quæst. 4. num. 4. quod major captivitas & vis, quam patitur intellectus, est in assensu ad hoc Sacramentum. Nec solus est Lullus, qui prædicto exemplo explicat conversionem eucharisticam, quia eodem utuntur plures Patres, & præcipue Nyssen *Orat. Catech. Damascen. lib. 4. de fide Orthod. cap. 14. Thephilact. in Ioan. cap. 6. & hoc exemplum tamquam certum & firmum Patrum documentum exponit contra Hæreticos citatus Gropperus, pag. 369. §. Tertiò docere eos.*

LXVII. Neque ad notatam propositionem alludit ipse Lullus, dum sæpè dicit, quod de pane fit caro, & de vino sanguis Christi, vel ex pane, & vino; quia in dictis locutionibus solum intendit, panem converti & transubstantiari in corpus Christi, & vinum in ejus sanguinem; non autem intendit panem & vinum esse materiam, ex qua vel de qua, sicut naturaliter vel artificialiter, unum fit ex aliquo vel de alio, ut patet ex ipsius doctrina, usque huc exposita; in hoc autem loquendi modo consonat Lullus Sanctis Patribus, qui ita frequentissimè loquuntur, ut D. Ambrosius, lib. 4. de Sacram. cap. 4. dicens: *Ubi accesserit consecratio de pane fit corpus Christi . . . Ergo didicisti, quod ex pane fiat corpus Christi.* Nyssen, *Orat. Catechet.* ait: *Seipsum (Deus) impertit per carnem, quæ ex vino & pane constituitur.* Gaudentius, *Traët. 2. de Exodo*, scribit: *Ipse naturarum Creator & Dominus, qui producit de terra panem, de pane rursus, quia & potest & promissus, efficit proprium corpus; & qui de aqua vinum fecit, de vino sanguinem suum facit.* Adelmannus, in *Epist. ad Berengar.* ait:

Qui dixit in principio : fiat lux , & facta est lux de nihilo ; non potuit dicendo de pane , hoc est corpus meum , id fieri efficere ? Tandem Divus Anselmus , Tract. de Azimo & ferment. passim repetit , de pane fieri corpus Christi.

LXVIII. Non etiam notatam innuit Lullus propositionem , dum sæpè repetit , quòd per consecrationem , panis fit caro , & vinum sanguis Christi , & ex consequenti quòd panis consecratus & transubstantiatus est ipsa eadem Christi caro , & unum cum ipsa ; nam panis dicitur fieri corpus Christi , quia in ipsum transubstantiatur ; & dicta expressione vividè & propriè explicatur transubstantiatio , prout communiter loquuntur Patres , qui apud cit. Gropperum & Bellarminum videri possunt ; & in canone Liturgiae Romanæ dicimus : *Ut nobis corpus & sanguis fiat dilectissimi Filii tui.* Undè , cum panis fiat corpus , & vinum sanguis Christi , verum est , quòd panis consecratus & transubstantiatus est corpus , & vinum consecratum sanguis Christi , ut intelligit Lullus in Textu relato num. 20. & aliquibus aliis , quia sic vividè & propriè explicatur vera transubstantiatio , dum dicitur panem transubstantiatum , esse ipsum verum Christi corpus ; esse unum & fieri unum cum ipso , non duo corpora , nec diversa , prout loquuntur plures Patres , ut *Proclus Constantinopol.* dicens : *Ut ejus divina praesentia propositum in sacrificio panem & vinum aqua permixtum , ipsum illud corpus & sanguinem Salvatoris Nostri Jesu-Christi efficeret.* Sanctus Remigius Rhemen. in 1. Corint. cap. 10. sic scribens : *Caro , quam Verbum Dei Patris assumpsit in utero virginali in unitate suae Personae , & panis , qui consecratur in Ecclesia , unum corpus sunt ; sicut enim illa caro corpus Christi est , ita iste panis transit in corpus Christi , nec sunt duo corpora , sed unum corpus.* Primasius , in Epist. ad Hæbre. cap. 10. sic : *Est unum corpus Christi cum illo , quod suscepit de utero virginali , non multa corpora.* Basilius in Liturgia sic orat : *Fac panem hunc ipsum honorificum corpus Domini Dei & Salvatoris Nostri Jesu-Christi ; quod autem est in calice isto , ipsum sanguinem , &c.* Damascenus , lib. 4. de Fide orthod. cap. 14. sic scribit : *Sic & propositionis panis vinumque & aqua per invocationem & adventum Spiritus Sancti supernaturaliter transmutatur in corpus & sanguinem Christi , & non sunt duo , sed unum & idem.* Eusebius Emislenus , vel , ut aliis placet , Gallicanus , Homil. de Passione , sic : *Hic , inquit , est sanguis meus , qui fundendus est , non alius iste & alius ille , sed unus idemque est , & iste & ille.* Chrysostom. Epist. ad Cesar. Monachum , sic : *Et non duo corpora , sed unum cor-*

pus Filii prædicatur. Et D. Thomas, in 4. dist. 11. quæst. 1. ar. 2. ad 1. dicit, panem converti in corpus Christi, *non ut sit sub ipso, sed ut sit ipsummet.*

LXIX. Ex his pronum est intelligere phrasim Lulli, quâ, ut explicet, quàm vera & realis est transubstantiatio panis in corpus Christi, dicit in Textu notato, num. 20. substantiam transubstantiatam existere sub accidentibus corporis Christi, quia est ipsum idem corpus, quod eisdem subjacet accidentibus: intelligi quoque potest alia Lulli phrasis, quâ, ut vividè explicet veritatem & realitatem transubstantiationis, dicit aliquoties, panem taliter fieri corpus Christi per transubstantiationem, ut induat, assumat, & accipiat accidentia corporis Christi, id est, cum panis per transubstantiationem fiat corpus Christi, quod est subjectum suis accidentibus, ipsisque indutum, sit subjectum ipsis accidentibus, & ponitur sub ipsis, ac proinde panis transubstantiatus induit, & assumit illa, quia sit ipsum verum Christi corpus ipsis subjectum, eisque indutum: atque ita panis, non secundum suum esse, sed prout transit per conversionem in corpus Christi, illa induit, & assumit. Sic intelligendus est Lullus, in *Lect. Art. inven. & Tab. gen.* dist. 3. par. 1. q. 5. in ejus quæst. 5. *de quantitate in Sacrament. Altar.* num. 1. dicens: „Jesus
„Christus, in quantum homo habet quantitatem, & sua quantitas
„est in Sacramento Altaris, quam quantitatem assumit illa substan-
„tiantia, quæ (per transubstantiationem) dimittit quantitatem pa-
„nis & vini; ad significandum magnam sapientiam & virtutem Dei-
„tatis in illo Sacramento, in hoc, quod in hoc Sacramento fiat
„transmutatio de pane in carnem, & de vino in sanguinem, sine mul-
„tiplicatione simplicis & compositæ, continuæ & discretæ quan-
„tatis, sic quod nulla species quantitatis multiplicetur in corpore
„Christi, in illa transubstantiatione Sacramenti; & hoc est intelli-
„gibile in magnitudine virtutis Dei, in hoc quod substantia, quæ di-
„mittit quantitatem panis, & vini (post transubstantiationem) non
„est alia substantia, quàm substantia Jesu-Christi. Et ibidem, num.
20. dum dicit, quod non posset esse transubstantiatio, si in pane &
vino transubstantiatis, quæ jam sunt corpus & sanguis Christi, rema-
neret quantitas panis & vini; & hoc quod transubstantiatum est, esset
indutum aliâ quantitate, quàm quantitate Christi tantum; quia nisi ita
esset, non esset transubstantiatum in ipsam verum Christi corpus,
cujus indumentum est quantitas sua propria.

LXX. Sub eodem sensu loquitur ibidem Lullus, quæst. 6. num. 1.

dicens, quod substantia panis (transubstantiata) qualificatur sub qualitatibus corporis Christi, & num. 2. quod substantia transubstantiata assumit accidentia corporis Christi, dum sensus attingunt accidentia illius substantiæ, quæ fuit panis, conjuncta cum transubstantiata substantia, quatenus sensus illa attingunt, ac si adhuc essent in pane; & num. 6. Transubstantiata substantia accipit naturalem odorem sustentatum in corpore Christi; & num. 14. quod hoc Sacramentum est de transubstantiatione illius substantiæ, quæ dimittit accidentia panis & vini, & assumit illa, quæ sunt corporis Christi; & num. 16. quod substantia panis & vini (per transubstantiationem) dimittat suas proprias qualitates, & accipiat alias qualitates, in quibus est magis amabilis, quàm in primis. Similiter dum, quæst. 8. num. 7. scribit: Substantia panis transubstantiata non est collocata in accidentibus, quæ dimittit, quia non est conjuncta cum illis; quia, si cum illis esset conjuncta & illa cum ipsa (per inhærentiam scilicet & coextensionem in loco) comprehenderet & terminaret ipsam quantitas panis in tam parvo loco, quod corpus Christi ibi non posset recipi (cùm ipsum quoad extensionem localem sit majus quàm quantitas panis) sed quia est conjuncta cum quantitate corporis Christi (quatenus est facta ipsum Christi corpus conjunctum cum sua quantitate) & quia est transubstantiata per æqualitatem magnitudinis & veritatis, potest recipi, (sacramentaliter scilicet, & non per localem coextensionem) in illo loco, in quo quantitas, quæ solebat esse panis, est terminata & comprehensa. Pariformiter dum, quæst. 9. num. 4. dicit: In Sacramento Altaris habent potestas, & voluntas Dei modum in majorificando substantiam panis, in quantum ipsam remouent à minoritate (videlicet per transubstantiationem faciendo illam corpus Christi, quod est quid majus) & illam demutant à quantitate, colore, & sapore panis, & illi tribuunt (faciendo illam corpus Christi) quantitatem corporis Christi, & hoc idem de substantia vini. Tandem, dum, quæst. 10. num. 2. ait: Et Sacramentum est cum accidentibus panis & vini, quæ (eorum substantia) dimittit, & cum accidentibus, quæ substantia (transubstantiata) sumit à corpore Christi, (dum fit ipsum corpus) & cum transubstantiatione substantiæ.

LXXI. Profectò hæc omnia deserviunt ad explicandam veritatem & realitatem transubstantiationis, nam adeo verè & realiter substantia panis transubstantiatur in ipsum verum Christi corpus, quod fit ipsummet Christi corpus affectum suis accidentibus, & ita fiendo ipsum corpus, assumit, induit, accipit & recipit ejus accidentia, ejusque conditiones fortitur; & postquam est transubstantiata, &

DISSERT. VIII. §. IV. 205

facta corpus Christi est ipsum corpus Christi, & est remota à minoritate panis, & adeo majorificata, quod est ipsum corpus Christi; ac proinde de ipsa sic sumpta prædicantur, quæ corpori Christi conveniunt, prout, præter relatos Patres, num. 68. omnia prædicta simili phrasi explicant sequentes: Irenæus, lib. 4. *advers. hæreses*, cap. 57. ait: *Qui est à terra panis, percipiens vocationem Dei, jam non communis panis est, sed Eucharistia ex duabus rebus constans, terrena, & cælesti.* Cyprianus, *Serm. de Cæna Domini*, vel quicumque est ejus Autor, dicit: *Ante verba illa, cibus ille communis tantum; sed post consecrationem, panis iste substantialis, & calix benedictione solemni sacrat, ad totius hominis vitam salutemque proficit.* Eusebius Emislenus, vel Gallicanus, Hom. 5. *de Paschate*, explicat quomodo fit panis aliquid majus dicens: *Immo jam minoris esse videtur miraculi, si id, quod ex nihilo agnoscitur condidisse, jam conditum in melius valeat commutare.* Et D. Bernardus, *Serm. de Cæna Dom.* sic: *Creator vini est, qui vinum provehit in sanguinem Christi.* Fulbertus Carnoten. *Episc. ad Adeodatum*, sic: *Dubitari nefas est, ut ad cujus nutum cuncta subito subsisterent, si pari potentia in spiritualibus Sacramentis terrena materies panis & vini, naturam & meritum generis sui transcendens, in Christi substantiam commutetur.* D. Thom. in 4. dist. 11. quæst. 1. art. 2. ad 2. scribit: *Conversio autem panis in corpus Christi non est mutatio opposita creationi, sed quodammodo perficiens ipsam, in quantum panis nobilius esse per hanc conversionem consequitur, & ideo non oportet, &c.* Et Cardin. Nicolaus de Cusa, lib. 6. *excitationum*, *Serm. 4. super una oblatione*, pag. 522. sic idipsum explicat: *substantia panis in consecratione Sacramenti debet in superiorem substantiam Christi transumi, alioqui non esset perfectum Sacramentum, in quo debet contineri omni modo possibili transubstantiatio: quæ fit veraciter; quando natura nostra transit in gratiosam Dei filiationem: non dico, quod natura pereat, sed quod substantia transumitur in altiorem. Sic hinc natura panis quæ est in cibatione, non perit, sed substantia transubstantiatur, hoc est in altiorem substantiam transumitur. Qualiter panis per transubstantiationem sortiatur conditiones corporis Christi, sic explicat Divus Damascenus, lib. 4. *de fide orthod.* cap. 14. dicens: *Non est figura panis & vinum (consecrata) corporis & sanguinis Christi; absit enim hoc, sed est ipsum corpus Domini deificatum; & infra: sic panis communionis non panis simplex est, sed unitus divinitati.* Gaudentius, *tract. 2. in Exod.* sic: *Ne terrenum putes quod cælesti effectum est per eum, qui transit in illud, & fecit illud suum corpus, & sanguinem.* Stephanus*

Heduen. lib. de Sacram. Altar. cap. 15. sic : *Itaque fides nostra est, & verè credendum est, quòd Sacerdote proficiente hæc verba : Hoc est corpus meum, jam non est panis terrenus, sed ille panis, qui de Cælo descendit.* Alcuinus, lib. de Divin. Offic. cap. de Missa, ad illa canonis verba : *ratam, rationabilem, &c.* sic loquitur : *Panis per se irrationabilis est, sed erat Sacerdos, ut ab omnipotente Deo consecratus, rationabilis fiat, transeundo in corpus Filii sui.* Cardin. Cassanus, lib. 4. *excitationum, Serm. Memoriam fecit mirabilium, &c.* pag. 447. postquam variis exemplis explicuit transubstantiationem, præcipuè ad modum quò panis convertitur in nostram carnem, sic scribit Deum alloquens : *Nam quid est convertere panem in Te, nisi Te in panem? Quando enim tu Domine panem in tuum corpus convertis, non-ne Tu vitam panis tribuis? Nam quid est panem in nostram carnem converti, quàm animam vivificando in panem descendere?*

LXXII. Neque pariter notatam admittit Lullus propositionem, dum Sacramentum Eucharistiæ ad modum incarnationis exponit : per hoc Sacramentum explicans incarnationem, & per incarnationem Eucharistiæ; quia similitudo, quam exponit, rectè tenet in utrisque, quamvis sit magna differentia, quam etiam explicat, quatenus humanitas assumpta à Verbo semper manet in seipsa distincta ab illo, licet eidem unita; substantia autem panis, quæ fit corpus Christi, non manet in seipsa, sed totaliter convertitur in corpus Christi; & propterea panis substantia secundum suum esse non est unita Verbo divino: At ut explicetur quàm verè & realiter panis substantia transubstantiatur in ipsum Christi corpus, quod est assumptum à Verbo, ipsique unitum, & quod in Sacramento est eadem ipsissima caro & sanguis Christi, quæ per transubstantiationem fiunt ex pane & vino, dicit aliquando Lullus, quòd Christus in Sacramento assumit carnem & sanguinem ex pane & vino, quatenus videlicet ex pane & vino facit suam carnem & sanguinem, non quòd alia sit caro ex pane à carne, quam assumpsit ex Virgine, sed quia eadem caro assumpta ex Virgine, per transubstantiationem fit ex pane, assumitur quodammodò ex pane; sicut, licet eadem jam sit à tempore incarnationis producta, de novo tamen quodammodò ex pane producitur.

LXXIII. Ex hoc patet intelligentia textus, qui habetur in *Leç. art. invent. & Tab. Gen. dist. 3. p. 1. quæst. 5. in ejus quæst. 3. De quo est Sacram. Altaris?* Ubi num. 10. sic scribit Lullus : *Igitur Sacramentum Altaris est de ista cognitione, videlicet ut homo in hoc Sacramento cognoscat, quomodò Deus sit homo, & homo sit Deus: quam*

cognitionem homo potest habere in Sacramento ; nam, sicut humanitas est conjuncta Deo, sine hoc, quod Deitas inde recipiat multiplicationem, & alterationem, sic, quoad istum passum, Christus assumit carnem & sanguinem (ex pane videlicet & vino) in Sacramento sine augmentatione, & mutatione sui ipsius. Planè comparatio, quæ fit in hoc textu, solum est quoad istum passum, videlicet, quod Deitas non recipit multiplicationem, id est, compositionem, nec alterationem, per hoc quod Deus fiat homo ex conjunctione humanitatis cum Deitate, sicut Christus non recipit augmentationem nec mutationem sui ipsius, per hoc, quod ex pane & vino per transubstantiationem faciat suam carnem & sanguinem ; seu assumat ex pane & vino suam carnem & sanguinem, faciendo ipsa ex pane & vino ; non enim aliter Christum assumere carnem censendus est dicere Lullus, quam eo modo, quo tenet fieri carnem & sanguinem Christi in Sacramento ; & cum ex hucusque dictis evidenter constet, ex mente ipsius, carnem & sanguinem fieri per transubstantiationem ex pane & vino, & taliter quod essentia panis transubstantietur & fiat ipsissima caro Christi, qui est in Coelo, ideo assumere carnem & sanguinem in dicto textu non aliud significat ; quàm Christum in Sacramento facere suam carnem & sanguinem ex pane & vino : non quod alia sit caro ex pane à carne Christi in Coelo, quia nedum in textibus supra adductis, sed etiam in tota hac quæst. 5. sæpè repetit, quod est eadem ; ut in ejus quæst. 2. ubi num. 3. dicitur, quod in hoc Sacramento principiatur Christus jam principiatus, & sanguis jam principiatus ; num. 5. quod ibi est Christus, qui est in Coelo ; num. 7. quod ibi est corpus unitum cum anima & divinitate ; quæst. 5. num. 1. quod substantia transubstantiata non est alia substantia, quàm substantia Jesu-Christi ; num. 2. idem dicitur ; num. 9. quod caro & sanguis sunt de essentia corporis Christi ; & similia passim dicuntur.

LXXIV. Sanè non est ulla novitas in Lullo explicare Eucharistiam ad modum Incarnationis, easque ad invicem comparare, immò hoc est valde frequens apud Patres, ut Justinum, in *Apolog.* 2. Cyprian. in *Serm. de Cæna Domini*, Chrysost. in *Epist. ad Cæsarium Monachum*, & alios plerosque, qui dum comparationem instituunt, phrasî unionis & conjunctionis ad carnem & sanguinem in Eucharistia utuntur, quemadmodum in Incarnatione, sic Damasc. lib. 4. de *Fid. Orthodox.* cap. 14. de hoc loquitur : „ *Quomodo fiet mihi istud*, dicit Sancta „ *Virgo, quoniam virum non cognosco ? Respondit Gabriël Archan-* „ *gelus : Spiritus Sanctus superveniet in te, & virtus Altissimi obum-* „ *brabit tibi : & nunc interrogas, quomodo panis fit corpus Christi,*

» & vinum & aqua sanguis Christi ? Respondeo tibi & ego : Spiritus
 » Sanctus obumbrat, & hæc operatur super sermonem & intelligen-
 » tiam ; panis autem & vinum *transumuntur* ». Et postea subdit :
 » Et quemadmodum in baptisate (quia consuetudo est hominibus
 » aquâ lavari , & oleo ungi) conjunxit oleo & aquæ gratiam Spiri-
 » tûs Sancti , & fecit illud lavacrum regenerationis : hunc in modum ,
 » quia mos hominibus est panem manducare , & vinum & aquam
 » bibere , *conjunxit* his ipsis suam divinitatem , & fecit hæc suum
 » corpus & sanguinem.... Corpus enim secundum veritatem conjunc-
 » tum est divinitati , quod ex Sancta Virgine corpus est : non quod
 » ipsum corpus *assumptum* ex Cælo descenderit , sed quod ipse pa-
 » nis & vinum transmutatur in corpus & sanguinem Dei ». Et pos-
 » tea dicit : Sic panis Communionis non panis simplex est , sed unius
 » Divinitati. Profecto hîc Damascenus dicit , ad modum Incarnationis
 » panem & vinum *transumi* , quod videtur idem ac *assumi* per transi-
 » tum in aliud , sive per transmutationem : & subdit quod Deus fa-
 » ciendo panem & vinum suum corpus & sanguinem , eisdem *conjunxit*
 » suam divinitatem ; ac deinde panem fieri *unitum* divinitati : in
 » quibus omnibus eadem utitur locutione , ac Lullus. S. Remigius
 » Rheimensis , in 1. Corint. cap. 10. sic : » Sicut enim illa caro (sumpta
 » ex Virgine) Corpus Christi est , ita iste panis transit in corpus
 » Christi , nec duo sunt corpora , sed unum corpus. Divinitatis enim
 » plenitudo , quæ fuit in illo , *replet & ipsum panem* , & ipsa Divinitas
 » Verbi , quæ implet cælum & terram , & omnia quæ in eis sunt ,
 » ipsa *replet* corpus Christi , quod à multis Sacerdotibus per univer-
 » sum orbem sanctificatur , & facit unum corpus Christi esse ». Hîc
 » etiam , nedum dicitur , quod Divinitas *replet* panem , sed quod ,
 » *replente* divinitate corpus Christi , quod à Sacerdotibus sanctificatur ,
 » *facit* illum esse unum corpus cum corpore ex Virgine sumpto : in
 » quibus , nedum quædam assumptio , sed etiam distinctio corporis à
 » corpore quoad modum insinuat. Guillelmus ex Abbate S. Theo-
 » dorici , Monachus Cisterciensis & D. Bernardi amicus familiaris ,
 » lib. de Sacram. Altar. cap. 5. sic : » Qui ergo divinâ pietate dignatus
 » est in humeros suos elevare ovem perditam , id est , in unitatem
 » Personæ suæ assumere corruptam naturam nostram , idem nunc
 » terrenam substantiam panis *fusciens* in virtute divinæ potentiae ,
 » cui in omnibus & per omnia subest , cum voluerit , posse , trans-
 » mutat in veritatem carnis suæ.

LXXV. Circa hoc idem alii PP. licet expressè ad Incarnationem
 non

non comparent Eucharistiam, ad illam tamen alludentes, hanc exponunt per quamdam unionem & consociationem, ut Magnus Gregor. lib. 4. *Dialogor.* cap. 58. relatus, cap. *Quid sit sanguis*, dist. 2. *de Consecrat.* ibi sic ait; „ Quis enim fidelium habere dubium possit, in „ ipsa immolationis hora ad Sacerdotis vocem Cœlos aperiri: in „ illo Jesu-Christi mysterio Angelorum choros adesse, summa & „ ima sociari, terrena cœlestibus *jungi*, unum quoque ex visibilibus „ atque invisibilibus *fieri*? „ Præterea idem in eodem Decreti capite sic Sacramentum exponit: „ Unô eodemque tempore ac momentô „ in Cœlis *rapitur*, mysterio Angelorum, corpori Christi *sociandus*, „ & ante oculos Sacerdotis in Altari videtur . . . licet multis locis, „ & innumerabilibus diebus illic consecretur corpus, non sunt tamen „ multa corpora Christi, neque multi calices, sed unum corpus „ Christi, & unus sanguis cum illo, quod sumpsit in utero Virginis, „ & quod dedit Apostolis; Divinitas enim Verbi *replet* illud, quod „ ubique est, & *conjungit & facit*, ut, sicut ipsa una est, ita & unum „ ejus corpus sit in veritate „. Gillebertus de Hoilandia, Abbas Cisterciensis. *Serm.* 7. in *Cant.* sic loquitur: „ Nam per Sacramenti benedictionem accipit oblatus panis hanc ineffabilem mutationem, & „ ex mystica consecratione, & Verbi viventis *copulatione*, hæc vivificatrix gratia in carne Christi redundat „. D. Gaudentius, locô citatô, num. 71. dicit: „ Ne terrenum putes, quod cœleste effectum „ est per eum, *qui transit in aliud*, & fecit illud suum corpus & „ sanguinem „. Et Cardin. Cusanus, ibidem dicit, Deum pani *vitam* tribuere. Et D. Thomas, Opusc. 59. cap. 7. adducendus Dissert. sequenti, num. 34. ait, quod panis conversus *substantificatur* in ipsam & ab ipsa Persona Filii Dei. Unde, sicut præfatæ Patrum expressiones verificantur & usurpantur; ut intelligatur panem per transubstantiationem fieri idem corpus Christi à Verbo assumptum, eidem copulatum, unitum, sociatum, &c. & propterea dicunt panem consecratum, vel carnem & sanguinem in Sacramento conjugari, uniri, copulari, &c. Verbo, ac à Divinitate repleti, eamque in ipsa transire: ita sub eodem sensu & intelligentia dicit Lullus, Christum in Sacramento carnem & sanguinem assumere ex pane & vino. Expressius de hoc loquitur Rupertus Tuitien. lib. 6. in Joandicens: „ Et sicut Verbum, quod est panis Angelorum, caro factum est, non mutatum in carnem, sed assumendo carnem: sic „ idipsum Verbum jamdudum caro factum panis visibilis fit, non „ mutatum in panem, *sed assumendo* & in unitatem Personæ suæ

„ transferendo panem. Proinde, sicut de carne nostra, quam Virgo
 „ Maria peperit, verè fatemur, propter unitatem Personæ, quia
 „ Deus est, sic nihilominus de pane isto visibili, quem ejusdem
 „ Verbi invisibilis Divinitas *assumens*, in carnem suam transfert,
 „ verè & catholicè confitemur, quia corpus Christi est ». Et lib. 7.
 pag. mihi 146. scribit: „ Licet panis iste visibilis cum invisibili Filio
 „ Dei unum factus sit; aries autem ille cum Isaac, pro quo eidem
 „ aræ impositus, unum esse, vel fieri non poterit. Nam Dei Filius,
 „ id est, Deus & homo, habet in se virtutem, effectivam, quæ sibi
 „ uniat panem istum visibilem; Isaac autem illum sibi concorporare,
 „ salvâ utràque substantiâ, non poterat arietem.

LXXVI. Ad alios Lulli textus explanandos progrediendo, oc-
 currit alius in citata lectura, & q. 5. in ejus q. 3. *de quo est Sacra-
 mentum Altaris?* num. 1. ubi dicitur: *Et ambæ virtutes tamquam
 agens, quod producit Sacramentum de illa materia, (substantia) quæ
 dimittit accidentia panis & vini, & est transubstantiata, & informata
 in corpus Jesu-Christi.* In hoc textu *ly materia* solum denotat mate-
 riam, s. sensû, quod Theologi communiter dicunt, panem & vinum
 esse materiam hujus Sacramenti, videlicet illud, quod est terminus
 à quo transubstantiationis eucharisticæ, ut patet ex toto decursu hujus
 Dissertationis; & sic *ly materia* non denotat illam, quæ talis dicitur
 in operationibus naturalibus, vel artificialibus, quæ permanet in
 operato, quia ex hucusquæ dictis constat eam materiam, de qua hîc
 agitur, videlicet substantiam panis & vini, totam, & totaliter tran-
 smutari, ita ut nihil sit postea quoad suum esse; nec obstat, quod
 in textu ipsa *materia dicatur informata in corpus Christi*; dicitur enim
 informata eò sensû, quod *transubstantiata*; & ita, sicut est transub-
 stantiata, quia est facta substantia corporis Christi, ita est *informata
 in corpus Christi*, quia est facta ipsum formatum corpus Christi. Si-
 militer sumitur *materia*, dum, num. 2. dicitur: *Sacramentum Altaris
 est de illa materia, quæ (dum transubstantiatur) dimittit accidentia
 panis & vini, sine corruptione sui ipsius, & ipsorum accidentium, &
 assumit (fiendo corpus Christi, ut supra est explicatum à num. 69.)
 accidentia Jesu-Christi sine corruptione ipsius Jesu-Christi, & suorum
 accidentium.* Dicitur autem illa materia, seu substantia panis & vini
 non corrumpi, sicut, nec ejus accidentia, corruptione scilicet phy-
 sicâ, quæ corrumpitur, dum in carnem comedentis, vel in aliud
 quodcumque naturaliter convertitur; non autem intelligitur de in-
 corruptione sumptâ pro permanentia secundum suum esse, quia

ex hucusque dictis constat totaliter converti, & non permanere.

LXXVII. Eodem sensu ibidem, num. 14. scribit Lullus : *In Sacramento Altaris substantia panis & vini dimittit accidentia sine corruptione, & ideo est hoc Sacramentum de illis principiis, quæ de una substantia possunt transire in aliam sine corruptione substantiæ, & accidentium*; nam hic loquitur de corruptione physica, ad quam subsequitur naturaliter generatio; quæ quidem corruptio nec substantiam panis & vini, nec eorum accidentia afficit, quia, permanentibus accidentibus, substantia sine sua physica corruptione convertitur in corpus & sanguinem Christi, quod autem hic agat de corruptione physica, quæ non corrumpitur, substantia, quæ convertitur, patet ex immediatè subsequenter his verbis : *Unde quando accidentia, quæ dimittit, corrumpuntur, &c.* prout explicavimus num. 53. quibus verbis docet, quod quando accidentia eucharistica corruptione physica in stomacho hominis, vel alibi, corrumpuntur, tunc fit productio novæ substantiæ; atque ita, cum hanc corruptionem, quam hic affirmat evenire accidentibus post transubstantiationem, neget afficere substantiam & accidentia in ipsa transubstantiatione, evidens est ibi agere de hac physica corruptione, ut amplius patet ex quæst. 4. num. 3. ubi loquens de difficultate intelligendi hoc Sacramentum, eam ponderat, præter alia, quia in ipso non possumus intelligere secundum naturam nostri intellectus, quod accidentia possint sustentari in seipsis, nec quod de pane fit caro sine corruptione, & de vino sanguis, & sic de aliis proprietatibus, quæ sunt supra naturam: ubi negat illam corruptionem, quam intellectus secundum suam naturam attingit, dum juxta naturam de pane fit caro.

LXXVIII. In eadem quæst. 3. num. 6. dicitur, quod Sacramentum sustentatur in subjecto, quod dimittunt accidentia, & est transubstantiatum in corpus Christi: quibus verbis unice intenditur, ad esse Sacramenti requiri, tamquam materiam, illud subjectum seu substantiam, quæ transubstantiatur, & persistere Sacramentum per hoc quod fit transubstantiatum, & factum ipsum corpus Christi. Præterea, quæst. 5. num. 18. scribitur : *Christus est propinquior homini, qui amat Sacramentum, per amare, quàm corpori, quod sentit accidentia, quibus Sacramentum est spoliatum.* Dicitur autem Sacramentum spoliatum accidentibus, quæ à corpore hominis sentiuntur, quia corpus Christi, quod ibi intelligitur per Sacramentum, sicut etiam frequentissime in hoc tractatu de Eucharistia, non est affectum per physicam inhærentiam ab ipsis accidentibus, nec est ipsis indutum &

informatum ; & eisdem fuit spoliata panis substantia , quæ facta est ipsum corpus Christi , quod tamen sub eisdem accidentibus sacramentaliter perseverat , ut sæpè explicat ipse Lullus in hoc eodem tractatu de Eucharistia. Tandem ibidem , quæst. 9. num. 6. habetur ita : *Modus Sacramenti Altaris est figura , quæ significat modum Incarnationis ; nam sicut substantia panis transubstantiatur in substantiam corporis Christi sustentata cum modo possificandi , gloriandi , & complendi , & illa transubstantiata substantia est corpus Christi , sic humanitas Christi est sustentata in Deitate , & ipsa est Deitas (in concreto scilicet , quatenus in Christo homo est Deus , & Deus est homo) & Deitas est ipsa ; & hoc per modum possificandi , gloriandi , & complendi.* In hoc Textu substantia panis , quæ transubstantiatur , dicitur *sustentata* , non secundum suum esse , sed secundum quod *transubstantiata substantia , est corpus Christi* ; & sicut , ut transubstantiata substantia , & prout est corpus Christi , sustentatur in Deitate , ita humanitas Christi sustentatur in Deitate ; & sicut substantia panis per conversionem fit corpus Christi , ita humanitas per unionem cum Deitate quoad concretum fit Deus , quatenus homo fit Deus , & sic Deus est homo ; non quod Deitas in abstracto sit humanitas in abstracto , sed in concreto , ut docet ubique Lullus , & signanter in hoc eodem libro , dist. 3. par. 1. quæst. 2. *de Incarnatione* , quatenus Deus est homo , & homo est Deus. Neque intelligitur , quod , sicut substantia panis convertitur in corpus Christi , ita humanitas convertatur in Deitatem ; quia , ut amplè docetur in eadem quæst. 2. *de Incarnatione* , utraque perseverat inconversa & inconfusa. Neque tandem intelligitur quod , sicut humanitas secundum suum esse perseverat factâ unionem , ita substantia panis secundum suum esse perseverat factâ conversionem , quia de substantia panis expressè dicitur transubstantiari , & prout est transubstantiata esse corpus Christi , & sic sustentari , ac proinde secundum suum esse non permanet ; unde non secundum ista intelligitur comparatio , sed unicè modo explicato.

LXXIX. Ex hucusque dictis judico patere , Lullum non sensisse substantiam panis quoad suum esse manere post transubstantiationem in Eucharistia : neque in locis à laudato Censore notatis ex lib. *Sentent.* neque in aliis , quæ ultrò protulimus , quæ viderentur fortasse ansam præbere ; neque in lib. *Proverbiorum* , par. 3. cap. 21. *de Sacram. Altar.* prout explicavimus Tom. 2. cap. 38. ad Art. 94. & 95. Eymerici ; quia constans est sententia Lulli ubique ab ipso propugnata , quod substantia panis totaliter transubstantiatur , ita ut tota es-

sentia substantiæ panis convertatur in corpus Christi, & nihil sit quoad seipsam, nec remaneat in termino operato per transubstantiationem, sed solum remaneant accidentia, quæ persistunt sine subiecto, ut abundantissimè est ostensum; & quia ex citata *Lec. Art. inven. & Tab. gen. dist. 3. par. 1. quæst. 5. de Sacramento Altaris*, plura videntur posse opponi loca, quæ supra explicuimus, iterum placet pro coronide eandem Doctrinam manifestare, præter alios Textus supra adductos, ex eodem libro, & quæst. 5. nam in ejus quæst. 3. num. 3. explicans Lullus, qualiter fit hoc Sacramentum, dicit fieri, *in principiando sacrificare de pane carnem, & de vino sanguinem; non tamen ita carnem de pane, sicut panis principiatur de farina & aqua, quia sic esset multiplicatio (compositio) in corpore Christi, sed sic de pane carnem, sicut imaginari de sentire, & intelligere de imaginari: quod imaginari non est de essentia ipsius sentire, in quantum est per sentire, & non posset esse sine sentire; & hoc idem est de intelligere; & similiter de transubstantiatione vini in sanguinem.* In hoc Textu apertè protestatur Lullus, panis substantiam vel aliquid ipsius non manere in carne Christi, quæ fit ex pane, aliter caro fieret ex pane, sicut panis fit ex farina & aqua, quæ manent in ipso, & in eodem componuntur; totum autem hoc negat Lullus in carne Christi factâ per transubstantiationem ex pane: unde solum, ut explicat, caro Christi fit ex pane, sicut imaginari fit ex sentire, ita quodd imaginari non componitur, nec integratur ex essentia ipsius sentire, sed fit ex sentire, quatenus est per ipsum, utpote ab ipso oritur, & non posset esse sine sentire; & consequenter nec substantia panis, nec aliquid essentielle ejusdem, manet post consecrationem in Eucharistia.



D I S S E R T A T I O I X.

An Lullus cum Ubiquistis senserit, corpus Christi esse ubicumque est natura divina, in quæst. 128. Sententiarum, quoad Prop. 20.

§. I.

*Demonstratur ex mente Lulli corpus Christi solum esse in loco determinato;
& non ubicumque est natura divina.*

I. **E**X Ubiquistis, cum quibus sensisse asseritur Lullus, aliqui, juxta Bellarmin. tom. 1. Controver. 2. lib. 4. à cap. 11. statuebant ubiquitatem humanitatis Christi ob idiomatum communicationem, dicentes unionem hypostaticam stare in hac communicatione, quâ humanitati fuerunt communicata divinitatis attributa, & ita dicebant, quòd humanitas formaliter est omnipotens, omnisciens, ubique, &c. sicut divinitas. At facillè est ostendere, Lullum cum istis non sentire, quia passim tenet, communicationem idiomatum in Christo non esse quoad naturas, sed quoad personam; quia, cum sit una persona in duabus subsistens naturis, quod de Deo dicitur, de homine prædicatur, & è conversò; non autem de naturis, ratione unitatis Personæ, ut signanter docet in eodem lib. Sent. ubi, à quæst. 101. ostendit, quòd, quia Christus est unum suppositum, in ipso Deus est homo, & homo est Deus, & alia plura ad hoc concernentia. Alii verò Ubiquistæ dicebant, ad unionem hypostaticam consequi hanc formalem idiomatum communicationem, ita ut vi unionis hypostaticæ, humanitas verè, propriè, & formaliter sit omnipotens, omnisciens, omniprensens, &c. At ex dicendis constabit cum neutris consentire Lullum.

II. Ad sequentium verò intelligentiam notandum est, ex Bellarmin. ibid. cap. 19. quòd, dum quæritur utrùm Christus Homo sit ubique, tres regulæ pro modo loquendi habendæ sunt præsentibus: „*Prima* est: „quando quæritur an Christus homo sit ubique, si homo sit subiectum propositionis, absolute concedendum est esse ubique, quia tunc „vox homo supponit pro supposito. Itaque ista est vera simpliciter: „*Christus homo est ubique.* „*Secunda* est: si homo sit prædicatum, & „adverbium ubique teneat se ex parte subiecti, similiter concedenda

» est propositio. Itaque cùm dico *Christus ubique est homo*, verum
 » dico, si illud *ubique* tenet se ex parte subjecti, est enim sensus Chris-
 » tum, qui est ubique, esse hominem. Tertia est; si homo sit præ-
 » dicatum, & *ubique* teneat se ex parte prædicati, tunc falsa est
 » propositio, nam cùm dico *Christus ubique est homo* si *ubique* afficit
 » conjunctionem subjecti cum prædicato, significat Christum in
 » omni loco habere secum præsentem humanitatem, quod est fal-
 » sum. » Itaque juxta Bellarminum verum est semper dicere: *Christus*
ubique est homo, dummodo non significetur humanitatem esse ubi-
 que præsentem, vel dummodo ly *ubique* non se teneat ex parte præ-
 dicati, quia idem suppositum, qui est Deus homo, est ubique. Notan-
 dum etiam ex eodem Bellarm. c. 17. « Illam propositionem: *Verbum*
 » *alicubi non est homo*; esse falsam, si significat verbum alicubi de-
 » seruisse humanitatem; licet enim alicubi sit verbum, ubi non est
 » humanitas, tamen etiam ibi verbum est homo, quia verbum ibi
 » existens sustentat humanitatem, ut suam & propriam; licet alibi
 » existentem, quemadmodum anima rationalis in pede existens,
 » unita est cum capite, & informat caput, licet caput ibi non sit,
 » ubi sunt pedes. »

III. His positis, ad Lullum deveniendo, clarissimè explicat suum
 sensum; & *Primò* quoad naturalem præsentiam humanitatis Christi,
 tenet eam non esse nisi in loco determinato, ubicumque de hoc trac-
 tat; nam lib. *de princip. Theolog.* (tom. 1.) part. 2: *de quæst.* in
 quæst. 5. resolvit, quòd quia humanitas Christi est finita, non est per
 totum ubi est Filius Dei. Lib. *de quinque sapient.* part. 3. ratione 6.
 probat distinctionem naturarum in Christo, quia, *si conversio* (quæ
 Deus est homo, & homo est Deus in Christo) *privaret distinctionem*
ab eis (naturis) *non esset distinctio in eisdem naturis inter magnitudi-*
nem finitam & infinitam: ex quo sequeretur, quòd humanitas esset infi-
nita in extensitate in tantum, quantum est Deitas; & ille homo Christus
esset major quàm totus mundus, & suum corpus esset collocatum intra
mundum, & non esset collocatum extra mundum, extra quem mundum
esset infinitum in quantitate sine superficie, & colore, & esset corpus & non
corpus; hoc autem est contradictio. Ex hoc patet, corpus Christi non
 posse habere magnitudinem infinitam, & consequenter non est ubi-
 que, sed in loco determinato juxta quantitatem suæ magnitudinis.

IV. Idem, in *disput. cum Hamar Saraceno* (tom. 4.) cùm part. 1.
 cap. 9. *de magnitudine* sic objiciat Saracenus: « Posito quòd Deus
 » sit incarnatus, aut ipse est totus incarnatus, aut pars: si totus,

» sequitur, quodd homo Christus sit ita magnus sicut Cœlum, &
 » plûs, & sit *ubique*, quod est impossibile; sed si Deus non est totus
 » incarnatus, inde sequitur, quodd divina magnitudo & subiectum,
 » in quo est, videlicet divina essentia, sit divisibilis, quod est im-
 » possibile: » sic ad hanc objectionem part. 2. cap. 11. *de magnitu-*
dine, num. 3. respondet Lullus: « Respondeo & dico, quodd Deus
 » Filius totus sit incarnatus, quia ens infinitum est ubique totum
 » ratione suæ indivisibilitatis; & Christus in quantum homo *non est*
 » *ubique*, quia est finitus & limitatus; sed Deus Filius ubique est
 » homo, quia totus est incarnatus, & sic est homo in Cœlo, &
 » extra Cœlum, & in terra; nam est infinitus, & propter hoc dici-
 » tur quodd Eucharistia sit possibilis, quia Filius Dei existens homo,
 » est ubique homo. » Et cap. 16. num. 3. respondens ad aliam Sara-
 ceni objectionem dicit, quodd Deus per incarnationem voluit esse
homo finitus, & conclusus in utero Beatæ Virginis. In relato textu
 apertè negat Lullus quodd Christus in quantum homo sit ubique; de
 Filio autem Dei, qui totus est incarnatus, quia est infinitus, affirmat
 quodd ubique est homo, ed quia ratione infinitatis Filius Dei est ubi-
 que, & quia totus est incarnatus, ubique est homo; quia ubique est
 suppositum humanitatis existentis in loco suo determinato; cum enim
 neget humanitatem esse ubique, dum affirmat Filium Dei ubique
 esse hominem *ly ubique* non afficit prædicatum, sed subiectum, pro-
 ut explicuit Bellarminus.

V. In *Lectura Art. inven. & Tab. Gen.* (tom. 5.) dist. 3. part. 1.
 quæst. 2. agit Lullus *de incarnatione* per 10. quæstiones, in quarum
 quæst. 8. *Ubi est incarnatio Dei?* Per totam tractat de loco humanitatis
 Christi, & ad præsentem casum sic num. 1. scribit: *Incarnatio est*
in Deitate, & humanitate . . . & in unitate Personæ, & quia divina
Persona est in omni loco, verificat sua veritas, & sua potestas possificat,
quodd sub ratione sui ipsius sit incarnata in omni loco, existens incarnata
in specifico loco sub ratione humanitatis. Num. 2. *Ex quo sequitur quodd*
Deus homo sit in omni loco, & homo Deus in specifico & terminato loco.
 Num. 3. *Quodd incarnatio sit in omni loco ratione Deitatis, & in spe-*
cifico loco sub ratione humanitatis: unde sequitur quies ambaram natu-
rarum, quia sub ratione minoritatis incarnatio est de humanitate, &
comprehensa in loco, & sub ratione majoritatis est incarnatio de Deitate,
quæ Deitas comprehendit & mensurat omnia loca. Num. 4. *Quia incar-*
natio est principiata, convenit ei corporalis specificus locus, ita quodd,
si est in uno specifico loco, non sit in alio; sed quia est principiata de ve-
ritate

ritate & gloria, quæ comprehendunt omnia loca, est incarnatio in omnibus locis sic in divina veritate & gloria, & multò melius etiam sine omni comparatione, sicut medicina est in medico, & justitia in justo homine. Et num. 5. Et ut Deitas (Deus) in incarnatione sit verus homo, potestatis possideat, quòd homo existens finitus & terminatus in loco, sit infinitus Deus, qui comprehendit omnia loca.

VI. Præterea, num. 6. ita scribit: Si incarnatio non esset in omni loco, ita quòd Deus homo esset in omni loco, impediret minoritas incarnationis veritatem & potestatem incarnationis in tantum, quòd totus Deus non esset homo. Num. 9. In incarnatione ambæ naturæ non habent æqualia principia, & ideo veritas ponit in vero, quòd non sint positæ in æquali statu: igitur ponit in vero, quòd Deitas sit in loco cum humanitate, & sit in omni loco & extra locum cum veritate incarnationis principiatæ in loco. Num. 10. Principium incarnationis est Deitas, & humanitas, & est in minoritate sub ratione humanitatis, propter quam minoritatem convenit, quòd sit in terminato & comprehenso loco; sed quia incarnatio principiat in Deitate sub majoritate, convenit quòd veritas ponat in vero, quòd Deus sit homo in omni loco, & extra locum. Num. 11. In quantum incarnatio est de duabus naturis, videlicet de divina, & humana, & in divina natura gloria & potestas sunt æquales, est incarnatio in illa æqualitate sub ratione Deitatis: in qua æqualitate comprehendit omnia loca, & ideo potest esse homo in omnibus locis, sed quia incarnatio sub ratione humanitatis est in æqualitate gloriæ & potestatis terminata in loco, non potest humanitas esse in omnibus locis, existens sub ratione unius loci. Num. 12. In incarnatione intravit intrinseca natura in extrinsecam naturam in tantum, quòd Deitas sit homo in humanitate, & extrinseca natura intravit in intrinsecam naturam in tantum, quòd homo sit Deus in Deitate: est igitur Deus in terminato & finito loco sub ratione humanitatis, & homo in omni loco sub ratione Deitatis. Et num. 19. Sed quia incepit se incarnare in potestate cum minoritate existens in uno loco, non potest in omni loco esse incarnata, quia si esset, perderetur potestas minoritatis.

VII. Profectò in locis adductis explicat Lullus doctrinam catholicam de existentia in loco determinato humanitatis Christi, expressè negans ipsam, licet sit unita hypostaticè Verbo quod est ubique, esse ubique, & affirmans tantum esse in loco determinato, sicut etiam affirmat, quòd Christus in quantum homo tantum est in loco determinato & specifico, & negat, quòd in quantum homo sit in omni loco; & quando absolute affirmat quòd Christus homo sit ubique, vel quòd Filius Dei sit ubique homo, dicit hoc verificari ratione

infininitatis Personæ, & quia est eadem Persona Deus & homo: unde cum dicit quod Filius Dei est ubique homo, vel aliquid simile, cum aliunde supponat humanitatem non esse ubique, tantum intelligitur, quod Filius Dei ubique est homo, id est suppositum sustentans humanitatem in suo loco specifico existentem; vel Filium Dei, qui est ubique, esse hominem, quia Filius Dei ubique est homo, cum falsum sit ipsum alicubi non esse hominem, juxta dicta, num. 2. ex Bellarmino: dum etiam in citatis textibus dicitur incarnationem ratione humanitatis esse in determinato loco, & ratione Deitatis esse ubique, accipitur *incarnatio* pro ipsomet Christo, vel pro Persona humano-divina; si tamen velis *incarnationem* sumi formaliter pro ipsa unione Verbi ad humanitatem, verificatur ipsam esse ubique ratione Verbi, quatenus Verbum ubique habet unionem, vel est unitum humanitati existenti in loco determinato, sicut anima rationalis in toto corpore existens, in toto corpore est unita capiti existenti in loco determinato, & non in toto loco totius corporis, prout etiam, num. 2. notavimus ex Bellarmino: unde in citatis locis idem dicit Lullus, quod D. August. *Serm. 14. de verbis Apostoli*, dicens: *Sedet in Cælo qui ambulat in terra: in Cælo erat; quia ubique Christus, idemque Christus & Filius Dei, & Filius hominis propter unitatem personæ in terra Filius Dei, propter eandem unitatem in Cælo Filius hominis; & lib. 12. de Gen. ad Litt. cap. 44. num. 66. ait: Non enim alicubi non est Christus, cum ipse sit sapientia Dei attingens ubique.*

VIII. Eadem Doctrina repetitur à Lullo in aliis Paragraphis, sicut & in plerisque quæstionibus de Incarnatione, & præcipue in quæst. 3. 5. & 7. singulariter etiam de hoc tractat in lib. *de Deo, & Jesu-Christo* (tom. 6.) par. 2. quæst. 8. *Ubi est Christus?* Nam num. 1. scribit: *Jesus in quantum Deus est in omni loco, & extra locum, cum Deus sit ens infinitum . . . sed in quantum est homo, est in loco, cum de conditionibus hominis sit, quod ipse sit in loco; num. 5. Quia Deus factus est homo, & Deus est infinitus, est Deus homo in omni loco, & extra locum, qui in quantum est homo, non est in omni loco, cum de conditione hominis sit, quod sit in loco determinatus & finitus; & in isto passu potest cognosci, quomodo Jesus homo, qui est in Cælo, sacramentaliter possit esse in multis Altaribus in uno tempore, & in Cælo, postquam Deus est homo in uno tempore & in multis locis; num. 7. Jesus in quantum est Deus non habet quantitatem, colorem & figuram, sed in quantum factus est homo habet quantitatem, colorem, & figuram, propter quæ convenit, quod sit in loco, cum sit de conditione illarum,*

quòd non possint esse sine loco : igitur Deus est in illo loco , in quo est homo , in quo homine ille habet quantitatem , colorem & figuram : Et similia repetit in aliis quæstionibus de Jesu-Christo.

IX. Similiter Lullus in *Arb. Scientiar. in Arb. Christian.* in ejus foliis , tit. *de loco Arb. Jesu-Christi* ita scribit : Dominus Jesus Christus in quantum est Deus , est in omni loco , & in quantum est homo , est in Cælo Empyreo , ut dictum est supra in *Arbore Apostolicali*. Et in quantum Deus est homo , est Deus in uno loco per hominem , & non in alio , ubi non sit ille homo ; & in quantum ille homo est Deus , est in omni loco per Deum ; & postea subdit , quòd si Sarraceni intelligerent modum Incarnationis , non dicerent quòd Christiani credant , quòd humanitas Christi sit in omni loco in quantum homo , si (homo) sit Deus , cum ita sit , quòd Deus sit in omni loco. Tandem in isto , & in aliis libris , in quibus tractat de Incarnatione , & Articulis pertinentibus ad Christi Incarnationem , dum de Christo concepto , nato , patiente , &c. agit , semper supponit ipsum quàm hominem , esse tantum in loco determinato , ubi videlicet conceptus , natus , patiens , &c. & præcipue in Articulo Ascensionis Christi docet , ipsum quàm hominem reliquisse terram , ubi erat , & ascendisse ad Cælum , ubi non erat , & ubi perenniter perseverat.

X. Ex hucusque dictis abundè constat mens Lulli clara , expressa , & operosè manifestata , videlicet quòd humanitas Christi , ac proinde ipsius corpus , quoad præsentiam naturalem , tantum est in loco specifico , & determinato , & nullatenus ubique. Quantum ad sacramentalem autem Christi præsentiam , super qua etiam *Secundò* exponendam suscepi Lulli sententiam , certum est , ipsum docere , Christum solum ibi esse sacramentaliter præsentem , ubi consecratur panis & vinum , vel ubi sunt species sacramentales , ac proinde constans est ex ipsius mente , corpus Christi non esse sacramentaliter ubique , ut colligi potest ex Dissertatione antecedente , præsertim §. 1. cui accedit , quòd ipse ubicumque agat de hoc Sacramento Eucharistiæ , semper repetit absolute Christum esse in multis locis sacramentaliter , nunquam autem dicit esse ubique : unde ad probationem expositæ sententiæ tantum afferam loca , in quibus præsentiam sacramentalem expresse restringit ad locum determinatum , quia ex hoc clarè deducitur , ipsum sentire , corpus Christi non esse ubique sacramentaliter ; & ut brevitati consulam , solum adducam Textus ex *Leit. Art. inv. & Tab. gener. dist. 3. p. 1. quæst. 5. de Sacram. Altaris* , ubi per decem quæstiones tractat de hoc Sacramento.

XI. Itaque ibi, quæst. 2. num. 2. dicit hoc Sacramentum esse, Christo existente in Cælo & in nobis, & carne existente in hostia, & consecrato sanguine, existente sanguine in calice, & in corpore, ita quod differentia loci ibi non potest contradicere. Eodem modo determinat corporis Christi præsentiam ad hostiam consecratam ibidem num. 5. quæst. 5. num. 14. 15. 16. 17. & 20. quæst. 6. num. 8. & 11. & aliis pluribus, ubi semper restringitur sacramentalis præsentia ad locum, ubi erant panis & vinum, quæ sunt consecrata; expressius autem quæst. 8. *Ubi est Sacramentum Altaris?* nam num. 2. ait: *Jesus Christus est in Cælo, & secundum Sacramentum Altaris est in terra in multis locis, secundum quod Sacramenta sunt multa per naturam loci, sed Sacramentum est unum, sicut unum corpus Christi; num. 5. Accidentia, quæ substantia panis dimittit tunc, quando transubstantiatur in corpus Christi, collocantur in elementalī potentiā. . . & in illa elementalī potentiā collocatur transubstantiata substantia, & ideo corpus Christi, quod est in Cælo, est collocatum in illa elementalī potentiā, quæ est in terra, ita quod corpus Christi non moveatur de Cælo; num. 9. & ista magnitudo æqualitatis existit in Sacramento Altaris in corpore Christi, quod est in Cælo, & in loco, qui est in terra, ubi fit Sacramentum.... per quam transubstantiatam substantiam Christus est ita magnus in terra, ubi fit hoc Sacramentum, sicut est in Cælo; & habet tantam concordantiam, & æqualitatem in illo loco, ubi fit Sacramentum, quantam habet in Cælo; & num. 10. Sacerdos principiat Sacramentum Altaris cum substantia panis & vini, pane existente in uno loco, & vino in alio, & per æqualitatem transubstantiationis panis in carnem, & vini, in sanguinem, existit hoc Sacramentum æqualiter principiatum in loco, ubi est corpus, & in loco, ubi est sanguis, licet corpus sit principiatum in uno loco, & in uno nunc, & sanguis in alio loco, & in alio nunc.*

XII. Tandem utrumque, scilicet, quod corpus Christi nec quoad præsentiam naturalem, nec quoad sacramentalem est ubique, sed tantum in loco determinato, declarat Lullus in lib. *Clericorum*, cap. 28. de *Sacram. Altaris*, ubi, num. 3. sic scribit: „Dei Filius totus fuit incarnatus, qui, cum sit infinitus, & ideo ubique simul „in Cælo, & in terra, oportet ipsum Deum hominem pariter „ubique esse in Cælo, & in terra; alioquin si quilibet esset Deus „tantum, & non Deus homo, non esset totus Filius Dei incarnatus (vide Bellarminum adductum num. 2.) „Attamen Christus, „qui in Cælo est, in quantum homo non est ubique, sed sacramentaliter est in Altari, & (naturaliter) in Cælo; quia Filius Dei non

„ magis ubique, quàm ubique homo (quatenus ubique est suppositum sustentans humanitatem, ut suam & propriam, ut ait Bellarminus adductus num. 2.) . Et ex hoc manifestus est modus, per quem fit ipsum Sacramentum, & quomodo non oportet, propter transubstantiationem panis in corpus Christi, quæ in Altari fit, Christum se de Cœlo demittere, aut ejus quantitatem per totum id spatium, quod est inter Cœlum & terram, extendi, aut per id spatium, in quo est Deus homo, nam prius quàm ipsa panis transubstantiatio fiat, Filius Dei homo est (quoad Personam, non quoad humanitatem) in Altari; & eadem est quantitas corporis Christi in Cœlo, & in Altari (peractâ transubstantiatione) sine magis & minus; & hoc per illam virtutem, per quam Deus est ubique homo, quia totus incarnatus: quare factâ transubstantiatione panis in carnem, non remanet quantitas panis in carne, quoniam jam ea est quanta per quantitatem, quam habet corpus Christi in Cœlo, & (tunc) in terra; Verumtamen in corruptione hostiæ consumitur Sacramentum, & non corrumpitur corpus Christi, quia est incorruptibile, sed sola hostia corrumpitur cum primis accidentibus, quæ non actu, sed potentiâ solum, remanserant in materia hostiæ (quatenus actu non inhærebant, sed tantum poterant inhærere, & dicebant habitudinem ad hujusmodi inhærentem) & fuerunt de potentia ad actum (inhærendi) reducta, cum primum fuit hostia tacta per corruptionem (& successit nova substantia, ut in antecedente Dissertatione est explicatum) tuncque ab hostia transit Sacramentum (desinit esse corpus Christi) eam dimittens.

XIII. Cum itaque B. Lullus adeo expressè & operosè explicaverit suum sensum in hac materia, nemini videtur posse esse dubium, mentem ipsius esse, quodd humanitas Christi, ac proinde ipsius corpus, non est ubique, nec secundum præsentiam naturalem, nec sacramentalem, sed secundum illam tantum esse nunc in Cœlo, secundum istam verò, ubi sunt species sacramentales. Præterea, cum expressè neget quodd Christus in quantum homo sit ubique, affirmet autem quodd quia Filius Dei est infinitus, ideo est ubique, & quia Filius Dei est homo, ideo est ubique homo, patens est, quodd quando dicit Christum hominem esse ubique, vel Christum esse ubique hominem, verè & propriè loquitur, quia in dictis propositionibus *homo* non accipitur pro natura, sed pro supposito sustentante humanitatem, & cum Filius Dei ubique sit suppositum sustentans humanitatem,

tem existentem in suo loco determinato, ideo Filius Dei verè dicitur esse ubique homo, & ubique habere unionem cum humanitate existente in suo loco, quin ex dictis propositionibus inferri possit humanitatem vel corpus Christi esse ubique.

§. II.

Adducitur Textus & Censura, prout à laudato Censore-exposita, & ostenditur Lullum non sentire cum Ubiquistis corpus Christi esse, ubique est natura divina, sed tantum corpus Christi posse esse ubique sacramentaliter.

XIV. Prælaudatus Censor sic Textum Lulli adducit & ejus Censuram: *Sacramentaliter corpus Christi potest esse simul in diversis locis, & hoc miraculosè, mediante tamen naturâ divinâ conjunctâ corpori Christi, quæ est ubique; quoniam ratione unionis amborum naturarum in uno supposito Christo, Deus facere potest, quòd corpus Christi possit simul esse ubique sacramentaliter, existente corpore Christi præsensualiter, potèntialiter & essentialiter ubicumque Deus est potentialiter, præsentialiter, & essentialiter Christus-homo; & ideo Eremita, exemplum quoddam de vino & de duabus amphoris, non valet, sed valeret, si Christus non esset Deus, nec Deus esset ubique homo-Christus. Quæst. 128. Sentent.*

Censura: Ex quibus verbis colligimus duo: primum est, Lullum sensisse cum Ubiquistis corpus Christi esse ubicumque est natura divina. Alterum est, corpus puri hominis non posse esse in duobus locis, miraculosè quidem & sacramentaliter, quia non habet naturam divinam unitam.

XV. Sanè, cum adeo aperta ex prædictis sit mens Lulli, quòd corpus Christi tam quoad præsentiam naturalem, quàm sacramentalem, nullò modò est ubique, sed tantum in loco determinato; clamat ratio, & expostulat æquitas, ut sicubi in modo loquendi videatur opponi, exponatur benignè, & intelligatur juxta ejus fixam Sententiam, & propatule manifestatam. At nec hujusmodi interpretatione est opus, si attendatur sincerè ipse textus purè prout à laudato Censore adductus; nam hic textus in quæstione, quâ simul cum antecedentibus, & consequentibus agitur de Eucharistia, est responsio ad objectionem, quâ prætenditur esse impossibile, quòd corpus Christi miraculosè possit esse sacramentaliter in multis locis, in qui-

bus asseruerat, & probaverat esse Lullus in resolutione quæstionis : atque ita sensus obuius prædicti textûs est solum, quodd Christi corpus sacramentaliter potest esse in multis locis ratione unionis naturæ divinæ & humanæ in uno supposito ; & insuper addere, quodd ratione ejusdem unionis Deus facere potest, quodd corpus Christi simul possit esse ubique sacramentaliter : unde planum est, quodd obuius sensus allegati textûs est, quodd corpus Christi *de facto est in multis locis sacramentaliter, & quod potest simul esse ubique sacramentaliter* ; non autem quodd *de facto sit ubique*, nec absolute, nec sacramentaliter ; ac proinde sincerè expendenti allegatum textum nullum apparet solidum fundamentum asserendi, ut opponit laudatus Censor, *Lullum sensisse cum Ubiquistis corpus Christi esse ubicumque est natura divina.*

XVI. Quodd autem corpus Christi possit simul esse ubique sacramentaliter, habetur tamquam certa, & vera sententia, si non ab omnibus, à plerisque saltem Doctoribus catholicis. Audiatur Vener. Bellarmin. locò citatò, lib. 3. *de Incarnat.* cap. 11. ubi manifestans ex scriptura humanitatem Christi non esse ubique, quia ubiquitas in scriptura attribuitur Deo tamquam propria & distinctiva, adeo ut multi Patres, ex illo Sapient. 1. *Spiritus Domini replevit orbem terrarum*, manifestent Spiritum Sanctum esse Deum : sibi proponit hoc argumentum : „ Dices : Nonne corpus Christi, ut est in tot locis „ simul sacramentaliter, posset etiam esse in toto mundo ? Nonne „ posset Deus totum mundum convertere in panem, & panem illum „ in corpus suum ? Et tamen non propterea corpus Christi posset „ esse Deus „. Ad hanc autem objectionem sic occurrit Bellarminus : „ Respondeo, potest quidem id fieri, sed hoc non est esse ubique, „ quò modò est Deus, & quò modò Brentiani intelligunt de corpore „ Christi. Nam Deus ita est in toto mundo, ut non contineatur „ mundò, sed sit tantæ immensitatis, ut possit replere infinitos mundos : id quod corpori Christi, quod est finitum, minimè tribuimus. Deinde quidquid sit de eo, quod potest, aut non potest „ fieri, satis nobis est reipsa id non esse communicatum nec communicandum ulli creaturæ, ut sit ubique, & ideo inde evidenter „ probari Spiritum Sanctum esse Deum „. Hæc Bellarmini doctrinam statuitur quod Lullus dicit in allegato textu, sed etiam satisficit tacitis objectionibus, quæ innuuntur ex laudati Censoris illatione contra Lullum, ut infra videbimus.

XVII. D. Bonaventura, in 4. dist. 10. q. 3. eandem Sententiam quoad substantiam amplectitur, nam sibi proposuit hoc argumentò :

„ Item, si Christus in Sacramento potest esse in pluribus locis, esto,
 „ quòd tantum tria loca sint, in illis possibile est esse corpus Christi:
 „ ergo possibile est esse ubique; sed hoc, cum sit solius Dei, im-
 „ possibile est alteri convenire: ergo, &c. „: adducit hanc respon-
 sionem: „ Ad illud patet responsio, quia non in omnibus potest esse
 „ conversio, quia Sacerdos non haberet locum, ad cuius ministe-
 „ rium fit. Positò autem per impossibile, quòd tantum essent tria
 „ loca, tunc dicendum, quòd esset ubique, sed non sicut Deus,
 „ quia Deus est ubique, propter suam immensitatem; unde nulli po-
 „ test abesse, sed corpus Christi esset ubique propter locorum pau-
 „ citatem. Sanè quoad substantiam idem docet Bonaventura, ac
 Lullus, & absolute possibile agnoscit corpus Christi esse ubique per
 divinam potentiam, quamvis illud restringat ad casum de tribus tan-
 tum locis in rerum natura existentibus; & Lullus, quin modum &
 circumstantias determinet, tenet Deum posse facere, quòd Christi
 corpus simul possit esse ubique sacramentaliter; quòd quidem ex
 paritate rationis videntur omnes debere dicere, quia eadem ratio,
 quæ corpus Christi asseritur posse esse sacramentaliter in multis locis,
 convincit posse esse sacramentaliter in omnibus.

XVIII. Hoc maximè habet locum apud illos, qui tenent, quod-
 cumque corpus posse supernaturaliter bilocari: si enim idem corpus
 potest supernaturaliter bilocari, eadem ratione potest ubique locari,
 & consequenter etiam corpus Christi potest ubique sacramentaliter
 esse. Quòd autem idem corpus possit supernaturaliter ubique locari
 expressè fatetur eximius Suarez, *Tom. 3. in 3. part. Disput. 48. sec. 4.*
 ubi pro solutione ad argumentum. D. Thomæ probans, idem corpus
 non posse esse in duobus locis circumscriptivè, quia, si ita posset
 esse, etiam posset esse ubique, scribit: „ Respondeo igitur, rectè
 „ posse facere Deum, ut idem corpus sit præsens extenso, vel
 „ inextenso modò, omnibus rebus & spatiis creatis, & cuicumque
 „ loco majori & majori, etiam si in infinitum assignetur: nego tamen
 „ inde sequi creaturam esse immensam, &c. „ Tosca, in *Compend.*
Philos. tom. 3. trac. 3. cap. 2. proposit. 23. objec. 5. ad argumen-
 tum ex bilocatione ejusdem corporis inferens posse etiam esse ubi-
 que, respondet: „ Nego itaque sequelam, quia, ut dixi in meta-
 „ physica, repugnat infinitum in actu; ideoque repugnat ex hoc
 „ capite corpus esse ubique, licèt possit divinitus esse in pluribus
 „ semper, & pluribus locis in infinitum. Quid? Quod si corpus
 „ posset ubique poni, adhuc non sequitur esse immensum, immen-
 „ sitate

„finitate scilicet independenti & essentiali, quæ propria est Dei, sed
„tantum immensitate participatâ, & à Deo dependenti „. Ex hoc
apparet, quod Tolca eam negat in eodem corpore possibilem ubi-
quitatem, quæ idem est ac existentia in locis actu infinitis, quæ ex
ipso esse non possunt; non autem negat ubiquitatem in eodem cor-
pore possibilem, sumptam pro existentia in omnibus locis actu exis-
tentibus, immò etiam & pluribus & pluribus in infinitum: quod
est concedere possibilem ubiquitatem ejusdem corporis in sensu, quò
hic agitur de ubiquitate. Scribonius in Sum. totius Theologicæ verit.
in Theosimia, disp. 5. de Euchar. cap. 11. objectione ultimâ, planè
fatetur posse corpus Christi esse ubique.

XIX. Itaque sententia, quam hîc docet Lullus, videlicet, corpus
Christi posse simul esse ubique sacramentaliter per Dei potentiam,
nullâ est notâ inurenda, & hanc constat tantum docere, exami-
natò textu, prout à laudato Censore allegato; non autem corpus
Christi esse ubicumque est natura divina conformiter ad Ubiquitas:
quod ampliùs est manifestum, inspecto toto contextu, & collato
cum antecedentibus & subsequentibus, & cum aliis libris ejusdem
Lulli. Pro quo notandum est, Lullum in citato libro *Sentent.* à quæst.
125. per sex earum agere de Sacramento Altaris, & postquam in
antecedentibus ostendit dictum Sacramentum, nedum esse possibile,
sed etiam debere esse, & de factò existere in multis locis per tran-
substantiationem panis in corpus, & vini in sanguinem Christi, fac-
tam in ultimo instanti, quo proferuntur verba consecrationis, oc-
casione objectionis, quæ solet fieri super repugnantia quòd idem
corpus sit in diversis locis, proponit quæst. 128. in qua quæritur:
*Utrum Deus possit facere, quòd unum & idem corpus simul sit in di-
versis locis localiter*, ex hujus quæstionis propositione videtur, prin-
cipale intentum ejus tantum esse de simultanea præsentia circumscrip-
tivâ ejusdem corporis in diversis locis: quod quidem extraneum
videtur ab hoc Sacramento, in quo non adstruitur multiplex simulta-
nea præsentia circumscriptiva; nisi quatenus ex negata multiplici
simultanea præsentia circumscriptiva posset argui, ut faciunt Hæretici,
contra multiplicem præsentiam simultaneam corporis Christi, natu-
ralem scilicet in Cœlo, & sacramentalem in Eucharistia.

XX. Ad propositæ quæstionis solutionem Lullus, num. 1. expo-
sito duplici modo agendi in Deo, videlicet naturaliter, & miracu-
losè, resolvit, *quòd Deus naturaliter non potest facere, quòd idem
corpus simul & semel sit in diversis locis (localiter seu circumscriptivè)*

quia sequeretur contradictio. At num. 2. sic objicit Eremita : “ Sicut
 „ Deus non potest facere , quòd idem corpus simul & semel fit in
 „ diversis locis naturaliter , ita non potest facere , quòd fit in diver-
 „ sis locis simul & semel , nec miraculosè , sive supra naturam ; quia
 „ si posset , vinum , quòd est in amphora plena , posset in eodem
 „ instanti esse in alia amphora , quæ est vacua , quod est impossibile ,
 „ quia sequeretur contradictio , scilicet quod eadem amphora esse
 „ plena vino , & non plena : à simili dico tibi , quòd idem corpus si-
 „ mul & semel non possit esse in diversis locis *localiter* , nec natura-
 „ liter , nec miraculosè. „ Hic observari debet , quòd argumentum
 directè tantum tendit contra multiplicem existentiam in loco *localiter* ,
 seu circumscriptivè , & solum indirectè contra præsentiam sacramen-
 talem , quatenus ex illius negatione arguitur hujus negatio , vel qua-
 tenus in argumenti propositione generaliter dicitur , Deum non
 posse facere , quòd idem corpus simul & semel fit in diversis locis ,
 nec *miraculosè sive supra naturam* : cujusmodi generalis negatio com-
 prehendit etiam modum essendi sacramentaliter , quia hoc fit mira-
 culosè.

Text.
 prop. 20.

XXI. Ad hoc argumentum Lullus , num. 3. sic respondet : “ con-
 „ cedo tibi quòd Deus , nec naturaliter , nec supra naturam possit
 „ facere , quòd idem corpus fit in diversis locis *localiter*. „ Hæc res-
 ponsio attinet ad directum argumenti scopum , qui solum tendebat
 contra multiplicem præsentiam circumscriptivam ; quoad indirectum
 verò argumenti scopum sic subjungit immediatè : *Sed sacramentaliter*
corpus Christi potest simul & semel esse in diversis locis , & hoc miracu-
losè , tamen mediante divinâ natura (modo explicando , num. 28. &
 sequentibus) *conjunctâ corpori Christi , quæ est ubique ; quia ratione*
unionis ambarum naturarum in uno supposito Christo , Deus potest facere
quòd corpus Christi simul & semel possit esse ubique sacramentaliter , exis-
te corpore Christi præsentialiter , potentialiter , & essentialiter ubicum-
que Deus est potentialiter , præsentialiter & essentialiter Christus homo :
Et ideo , Eremita , exemplum quod das de vino & de duabus amphoris ,
non valet , sed valeret , si Christus homo non esset Deus , nec Deus esset
ubique homo Christus. In hac responsione , ex obvio verborum sensu
 est manifestum , quòd Lullus ad indirectum argumenti scopum con-
 tra sacramentalem Christi præsentiam in diversis locis , ubi videlicet
 est facta consecratio panis & vini , quam statuerat in antecedentibus
 quæstionibus , respondet , quòd corpus Christi potest simul esse in di-
 versis locis sacramentaliter , mediante naturâ divinâ conjuncta cor-

pori Christi, atque ita non repugnat quod in antecedentibus quaestionibus statuerat, videlicet quod corpus Christi est de facto sacramentaliter in *diversis locis* tantum, quia solum de diversis locis actum fuerat; adeo verò abest ab assertione, quod corpus Christi sit de facto ubicumque est natura divina, quod nullum hujusmodi sit vestigium, nec ejus facta est ulla mentio in argumento.

XXII. Postea ad majorem abundantiam, & potiore ostensionem praefatae possibilitatis essendi sacramentaliter in diversis locis, subdit quod ratione unionis divinae & humanae naturae in uno supposito Christo, *Deus potest facere, quod corpus Christi simul & semel possit esse ubique sacramentaliter, existente corpore Christi* (id est ita ut corpus Christi existat) *praesentialiter, potentialiter, & essentialiter ubicumque Deus est potentialiter, praesentialiter, & essentialiter Christus homo*. Profectò ex obvio sensu praedictorum verborum tantum potest intelligi, quod corpus Christi potest esse ubique sacramentaliter, non autem quod de facto sit ubique, nec sacramentaliter, nec alio modo, qui opponitur; & in toto aliarum quaestionum contextu supponitur corpus Christi tantum esse praesentia naturali in Coelo, sacramentaliter verò tantum esse in diversis locis; atque adeo nullum est fundamentum eidem attribuendi sententiam de ubiuitate actuali corporis Christi.

XXIII. Sanè non puto, laudatum Censorem adeo oscitanter Lulli textum attendisse; ut dictam sententiam Lullo attribuerit ex illa citati textus dimidiata clausula: *existente corpore Christi praesentialiter, potentialiter, & essentialiter ubicumque Deus est, &c.* eam sumens ut clausulam perfectam, & in sensu absoluto, ita ut asserat, vel supponat, quod corpus Christi existit de facto ubicumque est Deus: non inquam puto dictum Censorem adeò crassâ minervâ, & modo à sinceritate alieno, construxisse textum; nam apertè constat dictam clausulam esse dimidiatam & referri ad antecedentem, utpote explicat modum, quo corpus Christi potest esse ubique sacramentaliter; & sensus est, quod ratione unionis naturae divinae & humanae in uno supposito Christo, Deus facere potest, quod corpus Christi sit ubique sacramentaliter, ita ut sacramentaliter existat praesentialiter, potentialiter, & essentialiter ubicumque est Deus homo; scilicet Deus potest facere corpus Christi esse ubique sacramentaliter, quatenus potest facere quod existat praesentialiter, potentialiter, & essentialiter ubicumque est Deus homo: atque adeo non asseritur vel supponitur in dicta clausula, quod corpus Christi existat de facto ubi-

cumque est Deus homo, sed tantum dicitur, quod potest existere ubicumque sacramentaliter; & ut sit sacramentaliter, debet esse præsentialiter, potentialiter, & essentialiter, ut exponit ipse Lullus, q. 126. num. 3. dicens, Christum in hoc Sacramento *participare nobiscum per præsentiam, potentiam, & essentiam*; & consequenter tantum intelligit in allegato textu, quod corpus Christi potest sacramentaliter existere præsentialiter, potentialiter, & essentialiter ubicumque Deus est Christus homo.

XXIV. Non solum autem Lullus doctrinam eidem attributam non tenet expressè in textu notato, nec in aliis ejusdem Libri, quin potius oppositum eruitur ex aliis quæstionibus, & præcipue ex hac eadem q. 128. & ejusdem resolutione; nam in ea resolvitur, quod adhuc miraculose idem corpus non potest esse localiter seu circumscriptive in diversis locis; si autem corpus Christi ratione unionis cum divina natura esset ubique, sicut natura divina, esset ubique eo modo, quo est unitum eidem; & cum sit eidem unitum secundum suam naturalem præsentiam circumscriptivam, quâ prius fuit in mundo, & nunc est in Cœlo, esset ubique circumscriptive, quod est contra Lulli resolutionem in hac eadem quæstione; & stultè probasset ipse, & quidem non parvo apparatû, articulos humanitatis Christi, præcipue Ascensionem ad Cœlos, cum ibi, supposita dicta doctrina, jam esset Christus quoad corpus & ejus naturalem præsentiam, à puncto suæ conceptionis. Deinde quæst. 94. explicans speciales modos, quibus Deus per unionem hypostaticam in assumpta humanitate existit differenter ac in aliis creaturis, num. 3. dicit: *Præterea Deus in quantum est incarnatus, est factus creatura, & est positus in tempore, & in loco, quantitate, & figura sine quibus creatura non potest esse*; & q. 95. num. 3. ait, quod *iste locus inferior non spectat ad corpus glorificatum (Christi) sed Cœlum*; & propterea in Cœlum ascendit: Unde, cum ex ipso creaturæ corporali correspondeat locus determinatus, sicut eidem correspondet quantitas, & figura determinata, non omnia loca, sed locus determinatus convenit corpori Christi, ut Deus per unionem cum ipso sit positus in loco determinato, sicut in quantitate & figura determinata; nec eidem glorificato corpori conveniret Cœlum præ isto loco inferiori, ut illuc porteret ascendere, si ubique esse eidem competeret.

XXV. Præterea ex doctrina ejusdem Lulli in hoc eodem libro repugnat corpori Christi esse, ubicumque est natura divina in sensu Ubiquistarum; quia isti omnes, ex num. 1. asserabant immensitatem,

quæ pro eodem ab ipsis accipitur ac ubiquitas, omnipotentiam, infinitatem, & alias Dei proprias perfectiones formaliter convenire humanitati; Lullus autem in toto hoc libro sæpè resolvit dictas perfectiones, adhuc de potentia Dei, non posse convenire creaturæ; nam quæst. 93. num. 3. resolvit & probat, nullam creaturam posse esse Deo æqualem, simpliciter vel secundum quid in aliqua perfectione, juxta quod, quæst. 32. probat mundum non potuisse esse æternum; q. 35. probat repugnare extra Deum magnitudinem infinitam; & q. 39. probat creaturæ non posse communicari potentiam creandi; cum autem ex apertissima Lulli sententia omnes Dei perfectiones sint omnino æquales, æqualiter repugnat communicari creaturæ immensitatem, prout etiam expressè docet q. 94. n. 3. expressius autem de his loquitur, q. 110. ubi, n. 2. sibi proponit argumentum intendens quodd, *quia Verbum factum est homo, appropriatum est homini quodd sit Deus, & per consequens, quodd suum intelligere & cognoscere sit infinitum*, atq; ita quodd anima Christi infinite cognoscât: ad quodd num. 3. respondet. „ Aliud est unire, & aliud appropriare, sicut in homine, in quo anima „ & corpus se uniant, sed essentiam, quam habent, sibi invicem non „ appropriant; sic corpus non appropriat animæ quodd bibat, nec anima „ appropriat corpori quodd intelligat: à simili Deitas in Christo non appropriat humanitati quodd spiret S. Spiritum, nec quodd creet animas, nec humanitas appropriat Deitati, quodd habeat colorem, & „ figuram: à simili dico tibi de infinitate & finitate, scilicet quodd „ unum se non possit appropriare alteri. „ Ex hac responsione est manifestum, quodd ex mente Lulli perfectiones divinæ non possunt appropriari creaturæ, & in casu præsentis, quodd per unionem humanitatis ad Verbum, humanitati non appropriantur propriæ Dei perfectiones, ut infinitas, immensitas, & reliquæ, ac proinde mens Lulli expressè repugnat sensui Ubiquistarum, super formali communicatione immensitatis, infinitatis, omnipotentiae, &c. facta eidem humanitati ex vi unionis hypostaticæ; & est manifestum, juxta ipsum, communicationem idiomatum non esse, quoad naturas in abstracto, sed tantum in concreto, & quoad suppositum.

XXVI. Ex his etiam cognoscere licet, quodd, dum Lullus in textu notato dicit, quodd Deus facere potest, quodd Corpus Christi simul & semel possit esse ubique sacramentaliter, existendo sub Sacramento præsentialiter, potentialiter, & essentialiter ubicumque Deus est præsentialiter, potentialiter, & essentialiter Christus homo: non intelligit posse esse sacramentaliter ubique. Sicut natura divina,

prout asserere Ubiquistæ de humanitate Christi videlicet per formalem communicationem immensitatis ; quia , ut vidimus ex mente Lulli , repugnat creaturæ communicari formaliter immensitatem aliasque Dei proprias perfectiones. Deinde immensitas naturæ divinæ non stat in esse tantum in omnibus locis ; sed etiam in existere extra locum , ita ut nullibi contineatur , sed in seipso Deus fit extra omnem locum , & ex se possit esse in infinitis locis , si forent possible ; de corpore autem Christi non dicit Lullus hoc posse habere sacramentaliter , sed tantum quod possit esse ubique sacramentaliter , id est , in omnibus locis , quæ reverà sunt loca , non autem extra omnem locum ; & ubicumque Deus est Christus homo , id est , in omni loco , in quo Deus est Christus homo ; non autem extra locum , cum etiam extra locum Deus fit Christus homo ; suppositum videlicet sustentans humanitatem in suo loco determinato existentem. Hoc patet in eadem q. 128. in qua tantum fit sermo de loco corporali , & in ejusmodi diversis locis statuitur posse esse corpus Christi , ac proinde , dum superadditur , ipsum posse esse simul & semel ubique sacramentaliter , tantum intelligitur posse esse sacramentaliter in omnibus locis corporalibus , non autem de ubiquitate sumptâ pro immensitate.

XXVII. Constat itaque laudatum Censorem immeritò attribueret Lullo , ipsum *sensisse* , cum Ubiquistis , *corpus Christi esse ubicumque est natura divina* ; nec dicas ipsum hoc attribueret Lullo , non tanquam expressam ejus sententiam , sed tanquam consequentiam , quam ex ejus infert doctrinâ ; nam injustissimum est , ut sæpè repetit clarissimus Berti Augustinianus in suis vindiciis , Autori Catholico inurere notam , ob consequentias , quas ex ejus quis infert doctrinâ , dum tamen ipse consequentias neget ; & aliunde est evidens ex hucusque dictis , Lullum negare ubiquitatem humanitati Christi , nedum in aliis libris , sed in hoc ipso eodem libro , quem totum examinavit laudatus Censor. Licet quidem Autori Catholico , arguendi & impugnandi gratiâ , opponere sequi ex ejus doctrina erroneas consequentias , non tamen licet asserere ipsum tenere dictas erroneas consequentias , quas quilibet pro suo captu infert , quas tamen ipse negat. Deinde laudatus Censor non habuit fundamentum in nostro textu Lulli ad inferendum rationabiliter ubiquitatem corporis Christi ; & *Primò* quidem quoad consensum cum Ubiquistis jam est ostensum supra , Lullum non admittere , immò impossibilem tenere communicationem formalem perfectionum Dei factam humanitati Christi ,

ac proinde cum ipsis non potuit sentire, immensitatem fuisse communicatam corpori Christi, consequenter ad unionem hypostaticam, & sic ipsum esse ubicumque est natura divina.

XXVIII. *Secundò*, non potuit inferri dicta consequentia ex eo quòd dicat Lullus in citato textu, corpus Christi posse esse sacramentaliter & miraculosè in diversis locis, *mediate divinà naturā conjunctā corpori Christi*, quæ est ubique; si enim Lullus diceret corpus Christi esse in diversis locis ratione dictæ unionis, ita ut unio esset formalis ratio actû essendi in diversis locis, cùm divina natura sit ubique, rectè inferretur corpus Christi etiam esse actû ubique; at non dicit Lullus dictam unionem esse rationem formalem actû essendi in diversis locis, sed tantùm posse esse in diversis locis mediante divinà naturā unitā; atque ita nullò modò infertur corpus Christi actû esse, ubique est natura divina, sed tantùm posse esse ubique, & quidem sacramentaliter, ut subjungit Lullus ibidem, dicens: *Quia ratione unionis ambarum naturarum in uno supposito Christo, Deus potest facere quòd corpus Christi simul & semel possit esse ubique sacramentaliter*: Unde ex hoc dicto textu tantùm constat, quòd unio corporis Christi cum divina natura, quæ est ubique, est ratio, cur corpus Christi possit esse in diversis locis, & ubique sacramentaliter, non autem quòd actu sit in uno vel in pluribus, in paucis vel multis locis, quia hoc pendet ab alio principio, nempe à voluntate & institutione Dei, qui ratione dictæ unionis potest corpus Christi ponere ubicumque velit, & propterea in textu dicitur quòd ratione dictæ unionis, hoc *Deus potest facere*: atque ita præfata unio est ratio remota & præsuppositiva, non autem proxima & formalis, cur de facto corpus Christi sit in diversis locis, ac proinde, licèt natura divina unita dicto corpori sit ubique, non rectè infertur, dictum corpus esse ubique. Deinde, ut §. 3. ostendemus non solus Lullus, sed etiam D. Thomas D. Bonav. & alii plures PP. tenent corpus Christi posse esse in diversis locis ratione unionis hypostaticæ; & tamen non tenent esse ubique, nec puto laudatum Censorem ausum fuisse ipsis attribuere, quòd sentiant corpus Christi esse ubique est natura divina, conformiter ad Ubiquistas.

XXIX. *Tertiò* tandem non debuit inferre laudatus Censor præfata consequentiam ex eo, quòd Lullus in adducto textu, num. 21. dicat, quòd *Deus est ubique homo Christus*, hæc enim propositio, juxta Bellarminum adductum, num. 2. est verissima, nihil enim aliud sonat, quàm quòd Deus ubique est suppositum sustentans humanitatem suo locò existentem, nunquam enim est verum ex dicto

Bellarmino, sensum communem Theologorum exponente; *Verbum alicubi non esse hominem*, quod idem est ac, *Deum alicubi non esse hominem*, vel *Deum alicubi non esse Christum*; & consequenter verum est, Deum ubique esse hominem, quæ est ejus contradictoria, cum sensus sit: Deus, qui est ubique, est homo, vel Deus ubique, est suppositum humanitatis, vel sustentans humanitatem suo loco existentem; qui est sensus in dicto textu à Lullo intentus, nam, quia ambæ naturæ sunt unitæ in uno supposito Christo, asserit veras istas propositiones: *Christus homo est Deus*, *Deus est homo Christus*, & quia Deus est ubique, dicit quod Deus ubique est homo Christus, & consequenter solum intendit quod Deus ubique est suppositum humanitatis, vel sustentans humanitatem suo loco existentem: verum quidem est, dictam propositionem esse falsam, ut docet Bellarminus, si *ly ubique* afficiat hominem, ita ut significet humanitatem ubique existere; at in dicto textu nulum est indicium hujusmodi significationis, cum expressè denotetur significare Deum ubique esse suppositum humanum, non autem ubique habere secum unitam, & ubique existentem humanitatem; cum etiam aliunde ex hoc eodem libro & aliis supra adductis aperte constet, ipsum sentire humanitatem Christi non esse ubique.

XXX. Resumendo igitur prædicta, videtur aperte constare, Lullum tum in præsentī libro *Quæstion. super Mag. Sentent.* tum in aliis, tenere Catholicum omnium sensum, videlicet, quod humanitas Christi non est ubique, sed tantum in determinato loco; & quoad præsentiam sacramentalem, quod corpus Christi simul est tantum in diversis locis, & quod etiam per Dei potentiam potest esse ubique sacramentaliter, in omnibus videlicet locis corporalibus, non autem ubique sicut Deus; quia immensitas Dei non potest eidem communicari. Docet etiam quod Persona, quæ est Christus homo, cum sit Deus, & Deus sit ubique, est ubique, & sic Christus homo est ubique, & Deus ubique est Christus homo, quia eadem Persona, quæ est homo, est ubique, & hæc eadem Persona ubique est suppositum humanitatis, sustentans eam existentem in loco determinato, quem tantum docet eidem competere; ac proinde in omnibus concordat cum Catholicis Doctoribus; cum autem adeo aperte doceat, & teneat ex professo, quod Christi humanitas non est ubique, sed tantum in suo loco determinato, si alicubi modus loquendi ejus videretur, primâ facie, dissonare, æquitas postulat, ut intelligatur juxta Catholicum sensum ab ipso toties & adeo patenter expositum.

§. III.

Ostenditur malè attribui Lullo absolutè, quòd corpus puri hominis non possit esse miraculosè in duobus locis sacramentaliter.

XXXI. In secunda parte relatæ Censuræ, num. 14. alterum quod Lullo attribuit sentire præfatus Cenfor, est, *corpus puri hominis non posse esse in duobus locis, miraculosè quidem & sacramentaliter, quia non habet naturam divinam unitam*: quod quidem fundat in assertione Lulli in Textu adducto, num. 21. videlicet quòd *sacramentaliter corpus Christi potest simul & semel esse in diversis locis, & hoc miraculosè, iamen mediante divinâ naturâ conjunctâ corpori Christi*. Hanc sententiam tenet Lullus, non solum in hoc Textu, sed etiam in aliis adductis, num. 4. 8. & 12. & eandem repetit in *Leçt. Art. inven. & Tab. gen. dist. 3. par. 1. quæst. 5. in ejus quæst. 8. num. 8. & 10.* At notandum est non esse solum Lulum in hujusmodi assertione, sed etiam eam tenere plures Patres, ut D. Gregorius adductus Dissertat. antecedenti, num. 75. S. Remigius Rhemensis, num. 74. & alii ibidem citati, sicut etiam alii, qui Eucharistiam explicant ad modum Incarnationis, quia omnes insinuant quod ratio, quare caro & sanguis, qui sunt in Eucharistia, licet hæc variis locis conficiatur & temporibus, est eadem caro & sanguis Christi, quam assumpsit ex Virgine, & quæ est in Coelo, est unio cum natura divina, quæ facit eandem esse, & eandem esse in diversis locis.

XXXII. Expressius hoc docet D. Bonavent. in *Compend. Theolog. verit. lib. 6. cap. 14. de mirabilibus quæ sunt in Eucharistia*, ubi ita scribit: *Nota quòd Deo convenit esse ubique simpliciter & propriè; creaturæ convenit esse in uno loco tantum; corpus verò Christi medio modo se habet, cum enim sit quoad humanitatem creatura, non debet æquari Creatori in hoc, quòd sit ubique; cum verò sit unitum Deitati, debet in hoc excellere alia corpora, ut simul & semel possit esse in pluribus locis, sub isto videlicet Sacramento*. Hunc librum Cardin. Cienfuegos, lib. de *Vita abscondita*, disp. 2. sect. 6. §. 3. num. 127. attribuit D. Bonaventuræ, & gravibus quidem fundamentis id ipsum faciunt plures Franciscani; Seraphinus tamen Caponi à Porrecta Dominicanus eum vindicare conatur B. Alberto Magno, desumptis argumentis, non quidem ex originalibus, sed ex tribus tantum antiquioribus impressionibus, in editione Veneta anni 1597. quâ utor. Eadem quoque

sententia habetur in eodem Tractatu, lib. 1. cap. 17. *de incircumscriptibilitate Dei*, ubi sic scribitur: *Corpus autem Christi, licet non sit ubique, cum corpus sit creatura, nec æquari possit in huiusmodi Creatori, in pluribus tamen locis est totum sub diversis hostiis, & hoc est propter unionem carnis ad Verbum; unde merito habet amplius quam alia creatura, scilicet quod in locis pluribus simul & semel possit esse. Ex prædictis patet, quod esse ubique simpliciter soli convenit Creatori; sed in loco uno esse, soli convenit creaturæ; in pluribus verò locis esse, sed non ubique, convenit corpori Jesu-Christi.* Profectò eadem sententia scribitur à D. Bonavent., quæ à Beato Lullo, ac si iste eam ex illo excripserit.

XXXIII. Pro eadem sententia citat Cienfuëgos ibidem Innocent. III. & eundem Bonav. in 4. dist. 10. ar. 1. quæst. 1. ad 2. ubi explicans congruitatem Sacramenti Eucharistiæ, ita scribit: *Congruum ergo fuit, ut haberent (viatores) exterius connectens, sicut habebant unum interius, sed illud unum debuit esse ubi erant membra; & ita, cum in multis locis sint membra, debuit tale esse, quod congrueret esse in multis, sed hoc non est nisi Deus, vel Divinitati unitum; sed quod est interius divinitati unitum, est corpus Christi: ergo corpus Christi debuit dari in Sacramento exteriori, quod est unum, in quo omnes fideles ununtur in manducando unam & eandem escam. Congruebat etiam, ut haberent exterius reficiens in hoc Sacramento, sed reficiens animam non est nisi Deus, vel Deo unitum, & hoc est corpus Christi verum.* Similia docet Bonaventura ibidem, quæst. 3. ex Innocentio: ex quibus aperte videtur, mentem ipsius esse, quod unio corporis Christi cum divinitate est ratio, cur ipsum corpus in diversis locis possit sacramentaliter replicari, prout etiam ita intelligit citatus Cienfuegos.

XXXIV. D. Thomas ab eodem Cardinali citatus ejusdem est Sententiæ, nam Opusc. 59. cap. 7. ait: *Filius ergo Dei, in quantum purus (id est perfectus, ut mihi videtur) est homo & verus Deus, est ubique sine dubio; in quantum est caro, est solum in uno loco; sed in quantum est Deus & homo tenet medium locum utriusque, esse scilicet in pluribus locis.... Licet ipsum corpus Christi, quantum est de se, sit in uno loco tantum secundum naturam corporalem, tamen quia panis, qui convertitur, est in locis pluribus, ideo necessario sequitur, quod ipsum corpus sit in pluribus locis, & non per sui mutationem, sed per alterius conversionem in ipsum: & ubicumque est iste panis sic conversus substantificatur in ipsam, & ab ipsa Persona Filii Dei, & quantum ad hoc habet quamdam similitudinem speciei, quæ verè est in omnibus suis in-*

dividuis ubicumque sit. Ipsum autem corpus sua naturâ restringitur ad unum locum, particularem : per unionem, quam habet cum divinitate, dilatatur quodammodo & extenditur quasi ad quemdam modum universalem, ut sit ubicumque suum individuum reperitur. Præterea, Opusc 58. cap. 13. sic scribit : Secundò, probatur hoc per manifestam rationem, quæ est, quòd Filius Hominis participat potentiam Filii Dei propter Personæ unitatem. Ambrosius : sicut in unam Personam, ita in unam potentiam conveniunt Dei & Hominis Filius. Unde, sicut Dei Filius est essentialiter in omnibus rebus, ita dedit Filio Hominis, ut corpus ejus sacramentaliter esse possit in pluribus locis.... Et est hujus mirabilis rei (Quòd scilicet integer sit in multis locis) ratio, ineffabilis unio Hominis & Verbi : unde, sicut Verbum Dei ubique est, & totum replet cælum & mundum, manens indivisum, sic dedit corpori, quod assumpsit de Virgine, & dedit Apostolis ; Divinitas enim, quæ ubique est, replet illud & conjungit & facit, ut sicut ipsa una est, ita veritas corporis Christi unum corpus sit in veritate.

XXXV. His Doctoribus præcessit Guillelmus ex Abbate S. Theodori Monachus Cisterciensis D. Bernardo familiarissimus, eique ob virtutem & sapientiam valde commendatus ; cujus tantum aliqua verba refert Cienfuegos loco citatò ; nactus tamen ejus librum *de Sacram. Altaris* D. Anselmo attributum in ejus operum editione Colonienfi anno 1612, cum tamen absque dubio sit prædicti Guillelmi, ut advertit Gerberonius Benedictinus in editione Parisiensi operum S. Anselmi, & evincitur in Bibliotheca Cisterciensi, ubi iste cum aliis dicti Guillelmi libris editur : Longiusculè ejus verba afferam, utpotè continentia eandem doctrinam, quam Lullus affert in quæstione, ex qua desumptus est textus notatus à laudato Censore, de quibus in tota hac Differtatione. Itaque præfatus Guillelmus, in cit. lib. cap. 3. & 4. variis exemplis adstruit credibilitatem hujus mysterii Eucharistici, & cap. 4. datò exemplò animæ rationalis, quæ, sicut Deus est idem totus ubique locorum, ita eadem est etiam tota in toto corpore suo, subdit : „ Cur tandem difficile videbitur, „ naturam carnis illi summæ naturæ sic unitam esse, ut ejus facta „ sint omnia, quæ illius sunt, maximè post resurrectionis glorificationem, ex divina potentia posse, ut in diversis locis sit, non diversò tempore. Nam, ut ait Apostolus, etsi crucifixus est ex infirmitate nostra, vivit tamen ex virtute Dei : sicut enim dignioris „ & subtilioris naturæ spiritum rationalem constat esse, quàm quodlibet corpus, istud tamen corpus, quod super omnes cœlos in eo,

„ qui super omnia est , meruit exaltari , dignus (fortè dignius) &
 „ ad omnia , quæ voluit , subtilius & efficacius puto esse quam sint
 „ aliqui , non solum inferiores spiritus , sed & omnes illi , qui cœlo-
 „ rum nomine meruerunt appellari .

XXXVI. Postea dicit , dictam naturam , nedum elevatione cor-
 porali elevatam super cœlos , sed etiam ita , ut dignitate , gloriâ , &
 potestate , super omnia cœlestia credatur glorificata , & immediatè
 subdit : „ Nec tamen naturam corporis Dominici ubique esse credo ,
 „ quia nec opus est , nisi ubi vult , & nisi fidei certò Sacramentò
 „ hoc operatur , ad quod assumpta est & glorificata , Mysteriis sci-
 „ licet salvationis humanæ . . . Sic enim constat in diversis locis unò
 „ horæ momentò esse posse corpus Christi , sed lege creatricis na-
 „ turæ , non creatæ , cum autem creatæ naturæ natura sit creatricis
 „ naturæ legibus obedire : si aliquando acta sua resolvenda illi per-
 „ mittit , qui ea instituit & ordinat , non debet videri errare , &
 „ deviare ab ordine suo , maxime etiam , & illa natura , quæ in uni-
 „ tate naturæ (Personæ , ut infra explicat , & sic mendum irrepsisse
 „ videtur) conjuncta est illi Verbo , per quod facta est omnis crea-
 „ tura , & per quod non posset amodò esse , nisi , sicut dicit Evan-
 „ gelista , in ipso vita esset . Sic cogitemus illam naturæ (Personæ)
 „ unitatem , quâ , licet Deus sit & homo ; non duo tamen , sed unus
 „ est Christus , secundum quam ipse Dominus : *nemo* , inquit , *as-*
 „ *cendit in cœlum , nisi quid descendit de cœlo* , & de qua Apostolus :
 „ *Si* , inquit , *cognovissent , nunquam Dominum Gloriæ crucifixissent* ;
 „ cum homo Christus quantum in suæ proprietate naturæ , id est
 „ humanæ , ante conceptum Virginis non fuerit , nec in suæ pro-
 „ prietate naturæ Dominum gloriæ crucifigi possibile : si inquam ,
 „ *hanc Personæ cogitemus unitatem* , participationem humanæ naturæ
 „ cum Deo , & in cœlo , & in terra , & *ubique* , etiam ante concep-
 „ tum Virginis , & *fuisse* , & *esse credendus est homo Christus* : que-
 „ madmodum secundum participationem divinæ cum homine naturæ ,
 „ procul dubio Dominus Gloriæ credendus est crucifixus . Secundum
 „ hanc enim naturæ (Personæ) unitatem , unò momentò Christus
 „ Dominus , & in sepulchro quievit , & in cœlo , & in terra , &
 „ *ubique* fuit ; sed secundum unitatem solam eodem temporis mo-
 „ mentò in sepulchro quievit , sed in carne sola , eodem tempore in
 „ inferno erat suos liberans , sed anima sola : eodem tempore in
 „ cœlo ad dexteram Patris sedebat , sed in Deitate sola . Et si de
 „ quolibet horum requiramus , Christum Dominum planè respon-

„dendum est fecisse, sed secundum proprietatem cujuslibet substantiæ.

XXXVII. In hac sanè Guillelmi Abbatis doctrina continetur idem, quod in tota hac Dissertatione docet Lullus, videlicet, Christum hominem esse in coelo & in terra, & ubique, licet humanitas per se tantum sit in loco determinato: corpus Christi etiam sacramentaliter tantum esse in diversis locis, posse tamen esse ubique, si velit Deus; hoc autem, quod idem in diversis locis sacramentaliter esse possit, habet ratione unionis cum divina natura, prout docet Lullus & alii citati: quibus consentit Cardin. Cienfuegos citatâ Disput. 2. sect. 6. num. 127. ubi pro Sententia, quæ præsentia replicationem solum Deo, vel Divinitati unito subjecto competere posse docet, allegatis D. Bonav. D. Thomâ, & Guillelmo Abbate, quamvis non adeo diffusè, ut hîc, subjungit: „Idque reipsâ tradunt Scholastici, cum docent „humanitati Christi Domini titulò nexûs hypostatici deberi omnia „privilegia eidem possibilia, convenientiaque, vel quæ ipsam ornant. „Et immediatius adhuc, dum probant, Christum Dominum me- „ruisse institutionem & excellentiam hujus maximi Sacramenti „Eandem Sententiam ibi adoptat Cardinalis, & ejus suppositâ veritate infert, quod eodem titulò unionis competit corpori Christi in Eucharistia usus de facto, quamquam miraculosus, sensuum & potentiarum.

XXXVIII. In eadem sententiam ivit Cardinalis Nicolaus de Cusa, lib. 2. *Excitationum* in Sermonem: *Hoc facite in meam commemorationem*, pag. 396. dicens: *Scio enim, quod Deo convenit ubique esse; homini in uno loco tantum: quid mirum, si Deo & homini medio modo, non ubique; & non in uno loco tantum, sed in pluribus?* Hoc etiam alter Teutonicus, & Cardinalis designatus Joannes Gropperus, & quidem expressius fatetur in laudato opere *de Eucharistia*, art. 1. cap. 15. pag. 29. cap. 55. pag. 278. & 295. ubi sic scribit: „Sed „hoc nos dicimus, quandoquidem Christus Deus & homo est, & „corpus ejus, licet humanum sit, tamen deificatum, & cum pri- „mis admirabile corpus est, eâ causâ posse eum, utpote apud quem „non est impossibile omne verbum, illud idem corpus suum ubi- „cumque velit substantialiter exhibere; & citra dubium, juxta ser- „monem illum: *Hoc est corpus meum*, locis omnibus, quibus vene- „rabile Sacramentum, sicut ab illo institutum est, conficitur, „etiam reverâ exhibere præsens, ita tamen, ut propterea, Cælum „deferere non cogatur. Et pag. 279. sic scribit: „In summa,

» tametsi Christi corpus reverà humanum corpus est, non vulgare;
 » sed stupendum & admirabile corpus est, quandoquidem cum præ-
 » potente Divinitate conjunctum & unitum est, quo fit, ut illi pos-
 » sibile sit, quod quibuscumque aliis corporibus est impossibile. . . . quâ
 » igitur ratione non possit etiam secundum verbum suum in vene-
 » rabili Sacramento præsens adesse » ? Idem docet gravis & anti-
 quus Theologus Raymundus de Sabunde in Theolog. naturali, tit.
 293. dicens : « Sed tamen non est mirum, si caro Christi conjuncta
 » inseparabiliter cum Divinitate ascendat ad istum gradum, ut possit
 » esse simul & semel in pluribus locis, quia Divinitas est ubique tota
 » simul ; & quia caro Christi est unita Divinitati, ideo ratione Di-
 » vinitatis potest simul & semel esse in pluribus locis.

XXXIX. Cum itaque constet, præfatos Patres, & Doctores eam-
 » dem tenere, ac Lullus, sententiam, videlicet corpus Christi ra-
 » tione unionis cum Divinitate posse esse sacramentaliter in diversis
 locis : sicut ipsis immeritò impingeretur erroneè sentire, *corpus puri
 hominis non posse esse in duobus locis, miraculosè quidem & sacramen-
 taliter, quia non habet naturam divinam unitam*, ita immeritò impin-
 gitur B. Lullo. Præfatam Patrum, quos citat, doctrinam intelligit
 Cienfuegos, ubi supra, ita ut existimet eos sentire, corpori Christi
 titulo unionis hypostaticæ deberi quodammodò esse sacramentaliter
 in multis locis. Bellarminus, citat. lib. 3. de *Incarnatione*, cap. 19.
 ad Doctrinam citati compendii *Theologicæ veritatis* ab Ubiquistis sibi
 oppositam pro ubiquitate humanitatis Christi, respondet quòd Autor
 citati compendii, *indicare voluit, propter unionem ad Verbum, posse
 hominem Christum statuere suum corpus in pluribus locis, quia enim homo
 ille est Deus, ideo potest hoc facere. Nos enim, qui tantum homines su-
 mus possumus quidem à Deo, si ipse voluerit, poni in pluribus locis, sed
 non possumus nos ipsos ponere in pluribus locis.*

XL. Uterque explicandi modus, ad relatam Doctrinam Cienfue-
 gos & Bellarmino adhibitus, optimè & absque ulla violentia quadrat
 textui notato Lulli, ut ex reflexione ejusdem cum alijs videri potest.
 Et *Primo*, dici potest quòd Lullus, dum asserit corpus Christi ratione
 unionis hypostaticæ posse esse in diversis locis, imò & ubique, sa-
 cramentaliter, hoc intelligit ex debito quodam ipsi correspondenti
 ratione unionis, ob magnam excellentiam, quam sic habet ; quod
 tamen nulli alteri corpori non unito sic competere potest ; & hoc
 innuit in citatis textibus, dum dicit, ratione unionis convenire cor-
 pori Christi posse esse sacramentaliter in diversis locis. *Secundò*, dici

potest, ut magis indicatum in citatis textibus, asseri corpus Christi posse esse sacramentaliter in multis locis; imò & ubique, ratione unionis cum divinitate, quatenus Christus, qui ubique est, potest suum corpus statuere & ponere ubique velit, & ita etiam, ut suum corpus, ut instrumentum conjunctum ad hoc concurrat, quod aliis corporibus convenire non potest. Hæc explicatio magis indicatur in citatis textibus, quia in omnibus attribuitur supposito, in quo ambæ naturæ sunt unitæ, posse facere suum corpus esse in diversis locis; & ubique; & in plerisque expressè attribuitur Christo posse esse sacramentaliter in diversis locis, ut num. 4, 8 & 12. in quo expressè attribuitur Christo seipsum ponere sacramentaliter in diversis locis, quin necesse sit seipsum de cœlo demittere, aut ejus quantitatem extendi.

XLI. Deinde pro Lullo & aliis dici potest, quòd, dum dicitur corpus Christi posse esse in diversis locis sacramentaliter propter unionem cum divinitate, unio hypostatica non designatur tamquam unica & præcisa ratio, ut corpus generaliter possit esse in diversis locis, sed tamquam sufficiens & efficax ratio, ut corpus Christi multiplicem valeat habere sacramentalem præsentiam; ac proinde non habet locum illatio consequentiæ, à laudato Censore exposita. Hoc maximè habet locum in textu Lulli notato & adducto, num. 21. ubi respondet ad objectionem, in qua ex eo quòd idem corpus non possit esse in diversis locis localiter, seu circumscriptivè, adhuc miraculosè arguitur indirectè quòd corpus Christi sacramentaliter non potest esse in diversis locis; & respondet, quòd ratione unionis ambarum naturarum in uno supposito Deus est homo Christus, & homo Christus est Deus; & quia Deus est ubique homo Christus, hoc est suppositum humanitatis, propterea Deus, qui ubique est homo Christus, potest facere, quòd suum corpus sit in diversis locis, imò & ubique, sacramentaliter: unde subjungit: *Et ideo Eremita, exemplum, quod das de vino & de duabus amphoris, non valet, sed valeret, si Christus non esset Deus, nec Deus esset ubique homo Christus.* Exemplum de vino & amphora, & argumentum ex ipso sic proponitur, quòd si posset idem corpus adhuc miraculosè esse in diversis locis, vinum, quod est in amphora plena, posset in eodem instanti esse in alia amphora, quæ est vacua, quod est contradictio, scilicet quòd eadem amphora esset plena vinò, & non esset plena; differentia verò, quæ opponitur à Lullo, est, quòd corpus Christi est unitum cum Deo tamquam ejus corpus in esse hominis, qui Deus

est ubique illius suppositum , & sic datur medium , quò illud corpus possit statui in diversis locis ; quod corpori vini non convenit ; & sic non sequitur contradictio , quæ in corpore circumscriptivè bilocato apparet , cùm corpus Christi sacramentaliter positum in diversis locis , illa non repleat.

XLII. Tandem præscindendo à quæstione , an corpus quodcumque possit sacramentaliter poni in diversis locis , quæ fortè posset agitari , sicut agitur ea , an idem corpus possit esse circumscriptivè in diversis locis : posset dici pro Lullo , & citatis Doctoribus , quòd in ordine sacramentali , & consequenter ad Incarnationem Filii Dei , juxta quam est stabilita sacramentorum dispositio , unio hypostatica corporis Christi cum divina natura est ratio formalis & propria , cur corpus Christi possit esse sacramentaliter in diversis locis , immò & ubique ; inde tamen non sequitur , quòd corpus puri hominis absolute , ut infert laudatus Censor , non possit esse sacramentaliter in diversis locis ; sed tantùm quòd in ordine sacramentali instituto conformiter & consequenter ad Incarnationem Filii Dei , purus homo non potest poni in diversis locis sacramentaliter , sicut in eodem ordine purus homo non potest esse Autor Sacramentorum ; in hoc autem nihil est notà dignum , cùm verissimum sit purum hominem modò dictò non posse poni sacramentaliter in multis locis ; & sicut D. Thomas , agens de Sacramento , plura dicit non posse à Deo fieri , quod tamen , ut Cajetanus & alii ejus Interpretes exponunt , non intelligitur de non posse absolute , sed solùm in ordine sacramentali instituto , sic pariter dicitur in hoc casu ; & hoc maximè locum habet in doctrina Lulli , qui in hoc libro tantùm agit de Sacramento Altaris , quod q. 126. resolvit debere esse , consequenter ad Incarnationem ; atque ita juxta hunc ordinem debent intelligi , quæ ex ejus doctrina , possunt vel non possunt fieri.



D I S T I N C T I O I I.

*De secunda classe Censurarum adversus , Lib. Quæstionum super
Magistrum Sententiarum.*

D I S S E R T A T I O I.

De Propositionibus 1, 2, 3, 4, 5, 6 & 7. ex quæstionibus, 5,
7, 22, 41, 48, 86 & 90.

§. I.

Proponuntur & breviter exponuntur Propositiones 1, 2, 3 & 4.

I. **A**D primam hic adducitur textus : *Intellectus, qui substantialis est, agit substantialiter & accidentaliter intra & extra, ut dictum est, sine production & generatione alicujus substantiæ.* quæst. 5. Sent. n. 5.

Censura : Statuit duplex intelligere in intellectu creato, alterum substantiale, & alterum accidentale : primum intra, secundum ad extra, contra communem opinionem Theologorum.

II. Hæc fanè quæstio de actu intellectûs potius videtur Philosophica, quàm Theologica, utpote ejus resolutio ab intima pendet Philosophia; nam *Primò*, sciri debet, an potentiæ animæ, scilicet memoria, intellectus, & voluntas, sint accidentia animæ, vel sint de ejus essentia & substantia? Et circa hoc in notata quæstione 5. Sentent. resolvit & probat Lullus, quòd non sunt accidentia, sed sunt virtutes substantiales & essentielles animæ rationalis. *Secundò*, sciri debet, an distinguantur ab invicem; & resolvit Lullus, quòd realiter ab invicem distinguuntur, cum unaquæque sit finita & terminata, ac proinde intellectus non est nisi virtus intelligendi, non autem volendi, ac propterea intellectus realiter distinguitur à voluntate. *Tertiò*, sciri debet, quomodo dictæ potentiæ realiter distinctæ constituent animam; & quia realis & naturalis constitutio nequit esse, quin partes constitutivæ agant & patiantur ad invicem,

Tom. III.

H h

aliter non haberent ad invicem naturalem habitudinem, ut per se & ex earum naturali ordine fieret ex ipsis unum totum : ideo debent ad invicem intrinsecè agere & pati, & una debet esse activa, & alia passiva ; & quia activum dicit majorem perfectionem ; quàm passivum, & aliunde dictæ potentiaë, cùm sint ad æqualem finem, sunt æquales, nulla earum per se est purè passiva, vel pura materia respectu aliarum ; & consequenter omnes ad invicem debent esse naturaliter mutuo activæ & passivæ.

III. Ex hoc jam consequitur, quòd si intellectus agit naturaliter & intrinsecè in alias potentias ad constitutionem animæ, debet habere actum seu exercitium agendi de suo genere & ratione, ac proinde hic actus debet esse & dici *intelligere* ; & quia etiam eò ipso intellectus est activus intrinsecè in alias potentias, debet in ipso esse ratio activa de suo genere, quæ debet esse & dici *intellectivum*, seu ratio intellectiva ; & etiam quia intellectus per se patitur sub aliis potentiis ad constitutionem animæ, debet habere rationem passivam de suo genere, quæ debet esse & dici *intelligibile*, seu ratio intelligibilis : Unde ad hoc, ut ex intellectu aliisque potentiis intrinsecè & substantialiter constituatur anima rationalis, debet in intellectu esse ratio activa de suo genere, id est intellectivum ; ratio passiva, id est intelligibile ; & actus seu exercitium, id est *intelligere*. Idem pariformiter est de aliis potentiis. Hinc, *Quarto*, ad hanc intimam de animæ substantia Philosophiam, debet sciri, an in intellectu hæc ratio activa, ratio passiva, & actus, sint una simplex ratio, vel distinctæ, ita quòd intellectus intrinsecè sit ex ipsis constitutus, & sit una essentia dictas coëssentialiter rationes includens ? At quia activum majus est quàm passivum, & plus est intrinsecum, quàm extrinsecum, resolvit Lullus, quòd in intellectu sunt coëssentialiter & consubstantialiter, ratio activa, id est *intellectivum*, ratio passiva, id est *intelligibile*, & actus, id est *intelligere* : ita ut primò sit ex ipsis constitutus intellectus tui simplex essentia de genere intelligendi, & deinde ad constitutionem animæ rationalis cum suo *intellectivo* agat intrinsecè in memoriam & voluntatem, mediante suo actu, nempe *intelligere*, & patiat ab eisdem cum suo *intelligibili*.

IV. Itaque hic actus, seu exercitium de genere intellectus, qui propterea debet esse & dici *intelligere*, est illud intelligere substantiale & essentiale, quod admittit Lullus in intellectu in hac quæstione ; quo quidem intelligere simul cum intellectivo, & intelligibili coëssentialibus est ; *Primò*, intellectus in seipso una essentia in suo genere

completa ; & *Secundò*, ut cum aliis potentiis constituat animam , cum eodem intelligere consubstantiali agit in alias potentias sub sua coëssentiali ratione activa , & patitur ab eisdem sub sua coëssentiali ratione passiva : Quia verò intellectus nedùm habet actum de suo genere in alias potentias , ut cum ipsis constituat animam rationalem ; sed etiam cognoscendo objecta , & hunc actum habet mediantibus speciebus , ideo habet alium actum , seu aliud intelligere accidentale , quod dicitur intelligere ad extra , & non ad intra , quia non deservit ad intrinsecam constitutionem , sed ad exteriorum notitiam. Et hæc est Philosophia de anima & intellectu , quam in notata quæstione attingit Lullus ; tota verò difficultas oritur ex penuria terminorum , nam illum actum intrinsecum intellectus vocat Lullus *intelligere* , quia non adest terminus opportunior ; & hinc oritur æquivocatio , quia actus accidentalis intellectus communiter notus etiam dicitur *intelligere*.

V. Patet itaque , non esse notâ Theologicâ dignum , textum , quem citat hic Censor ex dicta , quæst. 5. Sentent. nam ibi , postquam , num. 1. & 2. probavit Lullus , quòd anima habet partes substantiales , quæ sunt memòria , intellectus & voluntas , Eremita , num. 3. objicit ; quòd si ita sit , sequitur , *quòd una anima generet & substantialificet aliam animam* , & Lullus , ut ostendat hoc non sequi , explicat , num. 5. breviter quæ exposuimus de coëssentialibus intellectivo , intelligibili , & intelligere intellectus , & addit modum , quò intellectus , mediantibus speciebus , intelligit objecta , & tandem sic concludit : *Et sic intellectivus , qui est substantialis , agit substantialiter , & accidentaliter , intra & extra , ut dictum est* (id est , agit substantialiter ad intra ad constitutionem intrinsecam animæ ; agit verò accidentaliter ad extra , dum , mediantibus speciebus , intelligit objecta) *sine productione & generatione alicujus substantiæ , nihil de se , nec de suo proprio intelligibili , nec de suo intelligere , scindens , augmentans , vel diminuens , cum intellectus sit spiritualis & incorruptibilis* : ex quibus patet , qualiter sit in anima substantiale intelligere distinctum ab accidentali , quin per hoc una anima generet aliam animam. Tandem pro hoc *intelligere* , & actu substantiali videatur supra , dist. 1. dissert. 6. §. 3. præcipuè à num. 25.

Text pr. 1.

VI. Secundò notatur hic Textus : *Potentia generandi in divinis absolute se habet in quantum constituit unam communem proprietatem spirativam inter Patrem & Filium* , q. 7. Sentent. At hoc jam explicatum est supra dist. 1. dissert. 4. §. 1. à num. 1.

VII. Tertio, notatur hic Textus: *Pater constituendo Filium determinatum distinguit Filium à se ipso, & à Spiritu Sancto: Pater, & Filius constituunt Spiritum Sanctum, & à seipsis ipsum distinguunt.* Quæst. 22. Sent. num. 1. Etiam hoc explicatum est supra dist. 1. differt. 6. §. 2. à num. 9.

VIII. Quarto, notatur hic Textus: *Posita in æternitate Deus annihilare non potest, postquam illa vult esse æterna.* Quæst. 41. circa finem. At hoc etiam explicatum est supra dist. 1. differt. 7. §. 2. à num. 4.

§. I-I.

Docet Lullus in Prop. 5. quod *Christus ut homo non fuit mortalis naturaliter, id est, ex naturali pondere, & dispositione sui corporis, prout immunis à peccato, & Deo uniti; fuit tamen mortalis per accidens & ab extrinseco; quæ tamen mortalitas non fuit supernaturalis, sed naturalis & conformis naturæ assumptæ.*

IX. Quintus Textus notatus est iste: *Christus in quantum homo mortalis fuit, non naturaliter, sed per accidens ratione finis, ad honorandum scilicet naturam divinam, & ad recreandum genus humanum.* Quæst. 48. num. 3. At ex contextu liquidè patet, quod sensu dixerit Lullus Christum, ut hominem non esse naturaliter mortalem, videlicet ex naturæ infectione, & consequenti necessitate, quemadmodum alii homines; sed per accidens, quatenus ad honorandam divinam naturam, & recreandum genus humanum, voluntariè voluit pati & mori. Hoc ut intelligatur, notandum est Lullum ibi agere de perfectione naturali humanæ Christi naturæ; & postquam, num. 1. conclusit, quod natura humana in Christo est nobilior quàm natura Angelica, objicit Eremita, num. 2. sic: „Raymunde, natura Angelica est incorruptibilis & immortalis, & non indiget aliquò extra se ad vivendum, sed natura hominis est corruptibilis & mortalis, nec homo potest vivere sine cibo, & potu, &c. . . . Item „Angelus non est impeditus ad intelligendum, recolendum & amandum . . . sed in homine est per oppositum. „

Text.
prop. 5.

X. Ad hanc objectionem, num. 3. sic respondet Lullus: *Eremita, malè facis quod non distinguas inter naturam Christi, & naturam aliorum hominum; cum natura aliorum hominum sit mortalis, & impedita ad intelligendum, sicut tu dicis, propter peccatum primorum Parentum; sed*

humanitas Christi in instanti, in quo à Deo fuit assumpta, & producta natura, fuit innocens, & separata ab omni peccato originali & actuali, & ideo non fuit corruptibilis, nec impedita ad intelligendum, cum corruptio, mortalitas, & impedimentum in homine sint propter peccatum originale. Verumtamen Christus in quantum homo fuit mortalis, sed non naturaliter, sed per accidens ratione finis, scilicet ad honorandam divinam naturam, quæ ipsam tantum exaltavit, & ad recreandum humanum genus: sicut homo sanus, dum est sanus, non est mortalis naturaliter, sed est mortalis per accidens, quando alijs homo ipsum vulnerat, & interficit.

XI. Patet itaque Lullum negare, quòd Christus esset mortalis eà mortalitate, quæ reliqui homines, ratione peccati originalis, sunt mortales; affirmat sanè quòd Christus erat mortalis, non tamen eo modo, quo alii, ratione peccati, sunt naturaliter, seu ex necessitate naturæ mortales; sed quia ejus morte opus erat ad honorandam divinam naturam, & recreandum genus humanum; quod quodammodo accidens est incarnationis substantiæ, quia hæc fieri potuit Adamo non peccante, quia Christus moreretur, & morte ac passione honoraret divinam naturam, ideo per accidens, & ad prædictum finem fuit mortalis. Profectò duo negat Lullus Christo competere, ob suam immunitatem à peccato, quæ ratione peccati originalis alijs hominibus conveniunt, nempe corruptionem, seu mortalitatem, ac impedimentum animæ ad intelligendum; quia tamen ad honorandam divinam naturam & recreandum genus humanum oportuit ipsum mori, ideo, quia Incarnatio per se non requirit mortem & passionem, utpotè sine ipsis potuit esse; nec natura assumpta ut unita Deo per se exigit mortem & passionem, ideo Christus non erat *naturaliter* mortalis, sed tantum fuit mortalis *per accidens*, quia fuit mortalis, ut recrearet genus humanum, quod per accidens se habet ad Incarnationem, quæ potuit esse sine morte; & ideo neque illa mortalitas fuit naturaliter ex necessitate naturæ, ut in alijs hominibus, sed per accidens, quatenus voluntariè admissa ad recreationem humani generis.

XII. Totum hoc patet in exemplo de homine sano, quod adducit Lullus; nam, sicut homo sanus, dum est sanus, non est mortalis naturaliter, hoc est per se non exigit mori, ita Incarnatio, & natura humana ut unita Deo per se non exigit mortem; & sicut homo sanus, adhuc dum est sanus, potest per accidens vulnere occidi, ita Christus per accidens, quia sic voluit, potuit occidi & mori: Unde,

sicut homo sanus, inspecta sua natura, quæ ex elementis est composita, quæ quidem sunt ad invicem contraria, & ab invicem dissolubilia, est mortalis, & quantum est de se ab ipsis fluere & oriri potest mors, & tamen, dum est sanus, quo pacto temperiem habet elementorum, non est naturaliter mortalis, quatenus ex illa elementorum temperie fluere & oriri nequit mors, cum hæc ex elementorum proveniat intemperie; & hoc non obstante est accidentaliter mortalis, quia potest ab alio vel à seipso occidi; ita, licet humana Christi natura sit quoad corpus ex elementis ad invicem naturaliter contrariis extructa, ac proinde ipsum corpus ex se dissolubile sit ab anima, quatenus non est naturalis ejus proprietas elementorum temperies, neo indissolubilis cum anima unio, quia tamen hæc humana natura fuit producta perfecta & nulla peccati infectione maculata, simulq; unita cum Deo; & hæc naturæ humanæ perfectio unioque cum Deo non petit nec exigit mortem, imò vitam & bonam habitudinem, ideo Christus quoad hoc non est naturaliter mortalis; quia tamen opus est morte Christi ad recreandum genus humanum, & ad sic honorandam divinam naturam, ideo per accidens & ex voluntaria Christi acceptione fuit mortalis.

XIII. Hæc Lulli sententia amplius patet ex eodem libro, q. 111. ubi inquit: *Utrum Christus, si non fuisset interfectus redemisset humanum genus per naturalem mortem?* & ad ejus solutionem, num. 1. dicit: „Quodd mors fuerit in humano genere duobus modis per originale peccatum, scilicet naturaliter, & spiritualiter; naturaliter „quia corpus primi hominis, qui erat immortalis antequam peccasset, „post peccatum fuit mortale, corruptibile, & putrefactibile; spiritualiter, sicut sua anima, quæ fuit mortua per peccatum. „dicit etiam, num. 2.: „Quodd corpus Christi ratione unionis Deitatis fuerit „immortale, quia si fuisset mortale, assumpsisset potentiam corruptionis, & putrefactionis, quod ipsi fuit ita impossibile, sicut „illi fuit impossibile assumere potentiam peccandi, ut in 107. questione probatum est; aliàs unio divinæ & humanæ naturæ non potuisset fieri, nec homo Christus fuisset sustentatus, & factus in „divino supposito; & quia naturaliter non fuit mortalis, per naturalem mortem, quam non potuit habere, non potuit redimere „humanum genus: sicut homo, qui cum alijs, quas non habet, non „potest volare; sed corpus Christi fuit mortale per accidens, sicut „per vulnera; ut recreatio posset fieri per accidentalem mortem, „sicut naturalis mors humani generis per accidens fuit facta; scilicet „per peccatum primorum Parentum. „At num. 3. objicit Eremita:

» Christus fuit innocens , & non debebat mortem alicui ; unde ficut
» voluit esse mortalis , per mortem accidentalem , ut redimeret hu-
» manum genus , sic , si voluisset , fuisset mortalis naturaliter , ut
» naturaliter per naturalem mortem redimeret humanum genus. »
Huic objectioni respondet Lullus , num. 4. sic : « Superius proba-
» tum est , quodd Christus non potuerit habere naturalem mortem ,
» unde sequitur , quodd cum hoc , quod non potuit habere , non po-
» tuerit redimere humanum genus. »

XIV. In hac doctrina docet Lullus cum scriptura & Patribus mor-
tem humani generis esse effectum & poenam peccati originalis , at-
que ita hanc mortem & mortalitatem , quatenus est poena peccati
originalis , non potuisse assumi à Deo in natura humana sibi unita ,
sicut non potuit ab ipso assumi potentia peccandi ; hæc autem mor-
talitas , qua est infecta tota humana natura , stat in hoc , quodd ipsa
natura ex seipsa , & ex propria sui dispositione inclinatur & vergit
in sui corruptionem & mortem , ita ut necessitate quâdam naturali ,
ex sua infectione proveniente , debeat mori , & jure quoddam , in sub-
jectione ad peccatum fundato , ipsi dominetur mors , & aliæ naturæ
poenalties : & quia humana Christi natura , nedum ab omni peccato
est immunis , sed etiam à potentia peccandi , & est unita cum Deo ,
est immunis ab omni mortalitate & infectione , qua ipsa , quatenus
sic affecta & unita , naturali necessitate vergat in sui corruptionem
& mortem ; quia licet ex elementis de se contrariis sit composita ,
adeoque de se sit dissolubilis unio corporis cum anima , quia tamen
est in tali perfectione posita , quodd nedum est in ipsa elementorum
perfecta temperies , & immunitas ab omni peccato , imò , & à poten-
tia ad ipsum , sed etiam est unita cum Deo , ideo ratione hujus sui
status & perfectionis non vergit in mortem , nec est ipsi mortalitas
naturalis ; at quia ejus morte opus erat ad honorandam divinam na-
turam , & recreandum genus humanum , volente ipso Christo , mori
potuit per accidens , id est , non ex naturæ sic affectæ naturali vergen-
tia , sed ex causa accidentaria.

XV. Porro hæc Lulli sententia non est digna ullâ Censurâ , ut ad-
vertit eximius Theologus P. Berti Theolog. Discip. lib. 26. cap. 6.
in principio , ubi postquam retulit errorem eorum , qui nullum ve-
rum fuisse in Christo dolorem asseriebant , quia verum corpus eidem
abnegabant ; eorum etiam errorem , qui ex Eutichiana hæresi , con-
fundente in Christo naturam humanam cum divina , progeniti , te-
nebant naturam humanam esse omnino incorruptibilem , & immor-

talem : subjungit : « Distinguenda est accuratè à duabus istis damna-
 » tis opinionibus sententia aliquorum Patrum , qui tradiderunt
 » opus fuisse miraculo , ut Christus pateretur , atque non fuisse hu-
 » manæ fragilitatis , sed coelestis gratiæ sacramentum ; si Dominus
 » noster esurivit , sitivit , semetipsum turbavit , infremuit , & doluit ;
 » quod disertè tradit Clemens Alexandr. in 6. stromat. Maximus Mart.
 » Homil. 1. de jejunio , & Philippus Abbas Præmonstrat in Episto-
 » lis de Sententia Hilarii , de quo proximo capite profectò hi Patres
 » neque Christum divinitate passum , neque humanam ejus naturam
 » suis proprietatibus expoliatam affirmavere , sed hanc per unionem
 » hypostaticam adeo roboratam atque perfectam , ut non nisi divina
 » accedente virtute subjiceretur passioni : *Atque in hac sententia , quæ*
 » *nihil habet repugnans incarnationis Mystério , & nihil adversum*
 » *Christi doloribus , non reperitur aliquid judicio doctissimorum Virorum*
 » *in fide , periculi. »*

XVI. De disputatione relati Philippi Abbatis agit diffusè Petavius
 Théolog. Dogm. tom. 4. part. 2. lib. 10. de Incar. cap. 4. cujus
 Philippi Sententia videtur cum Lulliana coire in hoc , quòd ex ac-
 tuali humanitatis Christi dispositione , & unionem cum Deo taliter
 erat affecta , ut ex naturali & propria inclinatione , pondere , ac
 necessitate non vergeret in passiones naturales , famem , sitim , ac
 totalem tandem defectionem , ac mortem ; sed illas quidem passiones
 pertulisse Christum , non ex infirmitate , & necessitate naturæ , sed
 purâ voluntate , ut Deum honoraret , & nobis mereretur ; at in hoc
 discrepat aliquantulum à Lullo , quòd in humanitate Christi quamdam
 statuere videatur repugnantiam ad illas passiones & mortem , ita ut ,
 prout refert Petavius ibi , num. 1. quidquid passa est , non naturaliter ,
 sed extraordinariâ quiddam lege , ac velut per miraculum sit experta.
 Lullus autem eatenus negat in Christo naturalem mortalitatem , qua-
 tenus ex seipsâ , prout Deo unita , non vergebat & tendebat natu-
 rali pondere ac necessitate , ad illas passiones procreandas , ac tandem
 ad defectionem & mortem adsciscendam ; erat tamen talis ejus natura ,
 ut per accidens & ab extrinseco reverà per seipsam pati posset &
 mori , vel voluntariè excitante Christo illas passiones , vel admittente
 interfectionem violentam ; ac proinde pœnalitates ac mors , quam
 sustinuit Christus , non sunt naturales , prout naturale est idem ac ex
 pondere ac necessitate profluens naturæ , naturales verò sunt , prout
 naturale opponitur miraculoso : ita ut Christus per suam humanam
 naturam & in ipsa verè pertulerit absque miraculo illas pœnalitates ;
 &

& quia ejus natura per se ad id non vergebat , & naturali pondere ad idem non ferebatur , ideo per accidens & ab extrinseco pati potuit.

XVII. Unde differentia inter Lullum , & communem loquendi modum , stat in hoc quòd , supponentibus omnibus passiones à Christo non esse perlatas modò miraculosò , sed naturaliter , & ratione humanæ naturæ , communiter dicitur , naturam Christi ex seipsa , sicut aliorum hominum natura , pondere & inclinatione naturali ferri in poenaltates , & ad mortem , ita ut hæc naturali propagine fluant & oriantur ex ejus dispositione : at hoc negat Lullus , & tantùm fatetur , hæc omnia , non ex natura , sed accidentaliter & ab extrinseco potuisse Christo accidere. Ut autem clarius appareat ejus Sententia , aliqui sunt notandi textus ejus doctrinæ ; & quidem ante omnia suppono ipsius consensum cum Fide Catholica de vera & reali passione humanitatis Christi , ut fatetur & probat in libris innumeris , quibus agit de Articulis Fidei , dum tractat de passione & morte Christi , ita ut in humana & secundum humanam naturam inexplicabiles poenas & mortem pertulerit , quâ ipsius anima verè & realiter fuerit separata à corpore.

XVIII. Itaque ad præsentem scopum , in lib. *de 5. Sapient.* (tom. 2.) p. 4. dist. 2. cap. 2. objec. 9. dicit quòd Christus propter humanitatem , utebatur cursu naturæ , ac comedebat & bibebat. In lib. 4. *Demonstrat.* (tom. 2.) cap. 28. *de Passione nostri Domini Jesu-Christi* , num. 1. tenet , quòd noster Dominus Jesus-Christus fuerit mortuus morte accidentali. In *Disp. cum Hamar* (tom. 4.) part. 2. cap. 7. n. 3. litt. A. ait , quòd Deus potuit sibi unire humanam naturam , Deo remanente immortali quoad suam naturam , & mortali quoad humanam naturam. In *Supplicatione ad Professores Parisien.* (tom. 4.) dist. 2. *de Incar.* n. 11. supponit quòd Christus in hoc mundo passus est opprobria , mortem crucis , & verbera , famem , sitim & alia ; & n. 15. super illa verba ; *Deus meus , Deus meus , quare me dereliquisti* , scribit : *Dico quòd hoc dixerit ad significandum quòd esset verus homo , qui timebat mortem naturaliter , & dixerat Patri : non sicut ego volo , sed sicut tu vis.*

XIX. Præterea in *Arb. Scient.* in *Arb. Apost.* in ejusdem floribus , tit. Quòd Jesus-Christus fuerit mortuus , n. 2. ait : *Jesus-Christus fuit mortuus ad dandum exemplum , quòd ipse erat homo mortalis propter originale peccatum (ut scilicet ipsum deleteret) erat tamen immortalis in quantum sustentatus fuit in Deitate ; & mortalis fuit , ut cum sua spe-*

ciali mortalitate generalis mors moreretur ; & n. 5. ait : Idcirco mors Christi extitit secundum cursum naturalem. In Arb. Christian. tit. de Branchis , n. 1. docet humanam Christi naturam esse ex natura elementalī, vegetali, sensuali, imaginālī, & rationali, & quod sentiebat per naturam elementalem, calorem & frigiditatem. & per vegetabilem appetitum habebat ad comedendum & bibendum . . . Idcirco erat verus homo & utebatur conditionibus naturalibus naturaliter & virtuosè ; & n. 2. Quæ (natura divīna) ratione conjunctionis cum huamna attingebat famem, sitim, calorem & frigiditatem.

XX. Collatis adductis Lulli doctrinis cum textibus ex lib. Sentent. supra productis, & perpensò ipsum ubique tenere Christum passum fuisse, quia sic voluit, deducitur quod supra exposuimus, videlicet passionem & mortem Christi esse naturalem, prout naturale opponitur miraculoso, non autem esse naturalem, prout naturale importat intrinsecam ordinationem, pondus, & necessitatem naturalem ; sed tantum esse accidentalem, & ex causa extrinsecā ; & hoc idem innuere videntur illi Scripturæ textus, qui Christo passionem attribuant quia voluit ; si enim ejus humana natura ferretur de se ad illas passiones, & tandem ad totalem defectionem, non illa passus fuisset Christus quia voluit, sed quia hoc exegit ejus natura, quod ipse volendo admisit, non causavit : sic Isaiæ, 54. 7. dicitur : *oblatus est quia ipse voluit* ; & Joan. 10. 17. *Ego pono animam meam. Nemo tollit eam à me sed ego pono eam à me ipso* ; & Joan. 12. 27. *Nunc turbata est anima mea* : ad quæ verba D. Augustinus, Tract. 52. in Joan. ait : *Nos in se transtulit, nos in se suscepit, caput nostrum membrorum suorum suscepit affectum, & ideo ab aliquo non est turbatum, sed, sicut de illo dictum est, cum Lazarum suscitaret, turbavit semetipsum. Idem ibidem Tract. 49. Quis enim eum posset, nisi seipsum ipse turbare ? Turbaris tu nolens, turbatus est Christus quia voluit. Esurivit Jesus, verum est, sed quia voluit : mortuus est Jesus, verum est, sed quia voluit. In illius potestate erat, vel sic affici, vel non affici.*

XXI. Expressius idem Augustinus, Trac. 60. in Joan. cujus verba pro se allegabat citatus Philippus Abbas ; nam ibi sic scribit S. Pater : *Sive ergo isto loco propter ipsum Judam pereuntem miserando turbatus est, sive sua morte propinquantē, turbatus est, non est tamen ullò modò dubitandum, non cum animæ infirmitate, sed potestate turbatum, ne nobis desperatio salutis oriatur, quando, non potestate, sed infirmitate turbamur. Carnis quippe illa gerebat infirmitatem, quæ infirmitas resurrectione consumpta est, sed quia, non solum homo, verum etiam Deus*

erat, ineffabili distantia universum genus humanum animi fortitudine superabat : non ergo aliquò est cogente turbatus, sed turbavit semetipsum ; quod de illo evidenter expressum est, quando Lazarum suscitavit, nam ibi scriptum est quòd turbaverit semetipsum, ut hoc intelligatur & ubi non scriptum legitur ; & tamen legitur eum fuisse turbatum ; affectum quippe humanum, quando oportuit, in se indicavit, in seipso potestatem commonuit, qui hominem potestate suscepit. In hoc sanè tractatu, paulò ante relata verba, agit Augustinus de perturbationibus, quæ adhuc in Sanctis reperiuntur, quibus contra-ponit turbationem Christi, hanc dicens non ex infirmitate, sed expotestate provenire ; illæ autem, quæ Sanctos afficiunt, ex infirmitate naturæ, quæ de se prona est illas producere, fluunt, non autem in Christo, qui potestate illas admisit ; ac proinde illa coactio, quam negat in turbatione Christi, idem est ac motus naturalis in ejus humanitate, si enim in ipsa esset naturalis propensio, cogeret ipsa, saltem quoad excitationem perturbationis, licet non quoad admissionem, nisi Christus præsciis ejus commotionem comprimendo præveniret. Huic consonat ipse Augustinus in Psalm. 93. dicens : *Ergo tristis fuit ? Prorsus tristis ; sed voluntate suscipiens tristitiam, quomodo voluntate suscipiens carnem ; quomodo voluntate, carnem veram, sic voluntate tristitiam veram.* Ipse D. Augustinus, lib. 26. contra Faustum, cap. 8. ait de Christo, quòd passiones humanas verè habuit, sanè non necessitate conditionis, sed magisterii voluntate, & divinà etiam potestate. Enarrat. in Psal. 87. num. 3. de eisdem affectibus ac de morte, ait : *Non conditionis necessitate, sed miserationis voluntate suscepit, & Sermon. 232. cap. 5. Christum mortuum dicit, Dignatione, non conditione.*

XXII. Similiter D. Basilus, Hom. de gratiarum actione, apud citatum Petavium, lib. 10. de Incar. cap. 5. num. 9. scribit, *Christum manducasse & bibisse, non cibo ac potu indigentem ipsum, sed ut nobis necessariorum hujusmodi affectionum animæ mensuras, ac terminos præferiret : quemadmodum & flevisse, ut in gemitum, luctumque propensorum immoderatos affectus nimiumque dejectos corrigeret ; & post pauca : Quemadmodum igitur famem suscepit Dominus, exhausta per expirationem solidiore alimonia, & suum admisit, humore in corpore consumpto ; & lassatus est, musculis, & nervis nimium ex ambulatione distentis, non divinitate ipsa labore fracta, sed corpore ex natura consequenter affectiones admittente, sic etiam lachrymas suscepit, naturalem affectum accidere permittens.* Expressius Theodorus Abucara, in Opusculo 4. apud Petavium, lib. 10. de Incarnat. cap. 3. num. 11. Lulli sensum

exprimit dicens : *Corpus Adami ab omni labe purum effinxit Deus ; cui nulla ex naturalibus & inculpatis affectionibus necessitate dominabatur , veluti mors , & quæ mortem antecedunt ac sequuntur. Verum postquam , sponte sua & voluntate , Adamus idem divinum præceptum transgressus est , seque peccato subjecit , & inquinavit , tum demum naturalibus & inculpatis illis affectionibus , tamquam servus ; obnoxius esse cepit , nempe morti , cæterisque morti præeuntibus , aut eam sequentibus. Hinc Adamus esurire , sitire , ac mori necessitate quoddam est coactus , & post obitum , corruptela ejus corpori dominata est , tum alia iis similia. Porro sempiternus Dei Filius Adameum corpus assumpsit , hoc est ipse sibi ex purissimo Sanctissimæ Virginis Mariæ sanguine illibatum , & ab omni macula peccati liberum finxit : ob id nullum jus in ipsum mors habuit , nec illa quæ mortem antecedunt , uti fames , ac reliquarum culpæ carentium multitudo passionum , ut jam ostendimus ; sed neque mortem consequens corporum corruptio , de qua Dei progenitor ille David in Psalmo ita prædixit : Non derelinques animam meam in inferno , nec dabis Sanctum tuum videre corruptionem.*

XXIII. Itaque , si mors ac cætera præcedentia ac sequentia nullum jus habuit in Christum , non ex naturali humanæ ipsius naturæ propensione ac pondere ista contingere potuerunt ; sed tantum ex accidenti , ut exprimit Lullus. Similiter Damascenus , lib. 3. cap. 28. (apud Petavium , loc. cit. cap. 3. num. 2.) admittit in Christo illas passiones , famem , sitim , &c. non autem summam & ultimam in ea , ex quibus constat , corporis resolutionem , & ejus dissipationem : Unde ipse , ibidem , lib. 3. cap. 20. (apud Petavium ibi , cap. 4. n. 8.) ait : *Quo circa naturales nostræ passiones , & secundum naturam , & supra naturam in Christo fuerunt : secundum naturam enim in ipso commovebantur quando carni permittebat , ut quæ sunt ejus propria pateretur ; supra naturam verò quoniam non antecedeant in Domino , quæ naturalia erant , ejus voluntatem ; nam nihil coactum in eo consideratur , sed voluntaria omnia. Itaque volens esuriit , volens sitivit , volens timuit , volens est mortuus. D. Anselmus , lib. 2. Cur Deus homo , cap. 10. etiam ait : Utrum autem homo ille (Christus) sit moriturus ex debito , sicut alii homines ex debito moriuntur , non investigare debemus : sed si Adam moriturus non erat , si non peccasset , multò magis iste mortem pati non debebit , in quo peccatum esse non poterit , quia Deus erit ; & cap. 11. ad quæstionem , an Christus possit mori ? Respondet Boso , quod ita , cum omnis homo naturaliter mortalis sit ; at Anselmus ita dicit : Non puto mortalitatem ad puram , sed ad corruptam , hominis na-*

turam pertinere ; & concludit : *Quare non sufficit ad demonstrandum , illum hominem debere mortalem esse , hoc quia verus homo erit ; & tandem posse mori reducit ad sui ipsius omnipotentiam.* Demum , post multa concludit Boso : *Videō hominem illum planè , quem quærimus , talem esse oportere , qui nec ex necessitate moriatur , quoniam erit omnipotens ; nec ex debito , quia nunquam peccator erit , & mori possit ex libera voluntate , quia necessarium erit.* Similia repetit. cap. 18.

XXIV. Nec contra prædicta obstat illud August. lib. 2. de Peccator. mer. & Remis. cap. 20. ubi ait : *Sed quia in eo (Christo) erat similitudo carnis peccati , mutationes ætatum perpeti voluit , ab ipsa exortus infantia , ut ad mortem videatur etiam senescendo illa caro pervenire potuisse , nisi juvenis fuisset occisus :* Non inquam obstat , tum quia non tamquam aliquid certum illud exponit Augustinus , sed quia sic videatur ; tum etiam quia hoc intelligitur supposito quoddam ita voluisset , sicut voluit mutationes ætatum suscipere ; si enim voluisset corpus compositum ex elementis dissipari , non conservando ipsum per unionem cum Deitate , tunc fuisset corpus resolutum , & ad totalem pervenisset defectionem. Ad hoc ipsum alludit D. Bern. lib. de grat. & liber. arbitr. cap. 3. num. 8. dicens : “ Porro & à miseria , quæ
 „ est pœna peccati , habuit nihilominus libertatem , sed potentiā ,
 „ non actu ; nemo quippè tollebat animam ejus ab eo , sed ipse po-
 „ nebat eam. Denique , teste Prophetâ : *oblatus est quia ipse voluit* , si-
 „ cut & cum voluit natus ex muliere , factus sub lege , ut eos , qui
 „ sub lege erant , redimeret. Fuit itaque & ipse sub lege miseriæ ,
 „ sed fuit quia voluit , ut liber inter miseros & peccatores utrumque
 „ jugum fraternis à cervicibus excuteret.

§. III.

*Substantia naturaliter non potest creari nec esse sine accidente , nec acci-
 dens sine substantia ; bene verò supernaturaliter ; quoad propositionem 6.*

XXV. Ad sextam propositionem hic adducitur textus : *substan-
 tia sine accidente creari non potest , & è contrariò , cum relativè se ha-
 beant.* Quæst. 86. Sent. circa finem.

XXVI. Lullus in hac quæst. 86. inquit : *Utrum gratia gratum fa-
 ciens , & virtus gratuita differant per essentiam ?* Et postquam resolvit
 affirmativè , Eremita , num. 3. objicit , quoddam *Deus non potest facere
 gratiam sine charitate , & quod Deus non potest dare charitatem sine gra-*

Text. prop. 6. *ria, & sic de Fide, & Spe, & ita gratia gratum faciens & virtus gratuita sunt idem per essentiam, cum una non possit esse sine alia in agente, nec in patiente; at num. 3. sic respondet Lullus: Substantia non potest creari sine accidente, nec è conversò, cum relativè se habeant, sicut substantia mundi, quæ non potuit creari sine quantitate, nec quantitas sine subjecto? verumtamen, quamvis substantia naturaliter non possit esse sine accidente, nec è conversò, nec Deus possit unum facere sine alio, non tamen sequitur, quòd substantia sit accidens, nec accidens substantia: similiter est de gratia, & virtute, & ita tua ratio non procedit.*

XXVII. Planè inspecto toto contextu, clarè apparet sensus Lulli rectus, & obvius, quia in secunda ejusdem parte explicatur prima ejus pars, ita ut intelligatur, quòd *naturaliter* non potest creari substantia sine accidente, nec accidens sine substantia: Unde, cum etiam in exemplari Panormitano, quod vidit iste Censor habeatur explicatio per *ly naturaliter*, satis mirari non possum, hunc Censorem præfatam notasse propositionem, & eam à contextu avulsam exposuisse; cum ratio dicet juxta contextum esse intelligenda verba cujusque Autoris. Porro sententiam Lulli esse, quòd substantia supernaturaliter potest creari & esse sine accidente, & accidens sine substantia, indicat sufficienter Lullus in hoc eodem libro, à q. 125. ubi agens de Sacramento Altaris, sæpè repetit accidentia panis manere supernaturaliter sine subjecto; & omissis aliis libris expressè hoc probat in lib. de Articulis ab Episc. Parisien. damnatis, ubi plures impugnat articulos contrarium prætendentes, signanter Artic. 138. 139. & aliis pluribus.

§. I V.

Docet Lullus in prop. 7. *Animam non habere, id est, non fuisse ipsè datum, liberum arbitrium ad malum, uti ad bonum, sed simpliciter ad bonum.*

XXVIII. Hunc Textum septimo loco notat laudatus Censor: *Anima suum liberum arbitrium non habet invicem ad bonum aut ad malum, sed simpliciter ad bonum, sed homo, qui est ex duabus naturis deliberat cum libero arbitrio ad agendum oppositum cujuslibet naturæ. Quæst. 90. Sent. num. 2.*

XXIX. In hac quæstione inquit Lullus: *Utrum anima possit insicere carne?* Et ad ejus solutionem, num. 1. ita discurret: "*Raymundus* respondit duobus modis ad hanc quæstionem, scilicet per partici-

„ pationem, & per dispositionem : per participationem, dicens : vi-
 „ num rubeum mixtum cum aqua in mixto, quod est tertium ex ip-
 „ sis, est fractum & remissum quoad suam intensitatem coloris &
 „ saporis ; & hoc est ideo, quia participat cum aqua, quæ est fri-
 „ gida & humida, & ipsum est calidum & siccum, & ideo est mu-
 „ tatum & alteratum de intensa quantitate in extensam ratione par-
 „ ticipationis contrarietatis : à simili, quando anima creatur, & infun-
 „ ditur in corpus hominis, ipsa venit munda & pura, & cum suo conna-
 „ turali libero arbitrio, & corpus cum sua elementativa, vegetativa,
 „ sensitiva, & imaginativa. . . & per sensitivam habet (corpus)
 „ magnam potestatem & malam appetendi magna delectabilia sensi-
 „ bilia contra castitatem, temperantiam, justitiam, prudentiam,
 „ fortitudinem, patientiam, & abstinentiam, & sic de similibus vir-
 „ tutibus ; & hoc est quia sensitiva naturaliter est absoluta ad appe-
 „ tendam magnam inhonestam & inordinatam delectabilitatem : per
 „ imaginativam habet corpus naturam multiplicandi concupiscibile
 „ & irascibile, & inflammationem & augmentationem carnis, & sic
 „ de aliis : Unde quando anima sic venit ad corpus & corpus ad
 „ animam, ut supra dictum est, constituunt tertium, quod est homo,
 „ in quo anima est mutata & infecta, non quoad suam essentiam &
 „ naturam, sed quoad hoc, quod ipsa est in homine, qui natura-
 „ liter de ipsa agit in corpore, ut sit ejus forma & ipsum moveat
 „ ad elementandum, vegetandum, sentiendum, & imaginandum,
 „ permanente corpore cum suis connaturalibus supradictis proprie-
 „ tatibus : & ideo anima recipit infectionem à carne, agendo de cor-
 „ pore naturaliter secundum naturam corporis, quæ natura est dif-
 „ fusa in prædictis potentiis corporis.

XXX. Prosequitur, num. 2. dicens : *Præterea anima recipit infec-*
tionem à carne, dum homo per liberum arbitrium animæ deliberat ad
agendum bonum vel malum, honestum vel inhonestum ; cum anima non
habeat suum liberum arbitrium perinde (in exemplari Panormitano di-
citur invicem) ad bonum & malum, sed simpliciter ad bonum, sed homo,
qui est ex duabus naturis, cum libero arbitrio deliberat ad agendum se-
cundum appetitum cujuslibet naturæ : unde sequitur quod anima per acci-
dens sit infecta & remissa in participando cum corpore : sicut castitas,
quæ est infecta & remissa in homine casto, qui tentatur à luxuria, & de-
liberat utrum velit luxuriari vel non ; & sicut anima est mutata, & in-
fecta per liberum arbitrium (id est, quoad liberum arbitrium) sic est
mutata & infecta per suam voluntatem, intellectum, & memoriam, cum

Text. prop.
7.

quibus homo agit in diligendo inhonestam delectationem corporis, & intelligendo, & recolendo ipsam: Et ideo, Eremita, per prædicta patet quòd anima sit infecta à carne per participationem, & infectio carnis est à primis Parentibus.

XXXI. Ex toto hoc contextu patet, quòd Lullus, ut ostendat animam per participationem infici à carne vitiata per peccatum primorum Parentum, exponit *Primò*, differentem habitudinem & ordinationem animæ & corporis per hoc, quòd corpus per suas potentias, præcipuè sensitivam & imaginativam, inclinatur & appetit sensibilia inhonesta, & delectabilia; anima verò, quia cum libero suo arbitrio suisque potentiis venit pura & munda à Deo, à quo creatur & infunditur, nullam de se & per se dicit habitudinem & ordinationem ad inhonesta sensibilia & delectabilia: Unde, quia unitur cum corpore tamquam ipsius forma, participat cum ipso, utpote ambo sunt partes hominis, & per hoc dupliciter inficitur à corpore, tum quoad motum naturalem, quatenus naturaliter ut forma naturalis movet corpus quoad sensitivam ad naturales motus sensitivæ; cuius motus ex infectione originalis peccati sunt foedi; tum quoad deliberationem, dum homo deliberat an actum malum & inhonestum exerceat, quia anima de se, & per se non ordinatur nec inclinatur ad malum; quia tamen homo sensualiter motus cum anima deliberat an faciat illud malum, anima ratione corporis, & quia applicatur ab homine, habet illam deliberationem, ad quam per se non ordinatur, utpote per se non inclinatur ad malum.

XXXII. Unde, ut ait, num. 2. per verba notata à laudato Censore, *anima recipit infectionem à carne, dum homo per liberum arbitrium animæ deliberat ad agendum bonum vel malum, honestum vel inhonestum, cum anima non habeat suum liberum arbitrium perinde ad bonum & malum, sed simpliciter ad bonum*: id est, quia liberum arbitrium de se & per se non ordinatur nec propendit indifferenter ad bonum, & ad malum, sicut sensitiva corporis de se inclinatur & appetit delectabilia & inhonesta, ideo, cum homo à carne occasionatus utitur libero arbitrio animæ ad illam deliberationem, ad quam anima per liberum arbitrium per se non ordinatur, ipsa tunc inficitur, quia de sua ordinatione naturali non habet sic deliberare, *sed homo, qui est ex duabus naturis* (anima videlicet & corpore) *cum libero arbitrio deliberat ad agendum, secundum appetitum cujuslibet naturæ*, id est, vel naturæ corporis, quæ de se inclinatur ad malum, vel naturæ animæ, quæ de se simpliciter ordinatur ad bonum; & propterea anima sic participans

participans cum corpore sic est *per accidens infecta*, & remissa quatenus per talem deliberationem remittitur illa naturalis ejus inclinatio ad bonum: sicut dum homo castus tentatur à luxuria & deliberat, an velit luxuriari vel non, inficitur ejus castitas, quatenus non venit de ejus natura & inclinatione illa deliberatio, & per hoc castitas remittitur, quatenus vigorosè non movet ad fugiendam luxuriam.

XXXIII. Proinde illa verba: *Cùm anima non habeat suum liberum arbitrium perinde ad bonum & malum, sed simpliciter ad bonum*, tantùm ex contextu significant, quòd anima, vel liberum arbitrium animæ, per se & ex vi creationis non ordinatur & appetit æqualiter bonum & malum, sed simpliciter se habet seu inclinatur ad bonum, quia ad hunc finem unicè est à Deo creata. Hoc idem explicat ipse, quæst. 68. *Utrùm confirmatio, vel obstinatio mutet vel minuat libertatem arbitrii?* Ubi ad solutionem hujus quæstionis sic, num. 1. dicitur: *Raymundus consideravit liberum arbitrium hominis, quia dixit, quod liberum arbitrium sit potentia & instrumentum, per quod homo potest eligere bonum, & vitare malum, & est essenziale animæ, non corpori, sed quia anima conjuncta participat cum corpore, & corpus appetit sentire per sensitivum, sicut comedere, coire, &c. & non habet habitum de se electivum; anima ad honestum, vel in honestum per accidens habet liberum arbitrium, ut ratione naturæ sensitivæ possit appetere inhonestum, comedere, coire, &c. & per inhonestum sentire habet liberum arbitrium ad imaginandum, intelligendum, recolendum, & diligendum vitium.*

XXXIV. Quare per dicta notata verba non intendit Lullus, quòd liberum arbitrium æquè non deserviat homini ad bonum & ad malum, vel quòd ad utrumque non sit homo æquè liber, quia hoc expressè affirmat in verbis subsequenibus, dum dicit: *Sed homo qui est ex duabus naturis* (animâ videlicet & corpore) *cum libero arbitrio deliberat ad agendum secundum appetitum cujuslibet naturæ*; id est, animæ vel corporis: quod idem tenet in subsequenti contextu ejusdem quæstionis, & in aliis plurimis: Unde in eadem quæstione, num. 5. respondens Eremitæ, ait: *Licet tua anima non sit de primis Parentibus, tamen est infecta à carne per participationem, & in quantum homo per ipsam deliberat ad agendum inhonestum, diligendo delectabilia corpori, ut prædictum est; verumtamen tua ratio valeret, si homo non esset de essentia animæ* (id est, ex essentia animæ constitutus) *nec cum ipsa ageret inhonestum cum corpore.*

XXXV. Totam superallatam Lulli doctrinam de libero arbitrio, quòd videlicet de se purè se habeat ad bonum, non autem ad malum,

tenet D. Bonaventura, in *Compen. Theolog. Verā.* lib. 2. cap. 30. ubi loquens de anima rationali, dicit: *Ed recta, quo naturaliter appetens est bonitatis; sed expressius in 2. sent. dist. 25. art. 2. q. 3. litt. 1. ubi quæritur: Utrum liberum arbitrium secundum quod liberum, possit in malum?* Et in ejus resolutione dicit: *Alio modo contingit loqui de libero arbitrio secundum quod reperitur in creatura, & sic est loqui de ipso dupliciter: aut in quantum liberum, aut in quantum deficiens. Si in quantum liberum, sic natum est exire in actum æquitatis susceptibilem, & æquitatem informatum: si autem loquamur de ipso in quantum deficiens, sic liberum arbitrium in quantum arbitrium liberum, potest & exire in actum deliberativum, quia deficiens exire in actum deformatum, & ita in malum.* Et ad objectionem 2. num. 51. dicit: *Ad illud, quod objicitur, quod liberum arbitrium de se eligit malum; dicendum, quod etsi sufficiat ad eligendum malum pro eo quod facilius est deficere, quā proficere; non tamen ad illud ordinatur principaliter, quoniam hoc non convenit ei secundum naturæ propriæ complementum, sed potius secundum propriæ naturæ defectum.* Similiter loquitur ipse D. Bonaventura, dist. 44. art. 1. quæst. 1. *Utrum potentia peccandi sit in nobis à Deo?* Ubi resolvit quod potentia peccandi secundum quod potentia est, absque dubio à Deo est: *Si autem loquamur, ait, de ordinabilitate illa (dictæ potentie) respectu deformitatis, sic, cum illa deformitas nihil aliud sit quā privatio & defectus, talis ordinabilitas nihil aliud est quā defectibilitas, & ideo, sicut defectus deformitatis non est à Deo, sic nec talis defectibilitas est à Deo, sed est in ipsa creatura rationali quia ex nihilo.* Idem docet D. Thomas in 2. dist. 44. quæst. 1. ubi in corpore ait, quod *potentia voluntatis humanæ est per se ordinata ad bonum; & concludit, quod potentia peccandi, quantum ad id quod potentia est, à Deo est; sed quantum ad defectum, qui implicatur, non est à Deo.*

XXXVI. Eundem Lulli sensum exponit D. Bernardus, lib. de grat. & libero arbit. cap. 7. num. 27. dicens: “De tribus ergo liber-
 „tatibus, quas acceperat (Adam) abutendo illā, quæ dicitur ar-
 „bitrii, reliquis sese privavit. In eo autem abusus est, quod illam
 „cum accepisset ad gloriam, convertit sibi in contumeliam, juxta
 „testimonium scripturæ dicentis: *Homo, cum in honore esset, non*
 „*intellexit, comparatus est jumentis insipientibus, & similis factus est illis.*
 „Soli inter animantia datum est homini posse peccare, ob præro-
 „gativam liberi arbitrii. Datum est autem, non ut proinde peccaret,
 „sed ut gloriosior appareret, si non peccaret, cum peccare posset.
 „Quid namque gloriosius ei esse poterat, quā si de ipso diceretur

» quod scriptura perhibet, dicens : *Quis est hic , & laudabimus eum ?*
 » Unde ita laudandus ? *Fecit enim mirabilia in vita sua.* Quæ ? *Qui*
 » *potuit transgredi*, inquit, *& non est transgressus , facere mala , &*
 » *non fecit.* Hunc ergo honorem quandiu absque peccato fuit, serva-
 » vit ; amisit, cùm peccavit. Peccavit autem, quia liberum ei fuit ;
 » nec aliunde profectò liberum, nisi ex libertate arbitrii, de qua
 » utique inerat ei possibilitas peccandi. Nec tamen fuit culpa dantis,
 » sed abutentis, qui ipsam videlicet facultatem convertit in usum
 » peccandi, quam acceperat ad gloriam non peccandi. Nam etsi pec-
 » cavit ex posse, quod accepit, non tamen quia potuit, sed quia
 » voluit. Nec enim prævaricante diabolò & Angelis ejus, etiam alii
 » prævaricati sunt, non quia non potuerunt, sed quia noluerunt.
 » Peccantis igitur lapsus, non dono adscribendus est potestatis, sed
 » vicio voluntatis. »

XXXVII. Expressius fortè loquitur D. August. lib. 2. de liber.
 arbit. cap. 1. num. 3. dicens : « Planè si hæc ita sunt, soluta quæstio
 » est, quam proposuisti; si enim homo aliquod bonum est, & non
 » posset, nisi, cùm vellet, rectè facere, debuit habere liberam vo-
 » luntatem, sine qua rectè facere non posset. *Non enim, quia per illam*
 » *etiam peccatur, ad hoc eam Deum dedisse credendum est.* Satis ergo
 » causæ est, cur dari debuerit, quoniam sine illa homo rectè non
 » potest vivere. *Ad hoc autem datam, vel hinc intelligi potest, quia*
 » *si quis ea usus fuerit ad peccandum, divinitus in eum vindicatur:*
 » *Quod injustè fieret, si non solum ut rectè viveretur, sed etiam ut pec-*
 » *caretur libera esset voluntas data.* Quomodo enim justè vindicaretur
 » in eum, qui ad hanc rem usus esset voluntate, ad quam rem data
 » est? Nunc verò Deus, cùm peccantem punit, quid videtur tibi
 » aliud dicere, nisi, cur non ad eam rem usus es liberâ voluntate,
 » ad quam tibi eam dedi, hoc est ad rectè faciendum? Deinde illud
 » bonum, quò commendatur ipsa justitia in damnandis peccatis,
 » rectèque factis honorandis, quomodo esset, si homo careret libero
 » arbitrio? . . . Debit igitur Deus dare homini liberam volunta-
 » tem. » Cùm itaque Deus liberum arbitrium non dederit animæ ad
 » peccandum, sed ad rectè vivendum, quia anima eò ipsum habet,
 » quo datum est ipsi, ideo non habet liberum arbitrium, æquè ad bo-
 » num & ad malum, sed simpliciter ad bonum, licet ad utrumque
 » possibilitatem habeat.

D I S S E R T A T I O I I.

De Propositionibus 8. 9. 10. 11. & 12. ex Quæst. 94. 98. 102. & 133. Lib. Sentent.

§. I.

In Propos. 8. docet Lullus humanitatem in Christo non habere proprium suppositum.

I. OCTAVO loco notat laudatus Cenfor hunc textum : *Natura humana in Christo per se neque in se suppositum facit, sive hominem, sed de ipsa factus est homo in natura divina, sive in divino supposito, quod in se facit hominem de humana natura.* Quæst. 94. Sent. num. 2.

Censura. *Confusè loquitur de natura humana assumpta à Verbo, ut discerni non possit, an in Christo habuerit propriè suppositum humanum. Nunc videtur sibi contradicere, nunc verò suppositum humanum in Christo ponere.*

II. Tam clara & aperta est Lulli sententia cum Catholica Doctrina, quòd scilicet humanitas Christi non habuerit proprium suppositum, sed unicè suppositum divinæ naturæ, quatenus Filius divinus fuit & est ejus suppositum, ut, præter alios libros, in quibus passim hoc repetit, palpabilis sit hæc veritas in hoc eodem libro sententiarum in fere omnibus quæstionibus, quæ de Christo agunt; nam quæst. 95. num. 1. ait : “ Sicut Deus non potuit assumere hominem, ” sed humanitatem, ut suppositum non assumeret suppositum, non assumpsit hominem, ut non essent duo supposita, sed unum, vel ut suppositum superveniens non esset diminutum; & remissum; sed assumpsit humanitatem, & in seipso fecit de ipsa, & per ipsam existere hominem : similiter, &c. ” Quæst. 96. num. 2. “ Item sicut Deus non assumpsit hominem, sed humanitatem, sic, &c. ”

III. Præterea quæst. 101. inquit : *Utrum hæc propositio sit vera : Deus assumpsit hominem ?* Et illam resolvit negativè ; unde num. 1. dicit : “ Quòd homo sit suppositum constitutum ex anima & corpore, per se existens, habens proprietatem & naturam generandi

„ alium hominem, & sua essentia est humanitas, & esse suæ & ip-
 „ sius essentia est homo, qui habet naturam generandi, essentia verò
 „ non; & ideo Deus assumpsit humanitatem, & non hominem „.
 Et num. 2. „ Item Deus Filius est suppositum, & homo est suppo-
 „ situm: Unde, si Deus assumpsisset hominem, de necessitate se-
 „ queretur, quòd Christus esset duo supposita, vel unum compo-
 „ situm ex duobus, & sic Christus non esset una Persona, in qua Deus
 „ esset homo, & homo esset Deus: & si esset una Persona ex duo-
 „ bus suppositis, Christus non esset Deus nec homo, nec Deus &
 „ homo essent Christus, vel in Christo totum esset pars, & pars es-
 „ set totum; quod est impossibile: & ideo, ut prædicta inconve-
 „ nientia non sequantur, Deus assumpsit humanam naturam, & non
 „ hominem; & de ipsa humana natura se fecit hominem, ut esset
 „ unum suppositum ex duabus essentiis & naturis „. Arguit Eremita,
 num. 3. sic: „ Deus non potuit completè assumere humanam natu-
 „ ram, nisi assumpsisset animam conjunctam cum corpore, sine qui-
 „ bus homo non potest esse; sed animâ conjunctâ cum corpore in
 „ uno indivisibili instanti sequitur homo; & ideo Deus assumpsit ho-
 „ minem, aliàs Deus non potuit assumere humanam naturam, nec
 „ se facere hominem „. At num. 4. ita respondet Lullus: „ Incar-
 „ natio non fuit facta simpliciter (solum & unicè) secundum divi-
 „ nam naturam, nec secundum humanam naturam, sed secundum
 „ naturam utriusque, artificialiter: sicut Deus, qui assumpsit ani-
 „ mam & corpus, & in seipso homificando se (faciendo se hominem)
 „ ex utroque, conjunxit animam cum corpore, & hoc potuit in eo-
 „ dem instanti indivisibili, cum sit Dominus & Creator illius instan-
 „ tis; sed secundum naturam creatam verum dicis; & quia Incar-
 „ natio non fuit facta secundum naturam, non debes arguere per
 „ naturam; cum modus faciendi naturalis sit unus, & alius artificia-
 „ lis & supra naturam.

IV. Deinde, quæst. 102. num. 1. dicit: „ Quòd in Christo sint
 „ duæ naturæ, scilicet divina, & humana, & per Divinam in Christo
 „ fit unum suppositum, quod est Deus, & in illo supposito fit fac-
 „ tus homo de humana natura, quæ (in exemplari manuscripto,
 „ qui, sicut in editione Panormitana) est suppositum non distinctum
 „ à divino supposito, ut in Christo non sint duo supposita, sed unum,
 „ & sic unus Christus, sicut tres Personæ sunt unus Deus; & sicut
 „ Pater est Deus, & Filius est Deus, & Sanctus Spiritus est Deus,
 „ sic Deus est Christus, & homo est Christus, & Christus est Deus,

„ & Christus est homo, & sic Deus est homo ; & ideo secundum
 „ hunc modum numerandi dixit quod Christus sit duo, scilicet Deus,
 „ qui est unum suppositum, & homo qui est suppositum ; sed quia
 „ Deus est homo, & homo est Deus, non fuit ausus dicere, quod
 „ Christus sit duo supposita, quia si diceret affirmaret quod Deus
 „ in Christo non sit homo, nec homo sit Deus, quod est contra
 „ Sanctam Catholicam fidem ». Et num. 4. in responsione ad ob-
 „ jectionem ait : « Tua ratio esset vera, si Deus assumpsisset homi-
 „ nem, sed supra in proxima quaestione est probatum, quod non
 „ assumpserit hominem sed humanam naturam, de qua se fecit ho-
 „ minem in seipso, ut cum ipso sit unum suppositum, & non duo
 „ supposita ; quod suppositum est duo, scilicet Deus & homo, qui
 „ sunt illud suppositum ». Et num. 5. « Et quando dicis quod con-
 „ veniat, quod in Christo sint duo supposita, postquam ipse est duo,
 „ scilicet Deus & homo, non sequitur : cum homo (in Christo sci-
 „ licet) in se non sit suppositum, sed de sua humanitate factum est
 „ suppositum in divino supposito, in quo est sustentatus & factus,
 „ & in ipso est hoc quod est, & sine ipso non esset hoc quod est,
 „ nec per se sustentatus ; ratione cujus non potest esse per se sim-
 „ pliciter suppositum ; cum de natura suppositi sit, quod sit per se
 „ subsistens & sustentatum, & quod (per se) sit hoc quod est.

V. Ulterius, q. 104. num. 1. ait : « Sicut in divino supposito quod
 „ est divina Filiatio, est factus homo de humana natura, & susten-
 „ tatus in supposito, & unitus cum ipso, sic, &c. ». Et infra : « Ta-
 „ men negavit, quod in Christo sint duo supposita, sed unum, ut in
 „ praeallegata quaestione (scilicet 102.) probatum est ». Idem, q. 105.
 num. 1. scribit : « Christus secundum quod est Deus est individuum,
 „ sed non duo individua, sed unus Christus, qui est unum indivi-
 „ duum & unum esse, quod est Deus & homo : & sicut in indivi-
 „ duo, quod est Deus Filius, est homo factus de humana natura,
 „ sic in individuo, quod est Deus Filius, est individuatum & fac-
 „ tum individuum, quod est homo, tali modo quod sit unum indi-
 „ viduum, quod est Christus, & non duo, sed remanent duae dis-
 „ tinctae essentiae & naturae ». Et num. 3. ». respondens ad objectio-
 „ nem Eremitae, ait : « Sed ut melius intelligas, adhuc dico tibi, quod
 „ in quolibet homine unum sit *esse* corporis, & aliud sit *esse* animae,
 „ & ex utroque esse actu sequitur horum quod est tertium (*esse*) &
 „ unum individuum ; & iste est unus modus essendi individui ; sed
 „ alius modus individui est in Christo, quia in quolibet homine est

esse corporis actu, & esse animæ similiter, & unum actualiter veniunt ad aliud, quolibet remanente actu, & constituunt tertium esse... sed in Christo fuit assumpta humana natura de Beata Virgine, quæ humana natura non erat actu, sed fuit deducta in esse in divino esse, in quo homo habuit esse ex humana natura. Quæst. 107. num. 2. ait, quodd si Christus assumpsisset potentiam peccandi in Christo homo esset factus in seipso de sua natura & non in divino supposito; Et num. 4. loquens de modo, per quem in divino supposito fuit factus homo, ait quodd sicut homo Christus fuit factus homo in divino supposito, & non in seipso, sic suum liberum arbitrium & quidquid pertinet ad rationalem animam, fuit creatum in divino supposito.

VI. Ex hucusque relatis nedum constat sensum Lulli esse, quodd in Christo non est proprium humanæ naturæ suppositum, quia unice divinum suppositum est divinæ & humanæ naturæ suppositum; sed etiam aperitur ratio, cur ita sit, videlicet quia homo in Christo non est factus in seipso, sed in divino supposito, quia divinum suppositum uniendo sibi humanitatem se fecit hominem de ipsa, uniendo sibi corpus & animam, quibus est concretum seu esse, in quo sistunt, & sustentantur: unde, si aliquid subobscurum alicubi legeretur, ex contextu citato deberet intelligi; At neque hoc est necesse, cum satis clarè loquatur Lullus in ipsa notata quæstione 34. sentent. in qua inquiritur: *Utrum Deus per unionem aliter existat in assumpta humanitate, quàm in aliis creaturis?* quam resolvit affirmativè, & per tres distinctos modos ostendit diversitatem existendi in humanitate assumpta, ac in aliis creaturis.

VII. Primum modum exponit, num. 1. dicens: *Deus est cum assumpta natura una persona ex duabus naturis, scilicet ex divina, & humana, & Persona quæ est Christus, non est tertium ex ipsis: Unde sequitur quodd Christus Deus sit ipsa Persona, & homo Christus etiam, & Persona Deus sit homo: & Deus per Deitatem, & homo per humanitatem, & una est Deitas, & alia humanitas: & secundum talem modum existendi non existit cum aliqua creatura; nam si cum aliqua alia creatura ita esset unitus, per illam esset creatura, sicut per humanitatem, quam assumpsit, est homo; imò dico tibi, quodd nullum creatum ens, sic possit esse unitum cum alio, sicut in Christo sunt unitæ duæ naturæ: non in substantia solis, cum sol sit tertium compositum ex forma & materia, qui non est sua forma, nec materia, nec forma est sol, & sic de sua materia: sed in Christo Deus est homo, & homo est Deus, & Deus est Christus, & homo est Christus, & Christus est homo Deus; & ratio est, quia*

Text.
prop. 2.

humana natura in Christo nec per se, nec in se, facit suppositum vel hominem, sed de ipsa factus est homo in divina natura, vel in divino supposito, quod in se facit se hominem de humana natura.

VIII. Nescio, quid clarius dici poterat, ut intelligeretur naturam humanam in Christo non habere proprium suppositum humanum, sed tantum ejus suppositum esse suppositum Divinum; nam *Primò* explicat Lullus quòd Deus est cum assumptâ naturâ una Persona ex duabus naturis, & quòd hæc Persona est Deus; deinde quòd Persona, quæ est Christus, non est tertium ex ipsis naturis, id est, non est sicut compositum ex forma & materia, quod est tertium ex forma & materia, quia eadem Persona est Deus, & homo, & Deus per humanitatem, quam assumpsit, est homo, & homo est Deus, & Deus est Christus, & homo est Christus, & Christus est homo Deus: hæc autem omnia non possent verificari, si humana natura haberet proprium suppositum. *Tertiò*, maximè quia horum omnium explicat rationem, scilicet *quia humana natura in Christo nec per se, nec in se, facit suppositum, vel hominem*; & ideo non habet proprium suppositum, quia suppositum proprium humanæ naturæ est illud, quod ex humana natura fit in se, & per se, ita ut in ipso sistat, & sustentetur ipsa, & in ipsa natura per se fit, & existit.

IX. Unde postquam per prædicta verba adeo expressè negat Lullus proprium suppositum in humana natura, non illud, sibi contradicens, adstruit, ut opponit laudatus Censor, per immediatè subsequentiâ verba, videlicet: *sed de ipsa factus est homo in divina natura, vel in divino supposito, quod in se facit se hominem de humana natura*: imò per hæc verba magis confirmat prædicta; nam si divinum suppositum in se facit hominem de humana natura, suppositum humanæ naturæ, quod est homo, non est proprium humanæ naturæ suppositum; sed suppositum divinum, quod de humana natura se facit hominem, & sic se facit suppositum humanæ naturæ; quia verò de humana natura in se, & per se, non fit homo, sed tantum fit homo de ipsa in divino supposito, vel tantum divinum suppositum in se fit homo de ipsa, ideo ipsa non habet proprium suppositum, quoniam proprium naturæ humanæ suppositum est illud naturæ concretum, quod per se fit in natura, ita ut illud concretum in se sustentetur & in se subsistat, in eoque sistat ultimatè naturæ tendentia: in Christo autem, homo, qui fit de humana natura, est divinum suppositum, quod de humanâ natura, quam sibi unit, se facit hominem, & ita humana natura tantum sistit in divino supposito, non in proprio.

X. Nec

X. Nec ille loquendi modus, quò utitur Lullus, videlicet quòd *humana natura in Christo nec per se nec in se facit suppositum vel hominem, sed de ipsa factus est homo in divina natura, vel in divino supposito, quod in se facit se hominem de humana natura*: est absonus, & à modo loquendi Patrum, & Doctorum deviat, imò exponit, *Primò*, fundamentalem rationem, cur non est in Christo proprium humanum suppositum, ac proinde distinctum à divino supposito, & *Secundò*, quare in Christo Deus est homo, & homo est Deus, & Christus est Deus & homo; nam, ut explicat Lullus in locis adductis, num. 4. & 5. per hoc in aliis hominibus est proprium humanæ naturæ suppositum, quia ex corpore & anima unitis secundum suum esse in actu, resultat & fit unum esse & tertium seu concretum substantivum, quod est homo, & hoc est quia ex ipsis seu ex humana natura per se resultat, & fit in ipsamet natura, id est, in ipsomet naturali ipsius ordine: & illud concretum seu homo in se sistit & sustentatur; at in Christo non fuit sic, quia corpus fuit formatum in divino supposito, & anima in ipso creata, & ex ipsis non fuit factus homo in se, & per se, id est in proprio connaturali ordine, sed fuit factus homo in divino supposito, seu divinum suppositum fuit homo ex anima & corpore, & propterea Deus est ille homo ex anima & corpore constitutus, & ille homo est Deus, & Christus est Deus homo.

XI. Hoc necesse fuit ita fieri, ut evitaretur hæresis Nestorii, qui supposebat ex anima & corpore Christi factum fuisse hominem ex humana natura per se, & secundum ejus naturalem ordinem, illumque hominem in se factum & existentem fuisse assumptum à Dei Verbo, & propterea duplicem asserere Personam, & negabat eundem esse illum hominem, ac Deum, prout, si ita fuisset facta Incarnatio, legitimè discurrebat, sed quia, ut constat ex Doctrinis Lulli supra adductis, corpus Christi fuit formatum in supposito divino, in eoque fuit creata anima, & ex ipsis fuit factus homo, non in seipsis, & per se, seu in suo naturali ordine, sed in divino supposito, quod sic se fecit hominem ex ipsis, ideo ille homo sic factus fuit divinum suppositum, non humanum, seu proprium naturæ humanæ; & ita ille homo fuit filius divinus, & filius divinus & Christus, fuit ille homo Deus.

XII. Præterea modus loquendi Lulli non deviat à Patribus & Doctoribus, nam Damascenus, lib. 3. de fid. cap. 12. ait: *sed ipse substantialiter & verè homo factus, id est, in sua hypostasi animatam carnem rationabili & intelligente animâ sustentans, & ipse factus illi est*

hypostasis. Ferrandus, *Epist. ad Severum* (apud Petavium, tom. 4. lib. 2. de Incarn. cap. 1. num. 7.) scribit : *non enim hominem formatum , neque conceptum , neque vitam suam quandam , vel in Matris utero , vivere jam incipientem , Deus assumpsit , sed omnino antequam Maria aliquid conciperet , Deus assumpsit ex ea , quam habere voluit Matrem , nostri generis veram carnem : ex ipsa assumptione conceptus , & natus*. Et D. Epiphanius (apud Petavium, ibid. num. 9.) explicans quid sit *Verbum assumpsisse perfectum hominem*, dicit, hoc idem esse, ac in seipsum formavit, assumendo propriam humanitatem.

XIII. Ad explicationem Personæ, quæ ex relatis Lulli verbis colligitur, collimat illa Personæ descriptio, quam Petavius, ibid. cap. 12. n. 2. ex Leontio exponit, videlicet quoddam sit *individua substantia per semetipsam existens, & propria terminatione circumscripta*; atque ita, cum sic non fuerit homo factus in Christo, sed in Filio, non fuit proprium humanæ naturæ suppositum, & propterea non fuit homo in se & per se factus in Christo, sed in Verbo, quod se fecit hominem, ut pluribus videri potest apud Petavium, lib. 4. de Incarn. cap. 11, 12, & pluribus aliis; & lib. 10. cap. 1. num. 2. Rusticus Diaconus ita scribit: *Ob hoc eam (humanitatem) creavit, non ut sua, sed ut ejus esset, & super semetipso eam fundavit, tanquam super basim quamdam vel fundamentum, ut vera dicam: ut per eam perficeret propositam suæ immensæ longitati pulcherrimam dispensationem*. Igitur non omnis individua natura persona est, sed illa omnis, quæ non ad hoc creatur, ut alteri inseparabiliter unita permaneat. Præterea ipse Petavius, lib. 3. de Incarn. cap. 13. à num. 1. explicans illam Theologorum, præcipuè Græcorum, Sententiam, scilicet *Verbi hypostasim assumptæ humanitati fuisse vel esse factam hypostasim*, exponit ly *hypostasis* non esse nomen abstractum, sed concretum potius esse, ac naturam ipsam exprimere completam, per seque subsistentem.

§. I I.

Ex contextu Quæstionis in Prop. 9. notatæ clarè dignoscitur, nihil esse in ea suspectum vel confusum.

XIV. Hæc ad 9. propositionem scribit laudatus Censor: *Quæst. 98. Sentent. cum Deus sit infinitus, & homo finitus, quæritur: utrum ex essentia & natura utriusque possit esse una Persona?*

Censura: *In hac quæstione omnia sunt suspecta, & confusa.*

XV. Non puto difficultatem huic Cenfori subesse circa titulum hujus quæstionis, communiter enim & à Patribus agitur, quomodo ex natura infinita, & finita fieri potuit Incarnatio, ita ut ex utraque natura esset una tantum Persona; atque ita censura unicè cadit supra textum hujus quæstionis; in quo ad ejus solutionem sic num 1. discurret Lullus: „Raymundus consideravit, quomodo ex pluribus
 „ rebus fiat unum, sicut ex pluribus elementis unum elementatum;
 „ & ex piro inserta in pomerio una arbor; & ex elementativo, vegetativo, sensitivo, imaginativo, & rationativo unus homo; & ex forma
 „ & materia una substantia; & ex duabus præmissis & unâ conclusione
 „ unus syllogismus; & sic de similibus; & in omnibus istis factis,
 „ quodlibet remanet distinctum ab alio, sicut in elementato quodlibet
 „ elementum est distinctum ab alio per essentiam & naturam:
 „ & ideo postquam hæc omnia naturaliter possunt fieri per naturalem finitam
 „ potestatem, quid mirum? Si Deus cum sua infinita
 „ potestate, & supra naturalem cursum, sibi potest unire essentiam
 „ & naturam humanam finitam, & cum ipsa existere una Persona,
 „ ita tamen quod in ipsa Persona Deitas & humanitas remaneant
 „ distinctæ, aliàs posset fieri major unio per finitam potestatem,
 „ quàm per infinitam, quod est impossibile: per quam impossibilitatem demonstratur, quod affirmativa quæstionis sit vera.

Text pr. 9.

XVI. Quid, quæso, in hoc discursu est confusum, & suspectum? Nonne ferè omnes agentes de Incarnatione inquirunt sub quânam unitate, vel quânam unionis genere contineatur Incarnatio, & unitas in Christo? Quot modis & exemplis illam explicant Patres, desumptis ex unionibus rerum creaturarum? Sanè apud Petavium, lib. 3. de Incarnat. cap. 1. num. 7. à Patribus tum Latinis tum Græcis unio Divinæ & humanæ naturæ in Christo his terminis exprimitur, nempe unio, unitio, adunatio, consertio, sociatio, concordia, fædus, fæderatio, confæderatio, confibulatio, connexio, contextio, concretio, conventio, mistio, commistio, mistura, coaptatio, conversio, conjugatio: quæ omnes ex similitudine rerum creaturarum desumuntur. Etiam D. Bonaventura in 3. dist. 6. part. 2. quest. 1. D. agit de variis unionibus, quæ ad unitatem terminantur, & quartò locò eam, quâ unâ arbor inseritur stipiti alterius, & subjungit; *hæc tamen quartò unionis genere habet uniri natura Divina humana*; & non admittit modum, quò elementa uniuntur, nec quò anima & corpus conjunguntur; alii verò dicunt Incarnationem esse ad modum, quò anima unitur corpori: unde variis modis, prout possunt, exemplificant Incarnationem. At in hoc

texu Lullus, nec ad exemplum, præfatas uniones adducit, sed tantum eas exponit, & arguens à minori ad majus, dicit, quòd si possunt esse prænarratæ uniones, ex quibus fit unum, multò magis Deus cum sua infinita potestate, & supra cursum naturalem, potest sibi unire humanam naturam.

XVII. Deinde, num. 2. ita discurret Lullus: "Item, cum Divina potestas sit bonitas, magnitudo, æternitas, &c., plus spectat ad ipsam agere de majori bonitate quam de minori, & sic de majori magnitudine, duratione, &c. Ergo concluditur quòd, si Deus de minoribus rebus potest unire prædicta entia, multò magis de majoribus possit unire unum ens majus". Non video quid sit reprehensibile in hoc discursu; certum est enim, quòd potestas divina est sua bonitas, magnitudo, &c.: ex quo benè deducitur, quòd ad ipsam plus spectat agere de majori bonitate, quam de minori; unde, arguendo à minori ad majus, si Deus ex prænarratis num. 1. potest facere unum, multò magis ex majoribus rebus, quales sunt Divina natura & humana, potest facere, seu unire unum ens majus, nempe Christum.

XVIII. Postea, num. 3. ita discurret: "præterea convenit, quòd omne id Deo sit possibile, per quod Deus & homo magis possunt concordare, & invicem participare; & ex quo (id est, etiam est Deo possibile id ex quo) major & nobilior finis potest sequi toto creato universo; aliàs Deus plus posset per minoritatem, quam per majoritatem, & per parvitatem, quam per magnitudinem, quod est impossibile; & quia major & nobilior concordantia, & participatio, quæ potest esse inter Deum, & suum effectum; & etiam major finis totius universi, potest esse per unionem divinæ & humanæ naturæ: ergo ex essentia & natura divina & humana potest esse una Persona". Nescio quid in hoc discursu possit notari, nec video repugnantiam in aliqua propositione.

XIX. Tandem, num. 4. sic objicit Eremita: "unio elementorum in elementato, & sic de aliis (id est, de aliis unionibus supra narratis) non potest fieri nisi per compositionem, & quòd ex ipsis fiat unum, scilicet elementatum, quod transeat in tertium numerum, sicut lapis, vel arbor, &c.; qui lapis non est ignis, nec ignis lapis, & sic de aliis: unde, cum Deus, qui est infinitum ens, non possit intrare in compositionem cum finito, nec ex ipso, & homine possit fieri tertius numerus, qui non esset Deus, nec homo, nec è conversò: ergo concluditur, quod ex infinita & finita essentia, &

» natura non possit esse una Persona. Præterea humana natura non
 » potest sufficere ad esse hominis sine humano corpore, nec huma-
 » num corpus potuit assumi ex muliere sine forma ipsius corporis,
 » quæ forma fuit anima mulieris; & quia Deus non potuit assumere
 » animam mulieris, nec per consequens ejus materiam, quæ est
 » corpus; idè non pouit fieri unio ex humana & divina natura ».

XX. Ad hanc objectionem respondet Lullus, num. 5. sic: « Non
 » dico, quodd divina & humana natura possint facere unum per mo-
 » dum compositionis, sed per modum *deificationis*, & *homificationis*:
 » Sicut Filius Dei, qui est deificabilis, & deificatus (id est, Deus
 » producibilis, & productus Deus) à Deo Patre, & in sua deificabi-
 » litate, hoc est in seipso, potest deificare humanitatem, quæ est
 » homificabilis (id est, ex qua potest fieri homo) in divina natura,
 » antequam sit homo; in qua deificabilitate factus est homo Deus
 » Filius ex humana natura; & quia Deus Filius est simplicitas, licet
 » se faciat hominem, non tamen se potest facere compositum quoad
 » divinam naturam, sed facit se compositum in quantum se facit ho-
 » minem, qui homo est compositus ex corpore & anima; & ideo
 » tua ratio non valet, cum unus modus sit facere unum de rebus fi-
 » nitis, & alius de essentia & natura finita & infinita. »

XXI. In hoc textu puto subesse difficultatem laudati Censoris ob
 illas voces, *deificationis* & *homificationis*, quæ tamen noviter formantur
 ad vividius explicandum, quodd Deus factus est homo, & homo fac-
 tus est Deus; & quidem *Primò*, suppono nullum esse scrupulum in eo
 quodd Lullus neget in Christo compositionem, licet plurimi illam
 admittant, nam, ut notat Mastrius in 3. Sent. disp. 1. de Incarn. q.
 2. art. 1. num. 47. hæc quæstio est de solo nomine, & in eo sensu
 quodd negatur à Lullo compositio, videlicet quodd ex mutua componen-
 tium dependentia sit usum tertium ex ipsis, quod non est unum,
 nec aliud; ab omnibus negatur compositio in Christo ex natura divina
 & humana, quamvis ipse, ut adstruit Lullus, sit qua homo compo-
 situs ex anima & corpore. *Secundò*, quoad scrupulum quem ingerere
 potest illa propositio hujus textus, scilicet: *Sicut Filius Dei, qui*
est deificabilis & deificatus à Deo Patre: quâ Lullus ex suo modo lo-
 quendi, & ex proprietate verborum nihil aliud significat, nisi quodd
 Filius est producibilis, & productus in Deitate à Deo Patre, vel quodd
 est producibilis Deus, & est productus Deus à Deo Patre: videri pos-
 sunt, quæ diximus, Tom. 2. cap. 2: & hîc, dist. 1. dissert. 1. Nam sicut
 in productione ad intra, juxta illud Joan. 10. 36. *Quem Pater sancti-*

sancti, Patrem sanctificare Filium est idem ac illum producere sanctum; ita Patrem deificare Filium est idem ac illum producere Deum; atque ita, sicut Pater est deificativus Filii, & ipsum deificans, ita Filius, quia est productus Deus à Patre, est deificabilis, & deificatus à Patre.

XXII. Ad intelligentiam itaque relati textus notandum est, quod sicut in productione ad intra Filius dicitur deificari, ita licet non eodem modo, in ea operatione Dei ad extrinsecum, quâ creaturæ quid quodammodo divinum tribuitur, juxta illud Psalm. 81. 6. *Ego dixi dii estis*, dicitur creatura deificari; & præcipue in Incarnatione, dum producit homo Deus, dicitur homo deificari, ut ostenditur à Petavio, lib. 4. de Incarn. cap. 9. à n. 1. quia tunc fit homo Deus. Similiter homificare est hominem producere, vel producere illum, qui est homo: atque ita, dum in Incarnatione vel in Christo, ponitur deificatio, & homificatio, *deificatio* nihil est aliud, quam operatio vel unio, quâ homo fit Deus; & homificatio nihil est aliud quam operatio, vel unio quâ Deus fit homo; & hoc juxta sensum illius catholici asserti: *Deus homo factus est*, & juxta aliud: *homo factus est Deus*, quod, licet absolute non admittatur ab omnibus, passivè tamen admittitur, id est, licet homo in Christo non se fecit Deum, Deus tamen fecit ut ille homo esset Deus, vel Deus fecit illum hominem Deum, ut apud Petavium citatum exponunt multi Patres.

XXIII. Itaque Lullii sensus in relato textu est, quod in Christo divina & humana natura non possunt facere unum per modum compositionis, sed per modum deificationis & homificationis, id est, per modum, quo sic unitur humana natura divinæ in uno supposito, quod vi illius unionis homo est & fit Deus, & Deus est & fit homo: quod quidem non habetur in rigrosa compositione, quia in ipsa ex componentibus fit unum tertium, quod neutrum est ex illis; in hac verò unionem, ita humanitas unitur Deo, quod vi ejusdem Deus est homo, & homo est Deus, ut repetit Lullus in his questionibus, & constat ex relatis supra à num. 2. Hoc autem ita fit, quia *Filius Dei*, qui est deificabilis, & deificatus à Deo Patre, modò dictò, in sua deificabilitate, hoc est in seipso potest deificare humanitatem, id est, sibi ipsi uniendo humanitatem, se potest facere hominem, qui homo est Deus; quæ quidem humanitas est homificabilis in divina natura, antequam fit homo, quia videlicet antequam in illa humanitate resultat homo, qui est suppositum, unita ipsa divinæ naturæ in Filio, ex ipsa Deus fit homo, & sic ipsa est homificabilis, id est, ex ipsa fit

homo, in divina natura, prout in Filio; & hoc est, quia in sua deificabilitate, id est, in seipso, vel in sua proprietate, *Deus Filius factus est homo ex humana natura*. Dicitur autem quod *Filius in sua deificabilitate potest deificare humanitatem*, ut deponatur peculiaris congruitas Filii, qui est genitus, ad incarnationem, prout omnes exponunt; dum verò dicitur: *sicut Filius Dei, qui est deificabilis, &c.* ly *sicut* non denotat similitudinem nec proportionem, sed tantum modum & explicationem deificationis; & homificationis, quam ante exposuerat, prout phrasim est Lulli utendi ly *sicut* ad consequentes explicationes.

XXIV. Quod autem in prædicto textu per *deificationem*, & *homificationem* aliud non intendat Lullus, quam per unionem divinæ naturæ & humanæ in Christo Deum esse hominem, & hominem Deum, ad differentiam aliarum unionum prædictarum, patet ex verbis, quæ subjungit immediatè, ad solutionem objectionis, num. 19. relatæ; sic enim scribit: „A simili (id est, similiter) respondeo tibi ad hoc, „ quod dicis, scilicet quod id, quod factum est ex pluribus rebus, „ transeat in tertium numerum, verum dicis, quando factum est de „ finitis rebus; sed Persona, quæ est divina & humana natura (id „ est, Deus & homo, sumptò abstractò pro concreto, prout plures „ loquuntur Patres) non habet partes quantum ad deitatem, sed „ quantum ad humanitatem: sed Filius Dei sic transit in tertium numerum per humanitatem, in quantum se facit hominem, qui homo „ est tertius numerus ex corpore & anima, sicut transit in humanitatem faciendo se hominem (id est, de novo fit tertius numerus „ dum fit homo, sicut de novo fit habens humanitatem faciendo se „ hominem) & ideo ipsa Persona non transit in tertium numerum, „ cum ipse sit Deus & homo, quia ipsa, scilicet Persona Filii Dei, „ ante Incarnationem erat Deus; & quia Deus se fecit hominem, „ Persona, quæ est Deus, est homo; & ita tua ratio non procedit. „

XXV. Hanc eandem differentiam unionis divinæ & humanæ naturæ in Christo ab aliis unionibus, per hoc quod ex illa Deus est homo, & homo est Deus, & consequenter, quod hoc tantum intenderit Lullus per notata verba; explicat ipse in aliis questionibus, ut quæst. 94. quæst. 101. quæst. 102. & 106. & totum fundatur in hac veritate, quod Deus factus est homo, & homo Deus; hujusmodi autem veritatem per idem verbum *deificare* & *deitari* explicant plures Patres apud Petavium, lib. 4. de Incarnat. cap. 9. ubi hoc expresse tractat; unde Gregor. Nazian. in Epist. ad Cledonium, num.

4. ait : *Hæc enim ambo unum commistione, Deo quidem in humanato, (quod est idem ac homificato) homine verò deitato, vel quomodolibet quis nominet. Et in Iambico contra Apollinarem : sic quod Deum fecit, deificatumque est, unus Iesus. D. Damasc. lib. 3. de Fide, cap. 12. Ipsum Verbum caro factum est, conceptum quidem ex Virgine, progrediens verò Deus cum assumpta natura, jam & ipsa ab illo deificata simulatque esse cœpit : adeo ut tria simul ista fuerint, assumptio, existentia, & deificatio illius à Verbo. Euthymius, in Panoplia, part. 1. tit. 7. inter sententias quasdam collectas ex variis Patribus, unam habet, quæ de mutua naturarum communicatione agens, quamdam appellat æqualem, sed dissimilem ; ut in Deo inhumanato, & in homine deificato, quamvis enim tantum deificatus sit assumptus homo, quantum inhumanatus est qui assumpsit Deus (siquidem in corpore, & anima, & mente tam inhumanatio facta est, quam deificatio) dissimili tamen id ratione contingit. Andreas Crêtensis, de Annuntiatione Mariæ, p. 13. Ejus, quod assumptum est, deificationem vocat. Athanasius Orat. 4. Nisi divinitas Verbi opera per corpus effecta essent, numquam homo deificatus esset. Cyrillus, Thesau. lib. 20. Christum ait dici gratiam à Patre accepisse, deificato templo, quod assumpsit ; imò D. Damasc. lib. 4. de Fide, cap. 19. Incarnationem appellat deificationem & verbificationem, quatenus natura est à Verbo assumpta. D. Bonav. in 3. dist. 2. p. 1. q. 2. ut ostendat in humana natura majorem congruitatem ad assumptionem, quam in Angelica, sic scribit : Tertia ratio est propter multiplicem hominis compositionem ; quia enim homo compositus est ex natura corporali & spiritali, & quodammodo communicat cum omni creatura, sicut dicit Gregorius ; hinc est, quod cum humana natura assumitur, & deificatur, quodammodo omnis natura in ea exaltatur, cum in suo simili deitati unitur.*

XXVI. Tandem Lullus in hac quæstione, ad solutionem secundæ partis objectionis adductæ, num. 19. ita respondet : « Et quando
 » dicis, quod incarnatio non possit fieri, cum humanum corpus non
 » possit esse sine forma & materia, & quod Deus ex Beata Virgine
 » non potuerit assumere formam, sed materiam, cum materia sit tota
 » denudata à corporali forma, & subsistat spiritali formæ, quæ ip-
 » sam informat, ut sit corpus : si tua opinio esset vera, verum dice-
 » res, sicut plures dicunt, quod in homine non sit nisi una forma,
 » & illa sit rationalis anima ; sed talis opinio non est vera, ut signi-
 » ficatur in 89. quæstione, in qua probatum est quod sensitiva in ho-
 » mine sit à generante ; & ideo Deus potuit assumere naturam cor-
 » poris

» poris materialiter & formaliter, cum ipsum sit de materia & de
 » propria forma corporali : quæ forma sic est mota à rationali anima
 » ad informandam materiam corporis, sicut sensitiva ad movendum
 » vegetativam ad vegetandum, & sicut vegetativa ad movendum ele-
 » mentativam ad elementandum, cum specifica forma corporis ho-
 » minis sit ex prædictis.

XXVII. In hac solutione notandum est objectionem, quam solvit, stare in hoc, quod substantia ex B. Virgine tracta, ex qua debuit formari corpus Christi, est corpus, & quia corpus est ex materia, & forma; & in B. Virgine non erat alia forma, quàm anima rationalis, hæc erat forma illius substantiæ corporeæ, de qua debuit formari corpus Christi; & quia Deus non potuit assumere animam mulieris, non potuit assumere illam substantiam corpoream ex B. Virgine: ad hoc autem respondet Lullus, quod in B. Virgine, præter animam rationalem sunt aliæ formæ, scilicet sensitiva & vegetativa, & quod specifica forma corporis humani est ex dictis formis; atque ita illa substantia corporalis sumpta de B. Virgine, ex qua formatum fuit Christi corpus, erat formata ex propria materia & forma corporali, & ita, quin Deus assumeret animam mulieris, potuit assumere ex B. Virgine substantiam corpoream formatam propriâ formâ. Totum hoc fundatur in sententia Lulli, quod forma vegetativa, & sensitiva in homine sunt genitæ cum substantia elementativa, quæ est earum materia, & ex hac materia elementali informata formâ vegetativâ & sensitivâ, est corpus hominis compositum, quod cum prædictis formis subjicitur animæ rationali, quæ tanquam forma superior movet sensitivam ad sentiendum, & vegetativam ad vegetandum. Qualiter autem sensitiva in homine sit forma genita explicabitur infra, Dist. 3. Dissert. 1. à num. 31. ad Proposit. 11.

§. III.

In Proposit. 10. tantum dicit Lullus, quod Christus secundum modum numerandi est duo; non autem quod absolute sit duo, vel quod sit duo supposita.

XXVIII. Pro hac decima propositione hæc verba notantur: *Et ideo secundum hunc modum numerandi dicitur, quod Christus est duo, scilicet Deus, qui est unum suppositum, & homo, qui est suppositum.* Quæst. 102. sentent. num. 1.

Tom. III.

M m

Censura : *Quamvis Lullus in quaestione illa videatur negare duo supposita in Christo, habet tamen verba prædicta.*

XXIX. Sanè nedum in hac quaestione, sed ferè in omnibus aliis de Incarnatione negat Lullus esse in Christo duo supposita, nam q. 94. num. 1. dicit quòd *Deus est cum assumpta natura una Persona ex duabus naturis*; quæst. 95. num. 1. quòd *Deus non potuit assumere hominem, sed humanitatem, ut suppositum non assumeret suppositum*; & quòd *non assumpsit hominem, ut non essent duo supposita, sed unum*; q. 98. n. 1. quòd *Deus sibi potest unire essentiam & naturam humanam finitam, & cum ipsa existere una Persona*; & num. 2. quòd *ex essentia & natura divina & humana, potest esse una Persona*; & num. 4. *Persona quæ est Deus, est homo*; quæst. 99. num. 5. in fine dicit: *Quæ (Deitas, & humanitas) sunt unum suppositum*; quæst. 101. num. 2. ait: *Deus Filius est suppositum, & homo est suppositum: unde, si Deus assumpsisset hominem, de necessitate sequeretur, quòd Christus esset duo supposita, vel unum compositum ex duobus, & sic Christus non esset una Persona, in qua Deus esset homo, & homo esset Deus; & tandem concludit, quòd Deus assumpsit humanam naturam, & non hominem, & de ipsa humana natura se fecit hominem, ut esset unum suppositum ex duabus essentiis & naturis.*

Text. prop.
10.

XXX. Idem expressè, & determinatè fatetur in notata quaestione 102. ubi inquit: *Utrum hæc propositio sit vera Christus est duo?* Ex cuius contextu sole meridianò clariùs apparet, nihil esse notà dignum in relatis ejus verbis; nam ibi, num. 1. ad solutionem quaestionis, consideratò numerò in Divinis, ita quòd ibi sint tria supposita, & non sint tres Dii, sed unus Deus. *Assumpsit (Raymundus) de illo numero similitudinem, quam potuit, & per illam respondit ad quaestionem dicens, quòd in Christo sint duæ naturæ, scilicet divina, & humana, & per divinam in Christo sit unum suppositum, quod est Deus, & in illo supposito sit factus homo de humana natura, quæ (qui) est suppositum non distinctum à Divino supposito, ut in Christo non sint duo supposita, sed unum, & sic unus Christus, sicut tres Personæ sunt unus Deus; & sicut Pater est Deus, & Filius est Deus, & Sanctus Spiritus est Deus, sic Deus est Christus, & homo est Christus, & Christus est Deus, & Christus est homo, & sic Deus est homo; & ideo, secundum hunc modum numerandi, dixit, quòd Christus sit duo, scilicet Deus, qui est unum suppositum, & homo, qui est suppositum; sed quia Deus est homo, & homo est Deus, non fuit ausus dicere, quòd Christus sit duo supposita, quia si diceret, affirmaret, quòd Deus in Christo non sit homo,*

nam homo sit Deus, quod est contra Sanctam Catholicam Fidem: & ideo dixit Raymundus, quod sit distinguendum, tenendo per unum modum affirmativam, & per alium modum negativam, ut superius significatum est.

XXXI. Quid quæso clarius dici poterat, nedum ut videretur Lullus, prout exprimit laudatus Cenfor, negare in Christo duo supposita, sed etiam ut evidentissimè cognosceretur hunc esse ejus intimum sensum, & mentem? Nedum expressè negat in præsentī quæstione esse in Christo duo supposita, sed etiam hujus negationis diffinitivam profert rationem: quomodo ergo potest notari illa clausula: *secundum hunc modum numerandi dicitur quod Christus est duo, scilicet Deus, qui est unum suppositum, & homo qui est suppositum*: ac si Lullus per eam prætendat duo in Christo supposita? Nemo dubitare potest quod Deus in Christo est suppositum, neque quod homo in Christo est suppositum, neque etiam quod idem Christus est Deus, & homo, neque tandem, quod Deus, & homo aliquò modò sunt duo: atque ita quicumque asserat Deum, & hominem in Christo esse unum tantum suppositum, & sic Christum aliquò modò esse duo, scilicet Deum, qui est suppositum, & hominem, qui est suppositum: nullatenus intelligetur asserere Christum esse duo supposita, sed Christum, qui est unum suppositum, aliquò modò esse duo, hoc est suppositum duarum naturarum.

XXXII. Præterea, dum Lullus dicit: *secundum hunc modum numerandi, &c.* restringit illam propositionem: *Christus est duo*, ut non intelligatur absolute, sed restrictè ad illum modum numerandi; ille autem modus numerandi immediatè antea exponitur, dum ibi dicitur: *& sic unus Christus, sicut tres Personæ sunt unus Deus, & sicut Pater est Deus, & Filius est Deus, & Sanctus Spiritus est Deus, sic Deus est Christus, & homo est Christus, & Christus est Deus, & Christus est homo, & sic Deus est homo; & ideo secundum hunc modum numerandi, &c.* Unde, cum hic modus numerandi, restringatur ad hoc quod Deus est Christus, & homo est Christus, & Christus est Deus & homo, ita quod in Christo sint duæ naturæ, ut ante prædixit, & unum tantum suppositum, planum est quod dum dicit, quod *secundum hunc modum numerandi Christus est duo*, non possunt intelligi duo supposita, vel duo absolute, sed restrictè, quoad naturas quas supra explicuit esse duas in uno Christo, id est, *Christus est duo quoad naturas, vel est duo unita*. Sed melius dici potest, quod illa propositio: *Christus est duo*, restringitur secundum modum numerandi, qui est: *Deus est Christus, Homo est Chris-*

tus, Christus est Deus, Christus est Homo, & Deus est Homo, & sic est duo ex modo numerandi, & non ex parte rei numeratæ, quia supponitur Christum tantum esse unum, & ideo tantum intelligitur, quodd Christus est duo ex parte modi numerandi. Nec obstat quodd explicans quid sint illa dño adjiciat, *scilicet Deus qui est unum suppositum, & Homo qui est suppositum*, quia hæc verissimæ sunt, & adhuc abstracta à contextu, & per se considerata, non indicant distincta supposita, maximè autem hoc apparet ex contextu præcipuè subsequenti, ubi immediatè subnectit: *sed quia Deus est Homo, & Homo est Deus, non fuit ausus dicere, quodd Christus sit duo supposita, quia, &c.* & in conclusione resolvit, quodd sub distinctione est resolvenda præfata quæstio, affirmativè tenendo Christum esse duo ex modo numerandi, & negativè quoad supposita.

XXXIII. Neque obstat, quod ex comparatione, quam instruit in textu, videtur dicere, quodd sicut in Deitate tres Personæ sunt unus Deus, ita illa duo, nempè Deus, & homo, sunt unus Christus: atque ita sicut ille numerus in Deo est numerus Personarum, ita iste numerus in Christo erit Personarum; non inquam obstat, quia expresse protestatur non esse totalem similitudinem, sed tantum ea, quæ potest esse; *assumpsit*, inquit, *similitudinem quam potuit*; in textu autem exponit similitudinem, & differentiam ex parte extremorum comparatorum, videlicet, quodd in Deitate sunt tres Personæ & una natura; in Christo autem duæ naturæ, & una Persona, seu unum suppositum, ut amplius explicat, num. 4., ubi respondens ad objectionem Eremitæ, dicit, in Christo non esse duo supposita, quia, quæst. 101. probavit de Deo, *quodd non assumpsit hominem, sed humanam naturam, de qua se fecit hominem in seipso, ut cum ipso sit unum suppositum, & non duo supposita, quod suppositum est duo, scilicet Deus, & homo, qui sunt illud suppositum; & num. 5. similiter loquitur dicens: & quando dicis, quodd conveniat quodd in Christo sint duo supposita, postquam ipse est duo, scilicet Deus, & homo, non sequitur, cum homo in se non sit suppositum, sed de sua humanitate factum est suppositum in Divino supposito, in quo est sustentatus, & factus, & in ipso est hoc, quod est, & sine ipso non esset hoc quodd est, nec per se sustentatus; ratione cujus non potest esse per se simpliciter suppositum, cum de natura suppositi sit quod sit per se subsistens, & sustentatum, & quod (per se) sit hoc quodd est.*

XXXIV. Similem loquendi modum, ac Lullus, tenent aliqui. Sic apud Euthymium, in Panopl. tit. 7. (ut scribit Petavius, lib. 4. de

Incarn. cap. 4. , num. 6.) à quodam ex antiquis Patribus habetur scriptum : *Cum igitur duo in Christo dicimus , non eum asserimus esse numerò duo , sed unum quidem numerò , propter unitatem hypostasis , duo verò specie , hoc est naturà.* Pariformiter apud eundem Petavium, lib. 3. de Incarn. cap. 12. à, num. 8. plures Patres dicunt Christum esse duplicem , ut Athanasius ab Euthymio citatus : *Duplex naturis est Christus , & hypostasi singularis ;* Cyril. Hyerosol. Catech. 4. ait ; *Duplex erat Christus : homo quidem , id quod apparebat ; Deus autem quod non apparebat ;* & Antiochus Ptolemaidis Episcopus , ita Christum compellat : *Domine Fili David , duplex & simplex , duo , & unum.* D. Bernardus , *serm. 3. in vigil. Nativit. Domini : Verbum & anima , & caro in unam convenere Personam , & hæc tria unum , & hoc unum trid , non confusione substantiæ , sed unitate Personæ.* Tandem à plerisque Patribus asseritur quoddam *Christus est duæ naturæ* , ut observat Bernal. de Incarnatione , Disp. 14. sect. 3. , & ipse cum Vasquez , & aliis prædictam admittit propositionem , & sic poterit benè dici quoddam *Christus est duo , quoad naturas* , prout videtur prætere Lullus in notato textu , non autem absolute *Christus est duo.*

§. IV.

Rectè & conformiter ad plurimorum Theologorum Sententiam loquitur Lullus de indulgentiis in propositione 11.

XXXV. Undecimò locò sic scribit laudatus Censor : „ *Quæst. 133. utrum Indulgentiæ tantum valeant , quantum sonant ?*

Censura : *Multa loquitur Lullus ineptè de Indulgentiis in hac quæstione.*

XXXVI. Cum in hac Censura non determinetur aliqua propositio , erit per clausulas exponendus integer textus , & discutiendus , præcipuè ubi videbitur suboriri posse difficultatem. Itaque Lullus ad solutionem hujus quæstionis , num. 1. sic discurret : „ *In pipere* „ *est ignis in quarto gradu caliditatis , terra in tertio siccitatis , aer* „ *in secundo humiditatis , aqua in primo frigiditatis ; & in pipere* „ *unus gradus caloris intensus valet quatuor gradus extensos in* „ *numero , & in seipsis intentos ; sed de uno gradu aquæ non est* „ *sic , cum una frigiditas intensa non valeat nisi unum gradum* „ *aquæ intensum , sed valet quatuor gradus caliditatis ignis extensos* „ *in numero , cum sit dilatata , & diffusa per omnes ; non valet ta-*

Text. prop.
11.

» man ipsos intensivè ; & idem est suò modò de tertio gradu , & se-
 » cundo : à simili de indulgentia , quæ est instrumentum datum à
 » Prælato , qui habet claves ad alleviandum pœnas Purgatorii , &
 » ipsa indulgentia habet plures gradus , secundum magis , & minus ,
 » sicut una quæ habet decem dies , alia viginti , alia triginta , &
 » alia quadraginta , &c. »

XXXVII. In hoc textu , prætermisâ philosophicâ Doctrinâ , quæ tantum ponitur ut exemplum , nihil in reliquo videtur notâ dignum. Indulgentia autem dicitur *instrumentum* , quia , hoc generaliter sumitur pro quocumque , cum quo aliquid efficitur vel habetur , & quia cum indulgentiis alleviantur vel tandem tolluntur pœnæ Purgatorii , ideo dicitur *instrumentum*. Dum verò dicitur quòd indulgentia *datur ad alleviandum pœnas Purgatorii* , non prætenditur eam tantum valere pro defunctis & non pro vivis , sed , quia pœna temporalis debita pro peccatis , nisi solvatur in hac vita , debet sustineri in Purgatorio , ideo , pœna Purgatorii dicitur alleviari per indulgentiam , quia quantum alicui fuerit remissa pœna per indulgentiam in hac vita , tantò minus sufferre debet in Purgatorio ; & hoc clarè constat ex num. 3. ubi ait : *Dixit Raymundus : narratur quod quidam miles dixerit , suppositò quod moreretur sine peccato mortali , quòd ipse faceret tantas elemosynas ad acquirendum indulgentias , quòd nunquam intraret in Purgatorium , &c. ; Ac pròinde pro hac vita valent indulgentiæ , ita ut , si quis totam pœnam per indulgentias adæquaret , non intraret in Purgatorium ; & ita alleviant pœnas Purgatorii , quatenus quòd plures lucrantur indulgentiæ , eò minus sufferendum restat in Purgatorio. Dicitur indulgentia dari à Prælato , qui habet claves , quia ipsi tantum jure ordinariò competit illas conferre ex potestate clavium.*

XXXVIII. Post-relata verba , num. 36. & assignatò variò indulgentiarum gradù , videlicet decem , viginti , &c. dies , subnequit Lullus immediatè : « Et quilibet gradus est verus & intensus quoad dantem , & non simpliciter quoad recipientem , in aliquibus tamen » sic : sicut unus homo , qui non habet nisi unum gradum actûs » charitatis , & pro uno denario illi datur indulgentia quadraginta » dierum , & ille gradus (charitatis) valet (id est , correspondet , » & proportionatur) quadraginta dies extensivè , non tamen inten- » sive (id est , remissè & debiliter proportionatur , non autem inten- » tense & efficaciter , juxta comparisonem datam de gradibus ele- » mentorum) respectu alterius hominis , cui data est indulgentia

„ quadraginta dierum pro uno obolo, datò cum uno actu charitatis
 „ in quarto gradu, qui intensivè & extensivè valet quadraginta dies;
 „ & ideo, Eremita, respectu recipientis indulgentiam, ipsa indul-
 „ gentia valet tantum, quantum sonat, intensivè, & extensivè ut
 „ supra significatum est.

XXXIX. Patet ex hoc textu sensus Lulli esse quòd indulgentia lucratur proportionatè ad charitatem illius, cui conceditur, & qui impositam eleemosinam largitur, ita ut plùs lucratur & intensius eidem proficit, qui dat unum obolum de eleemosina pro indulgentia quadraginta dierum cum actu charitatis in quarto gradu, quàm qui dat denarium, qui est plùs quàm obolus, pro simili indulgentia cum actu charitatis in uno tantum gradu. Dicitur autem, quòd ille unus gradus charitatis valet extensivè quadraginta dies indulgentiæ, quatenus remissè & debiliter proportionatur illis quadraginta diebus, sicut, ut præmonuit in principio, in mixto calido in quarto gradu, unus gradus frigiditatis tantùm remissè proportionatur quarto gradui caloris: ac proinde Lulli resolutio est, quòd indulgentia tantùm valet, quantum sonat in eo, qui existit in gratia, & operà præscripta peragit, proportionatè ad charitatem, quâ exequitur opera præscripta, videlicet, si est in actu remisso charitatis, V. G. in gradu primo, remissè lucratur indulgentiam concessam; si verò est in gradu intenso charitatis, intense eam lucratur.

XL. Hoc ipsum plenius patet ex objectionis solutione, nam, num. 2. ita objicit Eremita: *Quòcumque modo indulgentia sit recepta, convenit quòd tantùm valeat quantum sonat, ut maneat vera, perfecta, & integra à parte dantis & à parte recipientis, sicut etiam Sacramentum Altaris, quod est ita verum, & perfectum. si conficiatur ab injusto Præbytero, sicut à justo; & hoc est ratione characteris recepti ab ambobus: aliàs si indulgentia non valeret tantùm in recipiente quantum sonat intensivè, indulgentia posset corrumpi & diminui à parte recipientis, & per consequens character Sacramenti in injusto Præbytero, quod est impossibile: Ergo indulgentia valet tantùm intensivè quantum sonat, sive accipiat cum primo gradu actus charitatis, sive cum quarto, & sic de secundo & tertio.*

XLI. Ad hoc respondet Lullus, num. 3. dicens: „ Narratur quòd
 „ quidam miles dixerit, suppositò quòd moreretur sine peccato mori
 „ tali quòd ipse faceret tantas eleemosynas ad acquirendum indul-
 „ gentias, quòd nunquam intraret in Purgatorium; & fuit ei res-
 „ ponsum quòd Sancta Sophia habebat plùs meriti per edificationem

„ Ecclesiæ Constantinopolitanæ in dando quolibet die denarium her-
 „ bæ bobus, qui portabant lapides, quàm imperator, qui ædificavit
 „ & perfecit totam Ecclesiæ. „ Hòc exemplò docet Lullus quòd,
 „ sicut ad lucrum meriti non tantum est attendenda magnitudo operis,
 „ quod peragitur, quantum charitas & devotio, quæ perficitur: ita ad
 „ lucrum indulgentiæ: Unde, num. 4. sic continuat: „ Item dico tibi,
 „ quòd sicut unus homo cum charitate (habituali) æquali (quoad
 „ essentiam) charitati alterius hominis plus posset acquirere de præ-
 „ mio, quàm alius, supposito quòd magis agat de ipsa, (id est,
 „ dummodo majores & ferventiores actus eliciat) sic à simili cum
 „ æqualibus indulgentiis in essentia unus homo posset acquirere plus
 „ remediij in Purgatorio, quàm alius, remanente qualibet indulgen-
 „ tiæ æquali alteri per essentiam (id est, quoad suum esse determi-
 „ natum à Pontifice concedente) non per actus secundarios (id est,
 „ per actus, quorum executione intenditur lucrari; nam cum isti
 „ sint inæqualis valoris & meriti, secundum ipsos, est inæqualis in-
 „ dulgentiam quoad lucrantem) per quos (actus secundarios) essen-
 „ tiæ indulgentiarum non corrumpuntur (id est, non redduntur
 „ omnino infructuosæ). nisi eveniat mortale peccatum (quia hòc
 „ admissò nulli prodest indulgentia) ideo, Eremita, mea verba sunt
 „ vera, ratione magnitudinis divinæ justitiæ, & suæ bonitatis, po-
 „ testatis, virtutis Dei, & tua verba non sunt vera, imò contradi-
 „ cis magnitudini divinæ justitiæ, &c. „

XLII. Tota hæc Lulli doctrina ad præfatum collimat scopum;
 videlicet quòd indulgentia quoad suum esse semper est eadem in essen-
 tia; quia tamen peragentes opera præscripta ad ipsius lucrum, non
 sunt in æquali gradu charitatis, ideo, licet omnes lucrentur ipsam,
 non tamen æqualiter ipsis prodest, quia intensius proficit habenti in-
 tensiorem charitatem: sicut cum eodem & æquali habitu charitatis
 quoad essentiam plus meretur, qui ferventiores elicit actus, quàm
 qui languidos & remissos: unde Indulgentia quoad essentiam eadem est
 respectivè ad peragentes opera præscripta; & quia solum peccatum
 mortale, vel defectus gratiæ habitualis, ipsam reddit infructuosam,
 solum ipsum illam corrumpit quoad ipsum peccatorem, non autem
 actus, quos cum gratia elicit, licet sint languidi & remissi, quia sunt
 actus secundarii, à quibus non pendet essentia indulgentiæ, quæ
 propterea non æquè valet uni, ac alteri, quia unus ob intensum actum
 charitatis, intense eam lucratur, alius verò, ob remissionem charita-
 tatis, extense solum & remisse ipsam consequitur.

XLIII.

XLIII. Hæc planè Lulli doctrina de inæquali lucro indulgentiæ pro inæquali actu charitatis, ad quam reducitur totus hujus quæstionis contextus, si non ab omnibus, à plerisque tamen Doctoribus catholicis profitetur, ut videri potest apud Amort, tract. de Indulgentiis, part. 2. sect. 3. ubi variæ adducuntur Theologorum sententiæ de indulgentiis, ex quibus pauca adducam; ibi enim, num. 8. Sanctus Raymun. de Pennafort scribit: *Sciendum est autem quòd majoritas & minoritas remissionis pœnitentiæ attenditur secundum tria, scilicet secundum majorem & minorem devotionem ipsius pœnitentis, &c.* num. 11. Sanctus Bonavent. in 4. dist. 20. p. 2. q. 6. ait: *Concedo igitur quòd indulgentiæ quantum ex parte dantis, tantum valent quantum promittunt, sicut ostendunt primæ rationes: concedo nihilominus, quòd cuilibet valent tantum, nec æqualiter omnibus, sed secundum existimationem ejus, quam habuit vel habere debuit, qui indulgentiam fecit, quam non oportuit exprimere; quia omnes Fideles debent illud in corde præsupponere, quòd dona, & miserationes Sancti Spiritus donentur cum æquo libramine; nec hoc debet aliquem ab his retrahere, quia semper plus valent, si homo sit in charitate, quàm valeat obsequium, vel aliud aliquid pro quo indulgentia conceditur & donatur;* num. 13. Innocentius V. seu Petrus de Tarantasio in 4. sent. dist. 20. q. 3. art. 3. postquam dixit, quòd valent indulgentiæ in se quantum sonant; & hoc quomodo sit explicuit, subjungit: *Quia verò actus activorum non sunt nisi in patiente disposito, ideo non valent indulgentiæ omnibus æqualiter, sed secundum quod sunt magis vel minus dispositi per meritum redemptionis pœnæ, non adeptionis vitæ. Unde sicut 40. dies pœnitentiæ plus valent uni perficienti eam cum majori fervore & labore, quam alteri, qui cum minori: ita dico quòd 40. dies indulgentiæ plus valent illi, qui se magis ad eam disponit, majori scilicet fervore, & labore, seu afflictione, seu dati quantitate, &c.*

XLIV. Etiam ibi, num. 3. Richardus de Media Villa, in 4. dist. 20. quæst. 3. art. 3. quæst. 2. dicit: *Dicendum quòd ad remissionem extensionis pœnæ pares sunt ille, qui minus dat, & ille qui plus. Sed quantum ad remissionem intensiōis pœnæ; & quantum ad sui dispositionem ad recipiendum augmentum gratiæ, impares sunt. Nec propter hoc sequitur quòd tantum remittatur uni de pœnitentia, quantum alii, quia pœnitentia unius anni in hac vita non tantum valet illi, qui eam facit ex minori charitatis fervore, & remissam, sicut illi qui eam facit ex majori, & asperam. Videantur ibidem alii, qui majori fervori & charitati attribuant majus indulgentiæ Lucrum ut Raynerius, Petrus de Palu-*

de, Bartholom. Pisanus, Joannes Nider, & plurimi alii, inter quos Christianus Lupus qui, Dissert. de Indulgentiis hanc ex Gelasio II. adducit regulam : *Quilibet indulgentiæ fructum percipit juxta modum suæ pœnitentiæ ac meritorum* ; & Cardinalis Denoff. ibid. ex Bonif. VIII. in Bulla pro Jubilæo hæc adducit verba : *unusquisque tamen plius merebitur, & indulgentiam efficacius consequetur, qui Basilicas ipsas amplius & devotius frequentabit* ; & ex Innocent. IV. Quodd quisque indulgentiam lucrabitur, *juxta quantitatem subsidii, & devotionis affectum*. Quare ipse Amort, ibid. sect. 4. hanc ponit Thesim. *Frustra sperant sibi multum pro futuras indulgentias, qui, ut congruè pro suis peccatis satisfaciant, seriò non allaborant* : quam diffusè probat, sicut & in Theol. Eccles. tom. 3. tract. de pœnitentia, disp. 7. de indulgentiis, & §. 188. Solvens objec. 4. ait, sat multos esse Theologos, *qui docuerunt tantum quemlibet de indulgentia recipere, quantum secundum fervorem suæ devotionis, laboris difficultatem, studium bonorum operum & satisfactionis coram oculis divinis dignus est* : eosque, num. 71. citat, productis eorum verbis.

§. V.


Docet Lullus in Prop. 12. Humanitatem in Christo per se, id est, ex con-naturali virtute, non facere hominem Deum.

XLV. Duodecimò locò notatur hæc propositio : *Humanitas in Christo non dat esse humanum, hoc est non facit hominem*. Hanc propositionem non explicat hic Censor ex qua extraxerit quæstione ; præ-sentis Libri Sentent. De illa agemus latius infra, dist. 4. dissert. 1. prout tamen spectat ad Librum Sentent. videtur desumpta ex quæst. 94. ubi num. 1. reddens Lullus rationem, cur in Christo Deus est homo, & homo est Deus, & Christus est homo Deus, ita scribit : *Et ratio est, quia humana natura in Christo nec per se, nec in se facit suppositum vel hominem, sed de ipsa factus est homo in divina natura, vel in divino supposito, quod in se facit se hominem de humana natura*. At, ut apertum est, in hoc textu non negat Lullus quodd humanitas det esse humanum, neque absolutè negat quodd faciat hominem, sed limitatè, nempe per se nec in se.

XLVI. Imò in eodem textu paulò ante relata verba expressè fate-tur humanitatem dare esse humanum, cum scribat Christum per humanitatem esse hominem, nam ibi ait : *Deus est cum assumpta natura*

una persona ex duabus naturis , scilicet ex divina , & humana ; & Persona , quæ est Christus , non est tertium ex ipsis : Unde sequitur quod Christus Deus sit ipsa Persona , & homo Christus etiam , & Persona Deus sit homo : est Deus per Deitatem , & homo per humanitatem , & una est Deitas , & alia humanitas ; & secundum talem modum existendi Deus non existit cum aliqua creatura , nam , si cum aliqua alia creatura ita esset unitus , per illam esset creatura , sicut per humanitatem , quam assumpsit , est homo. Cum ergo adeo expressè doceat Lullus quod Christus est homo per humanitatem , sicut est Deus per Deitatem , & quod Deus per humanitatem sibi unitam est homo , apertè fatetur quod humanitas dat esse humanum ; idem enim est dare esse humanum , ac esse naturam seu rationem , per quam est homo.

XLVII. Hôc non obstante , dicit Lullus ibidem , quod humanitas vel humana Christi natura *per se* non facit hominem , *nec in se* , quia , licet humanitas sit essentia & natura , ex qua fit & est homo , ita ut Christus per ipsam est homo , cum tamen in suo proprio naturali ordine & in connaturali ejus termino , seu supposito , non fiat homo ex ipsa , sed tantum in divino supposito , ideo ipsa per se non facit hominem nec in se , quia per se non facit aliquid , cum non fit per se & independenter , sed divinum suppositum illam sibi unit , & de ipsa se facit hominem ; & quia ille homo , qui ex ipsa fit , est Deus , & quod homo sit Deus non continetur in naturali humanitatis virtute ; ideo ipsa per se non facit illum hominem , sed de ipsa divinum suppositum fit ille homo , ac consequenter illa humanitas *in se* non facit hominem , quia homo , qui fit ex ipsa , fit in divino supposito , & non in ordine proprio & connaturali humanitatis ; quia si fieret homo in ipso humanitatis proprio ordine , fieret suppositum homo in seipso , & non in Deo , & homo esset aliud suppositum à Deo , quod repugnat in Christo ; quare , cum in hoc omnes conveniant , nihil adstruit ibi Lullus , quod communi doctrinæ non cohæreat.



D I S T I N C T I O I I I .

De tertia Classe Censurarum adversus Librum Quæstionum super Magistrum Sententiarum.

D I S S E R T A T I O I .

De Propositionibus à prima usque ad decimam, ex Prologo & Quæst.

I , 3 , 12.

§. I.

De sua Arte , non de hujus Libri Doctrina , dicit Lullus eam se habuisse à Deo ; & quia in neutra est ullus error , immerito Censurâ notatur.

I. **C**UM Propositiones ab hoc tertio Censore notatæ sint pleræque eadem , ac notatæ à primo & secundo, quæ jam sunt discussæ ; ideo hujus Censoris propositionem 2. & 3. remittimus ad dist. 1. dissert. 1. ad Textum primum , & secundum ; sicut & quartam , & octavam ad dissert. 2. & ad Textum primum & septimum. Similiter propositio nona hujus Censoris est eadem ac quinta Censoris secundi, quæ explicata manet supra dist. 2. dissert. 1. §. 2. à num. 9. Tandem decima propositio est eadem ac decima-octava primi Censoris, quæ discussa fuit supra dist. 1. dissert. 7. §. 5. à n. 39. & magis diffusè , tom. 2. cap. 42. ad Artic. 60. Eymerici , qui est idem ac utraque propositio ab ambobus notata Censoribus.

II. Ex dictis pariter constat quid dicendum sit ad primam propositionem, quam ita exponit laudatus Censor : *Raymundus multum do-
luit , & super hoc potissime , quod ipse per artem generalem , quam sibi
Dominus Deus pro sæculi hujus tenebris illustrandis contulerat , rem
Christi Ecclesiæ publicam promoverè nondum potuit , ut sperabat.* In Pro-
logo Sententiarum.

Censura : Propositio est temeraria , scandalosa , & periculosa in Fide ,

quia ait quòd hæc doctrina fuit à Deo Lullo revelata, cùm falsa, & erronea, & hæretica sit, respectivè quoad multa.

III. De hac materia egimus, tom. 2. cap. 42. ad artic. 100. Eymerici; & sanè hic Cenfor animadversione Eymerici præventus, etiam non distinguit, sicut ille, inter artem Lulli, ejusque doctrinam. Ars Lulli est ejus discurrendi methodus, principia regulasque complectens, prout Tom. 2. citato, cap. 42. explicuimus, sed adhuc diffusius Tom. 1. dist. 1. à dissert. 1. Doctrina autem Lulli, sunt conclusiones seu deductiones, quas in omni scientiarum genere ex sua generali methodo deducit, prout inter libros Theologicos in hoc libro sentent. doctrinam Theologicam exponit; nullibi tamen fatetur Lullus suam doctrinam, seu deductiones ex arte generali, quas exponit, fuisse sibi revelatam, imò fatetur se laborasse in hujusmodi conclusionum investigatione, ac errare potuisse sæpè fatetur; & propterea sua omnia correctioni Ecclesiæ submittit.

IV. Unde solùm de sua arte generali dicit sibi à Deo fuisse revelatum; qualiter autem & quomodo hoc sit intelligendum dictò, tom. 2. cap. 42. manet explicatum, & ipse indicat in hoc eodem textu notatò, nam in prologo hujus libri juxta Moguntinam editionem ita præfatur: *Raymundus Parisiis studens. & considerans perversum statum hujus mundi multùm doluit, & potissimè super hoc, quòd ipse per artem generalem, quam Dominus Deus illi dederat pro illustrandis tenebris hujus mundi, rem publicam Ecclesiæ Christi nondùm potuerit promovere, ut obstitabat.* Postea narrat quomodo cuidam Eremitæ obviaverit, qui in libro Magistri Sentent. quasdam difficiles quæstiones observabat, nec solvere sciebat; & quia ad hujus verba Lullus tacitus & confidens persistebat, percontatus ab Eremita in quo cogitabat, respondit: *Cogito de quadam arte generali, quam Deus mihi ostendit in quodam monte, cum qua libenter ad honorem Dei & tuam pacem tentabo solvere tuas quæstiones.*

V. Sanè ex relatis Lulli expressionibus tantùm erui potest, ipsum fateri suam artem generalem esse quoddam Dei donum eidem collatum, sicut omnes intellectuales notitiæ dici possunt esse Dei dona, cùm non ab alio, nisi à Deo, habeantur, quin indicetur specialis & supernaturalis revelatio in dictis verbis, licèt alibi, ut dictò locò explicuimus, indicet fuisse donum supernum; quod qualiter fuerit ibidem discussimus: solùm autem hîc notare oportet, Lullum non jactanter & in seipso confidentem ea verba expressisse, sed humiliter & solo Dei fretus auxilio præsumpsisse quæstiones Theologicas sol-

vere : unde , cùm Eremita eum rogasset , ut videas secundùm tuam artem , an de ipsis mihi posses ostendere necessariam veritatem , num. 4. ita eidem respondit Lullus : *Ad honorem Dei , & ex debito charitatis , quæ nobis omnibus est necessaria ad salutem , cupio tibi in hac parte obedire , & juxta meum posse cum auxilio Dei per prædictam artem inquirere veritatem de supradictis quæstionibus.* Postea requisitus ab Eremita enumerat suæ artis principia , & subjungit : *Per ista octodecim principia generalia miscendo unum principium cum alio , & recipiendo significationem illius mixtionis ad propositum , sicut in illa arte penitus traditur , invenitur veritas quæ quæritur.*

VI. Mirum sanè est quòd , cùm Lullus adeo apertè distinguat inter suam artem ejusque methodum , ac deductionem seu doctrinam , quæ ex ipsa deducitur , utrumque tamen hic Autor confuderit ; nec calumniandus est Lullus ex eo , quòd ex dicta arte sub ejusdem methodo præsumpserit Theologicas solvere quæstiones , sicut neque alius quivis est dignus notâ , qui prout variæ sunt adinventæ discurrendi methodi , juxta quam profitetur in Theologia discurret : Unde , cùm de arte sua expressè dicat , eam habuisse à Deo contradistinctè à doctrina , licèt in ista essent aliqui errores , dum non sint in illa , prout de facto non sunt , immeritò Censura infligitur , ex equivocatione supponendo ipsum dixisse se hanc præsentis libri doctrinam habuisse à Deo , cùm hoc non dicat , sed tantùm de sua arte , ex qua doctrinam deducit.

VII. Nec ipsa hujus libri doctrina ullo scatet errore , prout supponit laudatus Censor ; nulla est enim propositio notata , quæ inspecto sensû obvio juxta contextum ejusdem libri , non sit vera ac catholica , quamvis aliqua à contextu avulsa posset in malam partem deflecti ; sicut etiam possunt taliter deflecti multæ Patrum assertiones à contextu separatæ ; quia tamen rectus censendi modus est sensum ex contextu indagare , nullatenus est Censurâ digna doctrina Lulliana ; quamvis autem aliquid duriusculum dixisset , deberet in bonam accipi partem , cùm ubique se verum Catholicum profiteatur , & neūtiqum intendat ab Ecclesiæ sensu declinare , ideoque sua scripta eidem submittit , & signanter hujus libri doctrinam , ut in eodem notato Prologo sic , num. 6. profitetur : *Illa quæ in hoc libro propono dicere , volo quòd sint & intelligantur in omnibus , salvâ veritate , reverentiâ , & honore sacro Sanctæ Romanæ Ecclesiæ , cujus correctioni hæc & omnia alia mea dicta submitto.*

§. II.

Nullum fit in Prop. 5. Verbum de actu beatifico Dei, sed tantum creaturæ; atque ita ille non constituitur in creatura.

VIII. Propositionem 5. exponit laudatus Cenfor per hæc verba : *Nisi esset in prædicto gradu fruitio, scilicet perfecta, ut docet fides, nec Deus quiescere posset cum suis rationibus in effectu suo, nec effectus in Deo. Quæst. 3. Sentent. num. 1.*

Censura: Propositio est erronea, quia constituit actum beatificum Dei, qui est Dei essentia, in creatura.

IX. In notata quæst. 3. hujus libri Sent. inquit Lullus : *Utrum frui sit actus potentia appetitiva, vel cognoscitiva?* Ad cujus solutionem, num. 1. ita præmittit : *Antequam Raymundus respondisset ad hanc quæstionem secundum principia suæ artis, consideravit fruitionem, quæ est in Patria, & invenit, quod illa fruitio sit ille terminus, qui est in altiori & nobiliori gradu magnitudinis, bonitatis, æternitatis, potestatis, &c. qui possit esse inter Deum, & Beatos, & hoc convenit esse, ut sequatur ille finis, quare Deus creavit universum, aliud non esset in prædicto gradu; nec Deus posset quiescere cum suis rationibus in suo effectu, nec effectus in Deo, nec in suis attributis, quod est impossibile: Unde cum Raymundus sic consideravisset, dixit, quod Deus sit summè intelligibilis & amabilis cum summa magnitudine bonitatis, æternitatis, potestatis, &c. Unde sequitur, quod secundum hæc antecedentia sequatur ista consequentia, scilicet quod frui sit actus potentia appetitiva, & cognoscitiva, sic ad invicem proportionati, dispositi, & ordinati secundum summam amabilitatem, & intelligibilitatem; & sic Raymundus dixit quod frui æqualiter sit actus potentia appetitiva, & cognoscitiva Beatorum. Frui est etiam æqualiter actus divinarum dignitatum, qui coadjuvat fruitionem potentia appetitiva, & cognoscitiva, influendo, attrahendo, & perficiendo actus earum, & sic frui dicitur plus quàm actus potentiarum, ratione cujus potentia attingunt finem intra, & extra, mediante fruitione.*

X. Profectò ex titulo quæstionis, allato textu, & toto ejusdem quæstionis decursu, est manifestum, Lullum unicè loqui de fruitione creaturæ rationalis, seu de ejus actu beatifico, nullumque esse verbum, adhuc incidenter, de actu beatifico Dei, ac proinde æquivocationem fuit passus laudatus Cenfor putans hîc agi de actu beatifico Dei, & à Lullo constitui in creatura. Dicit sanè Lullus fruitionem

esse illum terminum creaturæ rationalis, qui est in altiori & nobiliori gradu bonitatis, magnitudinis, &c., qui possit esse inter Deum, & beatos, quia agitur de fruitione Dei, quâ perficitur creatura rationalis, & sic debet esse in majori bonitate, magnitudine, &c.; & quia hic actus habet pro objecto ipsum Deum, est inter Deum & Beatos, ac proindè, est in altiori gradu bonitatis, magnitudinis, &c., qui possit esse inter Deum & Beatos; quia, si non esset in prædicto gradu, nec Deus posset quiescere cum suis rationibus in suo effectu, id est creaturâ rationali, quatenus ipsi non conferret majus & nobilius complementum; nec effectus, id est creatura rationalis, in Deo nec in suis attributis, quatenus creatura rationalis non assequeretur Deum, nec Deo frueretur majori & nobiliori fruitione, & sic illam adhuc appetendo, non quiesceret in Deo nec in ejus attributis.

XI. Proinde dum dicit Lullus, quod nisi fruitio esset in altiori gradu bonitatis, magnitudinis, &c., nec Deus posset quiescere cum suis rationibus in suo effectu, nec effectus in Deo, nec in suis attributis; per *quiescere Deum in suo effectu* non intelligit actum Dei beatificum, vel Dei quietem suo actu beatifico annexam, sed quietem illam extrinsecam, quam habet in creatura rationali beata; Deus enim per illam fruitionem, eam complet & perficit summâ perfectione, cujus ipsa est capax, ad differentiam perfectionis, quam eidem confert, dum est in via, & propterea in ea Deus tunc quiescit, quia summam perfectionem, cujus est capax, eidem confert. Præterea in gloria, sicut creatura rationalis unitur Deo, ita Deus unitur creaturæ; ita ut ultra non proficiat, & sic in ea Deus quiescit, quia in ea permanet, & permanenter in ea beatificè moratur, ita quod illam evexit ad summum suæ perfectionis gradum: unde in fruitione, creatura quiescit in Deo ejusque perfectionibus ut in suo objecto beatifico. Deus verè quiescit in creatura, non quidem ut in objecto beatitudinis, sed ut in subiecto, quod beatificat.

XII. Hoc patet in eodem textu, ubi ait Lullus: *Frui est etiam* (est quidem, non formaliter, sed connotativè & præsuppositivè) *æqualiter actus divinarum dignitatum, qui coadjuvat fruitionem potentiae appetitivæ & cognoscitivæ, influendo, attrahendo, & perficiendo actus earum.* Hic dicit fruitionem esse actum divinarum dignitatum, id est esse effectivè ab actu divinarum dignitatum, vel præsupponere ipsum actum, quatenus Deus cum suis dignitatibus influit, attrahit & perficit actum intellectus & voluntatis: quod actu fruitionis positò, quiescit

quiescit creatura rationalis in Deo tamquam in objecto beatifico , quia , ut explicat Lullus in dicta quæstione 3. numero 2. summa intelligibilitas se communicat intelligibilitati intellectûs beati ; & sicut pulchrum , verum , & bonum objectum excitat potentiam ut ab ipsa fit apprehensum , sic supremum objectum excitat & coadjuvat , & etiam movet intellectivitatem intellectûs , ut ab ipso fit intellectum sine aliquo medio extraneo , & sic dicit Lullus quòd effectus quiescit in Deo tamquam in objecto beatifico , Deus autem dicitur quiescere in suo effectû tamquam in subjecto beatitudinis , seu in subjecto quod ipse Deus beatificat , non autem tamquam in objecto divinæ beatitudinis , atque ita nullum est fundamentum attribuendi Lullo , quòd constituat actum beatificum Dei in creatura.

XIII. Patet itaque nullum esse scrupuli locum in sensu Lulli quoad prædictum textum notatum , imò neque in phrasi & modo loquendi , quatenus modum , quò Deus se habet in fruitione , quâ creatura ipsò fruitur , explicat per hoc quòd Deus *quiescat* in creatura ; hæc enim phrasis conformis est scripturæ , in qua illa habitudo , quâ Deus in via se habet ad animam per gratiam sibi unitam , explicatur per mansionem , ut Joannis 6. 57. *Qui manducat meam carnem , & bibit meum sanguinem in me manet , & ego in eo* , & 14. 23. *Ad eum veniemus , & mansionem apud eum faciemus* ; & 15. 4. *manete in me , & ego in vobis*. Sanè hujusmodi habitudo , quæ est in via , non est nisi signum ejus , quæ futura est in Patria : sicut etiam per quietem , & requiem Dei explicatur inhabitatio Dei in anima fidei & sanctâ , & præcipuè in beata , juxta illud Eccl. 24. *In omnibus requiem quæsi vi , & in hæreditate Domini morabor :::: & qui creavit me requievit in tabernaculo meo*. Conformiter ad hoc D. August. , lib. 13. Confess. cap. 37. ait : “ Etiam tunc (in Sabbato vitæ æternæ) enim sic requiesces ” in nobis , quemadmodum nunc operaris in nobis ; & ita erit illa ” requies tua per nos , quemadmodum sunt ista opera tua per nos ” . Et lib. 4. de Gen. ad lit. cap. 16. super illud Gen : *Et requievis die septimò* , sic , num. 27. scribit : “ Illud quoque attendendum est , ” quod Dei requiem , quâ de seipso Beatus est , nobis insinuari oportebat , ut intelligamus quomodo dicatur requiescere in nobis ; ” quod non dicitur , nisi cum in se requiem præstat & nobis. ” .

§. III.

Ex contextu in Prop. 6. passio in Deo intelligitur esse productio passiva.

XIV. Hæc est sexta propositio notata : *Spiritus Sanctus habet duas passiones, unam à Patre, aliam à Filio, sicut Pater habet duas actiones, ac Filius unam actionem, & unam passionem.* Quæst. 12. sent. num. 3.

Censura : *Propositio est impropria, & periculosa in fide, quia in divinis non potest sumi nomen passionis.*

XV. Quia Eymericus eamdem quæstionem notavit, de hac supra egimus, tom. 2. cap. 9. ad artic. 20 & 21., ad quod remittimus pro pleniori intelligentia ; cum autem hic Censor exponat, quâ ratione Censuram inurit, aliqua sunt breviter adducenda ; & quidem passionem aliquo modo Deo attribui, non quidem in sensu philosophico, sed grammaticali, sicut etiam de actione, docet D. Thomas, 1. p. quæst. 41. art. 1. ubi ad 2. ita discurret : „ Ad cujus eviden-
 „ tiam attendendum est, quod primò conijcere potuimus origi-
 „ nem alicujus ab alio ex motu, quod enim aliqua res à sua disposi-
 „ tione removeretur per motum, manifestum fuit hoc ab aliqua causa
 „ accidere ; & ideo *actio secundum primam nominis impositionem im-*
 „ *portat originem motus*, sicut enim motus, prout est enim in mobili
 „ ab aliquo, dicitur passio, ita origo ipsius motus, secundum quod
 „ incipit ab alio & terminatur in id quod movetur, vocatur actio :
 „ remotò igitur motu, actio nihil aliud importat, quàm ordinem
 „ originis secundum quod à causa aliqua, vel principio, procedit
 „ id quod est à principio : Unde, cum in divinis non sit motus,
 „ actio Personalis producentis Personam nihil aliud est, quàm habi-
 „ tudo principii ad Personam, quæ est à principio, quæ quidem
 „ habitudines sunt ipsæ relationes, vel notiones, quia, cum de Di-
 „ vinis & intelligibilibus rebus loqui non possimus, nisi secundum
 „ modum rerum sensibilium, à quibus cognitionem accipimus, &
 „ in quibus actiones & passiones, in quantum motum implicant,
 „ aliud sunt à relationibus, quæ ex actionibus & passionibus confe-
 „ quantur, oportuit seorsum significari habitudines Personarum
 „ per modum actus, &c. Et ad 3. sic scribit : „ Dicendum quod
 „ actio secundum quod importat originem motus infert ex se passio-
 „ nem, sic autem non ponitur actio in Divinis Personis : Unde non po-
 „ nuntur ibi passiones, *nisi grammaticè loquendo*, quantum ad modum

„ significandi, sicut Patri attribuimus generare, & Filio generari.

XVI. Itaque, juxta Divum Thomam, actio & passio, remotò defectu, Deo attribuuntur, non quidem in sensu philosophico, sed in sensu grammaticali, prout actio dicit producere, & passio, produci, & disculpanda est Doctorum locutio eisdem terminis utens, cum à creaturis sensibilibus sumatur modus loquendi de rebus intelligibilibus, dummodo sanum sensum prætendat, & defectum, qui actionem & passionem in creatura comitatur, Deo non attribuat. Hoc autem expressè cavet Nullus passim, sed expressè in eodem Lib. Sent. nam. quæst. 8. docet productionem in Deo esse sine defectibus, qui sunt in productione creata, & sine ullo accidente. Quæst. 11. objicit Eremita; sic num. 2. „ Item si Deus non est in genere, non „ est in relatione, nec de genere actionis & passionis, nec est in „ isto nunc, in quo sumus, nec in isto loco, vel in alio, & sic de „ similibus: Unde, remotà relatione à Deo, non esset in Deo distinctio Personarum, & idem de remotione actionis, & passionis, „ ratione cujus in Deo non essent generatio, & spiratio, &c. „ Ad hoc autem num. 3. ita respondet: „ Et sicut ipse (Deus) per suam „ coessentialiam substantiam, quæ est eadem cum sua coessentiali differentia, differt à substantia creata, sic cum sua coessentiali relatione, productione, infinitate, æternitate differt à creata relatione, actione, & passione, loco, & tempore; sed intellectus conjunctus ponit Deum in genere, ut per aliquam media possit contemplari, & attingere veritates, quas Deus habet in se, dicens, „ quòd Deus sit in genere substantiæ, cum substantia sit per se stans, „ & dicit quòd sit in genere relationis, ut in ipso possit attingere „ pluralitatem personarum, & dicit quòd sit in genere actionis & passionis, ut in Deo intelligat suam operationem & productionem intrinsecam, & sic per consequens de tempore & loco, &c.

XVII. Hinc patet, sensum Lulli esse, quòd, dum in Deo concipitur vel exprimitur actio & passio, unicè est ad explicandam intrinsecam productionem, quin reverà sit in Deo actio & passio de genere actionis, & passionis accidentalis, licèt intellectus, ut dictam productionem concipiat, eam ponat sub genere intentionali actionis, & passionis, ac proinde docet apertè, actionem, & passionem; quæ de Deo dicuntur, solum exprimi, ut intelligatur Divina productio; in qua una Persona est produciens, & alia producta; non autem ut significetur esse in Deo actionem & passionem de genere accidentium, & cum defectu, cum quo sunt in creaturis. Præterea, quæst.

20. num. 4. objicit Eremita quòd si in Deo esset numerus Personarum, sequeretur quòd *Deus esset compositus & subiectus tempori, actioni, & passioni, & sic de aliis accidentibus* : ad quod num. 5. respondet Lullus : “ quòd sit impossibile, quòd sit limitatio inter producentem infinitum, & productum infinitum, infinito producere existente in æternitate de infinito producente, & producto, nec per consequens compositio, cum producens sit infinita simplicitas, sicut est infinita bonitas, magnitudo, &c. & de tota sua simplicitate producit productum, ratione cujus compositio non potest resultare, cum inter naturam, & essentiam simplicitatis & compositionis sit magna distantia, & sic per consequens de passione, quam tu dicis, cum Filius sit productus de Patre, qui est pura forma, ratione cujus in Filio non potest esse passio materialiter, nec tempus, cum sit productus in æternitate, & de æternitate, nec per consequens quantitas, qualitas, locus, situs, & habitus, cum sit productus de infinitate, & in infinitate, & sic de Sancto Spiritu.

XVIII. Constat itaque Lullum in eodem libro explicare, non esse in Deo passionem in sensu philosophico, & modò quòd attribuitur creaturæ, subindeque, dum quandoque Deo attribuitur, non accipi in sensu rigoroso & de genere prædicamentali, sed unice ad exprimendam productionem passivam personæ productæ, absque tamen ullo defectu per passionem creatam importato : atque ita laudatus Censor immeritò excandescit contra Lullum in relata Censura, cum, præter doctrinam allatam, ex eodem libro sufficienter intelligatur sensus Lulli in quæstione 12. notata : nam ibi inquit Lullus : *Utrum Sanctus Spiritus procedat à Patre & Filio ?* Probat Spiritum Sanctum debere esse in Deo, ut in Deo sit principium principiatum non principians, hoc est principium productum, non producens, & concludit : *Ergo est tertia Persona, quæ procedit à Patre & Filio ; à Filio procedit, ut Filius sit principiatum, & principians (productus, & producens) à Patre procedit, ut Pater sit æqualis Filio in bonitate, infinitate, æternitate, &c. Patre habente duas actiones, unam in generando, aliam in spirando, sicut Filius habet duas, scilicet unam actionem in quantum spirat Sanctum Spiritum, ut probatum est, & unam passionem, in quantum à Patre recipit filiationem (id est, in quantum à Patre producitur ut Filius) & sic à simili convenit quòd Sanctus Spiritus procedat à Patre, & Filio, ut sit æqualis Patri & Filio, & quòd sic habeat duas passiones, unam à Patre, & aliam à Filio, sicut Pater ha-*

Text pr. 6.

bet duas actiones , & Filius unam actionem , & unam passionem , ut dictum est.

XIX. Sanè istemet Textus notatus apertè ostendit quòd passio ibi sumitur tantùm grammaticaliter pro productione passiva, cùm Textus intendat probare, quòd Spiritus Sanctus producitur à Patre, & Filio; deinde passio sumitur eò modò, quò sumitur actio; actio autem sumitur pro activa productione, atque ita passio pro passiva productione; quòd expresse specificatur dum dicitur, Filium habere *unam passionem, in quantum à Patre recipit filiationem*; id est, in quantum à Patre producitur, ac proinde passio, quæ attribuitur Spiritui Sancto, non est aliud quàm ipsius productio passiva; dicitur autem habere duas passiones, prout explicuimus citatò tom. 2. cap. 9. non quidem duas quoad rectum productionis passivæ, sed quoad connotatum, quatenus à duabus Personis producitur: adeoque indebitè relatus Lulli Textus præfatà inuritur Censurà, cùm apud omnes debeat esse certum hujusmodi actionem, & passionem, id est, sumptas pro activa productione & passiva, esse in Deo; atque ita in Deo esse actionem & passionem absque defectu; si enim actio potest concipi, absque defectu, ita etiam passio eidem correspondens.

XX. Hæc omnia expresse docet Castilla in speculo Theologiæ Baconicæ, tom. 3. tract. 10. de Trinit. ubi quæst. 26. inquit: *Utrùm processiones activæ & passivæ, sint verè & propriè de prædicamento actionis, & passionis?* Et statim, num. 95. præmittit sic: „ Cùm potentiæ activæ sua passiva potentia correspondeat, & omnis „ potentia sit propter suum actum, cuilibet activæ processioni sua „ quæque correspondet passiva processio: unde, si in Deo damus „ & concedimus utrasque processiones, & verè, & propriè, sicut „ eadem veritate confitemur originans, & originatum, has easdem „ actiones & passiones, ut par est, debemus in illo concipere, ablatis „ iis imperfectionibus; quas in creatis processionibus cognoscimus, „ & quæ limitationi sunt obnoxia. Hucusque omnes convenire tenentur, & ab hoc incipit diversitas in modo sentiendi circa apicem „ & quidditatem harum divinarum processionum.

XXI. Unde, num. 99. hanc statuit conclusionem primam: *Processiones activæ Divinæ sunt de genere & prædicamento actionis*, quam dicit esse Doctoris resoluti Joannis Baconii, in 1. dist. 8. & probat, quia actio ut spectans ad prædicamentum est perfectio, quæ depurari potest ab omni defectu, ac proinde ad eam spectat actio divina. Postea, num. 102. hanc scribit conclusionem secundam: *Processiones*

passivæ, quæ sunt generari in Filio, & spirari in Spiritu Sancto, sunt verè passionēs de hoc prædicamento: quam dicit esse resoluti Doctoris in eadem, dist. 8. & probat, quia passio sic sumpta nullam involvit imperfectionem, ob quam Deo repugnet; & ideo ad objectionem, num. 128. propositam, quodd scilicet passio ex sua ratione formali dicit imperfectionem potentialitatis, respondet, num. 130. dicens:

» Datur duplex genus potentiæ passivæ; & datur passiva potentia
 » subjectiva, & objectiva: prima potentia est propria subjecti trans-
 » mutabilis, & per actionem mobilis de non esse ad esse, ut poten-
 » tia materiæ primæ respectu generationis potentia passiva
 » objectiva & terminativa præscindi potest ab hujusmodi imperfec-
 » tione potentialitatis & limitationis, juxta modum potentiæ activæ
 » sibi correspondentis. Si enim activa potentia, & ejus actio esset
 » termini productiva per purissimam communicationem ejusdem na-
 » turæ & substantiæ agentis, tunc passiva potentia ad produci, &
 » ejus passiva productio erit similiter actualissima, passumque &
 » terminus per eam productus non esset in potentia essentiali, sed
 » in actu ejusdem essentiae: sic loquimur de divinis passivis pro-
 » cessionibus.

§ I V.

*In Propositione 7. solum Spiritui Sancto attribuitur appropriatè missio
 Angeli Gabrielis, non autem privativè ad alias Personas.*

XXII. Septima notata propositio sic exponitur: *Sicut Deus Pater suum Filium misit ad assumendum carnem, sic Spiritus Sanctus misit Angelum Gabrielem nuntium Beatæ Virginis, quam Spiritus Sanctus inspiravit.* quæst. 12. num. 5.

Censura: Temeraria est comparatio & erronea: tum quia missio Angeli est tribuenda toti Trinitati; tum quia est discrimen inter utramque missionem.

XXIII. Nescio, cur hic præclarissimus Censor emotam bilem contra Lullum jam à prima propositione ostendat, quod maximè appareret in hac Censura; ut autem videatur quàm immeritò, notandum est Lullum in hac, q. 12. postquam explicuit, ut diximus § antecedenti, Spiritum Sanctum procedere à Patre & Filio, sibi num. 2. proponere objectionem Eremitæ, videlicet, quodd, quia B. Joannes, cap. 15. 26. solum explicuit Spiritum à Patre procedere, Spi-

rius, qui à Patre procedit; non videtur S. Spiritum, à Filio procedere, quia si sic esset, hoc dixisset Evangelista: & num. 3. respondet dicens: *Quòd sicut Deus Pater misit suum Deum Filium ad assumendam carnem, sic Sanctus Spiritus misit Angelum Gabrielem ad annuntiandum Beatæ Virgini Mariæ, quam Sanctus Spiritus inspiravit; & quia Sanctus Spiritus procuravit Incarnationem, Beatus Joannes in supradicta auctoritate locutus est de Sancto Spiritu & de Patre, nec convenit; quòd dixerit Sanctum Spiritum procedere à Filio, cum ipse Evangelista consideraverit missionem, & spirationem Incarnationis.*

Text. prop.
7.

XXIV. Sanè in prædicto textu non negat Lullus missionem Angeli esse à tota Trinitate, nec illud innuit, & solum illam attribuit Spiritui Sancto, sicut ipsi attribuitur Incarnatio Filii Dei, licèt sit operatio à tota Trinitate procedens, ut communiter explicant P P. & DD. ad illa verba: *Spiritus Sanctus superveniet in te*; & hoc ideo, quia Incarnatio est opus amoris, opera autem amoris, licèt sint à tota Trinitate, Spiritui Sancto attribuuntur: unde, cum ipsa Incarnatio attribuitur Spiritui Sancto, non est inconsequens, imo apprimè consentaneum, quòd missio Angeli ad annuntiandam hanc Incarnationem, utpote ad eandem ordinata, tribuatur etiam Spiritui Sancto, sicut etiam illa inspiratio Divina, quâ B. Virgo Maria fuit inspirata supernè, ut assentiretur illi operationi, quam in ipsa peragere Deus decreverat, eidem Spiritui Sancto tribuitur; & quia sic verè dicitur quòd *Spiritus Sanctus procuravit Incarnationem*, ut loquitur Lullus in adducto textu, consequenter etiam verè dicitur quòd *misit Angelum ad annuntiandum*, per appropriationem quidem, sicut ipsa operatio Incarnationis, & alia plura, non autem privativè & per exclusionem concursus aliarum Personarum.

XXV. Præterea, ex eodem textu eadem explicatio deducitur; nam reddens, rationem, cur Evangelista Joannes solum dixit Spiritum Sanctum à Patre procedere, & non explicuit à Filio, dicit hoc esse quia Evangelista consideravit missionem, & spirationem Incarnationis, id est, missionem Filii à Patre ad se incarnandum, & spirationem Virginis ad consentiendum, ad quam spirationem eam prævenit missio Angeli annuntiantis Dei decretum, & quia ad missionem Filii consequitur missio Angeli, & inspiratio Virginis, solum fuit necesse exprimere Spiritum Sanctum à Patre procedere, quia solum exprimebatur operatio Spiritus Sancti tamquam consequens ad operationem Patris, & non uti consequens ad operationem Filii: unde, sicut inspiratio Virginis rectè tribuitur Spiritui

Sancto, & ipsa Incarnationis operatio, ita etiam Angeli missio, quæ tantum erat prodroma, & præparativa ad hæc omnia, licet hæc omnia effectivè sint à tota Trinitate.

XXVI. Neque ab Angeli missione alias Personas excludit Lullus per comparisonem, quâ dixit: *Sicut Deus Pater misit suum Filium Deum ad assumendam carnem, sic Sanctus Spiritus misit Angelum Gabrielem ad annuntiandum B. Virgini Mariæ*; nam, licet solus Pater privativè ad alias Personas mittat Filium, non sequitur in dicta comparisonem quòd solus Spiritus Sanctus privativè ad alias Personas mittat Angelum, quia notum est, & evidens in Theologia, comparationes non tenere ex omni parte, cum nulla sit omnimodè correspondens rebus divinis; & solum proponuntur comparationes ad explicandas res secundum illum sensum, ad quem intelligendum deserviunt exempla comparata: Unde in dicta comparisonem non confertur operatio propria cum operatione propria, sed operatio appropriata, cum operatione propria; cum enim ea, quæ ad incarnationem spectant tribuantur in scriptura Spiritui Sancto, prout dicitur Lucæ 1. *Spiritus Sanctus superveniet in te*, & est Articulus Fidei in symbolo, quòd Christus est conceptus de Spiritu Sancto; sicut in incarnatione Pater misit Filium suum & hoc est ipsi proprium: Filius assumpsit carnem, quod ipsi quoque est proprium: ita Spiritui Sancto est appropriatè proprium quòd Virginem inspiravit, eam fecundavit, & humanitatem Deitati univit, ac consequenter quòd Angelum ad Virginem misit, cum hæc missio fuerit quædam præparatio ad incarnationem.

XXVII. Etiam dici potest, quòd dicta comparatio est quoad motivum incarnationis; quia, sicut Pater misit Filium ex amore, juxta illud Joannis 3. 16. *Sic Deus dilexit mundum, ut Filium suum unigenitum daret*, & alia plura scripturæ loca; ita Spiritus Sanctus, qui est amor, ad hujus missionis executionem misit Angelum ad annuntiandum Beatæ Virgini; vel etiam potest dici, & fortè plùs ad mentem Lulli, quòd attenditur in dicta comparisonem ex una parte Pater & Filius, & ex alia Spiritus Sanctus & B. Virgo, ut ex ipsa sumeret sibi carnem ipse Filius, consentiente ipsâ Beatâ Virgine; & sicut Pater misit Filium ad accipiendam carnem, ita Spiritus Sanctus inspiravit B. Virginem, ut consentiret, & ad hoc ad eam misit Angelum, qui nuntiaret divinæ Trinitatis decretum, & induceret ad consensum: Unde in dicta comparisonem ly *sicut* nunquam sumitur sub æqualitate, sed tantum cum aliquali similitudine & proportionem, prout

prout in omnibus aliis comparationibus, quæ ad divina explicanda proponuntur: atque ita non officit secunda ratio allatæ Censuræ, scilicet, *quia est discrimen inter utramque missionem*; nulla enim tum in scriptura tum in Patribus exposita est comparatio ad divina, in qua, si benè perpendatur, non sit magnum discrimen inter comparata, ut V. G. Comparatio Verbi humani ad Verbum divinum, & plura alia, quæ facile observari possunt.

XXVIII. Porro quòd missio Angeli sit à tota Trinitate effectivè, supponitur à Lullo in toto hoc libro, ubi sæpè opera ad extra toti Trinitati seu Deo adscribuntur, ut q. 2. num. 3. q. 9. num. 1. ubi asserit quòd *tota Trinitas est creatrix*, & quòd posse in Deo est Personis commune quoad creationem; q. 10. num. 3. Deo adscribit creare, & gubernare mundum; q. 15. ostendit quòd emanatio creaturarum de necessitate præsupponit generationem & spirationem, & quòd tota Trinitas est creatrix, & idem supponit in pluribus aliis questionibus; expressè autem hanc Angeli missionem adscribit Deo, juxta verba Evangelii, & non Spiritui Sancto privativè, ubicumque agit determinatè de dicta missione: sic in *Doctrina Puerili*, cap. 6. de conceptione Jesu-Christi ait, quòd *Deus misit Angelum, Sanctum Gabrielem ad B. Virginem*. Etiam lib. de *Benedicta tu*, part. 2. Deo etiam adscribit missionem Gabrielis Archangeli; lib. de laudibus B. Virginis Mariæ, cap. 21. de Fide dictam missionem etiam Deo adscribit, & in lib. *Clericus*, cap. 8. de articulo *conceptus de Spiritu Sancto*: Ubi sic scribit: *Deus Pater & Deus Filius per amorem spirant Spiritum Sanctum; & ideo Spiritus Sancti fuit sacratissimam Mariam inspirare ad consentiendum verbis Gabrielis annuntiantis Filii Dei incarnationem, quod posset se Filius Dei hominem facere*.

XXIX. Clarius fortè hoc exprimit Lullus in Apostrophe latina (tom. 4.) de Articulis Fidei, in Artic. 9. Tit. de Incarn. Filii Dei & sua Concep. per Sanc. Spir. num. 3. pag. 46. ubi sic scribit: *In omni divino opere extrinseco operatur tota Trinitas, aut secundum unam communem rationem, aut secundum proprietates personales; sed in tali incarnatione Pater mittit Filium, ut generetur . . . in humana natura . . . quam generationem appellamus missionem; Filius autem est, qui generatur: igitur, cum in tali incarnatione non sint nisi tria, scilicet missio generatio passiva, & conceptio, cum Patri attribuaturs missio, generatio passiva Filio, Sancto Spiritui debuit attribui conceptio*. Similiter, lib. Proverb. p. 3. cap. de incarn. Filii Dei, num. 2. *Deus Pater misit suum Filium ad assumendum carnem, & Filius illam assumpsit, & Sanctus*

Spiritus illum carne vestivit; num. 9. Sanctus Gabriel à Patre fuit nunciatus missus ad nostram Dominam, & Sanctus Spiritus perfecit illam nuntiationem, illam concipiente; & num. 10. Quia Pater producit Filium, ad illum pertinebat missio, & quia Sanctus Spiritus est productus à Patre & Filio, ad illum pertinebat unio divinae & humanae naturae.

XXX. Itaque, cum Lullus agnoscat & fateatur, missionem Angelis ad Beatam Virginem esse à tota Trinitate, censendum est solum per appropriationem, & non per exclusionem aliarum Personarum, eam attribuere Spiritui Sancto in textu notato: ad modum quo ipsam missionem Angeli attribuit Filio. D. Petrus Chrisologus apud Bibliam Marianam Iosephi de San-Miguel & Barco in D. Luc. super Evang. *Missus est.* Dubio 23. dicens: "Veni Angele, & in gravi arcanoque
" Mysterio obsequium tuum exhibe, in hoc miraculo mihi ministra.
" Equidem misereor Adæ, qui in peccatum lapsus miserè periit, &
" Paradiso exclusus, exul est & errabundus, in fauces lupi incurrit.
" Decrevi igitur descendere ut illum quæram, & inimicum ejus
" comprehendam. Hoc arcanum nulli coelestium virtutum pando,
" nisi tibi: itaque vade ad Virginem Mariam, & annuntia ei secretum,
" ut mihi in terris præparet habitaculum; noli autem illi terrorem inferre,
" sed prima salutationis verba sint, quæ gaudium sonent:
" *Ave gratia plena.* Similiter eandem Angeli missionem Filio divino attribuit D. Bernardus, serm. 1. in *Annuntiatione Beatæ Mariæ*, de Verbis Psalmi: *Ut inhabitet gloria in terra nostra*, num. 14. dicens:
" Intellexit Rex (id est Filius per Regem Salomonem expressus,
" ut antea exposuit) quid loqueretur, & ait: *Pœnitet me fecisse hominem.*
" Pœna, inquit, me tenet, mihi incumbit sustinere pœnam,
" pœnitentiam agere pro homine, quem creavi. Tunc ergo dixit:
" *Ecce venio.* Non enim potest hic calix transire nisi bibam illum.
" Et accersito protinus Gabriele, vade, inquit, dic Filiæ Sion: *Ecce Rex tuus venit.*
" Festinavit ille, & ait: *Adorna Thalamum tuum Sion,* &c.

§. V.

Rectè sentit Lullus in Proposit. 11. quod anima sensitiva hominum est genita, & distincta à rationali.

XXXI. Undecimus Textus notatus est iste: *Anima sensitiva hominum est à generante. Si anima sensitiva hominum esset à creatore, &*

anima sensitiva brutior à generante, plura inconvenientia sequerentur contra ordinem naturæ. Quæst. 89. num. 2.

Censura: Propositio est erronea, vel admodum temeraria.

XXXII. Miror sanè tam facilè eudi Theologicos errores in materia purè philosophica, & de qua nihil formaliter nec virtualiter est expressum in Sacra Scriptura, traditione, vel Ecclesiæ definitionibus. Fateor quidem Lullum non in hac tantùm notata quæstione, sed alibi passim asserere in homine, præter animam rationalem, esse pariter animam sensitivam, & hanc genitam esse, seu à generante productam; animam verò rationalem à Deo creatam. Nèdum hoc asserit Lullus, sed etiam efficaciter probat philosophicis rationibus, imò & indirectè theologicis, quarum nulla evidenter potest solvi. Hoc sanè fateor tenere Lullum, constanter tamen pronuntio, thesism ipsam de generatione animæ sensitivæ in homine nullatenus adversari alicui Scripturæ textui, neque rationes, quibus hoc probat; quinimò eandem Lulli sententiam valde conformari scripturæ sensui, & phrasi.

XXXIII. Dico nullum Scripturæ textum posse adduci, qui vincat animam sensitivam hominis non esse genitam, nec ex Ecclesiæ traditione hoc deduci, imò ex definitionibus ipsius infertur ipsam reliquisse in sua probabilitate hanc sententiam philosophicam; nam ignotum non est, Apollinarem Laodicenum Episcopum tenuisse in hominibus esse animam vegetativam, sensitivam, & rationalem; quam, quia hominibus propriam, vocabat humanam animam, & licèt Deum factum hominem in Christo affirmaret, negabat tamen in ipso animam humanam, licèt eidem animam vegetativam, & sensitivam concederet, ut refert Cabassutius in *Notitia Ecclesiast.* sec. 8. ad Synod. Œcumen. 8. num. 12. ad ejusdem, can. 10. & tamen referente ipso ad sæculum, pag. 101. num. 4. in Alexandrina Synodo anni 362. à D. Athanasio coacta, solum damnata fuit ejus hæresis negans animam rationalem in Christo; nec Verbum ullum fuit contra animam sensitivam in ipso, vel in aliis hominibus, distinctam à rationali; imò ex Petavio, lib. 1. de Incarn. cap. 6. num. 16. decrevit ipsa Synodus Christum, non solum animam, sed etiam mentem, habuisse; hæc enim posterior peculiaris fuit labes Apollinaristarum: quam potissimum notandam Patres illi Censuerunt. Id clarè demonstrat Synodica Concilii illius Epistola, quæ apud Athanasium legitur, ubi hujusmodi professio à Catholicis ad ineundam concordiam expressa dicitur: *Salvatore non habuisse corpus inanimatum, nec*

sensus aut mentis expers. Neque postea, cum iterum, referente ad sec. 4. pag. 123. eodem Cabassutiō, damnata fuit Apollinaris hæresis in Concilio Romano sub Damaso anno 381. eodem tempore, quō secunda œcumenica Synodus Constantinopoli celebrabatur, aliquid est expressum contra animam sensitivam Christi, vel aliorum hominem, sed tantum præscripta fuit hæresis, animam abrogans rationalem incarnato Filio Dei, ex quo etiam solo capite Apollinarem impugnant Ecclesiæ Patres.

XXXIV. Tantum verò abest, ut in dictis Conciliis damnata fuerit Doctrina de anima sensitiva distincta à rationali, tam in Christo quàm in aliis hominibus, quodd ipse Athanasius eam videtur adstruere in summa disput. habitæ inter Apollinaristam & Grec. Episc. nam ibi, in principio pag. mihi 1083. lit. B. sic scribit: *Item, sicut animâ rationis participæ cum animali conjunctâ, homo existit, nec tollitur, quodd sit animal, ita Deus conjunctus & undè creditus cum animali rationis participæ agnoscitur, & creditur esse Christus, neque tollitur quodd sit homo, sed idem est Deus & homo.* Nam, si anima rationalis unitur cum animali, caro cui unitur est animata animâ sensitivâ, ac proinde hæc est distincta à rationali, tum in homine quolibet, tum in Christo. Et per hæc verba idem sentit ipse in Epist. Synod. adversus Apollinarem dicens: *Cum Dominus propter nos homo factus sit, non posse corpus ipsius esse mentis expers, aut animæ.* Patres etiam, qui contra Apollinarem decertarunt, admittere in Christo aliam animam præter rationalem videntur. Sic (apud Petav. Theol. Dog. de Incarn. lib. 5. cap. 11. num. 5.) Constantinop. secunda Synod. in Epist. Synod. ad Damasum ait: *se nec animæ, aut mentis, expertem, nec imperfectam carnis œconomiam, admittere.*

XXXV. D. Epiph. (ibid. num. 6.) in Ancoratu, *Deum hominem factum* sic explicat, ut significet *perfectum assumptum hominem, animam, & corpus, & mentem, & quidquid aliud homo est, excepto peccatō.* D. Aug. (ibidem num. 8.) Epist. 57. *Cum dicis perfectum hominem totam illic naturam humanam vis intelligi; non est autem homo perfectus, si vel anima carni, vel animæ ipsi mens humana defuerit.* Gregorius Nazian. (ibidem cap. 12. num. 2.) Epist. 1. ad Cledon. *Nam Divinitas cum sua carne homo non est, sed neque cum sola anima, neque cum ambobus, si mentem abstuleris, quæ etiam magis homo censetur.* Item D. August. Epist. 140. aliàs 120. cap. 4. num. 12. ait: *Neque enim homo Christus, ut Apollinaristæ hæretici putaverunt, aut non habuit animam, aut non habuit rationalem.* Idem, lib. de agone

Christi cap. 18. scribit : „ Si ergo visibilia munda à visibilibus im-
 „ mundis contingi possunt ; & non inquinari : quanto magis invisi-
 „ bilis , & incommutabilis veritas , per spiritum animam , & per
 „ animam corpus suscipiens , totò hominè assumptò , ab omnibus
 „ eum infirmitatibus nullà suà contagione liberavit ? „ Et cap. 19.
 „ Nec eos audiam. 9. qui Trinitatem quidem in unà æternà substan-
 „ tia constituentur , sed hominem ipsum , qui temporali dispensatione
 „ susceptus est , audent dicere , non habuisse hominis mentem , sed
 „ solam animam & corpus. Hoc est dicere non fuit homo , sed mem-
 „ bra corporis habebat humana. Animam enim , & corpus habent ,
 „ & bestię , sed rationem non habent quæ mentis est propria ;
 „ sed si execrandi sunt illi , qui eum negant humanum corpus ha-
 „ buisse , quod est infimum in hominè ; miror quòd isti non eru-
 „ bescant , qui hoc eum negant habuisse , quod est optimum in ho-
 „ mine. „ In relatis sanè Patribus apparet solum impugnatos fuisse
 Appollinaristas , quæ Christo negabant rationalem animam , non
 autem quia eidem attribuerent sensitivam distinctam ; imò istam ap-
 probare videntur tanquam quid à mente vel Spiritu distinctum.

XXXVI. Duas esse in homine animas , unam bonam & aliam ma-
 lam , ambas rationales utpote rationis participes , & quæ , bonum ,
 videlicet bona , & malum , quæ mala , ageret , tenuerunt Manichæi ,
 ut omnibus est in confesso , quos impugnat Augustinus , lib. *de dua-*
bus animabus ex eo præcipue quòd unam ex Deo non esse mentie-
 bantur ; qui cap. 13. in eadem anima rationali agnoscit partem infe-
 riorem & superiorem ; attendens tamen ad sensibilia , ad quæ pro-
 pendimus , & ad intelligibilia , quæ rimamur , subiungit : *Quamquam*
si eis concedatur inferiore aliò genere animarum nos illi ad turpia , non
inde conficiunt , aut illas naturas malas esse , aut istas summum bonum ;
 & infra : *Ex quibus illud est quod intelligi volo , etiam si sunt animæ ,*
quod interim incertum est , corporeis officiis , non peccatò , sed naturâ de-
ditæ , nosque , quamquam sint inferiores , aliquò tamen inferiore vicini-
tate contingunt , non illas ideo malas habere oportere , quia & nos , cum
eas sequimur , & corporea diligimus , mali sumus. His enim verbis aper-
 tè innuit Augustinus non esse certum , & exploratum in homine non
 esse animam sensitivam à rationali distinctam ; certum autem esse ,
 quòd , quamvis ipsa admittatur , non tamen naturâ est mala sed bona
 & à Deo creata , nos autem malos effici , dum ejus condescendimus
 cupiditati.

XXXVII. Hunc Manichæorum errorem notat Auctor , lib. de Ec-

eclesiasticis Dogmat (qui tamen non est D. Augustinus) cap. 15. ubi scribit: *Neque duas animas esse dicimus in uno homine, sicut Jacobus & alii syrorum scribunt, unam animalem, quā animetur corpus, & immixta sit sanguini; & alteram spiritalem, quæ rationem ministret: sed dicimus unam esse eamdemque animam in homine, quæ & corpus suū societate vivificet, & semetipsam suā ratione disponat, habens in sese libertatem arbitrii, ut in suæ substantiæ eligat cogitatione quod vult.* Sanè hic Autor, licet id prætendat Eusebius Amort. Philos. Polling. part. 3. Philos. partic. quæst. 2; non repræsentat sensum universalis Ecclesiæ, quia plures docet errores, qui non possunt censerī de sensu universalis Ecclesiæ; ipse tamen per *ly animam animalem* non intelligit animam sensitivam à rationali distinctam, quia hanc in homine supponit ex parte corporis ab anima rationali contradistincti, nam cap. 19. sic scribit: *Duabus substantiis tantum constat homo, animā, & corpore: animā cum ratione sua, & corpore cum sensibus suis, quos tamen sensus absque animæ societate non movet corpus; anima verò, & sine corpore, rationale suum tenet.* Unde si corpus cum sensibus suis contraponitur animæ rationali, consideratur in corpore anima sensitiva, cujus potentia sunt corporis sensus; quia sensus non consistunt in organis corporis, sed in virtute agente per illa.

XXXVIII. Itaque illa animalis anima, quam in homine negat, est illa anima naturā mala, quam asseriebant Manichæi immixtam sanguini, & corpus vivificantem: quæ omnia, cum mala reputarent, malæ animæ tribuebant, & ideo animalis & contradistincta à spiritali dicebatur; ipsa tamen in eorum sensu rationalis erat, quia malum ab ipsa procedebat; & hoc videtur innuere idem Autor, dictum errorem tribuens Jacobo, & aliis Syris, quia hic Jacobus fuisse videtur ille Autor Jacobitarum, qui suo errore commaculans suos compatriotas Syros & Armenos apud orientem, hucusque celebratur, ut refert Petavius, Theolog. Dogm. tom. 4. lib. 1. de Incarn. cap. 17. num. 6. & Annatus in Apparatu, lib. 7. art. 7. tit. de Jacobitis; quippe, cum iste Jacobus esset ex discipulis Eutychis, & Monophysitas sub Ducatu suo colligeret, ipseque Eutyches de grege esset Manichæorum, hanc ex istis videtur adoptasse falsam doctrinam de duplici anima, quarum una bona, aliaque mala esset; quamvis ipsi Jacobitæ ex aliis pejoribus erroribus communiter sint magis notæ.

XXXIX. Eundem errorem damnavit Concil. gen. VIII. & IV. Constantinopolitanum, Can. 10. prout refert Cabassutius, Notit. 10. de istis verò Autoribus notare licet, nullum, quantum videre li-

Ecclef. sæc. IX. in hac Synodo, qui dictum Canonem sic excribit: *Cum vetus novaque Lex unicam Domini, eamque ratione & intelligentiâ pollentem, esse animam: eandemque sententiam Deiloquorum omnium Patrum, & Doctorem Ecclesiæ doctrina confirmat; sunt tamen qui duas homini esse animas asserant; & quibusdam vitiosis ratiocinationibus suam hæresim stabiliant: Itaque Sancta hæc & Ecumenica Synodus hujus impietatis conditores cum tota secta sua magnâ voce anathematizat; qui verò post contraria dicere ausus fuerit, anathema esto. Ferri Manichæos istò Canone fatetur ipse Cabassutius, quamvis explicet ipsos tenuisse animam sensitivam distinctam à rationali, adeoque hunc Canonem detorquet contra asserentes animam sensitivam distinctam à rationali, quamvis eam cum Manichæis non agnoscant naturâ malam; at cum animam naturâ malam, principium malorum operum agnoscerent Manichæi, eam non purè sensitivam, sed quodammodo etiam rationalem fatebantur: Unde omnes agentes de Manichæorum hæresi communiter tenent, eos asseruisse duas in homine rationales animas, ut clarè indicat ipse Augustinus, lib. citat. de duabus animabus.*

XL. Quare P. Biner. in Apparatu ad Jurisprud. Ecclef. par. 3. cap. 2. artic. 8. pag. 123. ad can. 11. dicti Concilii scribit: *Opinio de duabus hominis animabus quam Photius tenuisse dicitur, damnatur, tamquam Sacræ Scripturæ & SS. PP. contraria. Et licet cum Cabassutio subdat Manichæos tenuisse, præter animam rationalem, aliam sensitivam esse in homine naturâ malam, subjicit tamen: Fortassis tamen Concilium istud tantum eos damnat, qui duas animas rationales in homine asserunt. Licet enim videatur universaliter duas animas rejicere, ratio tamen, quam asserit ex Sacra Scripturâ, tantum contra duas animas rationales pugnat; sic enim Canon iste ex Anastasi versione incipit: » Veteri & novò testamento unam animam rationalem & intellectualem habere hominem docente, & omnibus Deilbquis PP. & Magistris Ecclesiæ eandem opinionem asseverantibus, in tantum impietatis quidam, malorum inventionibus dantes operam, devenerunt, ut duas eum habere animas imprudenter dogmatizarent, &c., ubi tantum de duabus animabus rationalibus videntur loqui, nihil cogitantes de principio sensationum, & vegetantium.* Idem tenent plures Autores, licet aliundè impugnent sententiam de anima sensitiva distincta à rationali, ut Mastrius Philos. tom. 3. disp. de anima. quæst. 8. num. 86. & scribentes de hæresibus, ut Alfonso à Caltro & Paulus Gryfaldus in Decis. Fid. Cathol. verbò animâ, num.

cuit, asserere damnatam sententiam de anima sensitiva in homine distincta à rationali; imò citatus Gryfaldus, ibid. num. 3. impugnans Philonem dicentem animam sensitivam hominis esse creatam ab Angelis, subdit: *Nec tango Scoti opinionem, quòd anima sensitiva sit à Patre, & hac ratione dicatur Pater, anima verò intellectiva sit à Deo.*

XLII. Tandem Concilium Vien. sub Clemente V. ut refertur in Clementina, cap. fid. Cathol. de Sum. Trin. & fid. Cathol. ita declarat: *Porro doctrinam omnem seu positionem temerè asserentem, aut verentem in dubium, quòd substantia animæ rationalis seu intellectivæ verè ac per se humani corporis non sit forma: velut erroneam, ac veritati catholicæ inimicam Fidei, prædictò sacro approbante Conciliò reprobamus: definientes, ut cunctis nota sit Fidei sinceræ veritas, ac præcludatur universis erroribus aditus, ne subintrent, quòd quisquis deinceps asserere, deffendere, seu tenere pertinaciter præsumserit, quòd anima rationalis seu intellectiva non sit forma corporis humani per se & essentialiter, tamquam Hæreticus sit censendus.* At ista definitio solum inuritur, vel Plato animam rationalem, tamquam nautam in navi, adstruens in corpore, vel alii, qui, præter vegetativam, & sensitivam diversas corporis partes informantes, animam rationalem tantum in cerebro esse, vel alia corporis parte, affirmabant, ac proinde non eam corporis humani veram agnoscebant formam, sed præcipuè feriuntur qui cum Ayerroë negabant animam rationalem, esse corporis formam: non autem attingit hæc definitio sententiam docentem, animam vegetativam, & sensitivam, utpote materiales & corporeas, ex parte corporis se habere, eumque informare: ac corpus ipsis, informatum verè & per se informari ab anima rationali.

XLIII. Hoc explicat ipsa Glossa Lit. C. dicens: *De sensitiva enim & vegetativa non fuit opinio, sensitiva enim, quòd sentimus per sensus corporeas, certum est, quòd corrumpitur corpore corruptò, & sic non potest dubitari, quin sit de corporis forma. Idem de vegetativa, quòd vegetamur, nutrimur & augmentum sumimus. In prima communicamus brutis, in secunda etiam plantis. Sed de intellectiva vel rationali fuit contraria opinio; & infra: Sed advertendum quòd, quanto forma est nobilior, tanto plus dominatur materiæ corporali, & minus ei immergitur. & plus eam excedit sub virtute; Unde anima vegetabilis plusquam forma metalli, sensibilis plusquam vegetabilis: Intellectualis ergo in nobilitate ultima in tantum excedit in homine materiam corporalem, quòd habet aliquam operationem & virtutem, in qua corporalis materia non communicat, quæ virtus est intellectiva.* Ipsa etiam Glossa, dum supra eodem capite,

capite, de Christo dicitur habere animam intellectivam seu rationalem, Lit. F. sic explicat : *Animam , non spiritum vitalem tantum , de Celeb. Miss. In quadam , ubi pluribus autoritatibus probatur quod hic de vera anima dicitur ; & Lit. G. Rationalem , non dicit sensitivam , vel vegetativam , de quibus infra. In dicto autem cap. In quadam, de celeb. Missarum , dicit Innocentius III. de Christo: Manifestè probatur , quod ipse Spiritum habebat , non solum flatum vitalem ; sed animam rationalem ; & Gloss. ibi , lit. H. vitalem , secundum quod Physici dividunt Spiritum , vitalem , scilicet animam. Ex dictis patet sententiam de anima sensitiva in homine distincta à rationali , quæ & generatur dum homo gignitur , & eò corruptò corrumpitur , nedum non inuri , sed roborari ex relata Concilii definitione. .*

XLIII. Itaque constat , hanc sententiam nulli Fidei definitioni adversari , conformem autem eam videri sacræ Scripturæ sensui , ut supra dixi, deduci videtur ex eis , quæ conglobat eruditissimus Calmetus exposit. In lib. Sapientiæ dissertat. præviâ, *de natura animæ & ejus post mortem statu , & sententia veterum Hebræorum ;* Artic. enim 1. supponit , nedum apud Philosophos , Paganosque Poëtas , sed etiam veteres Ecclesiæ Patres , in homine esse tria distincta , corpus , animam , & spiritum. Deinde dicit : *Animam à spiritu sive mente utcumque distingui sat constat , cum anima ipsa in Scripturis homini , æquè ac brutis , tribuitur ; sed spiritus vel mens uni tantum homini tribuuntur ; & subdit : Porro hæc loquendi phrasæ in eam fortè persuasionem veteres Hebræos adduxerunt , animam illam hominibus eandem ac brutis communem , quam in sanguine residere tradit scriptura Levit. 17. 11. 14. Anima carnis in sanguine est ; & , anima omnis carnis in sanguine est , materiâ quâdam constare , & alterius planè esse à mente , nunquam brutis in scriptura tributâ , naturæ. Luculenter sanè animam sensibilem & rationalem distinguens Philo (Lib. quodd deter. potiôr in fid. pag. 107.) ait vitalem illam animam ipsam esse , quâ vivimus , rationalem verò quâ ratiocinandi facultate utimur : illam habere nos cum brutis communem , hanc peculiarem. Addit etiam : Animam à spiritu distinguere visus est Daniel , C. 2. 86. Cum ad Laudes Domini invitet spiritus , item & animas : Benedicite spiritus , & animæ justorum Domino ; neque enim ille spirituum nomine Angelos & Beatos designare potest , quos antea ad eadem studia invitaverat.*

XLIV. Idem art. 2. ubi immortalitatem animæ statuit, §. Fatemur , scribit : “ Communia hæc vocabula , anima , spiritus , spiraculum , ” datas utrique huic creaturarum generi communes animas designant :

» hominum & brutorum interitus iisdem non rarò vocibus exprimi-
 » tur. *Aufert Deus Spiritum ex omni carne* (Psalm. 103. 29.) & ci-
 » bum , vitam omnibus æquè animantibus suppeditat , si. faciem
 » avertat, omnia turbantur : *auferes Spiritum eorum & deficient*. Deus
 » diluvii aquis immixtis interfecit omnem carnem , *in qua Spiritus*
 » *vita est*. (Gen. 6. 17. & 7. 15.) Terris & aquis iungit, ut pro-
 » ducant animam viventem , seu animantia , vita , & anima donata
 » (Gen. 1. 20. 21. 27.) & post diluvium fœdus init *cum omni ani-*
 » *ma vivente* (Gen. 9. & 10.) ac tandem animam esse in sanguine
 » habetur Levit. 12. 17. » Et §. *Nihil tamen* probans quòd hæc vo-
 » cum ambiguitas non officit. distinctioni animæ rationalis ab aliis, cùm
 » eas etiam distinguat Scriptura, scribit : « *Afferit Scriptura peculiaris*
 » *quædam de homine , quæ numquam de belluis affirmaret ; & si*
 » *quando paria de utrisque loquatur , sermo tunc est tantum de vita*
 » *corporis , de anima sentiendi facultate instructa, quam brutis æquè*
 » *ac hominibus vindicant omnes*. Quare in brutis anima , spiritus ,
 » spiraculum à Deo datum, reductumque ad arbitrium, nihil est aliud
 » quàm vita corporis in sanguine potissimum residens ; in homine
 » verò vocibus illis interdum designatur anima sensibilis æquè & ra-
 » tionalis ; non rarò etiam rationalis tantum , &c. quod ex sermo-
 » nis contextu satis discernitur. »

XLV. Nedùm in veteri Testamento , sed etiam in novo , distin-
 » guntur in homine spiritus , anima , & corpus , ut 1. Tessalon. 5. 23.
 » *Ipsæ autem Deus pacis sanctificet vos per omnia : ut integer spiritus ves-*
 » *ter , & anima , & corpus sine querela in adventu Domini Nostri Jesu-*
 » *Christi servetur*. Ad quod Hervæus Burdigalensis Monach. Benedic-
 » tinus (cuius plura opera D. Anselmo attributa in ejus edit. Colo-
 » niensi habentur) ita scribit : « *ita vos sanctificet , ut integer servetur*
 » *vester Spiritus* , id est illud , quò intelligitis , & *anima*, id est illud ,
 » quò vivitis , & *corpus* , id est illud , quò visibiles & contractabiles
 » estis. Tria sunt enim , quibus homo constat, id est *spiritus* , &
 » *anima* , & *corpus* ; quæ rursus duo differunt , quia sæpè anima si-
 » mul cum spiritu nominatur , pars enim quædam ejus rationalis ,
 » quâ carent bestię , spiritus dicitur. Principale itaque nostrum *spi-*
 » *ritus* est ; deinde vita , quæ conjungit hunc corpori , *anima* voca-
 » tur ; postremò ipsum *corpus* , quoniam visibile est , ultimum nos-
 » trum est. Illud enim , quò ratiocinamur & intelligimus atque sapi-
 » mus, ita propriè *Spiritus* nuncupatur , ut non sit universa anima ,
 » sed aliquid ejus , id est rationale nostrum , quò sentit & intelligit

„ ipsa anima , non sicut sentitur corporis sensibus , sed sicut ille est
 „ intus sensus , ex quo est appellata sententia ; hinc autem pecori-
 „ bus sine dubitatione præponitur eò quòd sint illa rationis exper-
 „ tia , non enim spiritum habent , id est intellectum & rationis ac
 „ sapientiæ sensum , sed animam tantum. „ Similiter de anima à spi-
 „ ritu distincta intelligunt plures hunc textum , prout hic testatur
 Calmetus.

XLVI. Ad idem collimat Scriptura , Eccles. 3. 18, 19, 20 : *dixi
 in corde meo de Filiis hominum , ut probaret eos Deus & ostenderet si-
 miles esse bestiis , idcirco unus interitus est hominis & jumentorum , &
 æqua utriusque conditio : sicut moritur homo , sic & illa moriuntur ; si-
 militer spirant omnia , & nihil habet homo jumentis amplius : cuncta
 subjacent vanitati , & omnia pergunt ad unum locum : de terra facta
 sunt , & in terram pariter revertentur.* Sanè hic describitur æqualitas
 vitæ & mortis in hominibus & bestiis , quantum ad eam scilicet , in
 qua conveniunt , vitâ , nempe vegetativâ , & sensitivâ , ut etiam
 dicit Clariss. Berti , lib. 12. de Theol. discipl. cap. 5 , pag. 304. res-
 pondens ad dictum locum Ecclesiastæ ; cum alibi constet in eadem
 Scripturâ eorum discrepantiâ quoad vitam rationalem , quâ gaudet
 homo , & non bestia : unde sicut in bestiis per earum mortem fit
 corruptio animæ vegetativæ , & sensitivæ , quæ cum elementali ea-
 rum substantia ad sua primitiva revertuntur principia , ita pariter in
 homine , & sola , tamquam immortalis , remanet anima rationalis ;
 anima verò vegetativa , & sensitiva corrumpuntur , ac proinde in
 hominis generatione generantur.

XLVII. Hanc eandem Sententiam , testante Mastro Philof. tom.
 3. disp. 1. de Anima , q. 8. num. 86. tenent Philop. 1. de Ani. text.
 91. Zabarella , lib. de facult. An. cap. 8. Gand. 7. Phys. quæst. 8.
 Ocham. quodlib. 2. q. 20. Maïron. 2. dist. 15. q. 1. & probabilem
 reputant Regentes Parisiens. 2. de An. q. 1. in q. 1. Collater ; tes-
 tante verò Scriboniô , pluralitatem animarum in homine docent Jan-
 dun. lib. 1. de An. q. 12. & Paulus Venetus in Summa de Anima ,
 cap. 5. eandem Sententiam apud Alb. Mag. lib. 1. de An. tract. 2.
 cap. 15. tenuerunt antiqui Philosophi Pithagoras , & Pithagorei ,
 sicut & Plato , ac Platonici. Apud Merinerum eam tenet etiam
 Ocham in 4. q. 7. Mirandulanus , lib. 33. Eversion. singular. certam.
 sect. 2. & Thomas Garbius , lib. 1. tract. 5. q. 49. Admittunt quoque
 eandem Fernælis , lib. 7. Physiolog. & Cassimirus , disp. 1. de An.
 art. 1. q. 2. Hanc Sententiam probabilem reputant Livius de Morg-

tursio, lib. 2. de An. dist. 1. q. 5. Perez Lopez, lib. 1. de An. disp. 1. q. 5. Ugo Cavellus, in supplem. ad quæstiones Scoti, in libros de Anima, disp. 1. Sect. 7. & Merinerus, lib. 2. de Anima, disp. 2. q. 2. Testante Eusebio Amort, Philos. part. 3. tit. de Anim. q. 2. Neoterici passim, quoad modum loquendi, saltem admittunt duas animas. Joannes-Baptista Duhamel, Metaph. tract. 3. q. 3. conclus. 4. sic resolvit: *Animam sentientem à parentibus traduci, defendi utcumque potest, non item animam rationalem.* Hanc conclusionem probat & defendit cum Patre Fabri, quem citat conclus. 3. ad 1. objectionem, docentem, *factum primò vivere, tum sentiente animà donari, sed quæ priùs fuit vegetatrix anima, aut formà, cum sola esset, jam fit potentia aut facultas animæ sentientis, eique subjicitur; cum autem anima rationalis creatur, non perit principium illud vitæ, aut sensûs, sed formæ rationem non ampliùs obtinet, est que potentia animæ rationalis, cui subest, ut formæ; non enim ante fuit homo, quàm anima in corpore crearetur, & unum esse hominis una forma constituit.* Idem docet Tosca in compendio Philosop. tom. 7. Tract. 10. lib. 7. cap. 3. prop. 18. & 19.

XLVIII. Clariss. Berti, lib. 12. de Theolog. Discip. cap. 4. de Animarum origine, pag. 302. §. *Respondeo falsam esse*, hanc Sententiam probabilem reputat, nam respondens ad objectionem istam: *Anima rationalis, sensitiva, & vegetativa est in homine una eademque: homo generat animam sensitivam, & vegetativam: igitur generat & animam rationalem:* datis duabus responsionibus juxta Neotericorum & Peripateticorum principia, sic concludit: *Aut, si magis placet, tres simul animas consistere in eodem corpore, & vegetativam, & sensitivam traduci, rationalem creari.* Item, lib. 26. cap. 8. postquam probavit Divinum Verbum assumpsisse humanam animam, loquens de disputatione super diversitate animarum, concludit: *Verumtamen est, quòd præcisà hâc de natura animæ quæstione, admisdque plurium animarum partitione, probatur in Christo anima rationalis ex ejus passionibus, quatenus fuerunt cum apprehensione animi conjunctæ.*

XLIX. D. Bonavent. in 2. dist. 31. part. 1. q. 1. ubi inquit: *Utrum anima sensibilis in hominibus sit à generante?* In ejus solutione refert & reprobatur error Manichæorum ponentium in homine duas animas, unam bonam, & aliam malam. Secundò refert sensum Philosophorum, *quòd rationabilis, & sensibilis sunt in nobis duæ substantiæ, non tamen sunt duæ animæ, pro eo quòd anima est nomen officii, & illæ duæ substantiæ ordinatæ sunt ad unius corporis perfec-*

nem, ita quod una disponit ad aliam, una tamen illarum est per generationem, scilicet sensibilis; & hujus signum est, quod dependet à corpore, & est perfectio alicujus partis corporis; rationalis verò, quæ nullius corporis est actus, est per creationem: hanc Sententiam solum impugnat ex Divo Aug. lib. de Eccles. Dogm.; quæ tamen autoritas nostræ non officit Sententiæ ex dictis, num. 37. & lib. de Spir. An. qui liber etiam cum superiori, ut advertit Annat. in Appar. lib. 4. art. 27. & etiam Editores Benedictini, non est D. August. tertio refert sensum Doctorum Theologiæ, qui dicunt quod sensibilis & rationalis in homine ejusdem sunt substantiæ, ad cujus explanationem ponit tres modos sensualitatis: primus est dispositio ex parte carnis ad actus virtutis sensitivæ. Secundus est dispositio ex parte carnis ad sentiendum cum virtute spiritali movente, & tertius qui non tantum dicit dispositionem cum virtute movente, sed etiam habitante, quæ inest ex anima perficiente, & subjungit: *Primò & secundò modò accipiendò sensualitatem, sic est in nobis à generante, quia cum semine deciduntur calores & spiritus, per quos caro disponitur ad sentiendum: transfunditur etiam simul cum hoc aliqua virtus animæ, quæ movet & regit & operatur usque ad formæ inductionem, tertio modò sensualitas est in homine ab anima perficiente, quæ quidem non habet esse per generationem, sed per creationem.*

L. At hæc Doctrina coincidit cum nostra Sententia; quam infra explicabimus, & quam breviter exposuit P. Fabri adductus supra num. 47. ut etiam magis explicat D. Bonaventura in solutione argumentorum. Planè sensus Theologorum Parisiensium videtur explicari in Censura datâ à Stephano Parisiensi Episcopo de consilio Magistrorum Theologiæ anno Domini 1226. Die Dominicâ, quâ cantatur *Latare Hierusalem*, prout refertur in fine libri Mag. Sent. edit. Parisien. an. 1553. à pagina 402. ibi enim sub titulo: *Errores de Anima & Intellectu*, pag. 405. tertio loco hæc notatur proscripta propositio: *Item quod ex sensitivo, & intellectivo non sit unum per essentiam, nisi sicut ex intelligentia & orbe, hoc est unum per appositionem*: Atque adeo sensus dicti Episcopi & Magistrorum est quod ex sensitivo & intellectivo sit unum per essentiam, & consequenter substantia sensitiva est distincta in homine ab intellectiva; & corpus, quod anima intellectiva informat, est sensitivum præcisivè ab anima intellectiva: adeoque importat sensitivam distinctam ab ipsâ. Præterea ibidem in excerptis contra errores Fratris Joannis de Montesono, pag. 423. ad probandum quod Doctrina D. Thomæ continet aliqua



in fide erronea; sic scribitur: „Item infra, q. 78. art. 3. & 6. in „quæstionibus disputatis tenet articulum de unitate formæ substan- „tialis in homine, qui est decimus-quartus articulus quintæ partis „de Evangelio æterno, damnatus per Alexandrum“. Unde, si te- nendum censuerunt non esse unam formam in homine, bene potest cum rationali esse forma sensitiva distincta.

L.I. Eadem distinctio sensitivæ à rationali in homine, & illius ge- nératio, hujus autem creatio, ostenditur manifestè, saltem proba- bilius, ex eo quòd juxta D. Thomam, p. 1. q. 118. Art. 2. in em- brione humano prius generatur vegetativa, postea sensitiva, & tan- dem infunditur anima rationalis per creationem, ac proinde juxta D. Thomam ejusque Discipulos probabile est in embrione humano generari vegetativam & sensitivam. Altera pars conclusionis D. Tho- mæ, videlicet quòd adveniente sensitivâ corrumpatur vegetativa, & quòd adveniente rationali corrumpatur sensitiva, ita quòd ratio- nalis in virtute contineat vegetativam, & sensitivam, Censetur à plerisque esse contra ordinem naturæ, ita quòd plurimi potius ne- gent illam animarum successionem, quàm convenire velint in illa earundem corruptione. Ex hoc autem deducitur esse probabile ge- nerari in embrione humano vegetativam & sensitivam, cum in ipso ante adventum rationalis fiat membrorum apta coaptatio, quæ fieri debet per animam, aliter perfectior esset generatio bruti; & quia ordini naturæ repugnat, ut est plurimorum sententia, quòd forma præcedens corrumpatur per adventum rationalis, ideo est quoque pro- babile, quòd adveniente sensitivâ non corrumpatur vegetativa, nec adveniente rationali corrumpatur sensitiva.

L.II. Sanè Doctores adversantes distinctioni formarum vel anima- rum in homine aliisque compositis, procedunt ex præjudicio præ- concepto, videlicet quòd forma ex sui natura debet esse actus ulti- mus, ita quòd non potest ordinari ad aliam formam: similiter quòd anima ex sui natura ultimò debet complere corpus organicum, ac proinde in uno composito non potest dari nisi una anima. Hæc pro- fectò eorum præconceptio reddit quæstionem de voce, & non de re; nam in sensu Lulliano forma est illa perfectio, quæ complet mate- riam in suo ordine, ac proinde in substantiis ordinatis sola ultima forma est actus ultimus & formæ ipsam præcedentes, licet sint for- mæ in suo ordine, dum advenit forma alterius ordinis fiunt materia respectu illius. Unde, cum homo sit elementalis, vegetans, sentiens, & rationalis, dum generatur homo ex humano semine prius dispo-

nitur materia elementalis, cumque ipsa est rectè disposita, actuatur in ipsa forma vel anima vegetativa, & fit quoddam esse vegetatum; & quia hoc ordinatur ad esse sensatum, dum habetur sufficiens dispositio actuatur in ipso forma vel anima sensitiva, & fit esse sensatum, & hujus formæ materia non est sola substantia elementalis sed etiam forma vegetativa, quæ tunc respectu formæ sensitivæ est materia; & dum per creationem infunditur anima rationalis, nedum substantia elementalis, sed etiam vegetativa & sensitiva, fit illius materia, & totum hoc informatur ab anima rationali; & quia anima rationalis in ordine naturæ ultimò complet illas substantias, sicut vegetativa & sensitiva fiunt materia animæ rationalis, fiunt etiam potentia ipsius, ita quod non agunt nisi in virtute & ex motu ipsius, prout supra num. 47. expositum fuit ex Patre Fabri.

LIII. Amplius videri potest probabilis hæc Doctrina ex sententia communiter recepta apud Medicos, & Physicos, videlicet dari in homine varios spiritus, nempe *naturalem, vitalem, & animale*: Itaque istæ animæ vel formæ, quas admittit Lullus in homine, non sunt formæ per intellectum abstractæ, sed formæ physicæ, ita quod per animam vegetativam, animam sensitivam, & animam imaginativam, quas præter rationalem admittit in homine, non aliud intelligit, quam prædictos spiritus ab omnibus admissos, vel subtilem substantiam corpoream in ipsis spiritibus inclusam. Hæc eadem videtur esse Doctrina D. Bonaventuræ, in 2. dist. 1. ar. 4. q. 2. h. ubi, cum sibi objecisset, quod creaturæ corporalis ad spiritualem nulla est proportio, ut ex ipsis fiat creatura composita, ita respondet: "Quod
" objicitur quod in omni conjunctione debet esse salva proportio,
" dicerendum est, quod in conjunctione animæ ad corpus salva est pro-
" portio, & absolute, & in relatione ad finem. Absolute, nam quam-
" vis supremum spiritus & infimum corporis multam habeant elon-
" gationem, tamen supremum corporis, & infimum spiritus sum-
" mam habent vicinitatem. Spiritus enim animalis sive rationalis ha-
" bet *potentiam vivificandi, potentiam vegetandi, & sensificandi*: cor-
" pus autem humanum habet complexionis æqualitatem, habet orga-
" norum multiplicitem, habet rursus spirituum subtilitatem, & se-
" cundum triplicem differentiam: habet enim *spiritum vitalem, spi-*
" *tum naturalem, & spiritum animale*. Comparando igitur complexio-
" nem æqualem, ac vim vivificativam per medium & vinculum spi-
" ritus vitalis, optimus est nexus. Similiter comparando, non so-
" lum complexionis æqualitatem sed & organisationem, & organi-

„ fationis perfectionem , ad vim vegetandi & sentiendi , mediante
 „ *spiritu naturali* ; & *animali* , optima est proportio , & mirabilis
 „ nexus : Unde , sicut terra & ignis , quæ multum distant , neuntur
 „ duplici mediò , unò quod magis communicat cum terra ; & reli-
 „ quò , quod magis cum igne : similiter est in proposito. Attenditur
 „ etiam perfecta proportio in relatione ad finem Similiter ex
 „ parte corporis est optima proportio in relatione ad finem ; cum
 „ enim sit ordo in formis corporalibus , quod patet , quia forma
 „ elementi ad formam mixti , & forma mixtionis ad formam com-
 „ plexionis ; & rursus *vegetabilis ad sensibile* ; & non sit status in re
 „ corporali & imperfecta , non est status ibi , *sed ulterius disponunt*
 „ *hujusmodi formæ ad animam rationalem* , per quam etiam corpus &
 „ natura corporalis efficitur particeps æternæ beatitudinis : aut ergo
 „ „ omnis intentio naturæ corporalis solvitur , aut necesse est per-
 „ venire , mediante animâ rationali , in ultimum finem. Quod obji-
 „ citur : in opere Dei debet salvari naturarum colligatio , dicendum ,
 „ quòd verum est , *sed sensibile* , & *vegetabile* non sunt de necessitate
 „ rationalis , nisi secundum quod est rationale per unionem. Anima
 „ enim , ut prius tactum est , cum sit spiritus simplex & purus , non
 „ potest uniri carni , nisi duplici mediò ex parte sui. Similiter nec
 „ corpus complexionatum ; & ideo necesse est quòd interveniat na-
 „ tura vivificandi sive vegetandi , & natura ulterius sensificandi , &
 „ ideo in omni homine hæc cadunt ; sed quia Angelus est spiritus
 „ purus ; ideo istis non indiget.

LIV. Sanè D. Bonaven. nedum admittit illos spiritus in homine , sed
 etiam conjunctionem vegetativi & sensitivi cum rationali in eodem ;
 illi autem spiritus nihil aliud sunt , quàm anima vegetativa , anima
 sensitiva , & anima imaginativa in homine , quibus aptatur corpus hu-
 manum , ut sit materia , quam informat rationalis anima ; & omnes
 illi Spiritus cum corpore , quod vivificant , sunt materia ipsius ra-
 tionalis animæ , quæ dum informat corpus , illud movet , sicut etiam
 prædictos spiritus , ut vitales actus exercent ; & quia anima rationa-
 lis tanquam superior forma omnia prædicta regit & gubernat , ideo
 propriè ipsa est corporis forma , & anima ; vegetativa verò , sensi-
 tiva , & imaginativa , cum subdantur rationali , licet unaquæque in
 se & per se sit forma & anima respectu corporis , dum sunt sub ra-
 tionali , sunt ipsius potentia , non quidem constituentes ipsam , quem-
 admodum eam constituunt memoria , intellectus , & voluntas , sed
 subditæ ipsi & ab ea pendentes in esse & operari in homine : quod
 etiam

etiam insinuat ipse Doct. Seraph. in 2. dist. 3. art. 1. q. 1. ad 3. dicens : *Sic debuit Deus dare inclinationem tam corpori hominis , quàm sensualitati carnis , quòd in nullo præjudicaretur rectitudini rationis.* Unde Berchorius, in Diction. morali : verb. *Perseverantia*, sic scribit : “ Ani-
 „ ma rationalis in corpore , quamvis ultima veniat , est tamen om-
 „ nium virtutum sive animarum completiva ; anima enim vegetativa
 „ & anima sensitiva imperfectæ sunt naturæ ; quinimò per istas ani-
 „ mas nunquam homo constitueretur , nisi ultimata perfectio per ra-
 „ tionalem animam adderetur , & nili quod imperfectum fuerat , per
 „ ipsam ultimò compleretur. ”

LV. Hinc patere videtur , Lullum in notata quæstione 89. *Utrum anima sensitiva in hominibus sit à generante ?* Rectè determinasse affirmativè prout validis probat rationibus. Et quidem primò ratio num. 1. descripta stat in eo , quòd communis & idem est modus sentiendi in homine ac in brutis , ac proinde commune & idem debet esse principium , nempe anima , sive vis sensitiva ., adeoque distincta à rationali , & ob eandem rationem distincta videtur agnosci sensitiva à rationali in homine à pluribus ; & D. August. lib. 83. Quæst. in q. 7. scribit : “ Anima aliquando ita dicitur , ut cum mente intelligatur ,
 „ veluti cum dicimus hominem ex anima & corpore constare : ali-
 „ quando ita ut excepta mente dicatur. Sed cum excepta mente di-
 „ citur , ex iis operibus intelligitur , quæ habemus cum bestiis com-
 „ munia. Bestiæ namque carent ratione , quæ mentis semper est pro-
 „ pria. ” Et q. 67. n. 5. explicans , quòd *omnis creatura in homine numeratur* , hoc esse ait , *quia omnis creatura partim spiritalis est , partim animalis , partim corporalis..... qui autem spiritu animam regit , & per animam corpus , vocatur spiritalis ;* & tandem concludit : *omnis creatura in homine est , quia & intelligit spiritu , & sentit animà & localiter corpore movetur.* Huc etiam referri potest , quod ipse Augustinus , lib. 2. de lib. arbit. postquam à cap. 3. ostendit esse in nobis , sicut etiam in brutis , quòd sumus , vivimus , sentimus , & quodammodo sensu interiori discernimus , ostendit majus esse in homine id , quò sentit , quàm id quò est ; & sensum interiorem , quàm id quò sentit externa ; cap. 6. ostendit animam rationalem prædictis omnibus esse in homine præstantiorem ; namque , ut ait , *in iis ipsis , quæ infra eam sunt , id est in corporibus & in sensibus corporis , & isto interiore sensu , quomodo sit aliud aliò melius , & quàm sit illis præstansior ipsa , quæ tandem nisi*

ipsa renuntiat? Similia docet D. Bernardus, serm. 3. in Vigil. Nat. Domini, num. 8.

Text. prop. 11. LVI. Ponit Lullus in notata, q. num. 2. textum à relato Censore adductum, nempè: *Item, si anima sensitiva hominum esset à creante, & anima sensitiva brutorum à generante, sequerentur multa inconvenientia contra ordinem naturæ, sicut sequerentur, quodd (si) essent duæ albedines, duæ caliditates . . . etiam duæ vegetativæ, & duæ elementativæ, &c.* Hæc Lulli ratio in hoc stat, quodd in ordine naturæ, ad omnia, quæ in natura conveniunt, est una generalis ratio, quæ uniformiter ad omnia se habet, ut patet in ratione albedinis & aliarum naturalium qualitatum, & signanter in elementativa, seu corporali substantia, quæ uniformiter se habet secundum ordinem naturæ ad homines, bruta & cætera omnia naturalia: ac proinde, si sensitiva non uniformiter se haberet ad homines & bruta, quibus convenit, deficeret naturalis ordo.

LVII. Tertia Lulli ratio, num. 3. petitur ex simili naturali interitu hominis, & bruti, quem illa scripturæ loca adducta, num. 46. explicant, & ibi plures Interpretes: & ex alio item capite, quia videlicet æquè ex cadavere hominis, ac bruti generantur vermes, qui sunt sensati, ac proinde caro illa humana æquè affecta & disposita sub sensatione debet esse, ac brutalis; ut in ipsa sint sensationis principia, ex quibus oritur vermis sensatus, sicut sunt in carne brutali, cum uniformis sit in eisdem naturalis ordo & operatio.

LVIII. Eamdem resolutionem probat Lullus, num. 4. quia, nisi sensitiva hominum esset à generante, plus parentelæ esset inter brutum & brutum, quàm inter hominem & hominem, quia in illis nedum fundatur parentela in substantia corporali, sed etiam in sensitiva, quod non esset in homine; & inde sequeretur etiam, quodd Beata Virgo non generasset carnem animatam in Christo, & quodd caro, quam Christus de Virgine sumpsit, non fuisset caro animata & vera, sed mortua; ac proinde propriè non fuisset caro, quia caro verè non est, nisi sub sensatione aliquomodo posita. Hanc rationem confirmant omnes illi Patres & Doctores, qui veram humanam carnem ex Maria sumpsisse Christum efficaciter probant. Eamdem rationem, quoad hominum generationem, illustrat Divus Gregor. Nissen. Disp. de anima & resurrectione, tom. 1. col. mihi 813: dicens: „ Ac quemadmodum terra, si furculum ab radice avulsum, „ ab agricolis acceperit, arborem inde efficit, non ipsa vim auferendi ei, quod nutritur, injiciens, sed incrementi dumtaxat ma-

„ teriam atque subsidium sibi insitò immittens: ita dicimus etiam id,
 „ quod ex homine avellitur ad hominis sationem, ipsum, quoque
 „ aliquomodò animal esse, ex animato animatum, & ex eo quod
 „ nutritur, id quod nutritur quemadmodum igitur in nascenti-
 „ bus feminibus incrementum paulatim ad perfectionem progreditur,
 „ eòdem modò in hominum quoque formatione atque constitutione,
 „ pro ratione atque proportionem corporeæ magnitudinis, animæ quo-
 „ que potentia apparet atque elucet: primùm quidem per vim alendi
 „ simul atque augendi, iis, quæ in utero effinguntur, sese insinuans
 „ atque innascens: Post hæc verò donum sentiendi in lucem pro-
 „ ductis inducens, atque ita deinceps quasi fructum quemdam, auctâ
 „ jam plantâ, mediocriter exerens ac prodens ratione præditam vim;
 „ non universam simul in unum conductam repentè, sed unâ cum
 „ surgente & excrecente planta per consentaneum & competentem
 „ progressum atque profectum crescentem & augescentem. Quoniam
 „ igitur id quod ab animatis ad materiam & causam animati constitu-
 „ tionis avellitur, mortuum esse non potest (mortalitas enim per
 „ animæ privationem fit: non autem privatio habitum anticipaverit)
 „ ex his deprehendimus, communem & in unum idemque tempus
 „ collatum ingressum & aditum ad essentiam patefieri & coagmen-
 „ tationi atque coalitioni, quæ ex ambobus, corpore scilicet & anima,
 „ constat & coalescit. Neque hoc priùs existente, neque illâ poste-
 „ riùs accedente. „

LIX. Hæc scripsit D. Gregorius, ut ostenderet quæ immediatè,
 refutatâ opinione de animarum præexistentia in peculiari quâdam
 statione, ante præmiserat, nempe; „ Enimverò posteriorem esse
 „ originem animarum, ipsasque recentiores esse corporum compo-
 „ sitiones, nemo sanâ mente præditus in animum induxerit, cum ma-
 „ nifestum ac perspicuum sit omnibus, quòd nihil ex inanimis habeat
 „ in sese vim movendi pariter atque crescendi. At eorum, qui in
 „ utero nutriuntur, neque augmentum & incrementum, neque de
 „ loco, ad locum motus introversus & ambiguus est. Relinquitur
 „ igitur, ut putemus unum & idem animæ & corporis constitutio-
 „ nis principium esse. „ Hoc autem, ut apparet ex dictis, intelli-
 „ gitur ordine quòdam, ita ut anima quoad potentiam vegetativam, pri-
 „ ma insit foetui, deinde quoad sensitivam, & tandem dum aptum est
 „ corpus, infundi rationalem, quæ simul est cum corpore, non qui-
 „ dem utcumque, sed cum corpore proportionato & disposito, quia
 „ hæc non est corporea nec traducitur à generante, quemadmodum

vegetativa, & sensitiva, sed creatur, & est incorporea, ut ipse ante prædixerat orat. *de festo Paschæ, & Resurrectione*, col. 736. *Nam anima quidem, si ipsa per sese examinetur & excutiat, numquam resurget, quandoquidem non moritur, sed interitis & corruptionis est experta. Cum autem sit immortalis, mortale corpus socium habet actionum;* & postea col. 737. ipsam vocat incorpoream. In hac quoque Disputatione animam rationalem vocat naturam invisibilem, incorpoream, materiam expertam, & quæ mente sola percipitur; & similia sæpe repetit: unde col. 748 colligit ex ibi allegatis, *comprehensionem atque perceptionem fieri intellectualem & invisibilis essentia, quæ in natura nostra infusa, immixta, contemperata, atque abscondita est;* & col. 751. esse creatam affirmat animam rationalem.

LX. Amplius patent prædicta, & simul confirmantur insinuatæ rationes Lullianæ, ex ipso Nysseno, lib. *De hominis opificio*, cap. 9. ubi postquam tres gradus vitæ distinxisset, ait: « Idcirco Moses
 » inanimas res primum, quæ animatorum tanquam imus quidam gradus essent, deinde naturalis vitæ prædictas, ortas esse tradit, quæ
 » nimirum plantarum germina erant: post hæc eorum, quæ sensu
 » agitantur, originem commemorat. Cum autem consentaneum sit,
 » rerum corporearum vitæ præditarum eas quidem, quæ sentiendi
 » vim habent, etiam circa naturam intelligentem existere posse: vim
 » verò ratiocinantem in corpore non esse, nisi facultati sentiendi
 » quoddam modò commisceatur: idcirco post plantas & pecora,
 » homo demum conditus est, naturâ ordine ad creatum planè perfectum progrediente. Nam animal hoc rationis particeps, quem
 » hominem dicimus, ex omni est animæ formâ quasi temperatum.
 » Perinde enim atque stirpium anima, quam naturalem diximus,
 » nutritur: deinde facultati accretionis etiam sentiens adhæret, cujus
 » est natura quasi media quædam inter animam illam primam rudior
 » rem, & tertiam intelligentem: tantò nimirum intelligente crassior,
 » quantò illâ purior. Denique cum subtili & lucida natura sentiente
 » etiam intelligens aptissimò temperamento conjungitur, ut jam tribus
 » hisce rebus hominis opificium constet. Licet hoc de Apostoli
 » verbis, quæ in Epist. ad Thessal. extant, intelligere. Optat enim,
 » ut integra corporis, & animæ, & spiritûs gratia in adventum Domini
 » conserventur: Quibus in verbis, corporis appellatio partem
 » in homine nutrientem; anima, sentientem; spiritus, intelligentem notat. Et cap. 11. » Quid igitur, inquires, naturâ suâ mens
 » hominis est, quæ per sensum diversas se facultates dedit, & per

„ has sibi rerum notitiam comparat? Diversum sanè quiddam esse
 „ mentem ab ipsis sensibus, qui ambigat, fore neminem, qui qui-
 „ dem sapiat, arbitror : : : : omnino censendum est, mentem aliud
 „ quiddam esse, quàm sit natura sensibilis, ne simplici rei, &
 „ quæ intelligentiâ comprehenditur, inesse diversa quædam sta-
 „ tuamus.

LXI. Neque contra distinctionem animarum in homine est, quod ipse Gregorius; ibidem, cap. 14. scribit, dicens: „ Cæterum, etsi
 „ superiori oratione declaratum est, triplex esse in vivendi facultate
 „ discrimen, ut alia sit vita, quæ quidem nutriatur, expers tamen
 „ sit sensûs: alia & nutriatur & sentiat, careat autem facultate ra-
 „ tionis: alia denique, & ratione utatur, & perfecta sit, perque fa-
 „ cultates cæteras omnes diffusa, ut in iis existat, & tamquam exi-
 „ mium quiddam intelligentiæ vim habeat: nemo tamen idcirco
 „ existimet *tres in humano opificio animas existere, seorsum quasi limi-
 „ tibus circumscriptas*, ut naturam hominis ex pluribus animis con-
 „ tam putare debeamus. Nam vera & perfecta anima reapse unica
 „ quædam est, intelligens, nullâ ex materia crassa constans, sed per
 „ sensus naturæ illi crassæ mixta „. Non itaque hæc Doctrina des-
 „ truit perfectam distinctionem sensitivæ à rationali, quia tantum hæc
 „ negat Gregorius diversas animas in homine, *seorsum quasi limitibus
 „ circumscriptas*; non autem negat diversas naturas, vegetativam sci-
 „ licet, & sensitivam, & rationalem, ita ut vegetativa sit subordi-
 „ nata & subdita sensitivæ, & sensitiva rationali, prout in superiori-
 „ bus docuit; istæ autem naturæ, vegetativa, & sensitiva, licet sint
 „ distinctæ à rationali, propriè in sensu Divi Gregorii non sunt animæ,
 „ sed facultates animæ, quia subserviunt rationali, quæ idèd propriè
 „ dicitur anima, quia cæteras movet, & regit; & propterea, licet
 „ concedat dictas naturas esse distinctas in homine, „ negat esse dis-
 „ tinctas animas propriè tales, sicut negat etiam prædictas naturas in
 „ plantis, & brutis propriè dici animas, sed tantum abusivè; & hoc
 „ non obstante, ipse concedit plantis naturam vegetativam, & bru-
 „ tis sensitivam distinctas à crassa materia.

LXII. Totum hoc explicat ipse, cap. 15. dicens: „ Si quis au-
 „ tem idcirco plures esse animas opinatur, quod creata nonnulla, fa-
 „ cultate nutriente sunt, prædita, nonnulla sentiente; cum illa sen-
 „ su, ac intelligentiâ careant, is animarum discrimen non satis ex-
 „ plicatè declarat „. Et explicatò quid propriè, quid abusivè per
 „ aliquod nomen dicatur, subnectit: „ Quamobrem, cum ea de-

» mum perfecta sit anima ; quæ & intelligentiâ & rationis est vi præ-
 » dita : Quidquid scilicet tale non est , ei cum anima quidem no-
 » men esse commune potest , reapse verò non anima , sed *vivendi*
 » *facultas* quædam erit , quæ more hominum animæ appellatione
 » censeatur . . . sed ab aliis ad alia progressa est ratio. Non enim
 » instituimus ostendere mentem in homine naturâ crassæ materie
 » præstantiorem esse , sed *nullâ certâ parte corporis nostri mentem con-*
 » *tineri*. Existere scilicet eam ratione pari in omnibus & per omnia
 » atque ut exterius nihil complectatur : sic interius eam *non concludi* ,
 » quemadmodum cados aliaque corpora propriè se complecti dici-
 » mus , cum in aliis alia collocantur ». Conformiter ad prædicta de
 hominis generatione ex materia animata & actuatione primùm natu-
 ræ vegetativæ , postea sensitivæ , quibus tandem conjungitur ratio-
 nalis , scribit ipse Divus Gregorius , cap. 29. ubi post plura conclu-
 dit : « Adeoque de hoc ipso potest homini non omnino hebeti , *ne-*
 » *quaquam mortuum , & inanimatum existere in officina naturæ* , quod ,
 » ad plantationem quasi quamdam animalis , de viri avulsum corpore
 » in ea deponitur. Nam & fructuum grana , radicumque surculos
 » terræ non mandamus , postquam insita eis à natura facultas vita-
 » lis emortua fuerit , sed cum adhuc eorum , à quibus orta sunt , *vita*
 » propriam conservant , latentem quidem illam & abditam , sed ta-
 » men vivam ». Dum verò moritur homo , sensitiva substantia in
 ipso dissolvitur , remanet autem rationalis anima , ut scribit in *Ca-*
techetica oratione , cap. 8. dicens « Ex natura ergo brutorum certò
 » consilio & dispensatione addita est mortalitas naturæ , quæ creata
 » fuerat ad immortalitatem , id quod est ejus extrinsecus , contegens ,
 » non id quod est intrinsecus , & *sensilem hominis partem interceptans* ,
 » *non attingens autem ipsam divinam imaginem* .

LXIII. Patet itaque , juxta Nyssenum generari in homine vege-
 tativam , & sensitivam , ne de mortua carne vel substantiâ generetur
 homo ; quæ est ipsa Lulli ratio ; & ex eodem confirmatur alia Lulli
 assertio , quâ docet Christum de Matre Virgine vegetativam , & sen-
 sitivam sumpsisse , ut de carne viva Filius ejus efficeretur ; si enim
 hoc in cæteris fit hominibus ex mente Nysseni , id abs. dubio etiam
 factum est in Christo , qui est perfectus homo , factus ex muliere :
 ad quod alludunt plures Patres Græci docentes , Deum in Christo
 assumpsisse Spiritum , per Spiritum animam , & per animam cor-
 pus , ut videri potest apud Petavium , lib. 4. de Incarn. cap. 13. n.
 8. plures enim Græci Patres etiam distinguunt in homine Spiritum

five mentem ab anima. Sic Dydimus, lib. 3. *de Spiritu Sancto* explicans quibus rebus in Scriptura attribuatur nomen *Spiritus*, scribit: „Dicitur etiam, exceptâ animâ, & exceptô Spiritu Sancto, spiritus alius quis esse in homine, de quo Paulus (1. Corint. 2.) scribit: *Quis enim scit hominum ea, quæ sunt hominis, nisi Spiritus hominis, qui in eo est.* . . . ad Theſſalonicenſ. quoque, integer, inquit spiritus vester & anima & corpus. *Sicut enim alia est anima, & corpus aliud, sic & aliud est spiritus ab anima, quæ sub locô ſpecialiter appellatur*: de quo & oravit, ut integer cum animâ ſervetur, & corpore. Et infra: „Non enim advertentes quoddam animam hominis, aut spiritum, quem tertium in homine eſſe, jam diximus, ſpiritus appellatio ſignificet.

LXIV. Ad idem collimant verba Divi Auguſtini adducta ſuprà, num. 35. in quibus ſæpè repetit, ſpiritum & animam à Deo fuiſſe ad integritatem Incarnationis ſuſceptum: quod idem confirmat ipſe Sanctus Pater eòdem librò *de Agone Chriſtiano*, cap. 21. dicens: „Nec eos audiamus, qui ſolùm corpus humanum ſuſceptum eſſe dicunt à Verbo Dei. . . . Nam ſi abſurdum eſt & valde indignum, ut humanum ſpiritum homo ille non habuerit, ſicut ſuperiùs tractavimus; quantò magis abſurdum & indignum eſt, ut nec ſpiritum nec animam habuerit; & hoc ſolùm habuerit, quod etiam in pecoribus vilius eſt & extremius, id eſt corpus? A noſtra ergo fide etiam iſta impietas excludatur, totumque hominem atque perfectum à Verbo Dei ſuſceptum eſſe credamus. Eisdem Auguſtini Doctrinis illuſtratur etiam alia Lulli ratio, quam, num. 5. exponit, ſcilicet, quoddam, niſi vegetativa, & ſenſitiva fuiſſent in Chriſto genitæ, Filius Dei per ſuam carnem aſſumptam non participaret in parentela cum humano genere per ſenſitivam & vegetativam; & per conſequens non potuiſſet recreare humanum genus, cùm ſenſitivum, & vegetativum humani generis fuerit in primis Parentibus vitiatum; ſi tamen vegetativum & ſenſitivum hominum non generaretur, & traduceretur, ſed crearetur, non fuiſſet corruptum, & vitiatum in primo homine ſed pura elementalſ natura. Ad quod alludens D. Bonavent. in 3. diſt. 2. art. 2. q. 2. num. 3. ait: *Quoddam Chriſtus aſſumpſit veram carnem, verum corpus, & veram animam cum ſuis potentiis, vegetabili, ſenſibili, & rationali.*


LXV. Tandem ultima Lulli ratio, quam num. 6. ſcribit, ſtat in hoc, quoddam niſi vegetativa & ſenſitiva omnium hominum, ac conſequenter in Chriſto, eſſent à generante, bruta & plantæ per ſenſiti-

vam & vegetativam non possent participare cum Christo, nec cum hominibus. Hæc etiam Lulli ratio à Divo Bonavent. illustratur, in 3. dist. 2. art. 1. q. 2. ubi probans quòd major fuit congruentia ad unionem cum Verbo in creatura humana, quàm in Angelica, hæc adducit rationem: "Tertia ratio est propter multiplicem hominis compositionem. Quia enim homo compositus est ex natura corporali & spiritali, & quodammodo communicat cum omni creatura, sicut dicit Gregorius, hinc est, quòd cum humana natura assumitur & deificatur, quodammodo omnis natura in ea exaltatur, dum in suo simili Deitati unitur". Divus etiam Damascenus, Orat. 1. de Nativit. B. Mariæ: ait: *Per eam quippe creator naturam omnem, interjectæ humanitatis beneficiò, in melius commutavit; & infra: Perfectò etiam artifex Dei Verbum humanæ naturæ copulatum, per eam cum universis rebus conditis unitum est.*

LXVI. Ex dictis sufficienter patere puto, quantò fundamentorum momentò nitatur Lulli Sententia de generatione animæ sensitivæ in homine, ac de ipsius distinctione à rationali; nec contra eam obstat illud, Gen. 2. & *inspiravit in faciem ejus spiraculum vitæ, & factus est homo in animam viventem*: quasi sola anima rationalis, quæ est spiraculum vitæ, sit forma vivificans, & consequenter nulla alia sit in homine forma vivificans; imò quia ex phrasi hebraïca dicitur *spiraculum vitarum*, videtur indicari animam rationalem, quæ per illam inspirationem intelligitur creata, tribuere corpori omnem vitæ rationem, scilicet vegetativam, sensitivam, & rationalem, prout ex hoc textu deducit Cajetanus apud Pererium in Genesim, lib. 4. q. 4. num. 108. Non inquam obstat, quia anima rationalis, quatenus est forma completiva & perfectiva totius humanæ corporeæ naturæ, complet & perficit, nedùm substantiam elementalem, sed etiam vegetativam & sensitivam, & ratione hujus complementi & perfectionis post unionem cum corpore est vegetationum, & sensationum principium, non quidem proximum sed remotum, quia movet vegetativam ad vegetandum, & sensitivam ad sentiendum, cum istæ, ob subordinationem ad rationalem, fiant potentiæ ipsius eidem subditæ, & ab eadem dependentes in esse & operari; & propterea recedente rationali, corrumpuntur ipsæ; & hoc idem insinuat ipse Cajetanus dicens, animam rationalem uti ad vitales hominis functiones triplici spiritu, tamquam instrumento, vitali scilicet, naturali, & animali, nam forma vegetativa, forma sensitiva, & forma imaginativa, quæ in homine præter rationalem agnoscuntur à Lullo, sunt

sunt ipsimet relati spiritus ; vel isti , quoad id quod important de elementali substantia , sunt ipsarum necessarium & inseparabile vehiculum.

LXVII. Tantum autem abest , ut ex hoc loco Scripturæ , imò ex Canone octavæ Synodi relato supra num 39. aliisque fundamentis pro parte adversa allegatis , deducatur erroneam esse Sententiam de distinctione vegetativæ , & sensitivæ à rationali in homine , quod Pererius loc. cit. licet amplectatur doctrinam de unica hominis anima , hæc num. 122. scribit : „ Alii tamen docti Viri , ut verum „ censent unam esse tantum animam in homine , ita putant id non „ esse unquam definitum secundum Fidem Catholicam , ut contraria „ Sententia sit damnanda tamquam hæretica : dummodo enim po- „ natur talis esse anima rationalis in homine , qualem facit eam fides „ catholica , scilicet immortalem , formam essentialem hominis , & „ multiplicatam pro multitudine hominum , utrum præter eam sint „ in homine anima sensitiva & vegetativa illi subordinatæ , quæ dent „ homini esse vegetativum & sensitivum , nec-ne , nihil omnino re- „ ferre arbitrantur ad rationem fidei catholicæ ; neque enim hoc „ unquam expressum est , vel in Scriptura , vel in Conciliis , neque „ à Patribus , ut dogma Fidei , traditum est ; neque Theologi Nomi- „ nales , qui tres animas in quolibet homine esse censent , ullò „ tempore sunt damnati ab Ecclesia ut hæretici. Nam quod in su- „ prædictis locis dicitur , non esse duas animas in homine , facile „ intelligitur , sermonem haberi de duabus animabus , quarum una „ sit vivificans , altera verò non vivificans , sed tantum rationem „ ministrans , & quasi assistens : vel quarum una sit à Deo , & de „ substantia Dei , altera verò sit ab alio quodam principio , sicut „ dicebant Manichæi. Non autem dominantur (fortè *damnantur*) „ qui multas animas ponunt in homine , modò quò supra exposui- „ mus , & quemadmodum opinantur Nominales.



DISSERTATIO II.

De Propositione 12. & sequentibus, usque ad 17.

§. I.

Solum intelligit in Propositione 12. Lullus, Deum de potestate ordinata non potuisse sibi unire creaturam irrationalem.

I. **H**Æc duodecima propositio sic scribitur : *Deus cum sua potestate facere non potest contra magnam bonitatem & virtutem suæ sapientiæ, & voluntatis : quod posset, si potuisset sibi unire aliquam creaturam irrationabilem, sicut sibi univit naturam humanam. Et hoc facere contradictionem implicat.* qu. 93. Sent. num. 1.

Censura : *Propositio est temeraria, cum loquatur de potentia absoluta Dei.*

II. Deum non posse assumere naturam irrationalem, adhuc de potentia absoluta, apud Suarez, in 3. part. disp. 14. sec. 2. tenet Alensis 3. p. q. 2. mem. 7. & clarius, q. 11. mem. 1. & q. 12. mem. 1. art. 1. quod etiam deducitur ex q. 7. mem. 2. art. 1. Hoc etiam tenent Henricus quodlib. 13. q. 5. Cartusian. dist. 2. q. 2. art. 3. Picus Mirandul. in Apolog. conclus. 4. eandemque ut probabilem defendunt Richar. dist. 2. art. 1. q. 4. Gabriel, dist. 2. q. 2. apud Bernal. hic. Eandem absolutè tenet Petrus Hurtadus, disp. 1. de Anima, sec. 6. & de Incarn. disp. 43. sec. 2. apud Mastr. hic eandem tenet Pasqualig. disp. 78. sect. 9. Apud Berti, lib. 26. Theol. disc. cap. 20. pag. 77. Tournelius, apud Cabrera, in 3. p. q. 4. art. 1. disp. 3. etiam Marfilius, in 3. q. 3. Hanc Sententiam, licet non sequatur, dicit tamen Lorca, in 3. part. disp. 27. *Sed certè non est, quò Sententiam illam erroris convincere possimus.* Præterea, non obstante omnipotentia Dei, Schmier. tom. 1. trac. de Incarn. q. 14. n. 126. sic resolvit : *Materia prima separatim ab omni forma substantiali non potest assumi.* Et num. 127. sic : *Probabilius est nec formas materiales à materia separatas, ad subsistentiam divinam assumi posse : quas conclusiones defendit cum aliis Autoribus, quos citat.*

III. Hinc planum est Sententiam docentem, quòd Deus adhuc

de potentia absoluta non potest assumere naturam irrationalem, sicut assumpsit humanam, non esse temerariam, ut notat laudatus Cenfor, cum apud Autores citatos gravi fundamentò nitatur : unde Palacios, in 3. dis. 2. disp. 1. hæc scribit : *Disputatio hæc cæterarum mores habet, est enim difficilis, ut cæteræ, & controversa, ut cæteræ* : & pro hac citat Albertum Magnum, dist. 2. q. 1. & art. 1. Porro altius fundari potest hæc Sententia in Doctrina plurimorum Patrum, qui, apud Petav. Theolog. dogm. tom. 4. lib. 4. de Incarn. cap. 13. Verbum non nisi mediante animâ carni fuisse unitum constanter docent, ita ut aliter fieri non potuerit : quod sanè animadversione dignum est ; nam dicti Patres procedunt contra Appollinarem, qui docuit Verbum assumpsisse carnem absque anima rationali : unde, si potuisset assumi à Verbo naturâ irrationalis, potuisset ab ipso assumi caro sine anima rationali, ac proinde argumenta ipsorum contra Appollinarem nullam inducerent necessitatem, nec dictum hæreticum convincerent.

IV. Audiantur aliqui eorum, cum reliquos ibi relinquam videntes. Divus Greg. Nazian. in Senariis adversus Appolinarium ita scribit : *Quoniam autem misceri nequit cum carne Deus : anima verò & mens, velut in interjecto spatio, sunt carnis quidem velut contubernalis, & ut Imago Dei : Cum cognato mista Dei natura, illinc habuit & crassæ molis societatem.* Sophronius Hierosolim. in Epist. synod. ad Sergium : *solum amplectimur inconfusam & imparibilem divinitatis & humanitatis unionem secundum animam, quam solum agnoscit naturalis secundum hypostasim conventio ; hujus enim beneficio divinitas, & humanitas istud habuerunt, ut neque mutationem expertæ sint, neque divisionem passæ.* Divus Ambrosius, Tract. in symb. Apost. cap. 13. *Verbum & substantia Dei, quæ per omnia incorporea est, corpori humano inferi non poterat, nisi aliqua spiritali naturâ mediante, id est animâ ; animâ ergo rationali mediante Verbum Dei, opificio Spiritûs Sancti, carnem assumpsit.* Ruffinus, in idem Apost. symbol. *Sed nec illud quidem ab absolutione vacare hujus quæstionis omittam, quod substantia Dei ; quæ per omnia incorporea est, inferi corporibus, vel capi ab eis principaliter, non potest, nisi aliqua media sit substantia spiritalis, quæ capax esse divini Spiritûs possit ; verbi gratiâ, ut si dicamus, lux omnia quidem membra corporis illustrare potest ; à nullo tamen eorum, nisi à solo oculo, capi potest ; solus enim oculus est, qui capax sit lucis. Et Filius ergo Dei nascitur ex Virgine, non principaliter soli carni sociatus, sed animâ inter carnem Deumque mediâ generatus.*

V. Pro hac eadem sententia citatur Divus Bonaven. in 3. dist. 2. part. 1. q. 1. ubi principaliter resolvit quodd major fuit congruitas ad unionem in rationali creatura, quam in toto universo; at istiusmodi resolutio supponit potuisse fieri unionem in creatura irrationali; in explicatione tamen hujus resolutionis aliqua tenet, quæ huic favent sententiæ, nam de tota creaturarum universitate dicit: *Propterea non est idonea ad unionem cum Persona divina, sicut rationalis creatura; Deinde ait: Habet etiam (universum) partes carentes vita, & ratione, & sensu, & ideo deficientes ab excellentia proprietatis personalis, & propter hoc non habet idoneitatem ad unionem in unitate Personæ; & in solutione ultimi Argumenti sic scribit: Ad illud quod opponitur, quodd magis manifestatur divina bonitas, sapientia & potentia, si assumeret universum, dicendum quodd falsum est, quia facere per unionem, quodd asinus fieret Deus, vel aliud aliquod brutum, potius dedeceret divinam potentiam, & sapientiam, qudm commendaret; facere autem, quodd homo sit Deus, in nullo præjudicat nec potentiæ, nec sapientiæ, cum homo natus sit effici deiformis.* Unde cum S. Doctor non agnoscat in irrationalibus idoneitatem ad unionem cum Deo, & fateatur Deum dedecere fieri asinum, videtur negare Deum posse assumere creaturam irrationalem.

VI. Divus Thomas, 3. part. quæst. 4. art. 1. pertractat eandem difficultatem, & absolutè resolvit, quodd *sola natura humana sit assumptibilis*; & licet ejus Discipuli hoc interpretentur de majori convenientia naturæ humanæ ad assumptionem, tamen ex ejus verbis videtur posse inferri quodd loquitur de absoluta assumptibilitate; nam in corpore dicit, *quodd aliquid assumptibile dicitur, quasi aptum assumi à divina Persona; quæ quidem aptitudo non potest intelligi secundum potentiam passivam naturalem; atque ita aliquid dicitur assumptibile secundum congruentiam ad unionem prædictam*; & quia hæc congruentia, ut probat, soli humanæ naturæ convenit, ideo concludit, *quodd sola natura humana sit assumptibilis.* Deinde ad 1. posito exemplo de morbo incurabili secundum propria subjei principia, subjungit: *sic ergo dicitur aliqua creatura non esse assumptibilis, non ad subtrahendum aliquid potentiæ divinæ, sed ad ostendendum conditionem creaturæ, quæ ad hoc aptitudinem non habet*: quibus verbis videtur dicere, quodd, quamvis Deus de se possit illam assumere, illa tamen non potest assumi, quia non habet aptitudinem: sicuti, licet Deus quantum est de se potuit producere mundum æternum, mundus tamen non potuit esse æternus. In responsione ad 2. negat congruitatem in creatura irrationali ad unionem, illamque incongruitatem probat; & in respon-

sione ad 4. repetit quodd *universi plurimæ partes non sunt assumptibiles*; atque ita sola humana natura est assumptibilis. Ipse tamen, ut notat Palacios loco citato, in 3. sent. dist. 2. q. 1. dicit Deum secundum potentiam ordinariam non posse assumere creaturam irrationalem, benè tamen ex absoluta sua potentia. •

VII. Ex hucusque relatis manifestum est immeritò Lullum inuri præfatâ Censurâ, adhuc supposito quodd assereret, Deum potentia absolutâ, non posse assumere creaturam irrationalem, cum hæc sententia gravibus nitatur fundamentis, & tot tantosque habeat Patronos; at multò magis indebita videbitur prædicta Censura, attento Lulli sensu, & determinato modo loquendi circa assumptibilitatem creaturæ rationalis; quia in summa idem docet ac Doctores Seraphicus & Angelicus in locis adductis; prout fit patens ex analysi notatæ q. 93. lib. Sent. quâ inquit: *Utrum Deus sibi potuerit unire aliquam creaturam irrationalem, sicut sibi univit humanam naturam?* Ubi maximè est notandum, non inquiri absolutè: *Utrum Deus sibi potuerit unire aliquam creaturam irrationalem?* Sed restrictè: *Sicut sibi univit humanam naturam*; in ista autem restrictione, præter varios sensus, quì possunt intelligi, magis obvius est iste: *Utrum possit fieri hæc unio, sicut unio cum humanitate, ita ut sicut de facto sibi univit Deus humanam naturam, & nullam aliam assumpsit, ita possit sibi unire creaturam irrationalem, omisâ assumptione humanitatis.*

VIII. In hoc sensu discurret Lullus, num. 1. sic, & est Textus notatæ propositionis: *Deus cum sua potestate non potest facere contra magnam bonitatem & virtutem suæ sapientiæ & voluntatis; quod posset, si sibi potuisset unire aliquam irrationalem creaturam, sicut sibi univit humanam naturam; & ratio hujus est, quia divina sapientia & voluntas non possent ita (id est, isto modo) participare cum irrationali creatura per intelligere & diligere, sicut (id est, prout) possunt in humana natura Christi; cum irrationalis creatura non habeat sapientiam nec voluntatem, cum quibus possit intelligere, & amare Deum; homo verò habet illas; cum in Christo divinum intelligere & amare participant cum humano intelligere, & amare (id est, mutuò sibi correspondent per intelligere & amare) ad quam participationem concurrunt divinum bonificare, & humanum bonificare Christi, & sic de magnificare, & magnificare, &c. & quia talis participatio non potest esse sine rationali natura, non potest Deus sibi ipsi injuriari, nec de se ipso suo effectui; quod faceret toti universo, & humanæ naturæ, quam assumpsit, si affirmatio quæstionis esset tenenda: in qua scilicet humana natura, quam assumpsit,*

Text.pr.12.

potest esse finis omnium corporalium entium, mediante animâ Christi conjunctâ cum corpore, sine qua omnia corporalia entia non possunt in Deo attingere finem, cum Deus sit immobilis, inelementabilis, invegetabilis, insensibilis, inimaginabilis; & sit recolibilis, intelligibilis, & amabilis: Ergo sequitur quod negatio quæstionis sit tenenda.

IX. Tota hæc ratiocinatio fundatur in illa propositione: *Deus cum sua potestate non potest facere contra magnam bonitatem & virtutem suæ sapientiæ & voluntatis*, quam Lullus ut certam supponit, quia nunquam Deus suis perfectionibus contraire potest; hæc autem contrarietas, non accipitur pro contrarietate positiva, sed potius pro negativa; id est, Deus non potest facere nisi juxta suam sapientiam, & voluntatem, & secundum quod scit sua sapientia, & voluntas vult; & hinc colligitur, non loqui Lullum de potestate absoluta, sed tantum de ordinata. Ad quod intelligendum adverto, quod, cum perfectiones Dei sint ad invicem æquales, æqualiter ordinantur ad invicem; & sic potestas ordinatur ad sapientiam, & voluntatem; & econversò sapientia, & voluntas ordinantur ad potestatem: potestas quatenus est ordinata ad sapientiam, & voluntatem est potestas ordinata, & sic quatenus ordinata tantum potest secundum quod scit sapientia, & vult voluntas; potestas autem, quatenus ad eam ordinantur sapientia & voluntas, est potestas absoluta, & sic potest quidquid est absolutè possibile, & non tantum quod est secundum sapientiam & voluntatem: unde, cum Lullus in hoc discursu statuatur pro fundamento, Deum non posse facere contra suam sapientiam, & voluntatem; id est, non posse facere nisi quod est juxta sapientiam, & voluntatem, propterea tantum loquitur de potestate ordinata.

X. Hoc amplius ostenditur ex ratione, quâ probat, quod Deus posset facere, contra ipsas, si potuisset sibi unire aliquam irrationalem creaturam, sicut sibi univit humanam naturam; nam hæc ratio stat in hoc, quod ad divinam sapientiam spectat sibi unire naturam, cum qua mutuo participet per intelligere, & velle, ita ut eam intelligat, & velit, ab eaque intelligatur, & ametur: hujusmodi quoque naturæ unio digna est ut à Deo ametur, ita quod hæc Dei & naturæ unitæ participatio sit juxta divinam & creatam bonitatem, magnitudinem, &c.; & cum hæc participatio non possit haberi per unionem cum creatura irrationali, quæ caret intellectu, & voluntate, haberi autem posset per unionem cum natura humana, ideo unio cum natura irrationali, prætermisâ unione cum humana natura,

esset contra, seu non esset juxta divinam sapientiam & voluntatem. Præterea talis participatio est competens magnitudini & perfectioni divinæ sapientiæ & voluntatis, & ita justum quodammodo est quodd Deus ita sapienter, & amorosè participet cum creatura, & quodd creatura tali participatione exaltetur; & quia talis participatio non potest esse sine rationali natura, si, unione ipsius prætermisâ, uniret sibi Deus creaturam irrationalem, sibi ipsi injuriaretur, quatenus non faceret quod justum est juxta suam sapientiam, & voluntatem, & suo effectui pariter quodammodo injuriaretur, quatenus creaturam privaret illâ participatione, quæ juxta sapientiam, & voluntatem Dei competit eidem.

XI. Alia ratio, quam exponit Lullus est, quodd ad sapientiam & voluntatem Dei spectat, ita de rebus disponere, ut omnia Deum, qui est eorum finis, consequantur, aliter frustra esset Deus eorum finis; at cum Deus sit immobilis, inelementabilis, invegetabilis, insensibilis, & inimaginabilis, nulla talium naturarum potest immediate Deum consequi; quia verò Deus est recolibilis, intelligibilis, & amabilis, & creatura rationalis est recollectiva, intellectiva, & amativa, ideo omnes aliæ creaturæ, mediante rationali, possunt Deum consequi, ita tamen ut omnes dictæ creaturæ cum rationali uniantur tamquam in proprio fine; & quia solùm in humana natura uniuntur tamquam in fine, ad quem ordinantur, ideo, nisi uniatur humana natura cum Deo, universum consequi non potest suum finem in Deo; quod est contra Dei sapientiam & voluntatem.

XII. Profectò omnes istæ rationes eò collimant, ut ostendant, unionem divinæ naturæ cum humana debuisse fieri, & non potuisse fieri unionem ejus cum natura irrationali, prætermisâ unione cum rationali, quia divina sapientia & voluntas, quibus correspondet ordinare & disponere illam unionem, quâ perfecta habeatur participatio naturæ increatæ, & creatæ, & quâ totum universum Deum suum finem consequatur, & ab ipso Deo in bonitate, magnitudine, &c. exaltetur, exigunt & petunt hujusmodi perfectam unionem, vel quia decet Deum tantùm posse agere quod convenit divinæ sapientiæ & voluntati; & quia hæc omnia tantùm conveniunt potestati ordinatæ ad sapientiam, & voluntatem, non autem potestati absolutæ, seu potestati, quatenus ad eam sapientia, & voluntas ordinantur, quia hujusmodi potestas, cum non sit ad aliquid determinata per ipsas, potest omne possibile: ideo dum Lullus hîc resolvit, Deum non potuisse sibi unire aliquam creaturam irrationalem, sicut sibi

univit humanam naturam, tantum loquitur de potestate ordinata; non autem de absoluta.

XIII. Antequam ad cætera explicanda procedam, notare oportet, illam primam rationem, quæ probat Lullus, Deum non potuisse assumere creaturam irrationalem, exponi à Divo Thoma, part. 3. q. 4. art. 1. ubi in corpore ait: *Unde relinquitur, quod assumptibile aliquid dicatur secundum congruentiam ad unionem prædictam, quæ quidem congruentia attenditur secundum duo in humana natura, scilicet, secundum ejus dignitatem, & necessitatem: secundum dignitatem quidem, quia humana natura, in quantum est rationalis & intellectualis, nata est attingere aliquammodo ipsum Verbum per suam operationem, cognoscendo scilicet & amando ipsum... Unde relinquitur, quod sola humana natura sit assumptibilis; & ad secundum sic scribit: Quod autem deficit à minori, non habet congruitatem ad id, quod est majus: sicut corpus, quod non est aptum perfici animâ sensitivâ, multò minus est aptum perfici animâ intellectuâ. Multò autem major, & perfectior est unio ad Deum secundum esse personale, quàm quæ est secundum operationem (cognitionis, & amoris, ut prædicit) & ideo creatura irrationalis, quæ deficit ab unione ad Deum per operationem, non habet congruitatem, ut uniatur ei secundum esse personale; & ad quartum dicit, quod universi plurimæ partes non sunt assumptibiles, ut dictum est: unde relinquitur, quod sola natura humana sit assumptibilis.*

XIV. Circa hæc Divi Thomæ verba observandum est, quod eandem conclusionem statuit, ac Lullus, videlicet: *Sola humana natura est assumptibilis*, quod idem est ac: *Deus non potuit sibi unire creaturam irrationalem, sicut sibi univit humanam naturam*, prout resolvit Lullus. Divus Thomas deducit præfatam conclusionem ex idoneitate humanæ naturæ ad cognoscendum & amandum Deum, & ex inidoneitate creaturæ irrationalis ad dictam operationem. Fundatur quoque Lullus in prædicta idoneitate & inidoneitate, & insuper in exigentia divinæ sapientiæ & voluntatis; atque ita pari currunt passu. Notanter porro est observandum, quod, licet Divus Thomas in propositione Articuli inquirat: *Utrum natura humana fuerit magis assumptibilis à Filio Dei, quàm aliqua alia creatura?* Tamen in conclusione art. absolutè & positivè resolvit, quod *sola natura humana sit assumptibilis*, & quod *universi plurimæ partes non sunt assumptibiles*.

XV. Observare etiam oportet, quod Divus Bonavent. ex relatis, num. 5. quamvis in tit. quæst. 1. dist. 2. in 3. agat de majori congruitate ad unionem, tamen propter eandem Divi Thomæ rationem

nem

nem negat in creaturis irrationalibus absolutam idoneitatem ad præfatam unionem, & in responsione ad ultimum argumentum, ex eo, quòd dedeceret divinam potentiam & sapientiam, quòd asinus fieret Deus, negat talem congruitatem, & sic quoad hoc etiam cum Lullo coincidit. Ipse quoque ibid. q. 2. *Utrum major sit congruitas ad unionem in humana natura, quàm in Angelo, an è converso?* utitur eadem ratione, quâ Lullus in textu adducto, circa consecutionem Dei ab omni creatura, mediante humanâ naturâ; nam ad ostendendam hujus majorem congruitatem in resolutione quæstionis sic scribit: *Tertia ratio est propter multiplicem hominis compositionem, quia enim homo compositus est ex natura corporali & spiritali; & quodammodo communicat cum omni creatura, sicut dicit Gregorius; hinc est quòd, cum humana natura assumitur & deificatur, quodammodo omnis natura in ea exaltatur, dum in suo simili, Deitati unitur. Et hinc est quòd assumptio humanæ naturæ plus facit ad totius universi perfectionem, quàm angelicæ; & ideo major est in ea congruitas ad unionem, etiam secundum suam institutionem.* At hæc ratio, quæ coincidit cum illa ex Beato Lullo descripta, amplius militat contra assumptibilitatem naturæ irrationalis.

XVI. Revertentes ad textum hujus quæstionis, notari debet, quòd num. 2. objicit Erémita, Deum, eò quia sua potestas est infinita, omnia posse in creatura, ex quo concludit, *quòd Deus ita potuisset assumere aliquam irrationalem creaturam, sicut sibi univit humanam naturam*: Ad hoc autem, num. 3. respondet Lullus; & primò ad primam consequentiam ex infinita Dei potestate, dicit, quòd *tria sunt quæ Deus non potest facere, unum est quòd non possit facere aliquam essentiam sibi æqualem simpliciter, nec secundum quid; aliud est quòd non possit facere contradictionem; tertium est quòd non possit facere peccatum*: hoc probat, & postea ad secundam consequentiam de potestate uniendi sibi creaturam irrationalem ita subjungit: „Unde, sicut probavimus quòd rationalis creatura non possit obedire Deo per prædictos tres modos, ita etiam per consequens non potest illi obedire irrationalis creatura, quòd cum ipso sit unita, quia ex hoc sequentur inconvenientia, quæ supra diximus (id est in ratione conclusionis relata supra, num. 8.) & etiam contradictio & peccatum; ergo tua ratio non valet „. Nota quòd in exemplari antiquo; licet valde corrupto, solum in fine hujus quæstionis sic habetur: *Ex hoc sequeretur etiam contradictio; & omittitur ly & peccatum.*

XVII. Sanè illa, quæ, in responsione ad primam Argumenti consequentiam, dicit Lullus Deum non posse facere, nec de potentia Dei absoluta possunt esse; inde tamen non sequitur, quòd dum dicit: *Sicut probavimus, quòd rationalis creatura non possit obedire Deo per prædictos tres modos, ita etiam per consequens non potest illi obedire irrationalis creatura, quòd cum ipso sit unita*; intelligat, hanc unionem non posse esse adhuc de potentia absoluta; quia comparatio, quæ ibi fit, non est secundum æqualitatem, sed secundum proportionem, quoniam non loquitur in utroque extremo de eadem potestate, sed in uno agit de potestate ordinata, & in alio de absoluta, quia dum dicit Deum non posse facere illa tria, loquitur de potestate secundum se, & inspectâ rerum essentiâ; quæ enim dicit Deum non posse facere, nempe æqualitatem creaturæ cum Deo, contradictionem, & peccatum, omnia ex propria essentia repugnant à Deo fieri; atque ita tunc loquitur de potestate absoluta; dum verò dicit Deum non posse unire sibi creaturam irrationalem, solum hoc fundat in sapientia & voluntate Dei exigentibus illam participationem Dei & creaturæ per cognitionem & amorem, & illud complementum ac exaltationem universi, non autem de hoc fundat in essentiali repugnantia creaturæ irrationalis ad unionem cum Deo absolute sumptam; atque ita quoad hoc tantum loquitur de potestate ordinata.

XVIII. Unde, Deum non posse æquare sibi creaturam, facere contradictionem, & peccatum, est, non posse absolute; non posse autem sibi unire creaturam irrationalem, est, non posse ex suppositione, id est, ex suppositione quòd Deus sciat & velit illam participationem mutuam, & complementum universi; ac proinde dum dicit, quòd si creatura irrationalis esset Deo unita, sequeretur *contradictio & peccatum*, non intelligitur absolute, sed ex suppositione, id est, suppositâ illâ scientiâ, & voluntate Dei; & si fieret unio cum sola creatura irrationali, esset ex scientia & voluntate Dei illa major participatio, & non esset, ratione talis unionis; esset etiam peccatum, quia non observaretur illa rectitudo à scientiâ, & voluntate Dei præscripta; nec servaretur creaturæ illud qualecumque jus sibi ex scientiâ, & voluntate Dei dimanans ad illam participationem ac complementum & exaltationem, quæ eidem ex divino beneficio competere per unionem humanæ naturæ cum Deo; atque ita Lullus per illa verba: *& etiam (sequeretur) contradictio & peccatum*, non in-

tendit negare absolutæ potestati Dei posse sibi unire creaturam irrationalem.

XIX. Hæc omnia clariùs patent ex quæstione 99. ubi quærit : *Utrum Deus debuerit assumere humanam naturam ?* Nam hæc quæstio coincidit cum notata quæstione 93. si enim Deus. debuit assumere humanam naturam , non potuit assumere creaturam irrationalem ; atque ita eò modò , quò debuit illam assumere non potuit istam sibi unire : Unde , cum solum doceat , Deum debuisse incarnari , debitò ordinationis suæ potestatis ad suam scientiam , & voluntatem , non autem debitò absolutò , ideo non posse sibi unire irrationalem creaturam , non est non posse potestatis absolutæ , sed tantùm ordinatæ. Audiatur in hac q. 99. num. 1. ubi sic discurrit : « Quando » Deus creavit mundum de nihilo , mundus quoad se nullumj us habebat nec dignitatem erga Deum , quòd ipsum debuisset creare , » quia , si habuisset , jam mundus fuisset aliquid , sed Deus per suam » liberam voluntatem voluit creare mundum , & facere gratiam (hoc » est , gratis ipsum creare) unde , sicut Deus per voluntatem liberè voluit creare , ita per suam bonitatem liberè voluit creare » bonum , & sic de magnitudine , &c. & quia sic voluit ; per eundem modum debuit , postquam voluit , & postquam sua bonitas » requirebat producere bonum , & sua magnitudo , magnum , &c. » Ecce quomodo statuit in Deo debitum creandi mundum , non ex jure , quod haberet mundus , nec ex aliquo determinato principio in Deo , sed ex libera Dei voluntate , & ex requisitione bonitatis requirentis ; ut liberè ipsum crearet bonum , magnitudinis , magnum , sapientiæ sapienter ordinatum : hoc autem debitum non est absolutum , sed ex ordinatione , & suppositione talis ordinationis voluntatis & aliarum Dei dignitatum.

XX. Ad hunc modum descendit Lullus ad debitum Incarnationis , subjungens immediatè : *Et ideo , secundum quod debuit creare quoad seipsum , & quoad actus suarum dignitatum , debuit assumere humanam naturam :* id est , eòdem modò quò debuit creare mundum , debuit assumere humanam naturam , & quia non debuit creare ob aliquod jus in mundo , vel ob aliquod principium Dei determinatum , sed ob liberam & gratuitam Dei voluntatem , bonitatem , magnitudinem , sapientiam , &c. ideo debuit assumere naturam humanam , non ex jure aliquo in mundo , nec ex determinato Dei principio , sed tantùm ex requisitione suæ voluntatis , bonitatis , &c. requirentium liberam & gratuitam humanæ naturæ assumptionem ; ac proinde solò debito

ordinationis divinæ voluntatis, & aliarum dignitatum, & ex ejus suppositione, non autem debito absoluto. Debit itaque ex hac suppositione assumere humanam naturam, prout subjungit: „ Ut per
 „ illam assumptionem exaltaret mundum & totum universum in ma-
 „ jori fine amabilitatis mundi, & bonificabilitatis, magnificabilitatis,
 „ &c. quam mundus potuit recipere, & Deus in novo esse perficere; & hoc fecit per unionem divinæ & humanæ naturæ in Christo,
 „ aliàs Deus non salvaret suum debitum (prædictum) sibi ipsi &
 „ suis dignitatibus cum majoritate magnitudinis, bonitatis, &c. sed
 „ cum minoritate, quod est impossibile (secundum prædictam ordina-
 „ tionem) ergo Deus debuit assumere humanam naturam. „

XXI. Ex hoc textu simul explicatur quod dixit Lullus, quæst. 93. in Verbis adductis, num. 8. ubi dicit, quod Deus sibi ipsi injuriaretur, si non assumeret naturam humanam, & assumeret creaturam irrationalem: quia hoc non intelligit de justitia absoluta, & præveniente liberam Dei voluntatem & perfectam ordinationem divinarum dignitatum, sed tantum de justitia fundata in dicta ordinatione, ac libera & gratuita Dei voluntate; sicut debitum ad assumendam humanam naturam unice fundatur in præfata ordinatione. Similiter explicatur quod ibidem dicitur, videlicet quod Deus injuriaretur suo effectui, si non assumeret humanam naturam, & tantum sibi uniret creaturam irrationalem: Nam in hac quæst. 99. expressè fatetur quod nec mundus nec humana natura ullum jus habuit ad unionem humanæ naturæ, sed quod debere humanam naturam cum Deo uniri unice provenit ex præfata dignitatum ordinatione, & gratuita Dei voluntate exaltandi mundum in majori magnificabilitate, ac proinde ex dicta ordinatione & voluntate Dei descendit jus in humanam naturam & totum universum ad præfatam unionem: quo supposito & in hoc sensu tantum dicit Lullus in notata quæstione 93. quod, si Deus non assumeret humanam naturam, sed creaturam irrationalem, injuriaretur suo effectui.

XXII. Amplius in eadem quæst. 99. explicat Lullus præfatum sensum; nam, num. 2. ita scribit: „ Item cum Deus creavisset mundum
 „ & hominem ad æternam Beatitudinem, & humanum genus fuit
 „ deviatum à fine, propter quem fuit creatum per originale peccatum,
 „ Deus debuit assumere humanam naturam & esse homo, &
 „ mori ad recreandum humanum genus, ut satisfaceret illi fini, quem
 „ supra diximus, ad quem mundus fuit creatus. „ Sanè his verbis dicit Lullus, Deum debuisse assumere naturam humanam, non ab-

~~Solutè, sed ex ordinatione divina hominis ad beatitudinem, ad hoc ut~~
 per passionem & mortem Christi fieret Deo debita satisfactio, quæ
 mediante posset homo consequi finem beatitudinis, ad quem erat
 creatus: in hac autem doctrina, quæ est eadem cum doctrina Divi
 Anselmi in libro *cur Deus homo*, debitum non est absolutum, sed ex
 suppositione divinæ ordinationis; & in eam conveniunt Theologi do-
 centes, solum creaturam cum Deo unitam potuisse Deo reddere
 debitam & perfectam pro peccato satisfactionem.

XXIII. Clarius explicat Lullus suum sensum in solutione objec-
 tionis propositæ, num. 3. scilicet, quod "inter finitum & infinitum
 " ens, est nulla proportio, unde sequitur, quod Deus non debuit in-
 " carnari, cum ipse sit infinitus, & homo, finitus: " nam ad hoc,
 num 4. ita respondet. " Verum dicis quando dicis, quod inter fini-
 " tum & infinitum ens sit nulla proportio, cum finitum ens quoad
 " se habeat nullam dignitatem, nec virtutem utendi infinito ente,
 " sed infinitum ens bene potest ratione gratiæ & charitatis sic se hu-
 " miliare erga hominem per unionem, sicut per dilectionem, cum
 " Deus diligat suum effectum; & quia Deus magis & melius scit di-
 " ligere suum effectum, quam aliquis alius, voluit se unire cum hu-
 " mana natura, ut suum effectum tantum exaltaret, quantum potuit,
 " & quantum suus effectus potuit recipere; & talis proportio inter
 " finitum & infinitum non est impossibilis, nec contra magnitudi-
 " nem nobilitatis divinæ bonitatis, &c. quæ in suo effectum requirit
 " magnum bonificare. " Ecce quomodo hic fundat debitum Dei ad
 Incarnationem in gratia & charitate Dei erga suum effectum. Pater
 itaque solum de potestate ordinata, non autem de absoluta dicere
 Lullum, quod Deus non potuerit sibi unire creaturam irrationalem:
 quod idem ex aliis libris ostendi facile potest; à quo tamen, brevitati
 consulens, supersedeo.

§. II.

*Rectè asserit Lullus in Prop. 14. Deum, quoad se & suam infinitam bo-
 nitatem, tantum distare à peccato mortali, quantum à veniali; magis
 verò distare à Deo peccatum mortale, quàm veniale.*

XXIV. Cum prop. 13. ab hoc Censore notata sit eadem, ac Ar-
 ticulus 58. Eymerici, cui data est plena satisfactio, tom. 2. cap. 23.
 nihil de ipsa oportet dicere in præsentia: idem dico de prop. 15. &

16. quæ sunt eadem ac prop. 19. & 20. circa Sacramentum Altaris, à primo Censore notatæ, de quibus egimus in hoc tom. 3. dist. 2. dissert. 8. & 9. ac proinde ad reliquas procedemus.

XXV. Itaque prop. 14. sic describitur: *Deus omnibus modis distat ab omni peccato infinite, & quoad se tantum distat à peccato veniali, sicut à mortali, sed homo existens in peccato magis distat à divina bonitate, magnitudine, &c., per peccatum mortale, quam per veniale: Et sic Deus consentit, quod homo faciat peccatum veniale, ut non faciat mortale; alioquin magis distaret à divina bonitate per peccatum veniale, quam per mortale; & sic Deus licentiaret hominem, quod faceret peccatum mortale; quod est impossibile.* Quæst. 121. sent. circa finem.

Censura: *Propositio quoad primam partem est falsa; quia plus distat Deus, quoad se, à mortali, quam à veniali, cum gratia Dei quæ sit simul esse cum veniali, & non cum mortali; & quoad secundam partem, in re coincidit cum hæresi Calvinii, quia dicit, Deum consentire, quod fiat peccatum veniale.*

XXVI. Hæc propositio quoad secundam partem explicata manet abundanter in tom. 2. cap. 24. ad artic. 59. Eymerici, ubi ostenditur, ibi agi de peccato veniali, non propriè, & rigorosè tali, sed vulgariter, & quoad sensum popularem tali; quia ibi agitur de mendacio vulgariter accepto, quod committit puella, quæ postquam promisit facere copiam sui corporis, resipiscit, & non vult se prostituere, & tunc dicitur illam mentiri: illa negatio propriæ corporis eò modò, quò mendacium vulgariter dicitur, dicitur etiam peccatum veniale, & de hoc populariter dicto peccato veniali dicit Lullus, Deum consentire ut ipsum faciat illa puella: unde ex contextu illa assertio non est generalis, prout videtur esse in verbis extractis à contextu, & à dicto Censore notatis, sed est determinata ad illud qualecunque mendacium puellæ; in Censura autem propositionum ab authoribus scriptarum non sunt attendenda verba ex contextu avulsa, sed secundum sensum, quem ex contextu prætendunt.

XXVII. At hic textus, qui eisdem verbis à Censore productis se habet in notata quæstione 121, quoad primam partem immeritò notatur falsitatis à laudato Censore, maxime obrationem, quam assignat, quia Lullus, *Primò*, ponit quod Deus infinite distat ab omni peccato; hæc autem propositio est verissima, quia Deus, cum sit infinita bonitas, infinite distat à quacunque malitia, nam distat eò modo, quò est infinita bonitas, cum ipsa infinita bonitas, sit ratio, cur distat; ac proinde infinite distat ab omni peccato, *Secundò*, ponit Lul-

lus quòd Deus quoad se tantum distat à peccato veniali, sicut à mortali : ubi *ly quoad se* apertè denotat agi de Deo quoad suum esse & infinitam excellentiam suarum perfectionum, & præcisé à quolibet extrinseco ipsius Dei ; & quia Deus quoad suum esse infinitum, & infinitam excellentiam suarum perfectionum infinitè distat à quocumque extrinseco, ideo quoad se infinitè distat tam à peccato mortali, quàm à veniali ; prout consequitur ad primum Lullij assertum in textu notato ; & quia in infinitate non datur magis & minus, ideo Deus quoad se tantum distat à peccato veniali, quantum à mortali, quia ab utroque distat infinitè ; quia tamen non eodem modò se habent peccatum mortale, & veniale, quoad distantiam à Deo, ideo *Tertiò*, dicit, quòd magis distat à Deo peccatum mortale, quàm veniale.

XXVIII. Ratio autem suæ censuræ, quam assignat laudatus Cenfor, non procedit in eodem sensu ; nam dicit : *Quia plus distat Deus quoad se à mortali, quàm à veniali, cum gratia Dei queat simul esse cum veniali, & non cum mortali* ; nam gratia Dei, quæ magis distat à mortali, quàm à veniali, non est Deus quoad se, & tantum potest dici, quoad similitudinem : atque ita ex eo quòd gratia, quæ est similitudo Dei, magis distet à peccato mortali, quàm à veniali, malè infertur, quòd Deus quoad se magis distet à mortali, quàm à veniali, cum tantum inferri possit, quòd Deus quoad aliquid sibi extrinsecum magis distet ; non autem quòd Deus quoad se ; quia Deus quoad se unicè importat suum infinitum esse ex suis infinitis perfectionibus : quo modo non verificatur de ipso magis & minus in re, sed pura infinitas : unde nulla videtur aperta ratio, cur Lulli propositio possit falsitatis notari ; & ratio ipsa, quam dat laudatus Cenfor, solum infert illud ipsum, quod dicit Lullus tertiò locò hujus propositionis, videlicet quòd peccatum mortale magis distat à Deo, quàm veniale ; & propterea gratia potest esse cum veniali, & non cum mortali, ut passim adstruit Lullus.

XXIX. Similia ac Lullus docet Divus Bonaventura in 1. dist. 37. part. 3. q. 1. ubi in principio refert Philosophum dicentem : *Prima causa se uno modò habet ad omnia, licet omnia non habeant se uno modò ad primam* ; & in resolutione quæstionis docet, quòd Deus secundum se æqualiter est in omnibus rebus, quamvis quoad effectum inæqualiter : unde ad primam objectionem ait : “ Quod enim ” objicitur ; quòd Deus uniformiter se habet ad omnes res, si intel-
 ” ligatur uniformitas ex parte divini esse, verum est ; si autem in-

„telligatur ex parte effectûs, falsum est, quoniam Deus uniformiter, & stabiliter existens cætera movet, & multos & varios effectus producit, & efficiendo diversa in rebus, facit quoddam res non se habere uniformiter ad ipsum. Eadem igitur ratione, quâ Deus secundum suum esse æqualiter est in rebus, & ex diversitate effectuum oritur diversitas: pariter Deus quoad se æqualiter poterit distare à peccato mortali & veniali, cum hoc quoddam magis distet ab eo peccatum mortale, prout dicit Aristoteles quoddam ipse unum modum se habet ad omnia, licet ipsa inæqualiter se habeant ad Deum. Etiam Deus, quoad se & suam infinitam perfectionem, infinite distat ab omnibus creaturis, & tamen ex creaturis illa, quæ est magis perfecta, magis accedit ad Deum.

XXX. Præterea Divus Bonavent. in 3. dist. 32. art. 1. quæst. 3. *Utrum Deus diligat omnes creaturas æqualiter?* Ita resolvit: „Respondendo deo dicendum, quoddam de dilectione Dei est loqui dupliciter, videlicet licet secundum essentiam, & secundum efficaciam; sive secundum actum essentialem, & secundum effectum consequentem. Si loquamur de dilectione quantum ad essentiam, sive quantum ad actum essentialem, sic non tantum æquali dilectione diligit omnia; imò tantum unum & eodem actu simplici & indivisibili, nullo variato, nullo multiplicato, quæ quidem est divina usia. Si verò loquamur de dilectione, quantum ad efficaciam, sive quantum ad effectum consequentem . . . dicendum est, quoddam Deus non omnes creaturas diligat æqualiter; & num. 17. Ad illud quod objicitur, quoddam prima causa unum modum se habet ad omnia, dicendum quoddam illud verum est, quantum ad id quod est ex parte Dei, sed tamen creaturæ, sicut ipse dicit, non uniformiter se habent ad ipsum; & quoniam diligere Dei non tantum dicit quod est ex parte ipsius, sed etiam effectum creaturarum, hinc est quoddam ratione illius potest attendi inæqualitas. Similia docet ad ultimum argumentum. Unde sicut dilectio quantum est ex parte Dei, est eadem & æqualis; diversificatur verò secundum effectus, vel secundum dispositionem objecti dilecti, sic pariter relata distantia.

XXXI. Ulterius, in Sentent. plurium Theologorum. idem est Deus, qui offenditur per peccatum mortale, & veniale; & quoad se eodem modum se habet; & tamen gravius offenditur per mortale, quam per veniale. Theologi etiam defendentes peccatum mortale esse infinitum simpliciter in ratione offensæ, regulariter conveniunt in hoc, quoddam peccata mortalia quoad hanc infinitatem sunt æqualia, quamvis aliunde

aliunde unum peccatum sit majus, quàm aliud : Unde Amort, Theol. Eclec. tom. 2. tract. de Incarn. dist. 2. quæst. 3. in sol. objec. 3. ait : “ Respondeo ad primum, distinguo : sequeretur quodd unum peccatum non esset majus alterò, quoad suum esse formale, concedo ; ” quoad suum esse materiale, nego. ” Lardito, tom. 2. in S. Anselm. de Incarn. tract. 2. dub. 3. §. 4. ad idem Argumentum ita refert : “ Ad argumentum respondent plures, peccata esse æqualia in ” ratione offensæ, nimirum infinitate desumpta ex divina majestate ” offensa, quod non impedit inæqualitatem ex aliis principiis, videlicet intensiōe, circumstantiis, & aversione activa : “ Hoc autem idem est ac dicere, quodd peccata mortalia quoad majestatem Dei offensam sunt æqualia ; inæqualia verò quoad propriam rationem : si ergo ista possunt dici, cur non poterit Lullus dicere, non quidem peccatum mortale & veniale infinitè distare à Deo, & tantum distare unum quantum aliud, sed Deum infinitè distare ab utroque, & quoad se tantum distare ab uno, quantum ab alio ; & tamen peccatum mortale plus distare à Deo, quàm veniale ? ”

§. III.

Docet Lullus in Prop. 17. Beatum non in specie aliqua, sed in ipsa divina essentia, seu intelligibilitate increata, videre Deum intuitivè.

XXXII. Propositio 17. & ultima sic exponitur : *In visione Dei intellectus Beatus in propria intelligibilitate Dei increata, & quæ est Deus, intelligit divinam Trinitatem & essentiam, non in suo proprio intelligibili creato, sed immediatè, Deo communicante intellectui Beato suam essentialem intelligibilitatem.* Quæst. 140. num. 1.

Censura : *Propositio videtur erronea, & accedere ad Ubiquistarum hæresim, quatenus ait : Beatum intelligere intelligibilitate increata, & ipsam ei communicari.*

XXXIII. Quoties hanc Censuram textumque inustum considero, non possum percipere qualiter hic clarissimus Cenfor tam acriter in Lullum excandeat, cum, saltem attentò titulò hujus quæstionis, appareat Lullum in textu notato docere idem, quod Divus Thomas ejusque Discipuli de visione intuitiva Dei; quod Amort, Theol. Eclec. tom. 1. tract. de Deo, disp. 4. de visione intuitiva Dei, q. 2. Notando 4. sic exponit : “ Thomistæ verò dicunt, in Beatis nullam dari, ” aut dari posse speciem five impressam, five expressam divinæ es-

„ sentia; hinc dicunt essentiam divinam se per semetipsam immediatè
 „ unire intellectui humano , seu animæ , ita ut essentia divina funga-
 „ tur formali officiò specierum , & anima humana in esse intelligen-
 „ tis tam perfectè uniatur cum essentia divina & infinito cumulo per-
 „ fectionum , quàm perfectè nobis de facto uniuntur species colorum ,
 „ lucis , harmoniæ , voluptatis , imò ipsi actus nostri interni. Sicut
 „ ergo homo mundanus in hac vita ex tali unione specierum sensibi-
 „ lium dicitur objecta sentire , vel videre : ita continget ex imme-
 „ diata unione divinæ essentia; , ut videantur & sentiantur infinitæ
 „ perfectiones Dei ; & cùm sentire intellectualiter has perfectiones
 „ idem fit , ac illis frui , mirum non est quodd homo ex visione Dei
 „ intuitiva , *per immediatam unionem omnium potentiarum ad essentiam*
 „ *Dei* , felix ac beatus sit. „

XXXIV. Audiatur circa hoc ipse Divus Thomas , part. 3. quæst.
 9. art. 3. ad 3. scribens : *Dicendum , quodd cognitio beata non fit per*
speciem , quæ sit similitudo divinæ essentia; , vel eorum quæ in divina
essentia cognoscuntur , ut patet ex his quæ in prima parte dicta sunt ,
sed talis cognitio est ipsius divinæ essentia; immediatè , per hoc quodd ipsa
essentia divina unitur menti beatæ , sicut intelligibile intelligenti. Ipse
 part. 1. quæst. 12. art. 2. in corpore tenet , quodd per nullam simili-
 tudinem creatam Dei essentia videri potest : hoc probat , & tandem con-
 cludit : *Unde dicere Deum per similitudinem videri , est dicere divinam*
essentiam non videri , quodd est erroneum ; & ad 3. ait : *divina essentia*
unijur intellectui creato , ut intellectum in actu , per seipsam faciens intel-
lectum in actu. Art. 4. in corpore , sic : *Non igitur potest intellectus crea-*
tus Deum per essentiam videre , nisi in quantum Deus per suam gratiam
se intellectui creato conjungit , ut intelligibile ab ipso ; & art. 5. in cor-
 ita : *Cùm autem aliquis intellectus creatus videt Deum per essentiam , ipsa*
essentia Dei fit forma intelligibilis intellectus.

XXXV. Habemus itaque ex mente Divi Thomæ ejusque discipu-
 lorum , quodd essentia divina ut forma intelligibilis unitur immediatè
 intellectui , & sic intellectus ipsam per seipsam immediatè attingit ;
 & quia attingitur ut intelligibilis , in ipsamet increata intelligibilitate
 attingitur , non enim attingitur in specie , vel similitudine , sed in
 seipsa immediatè , aliter non videretur intuitivè , quia ex Divo Thoma,
 dicere Deum per similitudinem videri , est dicere divinam essentiam
 non videri : Unde sicut alia objecta in similitudine & specie intelli-
 guntur , ratione cujus speciei sunt intelligibilia : ita Deus , non in si-
 militudine & specie videtur , sed immediatè in sua essentia , & ita

attingit eum intellectus in ipsa intelligibilitate increata; & quia divina essentia per gratiam seipsam ut intelligibilem unit cum intellectu creato, ideo sic Deus communicat intellectui suam essentialem intelligibilitatem, id est, se dat, seu intimè se immittit in intellectum; nisi enim seipsum ut intelligibilem intellectui communicaret seu uniret, non posset ipsum immediatè & facie ad faciem attingere, ut latè probant Thomistæ.

XXXVI. Consideremus nunc Lulli textum, & primò titulum notatæ quæstionis 140. in qua quæritur: *Utrum anima separata cognoscat vel intelligat per species influxas à Deo, vel species receptas in corpore, vel per species, quas existens separata, recipit?* Sanè hæc quæstio communiter agitur, & quia inquiritur generaliter de cognitione & intellectu animæ separatæ, intelligitur hæc quæstio in ordine ad omnia intelligibilia ab anima separata, prout respectivè ad omnia illam resolvit Lullus: Unde respectivè ad Deum inquit hæc quæstio, an Deus videatur per speciem aliquam, vel sine ipsa: quod resolvens Lullus, num. 1. sic scribit: *Solutio in 3. & 46. & 138. quæstione significata est, scilicet, quod in visione Dei beatus intellectus in propria intelligibilitate Dei increata, & quæ est Deus, attingat divinam Trinitatem, & essentiam, non in suo proprio intelligibili creato; & hoc sine aliqua specie antiqua vel nova; sed immediatè & facie ad faciem, Deo communicante intellectui suam essentialem intelligibilitatem, ut intellectus exaltatus sit in altiori gradu visionis, & participationis Dei; aliàs, si inter Deum & intellectum esset medium, scilicet species antiqua vel nova, beatitudo intellectus esset diminuta, & gloria non esset acquisita in fine, sed in medio, in quo non esset quies; quod est impossibile.*

XXXVII. Sanè, si laudatus Censor exposuisset, & considerasset integrum hunc textum, non adedè finistrè apprehendisset Lulli sensum; nam loquitur de intuitiva Dei visione, & hanc docet non fieri in specie & similitudine, sed immediatè facie ad faciem, & ideo, quia divina essentia ut intelligibilis se unit cum intellectu beato, *beatus intellectus*, non in specie aliqua vel similitudine, sed in *intelligibilitate increata*, quæ est Deus, hoc est in ipsamet divina essentia intelligibili, quæ est suamet increata intelligibilitas, *attingit divinam Trinitatem, & essentiam* ac cumulum omnium perfectionum; & quia intellectus creatus per seipsum non potest sibi unire divinam essentiam, sed hoc tantum fit, ipsâ divinâ essentiâ seipsam uniente per gratiam ipsi intellectui, ideo videtur Deus *immediatè, & facie ad faciem, Deo communicante* (objectivè, seu ut formam intelligibilem) *intellectui*

suam essentialem intelligibilitatem, ut intellectus exaltatus sit in altiori gradu visionis & participationis Dei; non enim potest esse altior & perfectior visio, quàm divinæ essentiae in seipsa, & absque specie, nec augustior participatio, quàm quoddam divina essentia sub sua essentiali intelligibilitate se immediatè uniat & communicet ut intelligibilis intellectui beato.

XXXVIII. Hinc manifestum est, quoddam, cùm hîc agatur de visione intuitiva Dei, quâ Deus facie ad faciem immediatè attingitur ut intelligibilis in sua propria intelligibilitate essentiali, illa communicatio asserta in relato textu, scilicet *Deo communicante intellectu suam essentialem intelligibilitatem*, unice & purè est communicatio objectivè, seu ut objectum intelligibile, id est, unio, quâ Deus, ut ait D. Thomas citatus, num. 34. *per suam gratiam se intellectui creato conjungit ut intelligibile ab ipso*; ac proinde ruit suspicio accessûs *ad Ubiquistarum hæresim*, quæ referente Bellarm. de Controv. lib. 3. de Christo, cap. 1. & cap. 9. ac sequent. stat in communicatione propria, & formali perfectionum Dei humanitati Christi sibi unitæ; ita ut, juxta aliquos unio hypostatica consistit in hac communicatione, vel hæc communicatio ad hanc unionem consequitur; & propter hoc dicunt humanitatem Christi esse omnipotentem, omniscientem, &c. & ubique: Unde totò Cœlò distat ab eis illa communicatio, quam asserit Lullus, quia dicit communicari intellectui essentialem Dei intelligibilitatem, non naturali communicatione, ita ut illa fiat propria & formalis perfectio intellectûs, sed purâ communicatione objectivâ & ut quid intelligibile: sicut totò Cœlò distat ab Ubiquistis & ab unione hypostatica unio intima & immediata divinæ essentiae cum intellectu beato, quam docent Thomistæ cum Divo Thoma, quia non est unio naturalis sed in linea intelligibili; quæ quidem unio *Phrasi communicationis* etiam exprimitur: unde citatus Amort, loc. cit. q. 3. in probatione conclus. 3. dicit: *Non potest ostendi implicantia in eo quod Deus secundum has rationes ideales immediatè se uniat cum sensu, eum per modum formæ actuando, sicut per suam essentiam immediatè se communicat intellectu.*

XXXIX. Quoad alia objecta intelligibilia, resolvit etiam Lullus juxta expositum titulum præsentis quæstionis, videlicet quoddam ipsa intelligit anima separata per speciem, & num. 2. ita scribit: *Item beatus intellectus in suo proprio intelligibili creato non potest naturaliter intelligere sine specie, &c.* ex quibus verbis ostenditur quid velit dicere, dum in notatò textu relato, num. 36. dicit, quoddam beatus intellectus

in propria intelligibilitate Dei increata attingit divinam Trinitatem & essentiam, *non in suo proprio intelligibili creato*, cum enim proprium intelligibile creatum intellectus importet speciem objecti intelligibilis, eamque requirat, ut intellectus in ipso attingat seu intelligat objectum: Ideo, cum intellectus beatus non videat Deum cum specie, sed immediatè, non attingit divinam essentiam in suo proprio intelligibili, sed tantum immediatè in ipsa divina essentia, seu in propria intelligibilitate Dei increata: atque ita patet quàm immeritò inustus fuerit relatus textus præfatà Censurà.

XL. Rectum expositum sensum notatæ quæstionis 140. animadvertisset laudatus Censor, si consulisset, ut debuit, alias quæstiones, ad quas provocat Lullus in ipsa: nam in quæst. 3. ad quam se refert, explicat differentiam intelligendi in via, & in Patria, ita quodd *intellectus in hac vita intelligat Deum per speciem, sed in intellectu beato, qui est in Patria, non est illa species, nec alia . . . sed in loco illius speciei summa intelligibilitas se communicat intelligibilitati intellectus beati*. Prætereà quæst. 46. quam etiam citat, num. 1. docet, *quod in fruitione Angeli, qui fruitur Deo, Deus se faciat intelligibilem, repræsentando suam propriam & consubstantialem intelligibilitatem Angelo, & hoc immediatè & sine aliquo instrumento, & Angelus . . . attingit Deum sine medio, ut cum ipso immediatè possit participare*. Tandem, quæst. 138. num. 1. docet quodd ad illam immediatam Dei intellectionem seu divinæ essentiæ visionem, quam docuit quæst. 3. cum *intellectus non possit habere vigorem per se, Deus dat ei lumen gratiæ & veritatis, sub quo est passivus, ad attingendum illam supremam visionem, in qua est activus*. Itaque in his omnibus quæstionibus apertum est, divinam intelligibilitatem se communicare intellectui, esse idem, ac se repræsentare seu eidem se unire ut intelligibilem; intellectum quoque intelligere Deum in sua increata & essentiali intelligibilitate, esse idem, ac attingere immediatè ipsam divinam essentiam; quæ per seipsam, & absque media specie se facit intelligibilem.




D I S T I N C T I O I V.

*De Censuris latis adversus Librum de quæstionibus Magistri Thomæ
Atrebatensis.*

D I S S E R T A T I O I.

De formâ in Christo ; futurorum mutabilitate ; & libero ad peccandum arbitrio , quoad propositiones 1. 2. & 3. ex quæstionibus 1. 3. & 4.

LICET hic liber de quæstionibus Magistri Thomæ Atrebatensis , non fuerit ab Eymerico notatus , quia tamen fuit simul impressus & compactus cum libro de quæstionibus super Librum sentent. anno 1507. quô usi fuerunt relati Censores , ideo simul fuit examinatus , & in ipso aliquæ fuerunt notatæ propositiones , de quibus est agendum in præsentî : solum advertendo , quod in hoc libro solvuntur quæstiones juxta artem Lullianam , quarum solutionem expetierat ipse Magister Thomas Atrebatensis per litteras ad ipsum Beatum Lullum directas ; & quia breviter ac explicitè juxta principia artis resolvuntur , ut practica artis aperiatur : cujusmodi solutionem fortè non erant intellecturi nescientes artem , ideo Lullus in Prologo rogat Magistrum Thomam , ut eas ponat tali modò , quod ab omnibus possint intelligi : an autem hoc fecerit , ignoratur : unde solum ex textu Lulli desumenda est earum intelligentia ; & quia ad varias pertinent materias , prout oportuerit , simul variæ propositiones discutientur.



§. I.

Doctrinā Lulli in Proposit. 1. est, quòd quia Filius Dei se fecit hominem de humana natura, se habet activè ad esse Christi, & humana natura passivè sub ipso; ac proinde, ut Christus sit una Persona ex duplici natura, Filius Dei est forma, id est, ratio formalis, ut sit una persona ex illis.

I. Verba, quæ in hac quæstione notantur, sunt ista: *Humanitas in Christo non dat esse humanum, hoc est, non facit hominem, sed suppositum divinum de natura humana facit hominem.* Et mox: *In supposito Christo Divinitas sive Filius Dei est forma antiqua & æterna, qui Deus est, & ipsa forma informat hominem de humanitate, informando se hominem; & sic dico, quòd una forma est in Christo, & illa est divina natura, quæ cum Dei Filio convertitur, cum sint idem numerò.* Et ibidem: *forma humanitatis remanet realiter in illo supposito, sed passivè sub forma divina possessa.* Quæst. 1. Sanè his verbis, quæ notat, nullam Cenfor apponit censuram, & sic ignoratur determinatus sensus, qui difficultatem sibi ingerit; at ex hujusmodi verborum nota, videtur difficultatem stare, *Primò*, in eo quòd dicatur: *humanitas in Christo non dat esse humanum, hoc est, non facit hominem; Secundò*, in eo, quòd asseritur sic: *sed suppositum divinum de natura humana facit hominem; Tertio*, in eo, quòd divina natura seu Filius Dei dicitur forma, quæ informat hominem de humanitate; *Quartò*, quòd forma humanitatis remanet passivè sub forma divina possessa; quia ex his videtur poni in Christo compositio physica ex forma, & materia, ita quòd divina natura sit forma, & humana natura sit materia.

II. Ad intelligentiam præfatorum verborum reflecti debet integer Textus hujus quæstionis, qui sic se habet: *Quæstio 1. cum Christus fuerit unum suppositum, quæro, quæ fuit forma illius? Cum sit ex duabus naturis, scilicet divinâ, & humanâ.* Solutio. *Ad istam quæstionem oportet sic considerare, sicut Ecclesia tenet, & dico, quòd Deus factus est homo de natura humana in divino supposito, ita quòd humanitas in Christo non dat esse humanum, hoc est, non facit hominem; sed suppositum divinum de natura humana facit hominem, faciendo se hominem per humanitatem, ex qua est homo, & ideo in illo supposito Divinitas, sive Filius Dei, est forma antiqua & æterna, quæ Deus est, &*

Text. prop.
1.

ipsa forma informat hominem de humanitate (melius in quodam manuscripto : Quoniam Deus est ipsa forma , & informat) informando se hominem : & sic dico , quod una est forma in Christo , & illa est divina natura , quæ cum Filio Dei convertitur , cum sint idem numerò ; verumtamen , ut natura humana Christi non sit de minori conditione quàm aliorum hominum , forma humanitatis remanet realiter in illo supposito , sed passivè possessa sub forma divina , secundum tertiam speciem Regulæ D. Verumtamen , si in aliquo ego erravi in ista quæstione , vel aliis de Deo , peto correctionem à Doctoribus Sanctæ Ecclesiæ Romanæ.

III. Ex propositione quæstionis ejusque solutione intelligitur sensus eorum , quæ difficultatem ingerere videntur ; nam quæstio supponit , quod Christus est unum suppositum ex duabus naturis , scilicet divinâ , & humanâ , ut catholica docet Ecclesia ; quia verò in quolibet uno ex multis semper aliquid est , quod , ad modum unius physici se habet tanquam forma , id est , tanquam determinans & trahens cætera ad illam unitatem ; illud scilicet , quod præcipuum est & principale in illo uno , ita ut illud agere videatur , & alia pati sub ipso , ad modum , quò in uno physico forma tantum agit , & materia patitur , formâ determinante materiam ad unum esse physicum : ideo sensus quæstionis est , quid se habeat tanquam forma in Christo , qui est unum suppositum ex duabus naturis ; & quia præcipuum & principale , quod est in Christo , est Filius Dei , qui est ipsa divina natura ; ipse enim Filius Dei sibi univit humanam naturam , & de ipsa se fecit hominem , ita ut humana natura , licet sit vera essentia & forma humana , sicut aliorum hominum , passivè se habuit sub Filio Dei , quia de se & ex propria virtute non habet facere illum hominem , qui est Deus , sed de ipsa assumpta , Filius Dei se fecit hominem : ideo dicitur , quod forma , id est , id quod se habet tanquam forma in Christo , est Filius Dei , qui est ipsa divina natura.

IV. Nunc facile intelligi possunt illa verba , quæ difficultatem ingerere videntur , & quæ Censor annotavit ; & pendent ex illa prima propositione Lulli : *Deus factus est homo de natura humana in divino supposito* , quæ est ad sensum omnium Catholicorum , ad quam tamen non videtur Censor advertisse : ex ea enim intelligitur sequens propositio adnotata , scilicet : *ita quod humanitas in Christo non dat esse humanum , hoc est , non facit hominem , sed suppositum divinum de natura humana facit hominem , faciendo se hominem per humanitatem , ex qua est homo* : supponitur enim in Christo vera humanitas , & ita ut Deus per humanitatem se facit hominem , & quod ex humanitate est

est homo ; cùm autem Deus sit qui *factus est homo de natura humana in divino supposito* , ita ut ipse seipsum fecit hominem , assumendo naturam humanam , humanitas verò non assumpsit Deum , nec sibi univit Deum , sed tantùm à Deo fuit assumpta , & ipsi unita ; ideo non facit hominem , & sic non dat esse humanum ; tum quia humanitas non præcipuè , & principaliter agit , sed Filius Dei , sub quo ipsa patitur , ut assumpta , & unita ; tum quia illa de se non habet dare illud esse humanum , quod est Deus , nec facere hominem , qui est Deus ; & propterea suppositum divinum , faciendo se hominem per humanitatem assumptam , facit hominem , illum scilicet , qui est Deus , non autem humanitas , quæ passivè se habet ad divinum suppositum , quod ex ipsa se facit hominem.

V. Indè patent reliqua , in quibus ob realem identitatem , five mutuam realem conversionem , Filius Dei , Deus , Divinitas , & divina natura , promiscuè sumuntur ; & ita divinitas , Filius Dei , seu Deus dicitur in supposito Christo esse forma , non quidem physica , sed ad modum formæ , determinans & trahens humanam naturam ad illud unum suppositum , ut ex ipsa sit homo ; dicitur autem forma antiqua , & æterna , quia Deus per seipsum est forma , non materia , id est habet perfectionem , quæ in ratione formæ consideratur , & sic sæpè ab Augustino , & Anselmo Deus dicitur forma : & ipsa forma (ut habetur in Textu) *informat hominem de humanitate informando se hominem* : non debet dici uno verbo : *informando* ; sed duobus , *in formando se hominem* ; quia enim Filius seipsum format , hoc est facit , hominem , ideo in formando , seu faciendo , se hominem , *informat* , hoc est , format , perficit , & facit , *hominem de humanitate* ; atque ita *ly informat* , attributum formæ divinæ non denotat proprium actum formæ physicæ , qui dicitur *informare* , quia ibi explicatur quòd forma divina informat hominem de humanitate , per hoc quòd seipsam format seu faciat hominem ; atque ita ad illam non spectat informare ut forma physica : quod inde etiam eruitur , quia Lullus , licèt dicat Filium Dei se facere hominem de humanitate , & humanitatem esse passivè possessam ab ipso , nunquam tamen adstruit humanitatem esse materiam physicam , ac proinde neque intelligi Personam divinam esse formam physicam.

VI. Hæc ipsa intelligentia , quam exposui de hoc textu Lulliano , ampliùs patet ex aliis locis , ubi diffusiùs tractat Lullus de Incarnatione ; & præcipuè ex lib. *quæst. super lib. sent.* quem vidit idem Censor ; nam ibi quæst. 94. num. 1. postquam asseruit , *quòd Deus est*

cum assumpta natura una Persona ex duabus naturis, scilicet ex divina, & humana, & Persona, quæ est Christus, non est tertium ex ipsis: quod excludit physicæ formæ & materiæ unionem, ut pote ex ipsis necessariò fit tertium; postea distinguit hanc unionem, & unitatem Personæ ex duabus naturis, ab omnibus unitatibus entium naturalium, quia ista sunt unum tertium ex forma & materia. Et quæst. 98. cùm ex unionibus variarum rerum, ex quibus fit unum, probasset, à minori ad majus, quodd ex essentia & natura divina, & humana potest esse una Persona; ad objectionem probantem quodd, si sic esset, hoc esset per compositionem, & fieret unum tertium ex divina, & humana natura, num. 5. ita respondet: Non dico quodd divina, & humana natura possint facere unum per modum compositionis; & addit: Tua ratio non valet, cùm unus modus sit facere unum de rebus finitis, & alius modus de essentia & natura finita & infinita; & postea subjungit, quodd Persona ex duabus naturis non ita fit, sicut fit unus homo ex anima, & corpore, tamquam tertius numerus ex ipsis; & eandem differentiam explicat, quæst. 105. num. 3. Videantur etiam dicta in dist. 2. dissert. 2. §. 1.

VII. Ex his apertè patet, Lullum negare hanc compositionem in Christo, quæ est ex forma, & materia, ac proinde numquam fuit ejus mens, quodd vera forma physica sit in ipso. Similiter in aliis libris negat propriam compositionem in Christo, ut in libro *Quinque sapient.* part. 2. & 3. in cujus ratione 9. respondens ad argumentum Jacobi ait: *Etiam non tenent (latini) quodd Christus sit compositus de natura divina & humana, sed quodd in Christo sit utraque natura, & quod per divinam sit Deus, & per humanam homo :: nec propter assumptionem hujus humanitatis sequitur, quodd Christus sit compositus de Deo & homine; expressiùs autem, part. 4. cap. 2. scribit; Si vis dicere, quodd natura divina & humana componunt unam Personam, malè dicis, quia Persona Filii est infinita & æterna, & est simplex & non composita; & idè de illa, & de natura humana non potest fieri compositio, quia compositio non potest esse, nisi de partibus finitis, habentibus in seipsis quantitatem, & existentibus in tempore. Negat etiam compositionem in Arb. scient. in Arb. Christianali, tit. de Trunco, ubi, nedum negat, Christum esse tertium numerum ex divina & humana natura, sed etiam dicit, quodd ad differentiam aliorum, in quibus plura fiunt unum, divina natura compositionem non intrat cum humana, quoniam ita magna est ejus simplicitas, quodd in compositionem intrare non potest.*

VIII. Unde, cùm ubique neget Lullus veram compositionem in

Christo, & per hoc præcipue neget eam, quæ est ex forma & materia physicis, ex quibus resultat unum tertium, ideo numquam cogitari potest mentem ipsius esse, divinam naturam esse physicam formam respectu humanæ naturæ; sed tantum habere se ad modum formæ, quatenus activa est de humana natura, in quantum Deus de ipsa se facit hominem, & humana natura patitur sub ipsa, ut explicat in *Arb. scient.* in Arb. Chris. tit. de actione & passione Jesu-Christi dicens: *In Domino Jesu-Christo est natura divina activa, & humana passiva, in quantum divina natura humanam assumpsit, & illam in seipsa sustentat: etiam in seipsa factus fuit homo, ex natura humana; expressius autem de hoc loquitur in lib. de Deo, & Jesu-Christo (tom. 6.) part. 2. quæst. 9. num. 9. ubi scribit; Jesus est potenter una Persona de duabus naturis; & hoc est per duas potestates; quarum una est divina, & alia humana; quia per divinam potestatem hoc potest esse activè, & formaliter, cum sit infinita potestas; & per humanam potestatem hoc potest esse passivè & materialiter, cum humana natura per semetipsam de potentia deducta in actum possit esse homo: Igitur Jesus potest esse Deus & homo per modum potestatis formalis divinæ, & potestatis materialis humanæ, conjunctis ambabus potestatibus in unitate divinæ & humanæ Personæ. His sanè verbis clarè ostendit, rationem formalem attribui divinæ naturæ, & materialem humanæ, eò solò motivò, quòd divina est activa, quatenus Deus de humanitate se fecit hominem, & humana est passiva, quatenus de ipsa assumpta Deus factus est homo in una Persona; & hoc conformiter ad formam & materiam generaliter acceptas, prout eas explicat in *logica nova*, dist. 4. de centum formis, dicens: *Forma est ens, propter quod actio maximè consistit. materia est ens propriè, & maximè sub passione consistens.**

IX. Itaque per hoc unice dicitur natura divina, vel Filius Dei, esse forma in Christo, quia se habet activè & ad modum formæ, quatenus ipse de humana natura se fecit hominem; & humana natura, de qua assumpta fuit factus homo, se habet passivè, quatenus sub dicta actione de ipsa Filius Dei factus fuit homo: hoc autem apud omnes est verum, quia apud omnes est in confesso, quod Lullus ut fundamentum omnium supponit in principio hujus quæstionis, scilicet quòd Deus factus est homo de natura humana in divino supposito, ac propterea ad hoc, ut Christus sit una Persona ex duabus naturis, Filius Dei, qui de humana natura se fecit hominem, activè se habet, & humana natura, de qua se fecit hominem, pas-

fivè se habet respectu illius ; & hoc maximè dicere tenentur , qui Christum admittunt Personam compositam ex duabus naturis , dicunt enim quòd Personalitas divina determinat & trahit ad se naturam humanam , illam reddendo subsistentem , atque ita agnoscunt in Persona divina rationem activam & ad modum formæ , ac proinde in natura humana rationem passivam.

X. Hoc expressè fatetur Petavius , Theolog. Dogm. tom. 4. lib. 2. cap. 4. num. 7. ubi explicans differentem agendi modum personarum in Incarnatione ait : *Verùm peculiare id Verbi Personæ fuisse , ut in genere quasi formalis causæ naturam afficeret ac terminaret assumptam , hoc est , ut Græci PP. loquuntur , hypostasis esset humanæ naturæ ;* & lib. 3. cap. 13. explicans qualiter hypostasis Verbi facta est hypostasis humanæ naturæ , num. 5. ita scribit : “ De hoc loquendi » genere , *Deum fieri* , sub locò dicemus ; interim animadvertenda » ratio est , ex qua constat hypostasim Christi esse peculiarem divi- » næ naturæ , quòd videlicet , nisi esset ejusmodi , Christus quâ hic » homo Deus non esset , nam non aliter homo statum quodammodo » mutat , & in Deum transit , re appellationeque ipsâ , nisi quia di- » vinæ hypostasis natura humana , & per sese creata , fit particeps . » Cùm igitur ab hypostasi Verbi natura hominis hoc habeat ut sub- » sistens sit , & Deus ; necesse est hypostasim , *sic tanquam formam* , » à qua divinam illam conditionem accipit , esse divinam ». Idem cap. 14. num. 3. scribit : “ Ea proprietas relativa (Filietas) cum natura » communi conjuncta , prout animò ista percipimus , Personam Tri- » nitatis secundam constituit : quæ hac affecta proprietate , *tanquam » formâ* subsistens efficitur ut hypostasis ac Persona . Eadem porrò , » naturam sibi alteram adjungens , cum eâque *formam illam suam* & » personalem proprietatem communicans , unam secum hypostasim » ac Personam facit , qui unus est Filius , isque Dei : quocirca Fi- » lietas Divina , *cùm hypostatica sit forma* , cuicumque tandem appli- » catur , idipsum divinam hypostasim , Deique Filium efficit : unde » natura hominis ad illius hypostaticæ proprietatis communionem » assumpta , divinam transit in Personam , ac Dei Filium .

XI. Conceptum ampliùs explicat Petavius immediatè dicens : “ Nunc illud tenemus , quòd ad propositæ quæstionis disceptatio- » nem propriùs pertinet , apparere jam ex dictis cur Persona Chris- » ti , etsi duabus ex naturis composita dicatur , una nihilominus , » & quidem divina , sit , nam cùm in hypostasi qualibet sive Per- » sona duo , quâdam cogitatione distincta , reperiantur , alterum *quod*

„ *est*, alterum *quo est*, horum prius est natura, posterius, forma
 „ five personalis proprietas, hoc est, *quò* certa Persona constituitur:
 „ ab hac verò proprietate, tamquam *formâ*, capit hoc hypostasis,
 „ tum ut hypostasis sit, tum ut una sit hypostasis, siquidem unitas
 „ propria est entis affectio; ab eodem itaque res quælibet accipit ut
 „ sit unum, à quo, ut sit ens tale, sortitur. Quemadmodum igitur
 „ ex eo quòd naturæ duæ sunt in Christo perfectæ, minimèque con-
 „ fusæ, ab his, velut ab geminata formali causa, duplex Christus
 „ ac geminus dicitur, proximèque Deus & homo nominatur, non
 „ unum aliquid, ex duobus conflatum, tertium, quia nullam hujus-
 „ modi habet in se formam, à qua denominatio ista proficiscatur;
 „ ita cum unica sit in eodem Christo *forma*, id est proprietas, quæ
 „ hypostasim facit, nimirum Filietas divina, quamvis plures ei na-
 „ turæ subiectæ sint, eaque quodammodo *formatæ*, non nisi una orie-
 „ tur hypostasis ac Persona, nec alia quàm divina, hoc est Dei Fi-
 „ lius, adeo ut qualiscumque tandem compositi istius *materia* ipsa
 „ sit duplex, *forma* verò, & quod ex ipsa sequitur, non nisi sit unum.
 „ Sequitur autem hypostasis & Persona, five Dei Filius, tamquam
 „ proprium, &, ut vocant, formale illius effectum. Quare tum una
 „ Christi est hypostasis, tum ea meritò divina censetur, ratione
 „ dumtaxat substantiæ, quamvis, si naturam consideres, appellari
 „ etiam humana possit.

XII. Sanè nihil clarius dici poterat ad explicandum Lulli concep-
 tum, & ad ipsum eandem phrasin exprimendum; & hoc confirmat
 Petavius ibidem, num. 4. ex trita quorundam veterum locutione,
 scilicet quòd *in illa naturarum copulatione compositioneque Christi, quod*
præstantius est prævicisse id quod erat inferius & imbecillius in seque quò-
dam modò transfuisse: quâ sensus expressione indicatur propria ratio
 formæ, hæc enim, quia præstantior & nobilior, ad se trahit & ad
 esse suum deducit illud, in quod agit; & propterea, saltem tam-
 quam forma se habet, in quod in aliquo uno est præstantius, & ad
 illum unum deducit & trahit, quod sibi unitur, quò modò dicit Lul-
 lus Personam Divinam ad se trahere humanitatem, & se facere ho-
 minem de ipsa: cui consonant apud Petavium ibidem relati Gregor.
 Nazian. orat. 37. dicens: *factus est unus, eo, quod melius est, supe-*
rante; Andreas Creten. Orat. de transfiguratione dicit: *In incon-*
fusa unitione factum esse, ut illud pervinceret, quod est excellentius:
vel ut magis propriè loquar, extitit inexplicabilis illa in Deum transfor-
matio; Cyrillus Alexan. Dial. de Incar. *Natura Verbi humanitatem as-*

sumens, non nuda est humanitas, sed potius assumptam naturam propriâ gloriâ superans, in divini splendoris inconcussa possessione persistit; & Arnobius, in Disput. cum Serapione: superavit enim magnitudo Domini parvitatem servilis formæ, ita ut ipsa forma servilis, quam assumpsit, cessaret esse servilis, per eum Dominum, qui eam assumpsit.

XIII. Alii apud ipsum explicant, Verbum, vel divinam naturam, complere & perficere naturam humanam (quod est etiam quid proprium formæ, vel tanquam forma se habentis) non autem compleri nec perfici ab humana natura: sic ibi cap. 15. num. 7. Maxentius Dialog. 2. contra Nestorianos ait: *Non esse imperfectum Deum Verbum: quia non, ut perficeretur, assumptione carnis indiguit, sed ut caro perficeretur, in melius commutata, carni se uniens compositus factus est, qui ante erat sine dubio summè simplex & incompressus perfectusque per omnia, utpote Deus; & num. 12. Athanasius, vel alius Autor, lib. de uno Christo affirmat: Deum & hominem unam esse hypostasim & unam Personam, ut non sit expletivum corpus hypostaseos; id enim impium esse Quamobrem corpus non explendæ divinæ hypostasis vim habuit, sed qui reverâ perfectus erat, id perfecit, quod erat imperfectum; & qui nullius est indigens, cum egena carne convenit, & unitus est. Unde apud dictum Petavium ibi lib. 4. cap. 8. num. 9. Rusticus Diaconus, in disp. contra Acephalos, explicans diversum modum, quò duæ naturæ se habent in Christo, ait: *Duarum naturarum unionem, non ambæ fecere naturæ, sed sola divinitas: quid enim & cooperari ad unionem valuit natura nostra; quæ in Christo est, quæ sumpsit ab ipsa unionem principium?**

XIV. Hæc sanè omnia declarant peculiarem illam rationem, quæ in Christo convenit naturæ divinæ, vel Filio Dei, respectu naturæ humanæ, scilicet ratio activa, quatenus Dei Filius seipsum fecit hominem de humana natura, illam ad se trahendo & sibi uniendo: quò designatur se habere tanquam forma, ut intendit Lullus in textu notato; & consequenter intelligitur ratio passiva in humana assumpta natura sub actione Verbi assumentis: quapropter à Lullo in textu dicitur *passivè passiva sub forma divina*, id est, quod Deitas, Filius Dei, vel divinum suppositum, habet & possidet humanam naturam; hæc autem non habet Deum, ut est phrasis, quâ Petavius ibid. lib. 3. cap. 14. num. 6. ex Divo Thoma explicat modum, quo se habent in Christo naturæ, quia *quod principalius est, id semper habere dicitur, quod autem minus principale, haberi*; & ideo natura divina dicitur habere humanam, non autem è conversò, quia, ut ibid. ait ipse Divus Thomas in compendio Theologiæ, cap. 202. *In unionem Dei ad*

creaturam, non trahitur Deitas ad humanam naturam, sed humana natura à Deo assumitur, non quidem ut convertatur in Deum, sed ut Deo adhæreat.

XV. Proinde ostenditur vera illa assertio Lulli in textu notato, scilicet quodd Deus factus est homo de humana natura, *ita quod humanitas non dat esse humanum, hoc est non facit hominem, sed suppositum divinum de humana natura facit hominem, faciendo se hominem per humanitatem, ex qua est homo*; quia licet humanitas sit vera essentia & natura humana, *per quam & ex qua*, ut ait Lullus in textu, Deus fit homo, & est homo; ipsa tamen quoad hoc, respectivè ad Filium Dei, non se habet activè, sed passivè sub ipso; ut autem clariùs intelligatur Lulli sensus, dum dicit, quodd *humanitas non dat esse humanum, nec facit hominem* in Christo, notandum est, quodd esse humanum vel homo in Christo, non intelligitur utcumque, sed intelligitur esse humanum quod est Deus; & homo intelligitur, qui est Filius Dei, vel utrumque intelligitur pro supposito, quod est Deus; & quia natura humana in Christo de se & de propria ratione non habet facere hominem Deum, ideo non dat esse humanum, quod est Deus, nec facit hominem, qui est Filius Dei. Hic est Lulli sensus ubicumque hujusmodi utitur phrasi, præcipuè in lib. sent. à quæst. 94. in qua, num. 1. ponit, *quodd in Christo Deus est homo, & homo est Deus, & Deus est Christus, & homo est Christus, & Christus est homo Deus*; hoc autem ita est quodd *humana natura in Christo, nec per se nec in se facit suppositum vel hominem, sed de ipsa factus est homo in divina natura, vel (id est) in divino supposito, quod in se facit se hominem de humana natura.*

XVI. Quodd autem in Christo natura humana non det esse suppositi quod est esse humanum, nec faciat suppositum, quod est homo, sed quodd Filius Dei se faciat hominem per ipsam & de ipsa, sæpè repetitur à Divo Bonav. ut in 3. dist. 6. art. 1. quæst. 2. num. 18. ubi ait: “ Ad illud, quod opponitur, quodd si Christus esset solum
 „ ex anima & carne, haberet hypostasim compositam: dicendum,
 „ quodd verum est; quia tunc haberet primum esse hypostasis ejus ex
 „ humana natura, quæ quidem composita est; nunc autem non est
 „ simile, quia Persona Christi suum esse primum habet ex divina
 „ natura, quæ quidem est omninò simplicissima; & ideo humana
 „ natura superveniens, sicut non dat Personæ esse personale, sic non
 „ facit eam esse compositam; „ & quæst. 3. num. 20. de natura humana in Christo ait: *Ita quodd non dat illi supposito primum esse, sed*

advenit jam completo ; num. 21. Licet enim humanitas adveniat jam completo, nihilominus substantificatur in illo tamquam in proprio suo supposito ; quia Dei Filius, qui est suppositum divinæ naturæ per naturam, fecit se suppositum humanæ naturæ per gratiam. Similiter art. 2. quæst. 1. num. 25. sed quia est ibi (in Christo) alterius, scilicet divinæ naturæ prædominatio, necesse est quod divina natura humanam naturam trahat ad unitatem, sed ad unitatem naturæ non potest trahere sine transmutatione & conversione : necesse est ergo, quod eam trahat ad unitatem Personæ, & una & eadem hypostasis sit divinæ naturæ & humanæ, ut quasi humana natura fundetur & substantificetur in divino stipite.

XVII. Idem etiam deducitur ex eo quod juxta Evangelium asserens, quod *Verbum caro factum est*, licet concedant plurimi Patres apud Petavium, quod homo factus est Deus, hoc *facere* soli Deo tribuunt, non autem homini nec humanæ naturæ, & semper repetunt quod Deus se fecit hominem de humana natura, numquam autem quod hæc de se ipsa fecerit Deum hominem : plures quoque negant humanæ naturæ propriam existentiam ; at cum ipsa juxta Fidem propriam careat subsistentiâ, non facit hominem vel suppositum suum, quemadmodum aliorum hominum naturæ, sed Filius Dei faciendo se hominem, se facit ejus suppositum, ut innumeris locis repetunt Patres apud citatum Petavium ; ad præsentem autem scopum Damascenus ibi lib. 5. cap. 8. num. 2. ait : *Non autem propriâ vi consistens Dei Verbi caro subsistit ; nec altera facta est hypostasis, præter hypostasim Dei Verbi ; sed in ipsa subsistens ad hypostasim magis adjuncta, quàm propriâ modò consistens hypostasis est facta.*

XVIII. Tandem quod natura humana non det esse humanum in Christo, nec faciat hominem, videtur consequi ex doctrina D. Thomæ 3. p. q. 17. art. 2. docente in Christo unum tantum esse dari, quod est esse personale ; ad istud esse quod simul est divinum & humanum, est esse Filii Dei, quod non dat humana natura ei adveniens. Præterea esse humanum vel homo in Christo, non provenit ex intrinsecis principiis humanæ naturæ ; quia, si ita humana natura in Christo faceret hominem, vel daret esse humanum, se haberet sicut in aliis hominibus, & sic haberet propriam Personam, quod esse nequit : ac proinde, licet Filius Dei fiat homo per humanitatem, ipsa tamen non facit illum hominem, nec dat illud esse humanum, quod est Deus ; sed Filius Dei ex ipsa se facit hominem, & se facit esse humanum ipse ; atque ita ipsa passivè se habet in Christo, ut docet Lullus in textu notato ; ac proinde immeritò taxatur textus hujus quæstionis 1.

§. II.

In Prop. 2. Præscita à Deo, quæ sunt futura secundum causas inferiores non autem secundum æternam Dei dispositionem, possunt à Deo ad preces justorum mutari, ex sensu Lulli.

XIX. In quæst. 3. hoc notatur : *Utrum Deus ad preces proborum aliquid mutet de futuris ab ipso præscitis ? Teneo de ista quæstione affirmativè, & non sequitur, quod Deus sit variabilis in se, sed hoc, quod recipitur in hac vita ab ipso, variabile est.* Quæst. 3.

Censura : *Proponit simpliciter quæstionem, & respondet absolutè, & sine distinctione, affirmativè, cum potius distinguendum esset de decreto absoluto & conditionato.*

XX. At, ut videatur, quàm immeritò Lullus in hac quæstione taxetur, reflectenda est tota textûs continentia, quæ talis est : *quæst. 3. Utrum Deus ad preces proborum aliquid mutet de futuris ab ipso præscitis ? Quia legitur in sacra scriptura, quod Deus per Isaiam Prophetam mandavit Ezechiae Regi hæc verba : Dispone domui tuæ, quia morieris tu, & non vives : & propter Regis orationem & fletum legitur, Deum ipsum Regem à morbo. sanasse.* Solutio. *Secundum regulam de C. hoc, quod divina sapientia attingit in creatis, est æternum. Et immutabile secundum hoc, quod Deus habet in se, (quatenus scilicet est Dei idea, quæ est ipse Deus) & secundum hoc, quod ens creatum habet in se, est in tempore & variabile : & ideo, quia inter Deum & hominem justum, est magna concordantia, ut significatum est per diffinitionem medii, Deus refluit homini justo finem præfatum in respectu subjeçti, quod variabile est, quoniam, sicut radius solis facit in camera figuram quadratam, si fenestra per quam intrat est quadrata, aut circulum, si fenestra est circularis, & triangularem, si est triangularis : ita à simili, Deus secundum quod habet vicinitatem per orationem cum homine justo, influit & refluit ei respectu dispositionis subjeçti ; unde propter hoc teneo de quæstione affirmativam ; & non sequitur, quod Deus sit variabilis in se, sed hoc, quod recipitur ab ipso in hac vita, est variabile, cum subjeçtum sit in motu, & in successione temporis.*

XXI. Ex huiusmodi textûs consideratione clarè apparet indebitè fuisse taxatam Lulli responzionem ; & quidem, quamvis Lullus expressisset se loqui de decreto conditionato : non-ne simili modo potuisset aliquis insurgere, ipsum non distinguere inter decretum sub-

jectivè conditionatum, quod meritò ab omnibus Deo negatur, & decretum objectivè conditionatum? Deinde non est necesse in propositione quæstionis distinguere inter præscita secundum decretum absolutum, vel conditionatum, & consequenter neque in solutione quæstionis; quia quæstio non reddit sensum omninò generalem, videlicet an mutet Deus omnia futura præscita, sed reddit sensum particularem, videlicet an mutet aliquod ex futuris à seipso præscitis; & cum, tam absolutè, quàm conditionatè futura, dicantur futura à Deo præscita: ut rectè affirmativè absolutè respondeatur, sufficit, quòd aliquod ex hujusmodi præscitis mutet Deus, quamvis non explicetur, usque ad ulteriorem indaginem, quodnam sit illud futurum præscitum, quod mutat; sicut, dum quæritur an aliquod futurum à Deo præscitum sit liberum, ut rectè respondeatur absolutè affirmativè, sufficit unum actum liberum à Deo sciri, quamvis non explicetur, absque ulteriori indagine, distinctivè ab actu necessario.

XXII. Præterea notandum est, expressè proponi quæstionem occasione casus, qui Ezechiae contigit, ac consequenter quæstionem determinari ad hunc & similes casus, qui in Scriptura occurrunt; mors enim Ezechiae & alia similia dicuntur futura præscita; & cum in scriptura non exprimatur, an sint absolutè vel conditionatè futura, neque necesse erat, quòd hoc exprimeret Lullus, cum utròvis modò sint futura, rectè dicantur præscita; quia tamen agitur de futuro tantum conditionatè, implicitè & sufficienter intelligitur agi de conditionatè futuro; nec est necesse, quòd fiat distinctio futuri sub his terminis *absolutè*, & *conditionatè*, cum pluribus Antiquis, vel fuerint ignoti isti termini, vel non fuerint in usu, sed tantum distinguebant inter futura secundum causas inferiores, tum naturales, tum morales: Unde, cum Lullus, nedum in propositione quæstionis limitet ad hujusmodi casus, sed etiam in ejus solutione expressè distinguat inter futurum secundum quod Deus habet in se, & secundum hoc quod ens creatum habet in se, juxta quod dicit variari influxum & refluxum Dei, prout variatur radius solis secundum figuram fenestæ: ideo responsio affirmativa determinatur in textu ad futura secundum causas inferiores, & nullò modò comprehendit futura secundum æternam Dei dispositionem.

XXIII. Expressius hoc idem exponit Lullus in *Introductoria Art. Demonst.* (tom. 3.) cap. 30. Ubi inter alias regulas de modo judicandi de rebus ita scribit: "Secunda Regula est, quòd prætermittitur, quòd deberet accidere *secundum causas medias*, propter

» *ordinem causæ superioris*, V. G. Ezechiae Regi Judæ dictum est ab
 » Isaiâ : morieris tu & non vives ; & egressus Isaiâs statim rediit ex
 » præcepto Domini , & dixit illi , quod non morietur ; sed primum
 » erat verum secundum dispositionem causarum naturalium ; secun-
 » dum erat verum secundum supernaturalem dispositionem Dei....
 » Unde non solum respiciendum est ad dispositionem superiorum
 » sed etiam supremi ». Sensus Lulli hic & in quæstione notata est ,
 mortem Ezechiae fuisse præscitam futuram secundum dispositionem
 morbi , non autem futuram secundum supremam Dei dispositionem ,
 & propterea ad preces Ezechiae mutavit illud præscitum futurum se-
 cundum causas naturales, quin mutatum fuerit æternum Dei consilium.

XXIV. Huc alludit dictum Divi Gregorii à Glossa ordinaria ad
 cap. 38. Isai. adductum : « Deus etiam , secundum quod Gregorius
 » dicit , sententiam mutat , sed non consilium. Sententiam debemus
 » intelligere , sensum verborum ; consilium verò ab æterna dispo-
 » sitione est. Sententiam verò servis suis Deus revelaverat , non ta-
 » men consilium , sed ut eorum comminationibus poenitentiam incu-
 » teret populis suis , & sic eorum misereretur. Cum enim Isaiâs sim-
 » pliciter diceret : morieris , & non vives ; & Jonas : Ninive sub-
 » vertetur , & ista non essent futura , non videntur esse in Libro
 » Dei , quæ non erant futura. Sed sciendum est , quod Deus duo-
 » bus modis aliquas res considerat : *secundum merita & secundum rei*
 » *naturam* (quæ dicuntur causæ inferiores) & *secundum suum consi-*
 » *lium*. Unde Ezechiam moriturum Deus præviderat secundum me-
 » ritum , vel secundum physicam , licet non futurum & non mori-
 » turum secundum consilium suum : Utrumque igitur scriptum erat
 » in Libro Vitæ , sed alterum suo. Prophetæ permisit legendum ; al-
 » terum verò non permissum est ». Sanè conformiter ad sensum ,
 imò quasi ad verba Lulli , resolvitur hæc quæstio in Glossâ ; notan-
 dum est autem , quod nulla fit expressio Decreti absoluti , nec condi-
 tionati , sed tantum fit distinctio unius futuri ab alio , prout etiam
 explicat ipse Lullus. Ad idem pertinet illa Divi Hieronimi , lib. 3.
 comm. in cap. 18. Matthæi sententia super illa verba : *Sic & Pater*
meus Cælestis faciet vobis si non remiseritis unusquisque fratri suo de
cordibus vestris , dum dicit : *Farmidolosa sententia ; si juxta nostram*
mentem sententia Dei flectitur atque mutatur : si parva fratribus non di-
mittimus , magna nobis à Deo non dimittentur.

XXV. Præterea de hoc eodem tractat Divus Thomas , par. 1. q.
 19. art. 7. & ad 2. sic scribit : « Utrumque eorum vult Deus , sci-

„ licet, quòd aliquid quandoque fit futurum secundum causam su-
 „ periores, vel è conversò. Sic ergo dicendum est quòd Deus ali-
 „ quando pronuntiat aliquid futurum secundum quod continetur in
 „ ordine causarum inferiorum, utputa secundum dispositionem na-
 „ turæ, vel meritorum; quod tamen non fit, quia aliter est in causa
 „ superiori divina, sicut, cùm prædixit Ezechix, dispone Domui
 „ tuæ, quia morieris & non vives, ut habetur Esaïæ 38. Neque ta-
 „ men ita evenit, quia ab æterno aliter fuit in scientia & voluntate
 „ divina, quæ immobilis est: propter quod dicit Gregorius, quòd
 „ Deus immutat sententiam naturæ, non tamen mutat consilium,
 „ scilicet voluntatis suæ. Pariter ipse Divus Thomas 2. 2. q. 171.
 art. 6. ad 2. utraque futura distinguit dicens: „ Quod divina præf-
 „ scientia respicit futura secundum duo, scilicet secundum quod sunt
 „ in seipsis, in quantum scilicet ea præsentia intuetur; & secun-
 „ dùm quod sunt in suis causis; in quantum scilicet videt ordinem
 „ causarum ad effectus: „ & ad hujusmodi genus futuri præsciti re-
 ducit illud dictum Ezechix: *Morieris tu & non vives*; & quia sic in-
 telligebatur, & *ejus revelatio prophetica est impressa quædam simili-
 tudo divinæ præscientiæ, prout scilicet cognoscit ordinem causarum ad
 effectus*, ideo aliter potuit evenire, prout de facto evenit. In his au-
 tem locis eòdem sensu, quò Lullus, loquitur Divus Thomas, quin
 exprimat decretum absolutum & conditionatum.

XXVI. Porro, quòd futura secundum divinam dispositionem, sive
 talia sint etiam secundum causas inferiores, sive non, non muten-
 tur sed infallibiliter eveniant, prout à Deo præsciuntur, non unò
 tantum locò, sed sæpè asseritur à Lullo, ut, exempli gratiâ, in lib.
Quæst. super librum sent. q. 27. & 30. attribuit Deò infallibilem fu-
 turorum, adhuc contingentium, præscientiam; q. 31. asserit, Deum
 non posse non præscire id quod præscit; quæst. 33. docet quòd præf-
 scientia Dei est infallibilis & immutabilis in hoc, quod scit de ho-
 ne prædestinato, licet iste non necessitate, sed cum liberate, salve-
 tur. Similiter, Lib. *de Deo & Jesu-Christo*, par. 1. q. 7. num. 8. ait:
*Et scire Dei, quod habuit de Juda, est Deus & idea æterna, quæ idea
 est immutabilis.* Etiam in lib. *de Artic. damnatis*, ad Artic. 21. docet
 infallibiliter futurum illud, quod Deus scit; ad Artic. 60. docet,
 quòd Deus est causa inimpedibilis: atque ita patet, sensum Lulli
 esse quòd futura à Deo præscita, secundum ejus supremam dispo-
 sitionem, non aliter eveniunt, ac præsciuntur; quæ autem talia
 sunt tantum, quoad causas inferiores, prout Deo placet, mutan-

tur; cùmque in hoc rectam amplectatur sententiam, indebitè calumniatur ejus Doctrina.

§. III.

In Prop. 3. ex quæst. 4. docet Lullus, quòd homo non eligit malum per liberum arbitrium, ratione perfectionis, quam habet per creationem, sed ratione defectûs, quem habet, prout ex nihilo est ortum.

XXVII. Ad quæst. 4. hæc verba à Censore notantur: *Homo eligit alium terminum oppositum Deo, id est peccatum, per suam liberam voluntatem, non tamen per liberum arbitrium creatum, sed per hoc, in quo homo dependet, in quantum est de nihilo productus.* Et mox: *Homo existens in libero arbitrio potest eligere bonum per liberum arbitrium creatum; & malum, per liberum arbitrium, quod non est creatum.* Quæst. 4. Censura hîc non exprimitur; at ex verbis notatis, duo videntur difficultatem ingerere: *Primum* est, quòd homo eligat peccatum per suam liberam voluntatem, non tamen per liberum arbitrium creatum, sed per hoc quòd homo à nihilo dependet, de quo est productus. *Secundum* est quòd in homine detur liberum arbitrium, quod non est creatum, per quod eligit malum; & liberum arbitrium creatum, per quod eligit bonum.

XXVIII. Ut autem sensus Lulli percipiatur considerandus est textus hujus quæstionis, qui ita scribitur: *Quæst. 4. Utrùm omne ens sit similitudo Dei, sicut (id est, verbi gratiâ) minoritas, quæ est substantialis, & contrarietas, quæ est accidentalis? Et si dicatur, quòd sic, in quantum sunt entia: quæro, utrum in quantum talia entia? Et si dicatur, quod non: Quæro, qualiter habuerunt esse? Cùm dissimilitudo Dei & non ens habeant concordantiam.* Ad hanc quæstionem respondet Lullus, num. 1. quòd quia Deus creavit mundum ad hoc, ut recoleretur, intelligeretur, & amaretur ab Angelis, & hominibus; & quia isti possunt meliùs recolere, intelligere & amare Deum cum ejus similitudinibus, & dissimilitudinibus, quàm cum similitudinibus tantùm, ideo Deus, nedùm creavit in mundo similitudines, ut bonitates, magnitudines, &c. sed etiam dissimilitudines, ut minoritates, contrarietates naturales, &c. & postea ita subjungit: „ Peccatum autem non creavit, cùm sit malum; & Deus sine bonitate, quæ opposita est peccato, agere, vel creare, aliquid non potest, cùm ipse & sua bonitas sint idem numero. „

XXIX. Transit, num. 2. ad exponendum, quomodo peccatum habet esse, & scribit: « At quomodo peccatum habeat esse in sub-
 „ jecto creato? Hic esset longus sermo; sed ego breviabo, quantum
 „ potero. Dicitur in nona regula (scilicet Artis Lullianæ) quod sub-
 „ stantia transmittit extra se suam similitudinem, & hoc apparet in
 „ planta, quæ generat aliam plantam de suo genere & de se ipsa,
 „ & sic de aliis generabilibus, & hoc idem est de accidentibus (in
 „ manuscripto, *de accidentalibus*) sicut ignis, qui transmittit suam
 „ similitudinem, scilicet suam caliditatem, in aquam calefactam, &
 „ suum colorem in cameram lucefactam, & hoc per medium, ut fig-
 „ nificatum est in definitione medii, quando dicitur, quod medium
 „ est subiectum finis, & principii per influxum & refluxum, & sa-
 „ pit naturam utriusque: Unde suppositò quod medium esset contra
 „ suum principium & suum finem, & esset contra naturam eorum,
 „ & mutaretur in aliud genus (sic corrigenda editio Panormitana)
 „ per tale medium nunquam planta posset producere plantam, neque
 „ subiectum (in aliis, *neque substantia*) suam similitudinem, sed bene
 „ posset contra naturam suam, & naturam principii & finis trans-
 „ mittere suam dissimilitudinem, ratione varietatis medii: sicut na-
 „ tura quæ in inferioribus transmittit monstruositatem contra suum
 „ finem & principium, sicut sextum digitum in manu, & surditatem
 „ in puero, & sic de aliis. »

Text.
 Prop. 3.

XXX. Continuat immediatè sic: *A simili, & multò magis, homo*
causat peccatum in semetipso, convertens se contra suum principium &
finem, qui est Deus; & hoc deviando se à termino, ad quem creatus est,
dum eligit alium terminum oppositum per suam liberam voluntatem, non
tamen per liberum arbitrium creatum (id est, non ratione perfectionis
liberi arbitrii, quæ in ipso est creata) sed per hoc à quo homo depen-
det (alibi, descendit) in quantum est de nihilo productus, quoniam prop-
ter hoc habet libertatem ad causandum peccatum in subiecto, cum pecca-
tum sit nihil in se, sicut, si Deus removeret (sic corrigenda est editio
Panormitana) hoc, quod posuit in homine per creationem, homo de se,
& per hoc, quod per se habet, sic reverteretur in nihilum, sicut lapis,
qui per suam ponderositatem in aëre descendit in suum centrum. Et ita homo
sic existens in libero arbitrio potest eligere bonum per liberum arbitrium
(in alia editione additur creatum) quod habet per se tantum, quod non
est creatum ad malum (in Manusc. ita habetur: potest eligere bonum per
liberum arbitrium creatum, & malum per liberum arbitrium, quod habet
per se tantum, quod non est creatum ad malum) & de ista dissimilitudine

(melius in Manusc. & de ista distinctione) dictum est in arbore humana , quæ est una pars arboris scientiæ.

XXXI. Tandem concludit Lullus : « Ostenſum eſt ergo , quomodo in ſubjecto oritur peccatum , quod eſt adeo diſſimile Deo , quodd nullam entitatem realiter (*realem* in Manusc.) habet , ut non habeat aliquam ſimilitudinem Dei , quia ſi haberet , jam eſſet bonum , in quantum illam haberet ſimilitudinem , ſed eſt ita diſſimile Deo , quodd magis illi diſſimile eſſe non poteſt ; & Deus permittit ipſum peccatum eſſe , ut magis per ipſum poſſit cognoſci , recoſi , & diligere ab Angelis & hominibus ; quoniam hæc eſt (ſic videtur corrigenda editio Panormitana) magna cognitio diviniæ bonitatis , magnitudinis , poteſtatis , & aliorum attributorum , quodd Deus ſciverit peccatum eſſe futurum in ſubjecto creato ; & ipſe creaverit ſubjectum tali modo , quodd innocens eſt à peccato , ut ſupra ſignificatum eſt ; & ſi non creaviſſet ſubjectum peccati , ſcilicet hominem , aut Angelum , ut peccatum non eſſet futurum , eſſet ligata divina poteſtas & ſua voluntas , & ſic de ſua bonitate , & de aliis ſuis attributis ; quod eſt impoſſibile , & contra infinitam poteſtatem diviniæ bonitatis , voluntatis , &c. Creavit ergo Deus Angelos & homines , & ſcivit ſibi cavere à cauſa peccati , & facere ſe innocentem. »

XXXII. Antequam ad principalem deveniam difficultatem , notandum eſt , nullam jam eſſe circa verba notata , num. 27. quibus videtur , Lullum aſſerere quod in homine eſt liberum arbitrium , quod non eſt creatum , dum ibi dicitur , quodd poteſt eligere malum *per liberum arbitrium , quod non eſt creatum* : nam , ut vidimus , non ita ſcribitur , in textu Lulli , ſed *per liberum arbitrium quod non eſt creatum ad malum* , atque ita , vel æquivocationem paſſus eſt Cenſor in notandis Lulli verbis , vel qui ex Cenſore verba deſcripſit , ac proinde jam non eſt locus cogitandi Lullum adſtruere in homine duo libera arbitria , unum creatum per quod eligit bonum ; & aliud non creatum per quod eligit malum , ſed unum tantum ponere liberum arbitrium & liberam voluntatem.

XXXIII. Nunc , ergo reflectendo relatum textum conſtat , ſcopum Lulli , juxta propoſitam quæſtionem , eſſe , quodd , licet Deus cauſaverit in mundo diſſimilitudines vel defectus naturales , non tamen creavit peccatum ; quia licet creaverit hominem eiſue dederit liberam voluntatem , per quam homo peccat , non propterea Deus creat & cauſat peccatum : imò ex hoc oſtenditur magna ſapientia , & bo-

nitas Dei, quòd creaverit hominem, præsciendo ipsum esse peccatum, quin tamen peccatum causaverit; modus autem, quòd Lullus hoc ostendit, quoad substantiam, est idem ac ab omnibus explicatur; nam supponens, quod quælibet substantia per se tendit ad transmittendam suam similitudinem, & tamen aliquando hoc non fit, quia medium, per quod deberet transmittere, est contrarium suo principio, & suo fini: ita homo, qui debet agere juxta perfectiones sibi à Deo collatas, ut in Deum tamquam ad suum finem tendat, se deviat ab illo fine, & facit actus devios, non solum à fine ad quem est creatus, sed etiam contrarios perfectionibus sibi à Deo inditis: istæ enim creatæ hominis perfectiones, per se & ex vi divinæ ordinationis tantum sunt ad bonum, homo autem, quia à nihilo venit, & ad nihilum tendit, easdem perfectiones deviat ac deflectit; eisque abutitur & agit malum, ad quod agendum non sunt creatæ; imò ex ordine suæ creationis tantum sunt ad bonum.

XXXIV. Itaque in verbis relatis, num. 30. dicit, quòd homo causat peccatum in semetipso, convertens se contra Deum, qui est suum principium & finis; & hoc deviendo se à termino ad quem creatus est, hoc est deviendo se à bono, quia creatus est ad agendum bonum in Dei obsequium; dum eligit terminum oppositum per suam liberam voluntatem; id est, eligendo malum per liberam voluntatem, quatenus ex libera sua voluntate habet facultatem eligendi bonum, vel malum; dum autem in hac integra clausula dicit: *dum eligit terminum oppositum* (hoc est malum) *per suam liberam voluntatem, non tamen per liberum arbitrium creatum, sed per hoc à quo homo dependet, in quantum est de nihilo productus, quoniam propter hoc habet libertatem ad causandum peccatum in subiecto, cum peccatum sit nihil in se:* (quam integram clausulam non examinavit debitâ reflexione laudatus Censor) apertè distinguit, non duplex liberum arbitrium, sed duplicem ipsius considerationem: *Prima*, quatenus est creatum, & secundum perfectionem, quam importat vi creationis; *alia est*, quatenus venit & est productum de nihilo. Liberum arbitrium seu libera voluntas potest facere peccatum quatenus venit à nihilo, & ad nihilum se inclinat, cum peccatum nihil sit; at quatenus est à Deo creatum, & secundum perfectionem quam habet vi creationis, ac ordinationem quam ei indidit Deus, non potest facere peccatum, quia tota ejus creata perfectio ad bonum tendit, & ordinatur.

XXXV. Adeoque, cum homo ejusque libera voluntas, seu liberum arbitrium, sit ex nihilo, & propter hoc possit peccatum facere, homo,

homo, ut ait Lullus, eligit peccatum per suam liberam voluntatem, non tamen hoc facit per liberum arbitrium creatum, id est, quatenus est creatum, vel vi & ordinatione suæ creationis, vel ob suam perfectionem à Deo per creationem impertitam, quia sic unice tendit ad bonum; sed per hoc, à quo homo dependet, in quantum est de nihilo productus, id est, sed per hoc quod est defectivus, qualis est, eò quia est de nihilo, cum sic ad nihilum, quale est peccatum, tendat & inclinatur. Hunc sensum magis ostendit exemplum à Lullo propositum, quia, sicut lapis ob suam ponderositatem tendit in centrum, ita homo, ablato eò quod habet à Deo per creationem, reverteretur ad nihilum, atque adeo ejus tendentia in nihilum, quale est peccatum, non est per id, quod habet per creationem, vel non peccat per creatam perfectionem, sed per defectum annexum, quatenus ex nihilo est productus.

XXXVI. Unde subinfert, ut aptius explicatur in Manuscripto, quod homo sic existens in libero arbitrio, id est, ita habens liberum arbitrium, quod ipsum & tota ejus perfectio sit à Deo creatum ad bonum, utpote ordinatum ad ipsum Deum; quia est ex nihilo, & propterea ad nihilum tendit & inclinatur, *potest eligere bonum per liberum arbitrium creatum*, id est, quatenus est quædam à Deo creata perfectio, quia est creatum ad bonum tantum, & in vi creationis unice ad ipsum se habet; & *malum potest eligere per liberum arbitrium, quod habet per se tantum, quod non est creatum ad malum*, id est, per liberum arbitrium ut defectuosum & inclinatum ad nihilum, quatenus ex nihilo est; & quia hæc tortuositas & defectus liberi arbitrii non venit à Deo, sed est in homine occasione suimet, eò quia creatura necessariò est ex nihilo: ideo illud liberum arbitrium sic defectuosum homo habet *per se tantum*, & non à Deo; & illud liberum arbitrium *non est creatum ad malum*, quia Deus unice illud creat ad bonum; & propterea per ipsum quod creatum homo non eligit malum, sed tantum per ipsum quod ex nihilo ortum, & ad nihilum vergens: atque adeo tota quæstionis difficultas solvitur ex distinctione liberi arbitrii, quatenus perfecti ex vi creationis, & quatenus defectuosi ex vi ejus dependentiæ à nihilo.

XXXVII. Tota hæc doctrina clariùs patet ex lib. *Arbor scientiæ*, ad quem provocat in textu notato, non quidem in *Arbore Humanali* ut per errorem videtur ibi notari, quia in hac Arbore tantum leviter attingit hanc materiam, sed in *Arb. imperiali*; nam ibi in *Ramis*, tit. *de libertate principis*, ita num. 1. scribit: « Libertas est forma intel-

„ lectualis data homini, ut liberè bonum faciat, & liberè malum evi-
 „ tet; quoniam bonum est ita nobile, quòd de ejus nobilitate est,
 „ ut liberè fiat, & non coactè; & vitium & peccatum, est tantum
 „ malum & vile, quod sibi non convenit quòd coactè sit deamatum:
 „ Et ideo data est libertas voluntati hominis ad faciendum bonum,
 „ & vitandum malum . . . & quoniam homo libertatem habet ad
 „ faciendum bonum, & ad vitandum malum, si bonum faciat & ma-
 „ lum evitet, habet meritum, ratione cujus majus bonum assequitur,
 „ quàm bonum quod fecit; & si faciat malum, & evitet bonum,
 „ habet culpam, ratione cujus consequitur majus malum, & perdit
 „ majus bonum, quam bonum quod facere noluit: & in hoc passu
 „ significatur alia vita cum magnitudine justitiæ Dei. Deus homini
 „ libertatem non dedit, ut malum faciat, cum ita sit, quòd ei liber-
 „ tatem dedit, ut bonum faciat & malum evitet; & si Deus homini
 „ libertatem dedit, ut malum facere posset, libertatem creavisset
 „ contra libertatem, & creavisset duas potestates, unam bonam,
 „ & aliam malam, & duas libertates, unam bonam, & aliam malam;
 „ quòd est impossibile, quòd Deus sit creator mali, & quòd una li-
 „ bertas in uno subjecto sit contra aliam, cujus libertates sint partes
 „ intellectuales, quoniam jam forent formæ necessariæ secundum cur-
 „ sum naturalem . . . & ratio, quare homo libertatem habet ad
 „ malum, est hæc, quia tenet sive habet de natura, de qua est, vi-
 „ delicet de non esse, & quia peccatum originale est. Unde sic habet
 „ libertatem faciendi malum ratione naturæ sibi appropriatæ, quæ
 „ est ex parte nihili, quod est suum centrum, ad quod cum peccato
 „ descendit liberè, sicut lapis, qui ad centrum cum ponderositate
 „ descendit, quam quidem ponderositatem ei suum centrum appro-
 „ priavit, ut possit esse centrum illius, & quòd lapis possit in illo
 „ quiescere. Et in hoc passu datur cognitio, cum qua possunt cognosci
 „ principia libertatis, quam homines habent ad faciendum malum,
 „ quæ libertas est privatio libertatis, quâ homines uti volunt, faciendo
 „ bonum (id est, dum faciunt bonum) & evitando malum. Et iste
 „ passus est valde utilis, & subtilis ad sciendum. „

XXXVIII. Consonat sibi Lullus in aliis locis, nam in Lib. Sent.
 q. 68. num. 1. docet, quòd liberum arbitrium per se est instrumen-
 tum, *per quod homo potest eligere bonum, & evitare malum*, & tan-
 tum per accidens anima ad honestum vel inhonestum habet liberum
 arbitrium. In Libro Proverb. (tom. 6.) par. 1. cap. 14. à num. 13.
 ita scribit: „ Libertas, quam homines habent in faciendo bonum,

„ est similis libertati bonitatis Dei. Si libertas, quam homines ha-
 „ bent in potestate faciendi malum, esset similis libertati potestatis
 „ Dei, una eadem potestas esset subiectum concordantiæ bonæ &
 „ mæ libertatis. Nulla mala libertas est creata. Si aliqua mala liber-
 „ tas esset creata, Deus creavisset creaturam contra suam bonitatem
 „ & libertatem. Nulla causa scienter producit suum effectum contra
 „ seipsam. Pariter in libro *de homine* distinctione 2. par. 2. in *quæ-*
 „ *sitione*, de quo est peccatum? Scribit: „ In peccato non est aliqua fi-
 „ militudo Dei, nam, si esset, esset aliquod bonum in ipso, cum
 „ omnis similitudo Dei sit bona, & omne peccatum sit malum: igitur
 „ peccatum non est de aliqua re, quam Deus creavit, hoc est de
 „ essentia & natura creaturæ: Ergo peccatum est de alio, quod non
 „ est creatura, & illud est nihil, de quo homo creatus est, ad quod
 „ homo, qui facit peccatum, se inclinat, cum peccatum sit contra
 „ esse, & habeat concordantiam cum non esse. Similiter in libro
 „ *de anima rationali* (tom. 6.) part. 3. specie 1. postquam q. 1. re-
 „ solvit, quod libertas animæ non est ei occasio peccandi, quia est
 „ creata à Deo, cui peccatum est contrarium, inquit postea: *Cum*
 „ *homo habeat libertatem peccandi, & homo sit de anima & de corpore,*
 „ *quæ sunt creaturæ: de quo est libertas peccandi, quam habet?* Et sic
 „ respondet: „ Homo est creatus ex nihilo, & in quantum est creatus
 „ ex nihilo, nisi Deus illum sustentaret, reverteretur ad hoc, de
 „ quo est: & homo habet libertatem habendi inclinationem ad esse,
 „ & ad non esse; & libertas, quam habet secundum esse, est crea-
 „ tura, & libertas, quam habet secundum inclinationem ipsius non
 „ esse, est inclinatio, quam habet ad peccatum quod illud faciat,
 „ nam peccatum nihil est aliud, nisi facere ea, quæ non debent fieri,
 „ per quæ devenitur ad non esse, & quæ nullam concordantiam ha-
 „ bent cum esse; & ideo illa libertas peccandi, quam homo habet,
 „ est de inclinatione, quam habet ad non esse, in quantum est crea-
 „ tus ex nihilo.

XXXIX. Non aliam Doctrinam, quam Lullus, tradit in hoc punc-
 to D. Bonaven. in 2. dist. 25. ar. 2. quæst. 3. *Utrum liberum arbitrium*
secundum quod liberum possit in malum? In cuius solutione ita scribit:
 „ Alio modo contingit loqui de libero arbitrio secundum quod repe-
 „ ritur in creatura, & sic est loqui de ipso dupliciter: aut in quan-
 „ tum liberum, aut in quantum deficiens. Si in quantum liberum,
 „ sic natum est exire in actum æquitatis susceptibilem, & æquitate
 „ informatum. Si autem loquamur de ipso in quantum deficiens, sic

„ liberum arbitrium, in quantum liberum arbitrium, potest & exit
 „ in actum deliberativum, quia deficiens exit in actum deformatum,
 „ & ita in malum. Sic ergo patet, quod liberum arbitrium secun-
 „ dum quod liberum est, habet objectum bonum, & exit in bonum,
 „ non in malum, sicut rationes ad secundam partem inductæ osten-
 „ dunt; nihilominus tamen, in quantum cum libertate habet defec-
 „ tibilitatem, potest in malum, ita quod malitia non est objectum
 „ liberi arbitrii, nec à libero arbitrio secundum quod liberum, sed
 „ secundum quod deficiens ». Et dist. 34. art. 1. q. 2. *Utrum ma-
 lum sit à bona causa, utpote à voluntate, ut efficiente, vel deficiente?*
 Resolvit cum D. August. quod peccatum est à voluntate ut deficien-
 te; & in hujus explicatione ait: *Naturalem defectum voco ipsam defec-
 tibilitatem, quæ inest voluntati, hoc ipso quod est ex nihilo; & infra: Unde
 non necessario sequitur, si alicubi sit defectus naturalis, quod ibi sit cul-
 pa; voluntas enim non hoc ipso peccat, quia est ex nihilo, sed hoc ipso
 quod est ex nihilo, potest deficere, hoc ipso quod voluntas est potestas
 potens servare rectitudinem justitiæ; hoc ipso vero quod voluntas est ex
 nihilo, potens est, quantum est de se, illam deferere; & ita defectus ille
 circa voluntatem reddit eam ad peccandum possibilem.* Ipse D. Bona-
 ven. ibidem, dist. 44. ar. 1. q. 1. resolvit, quod potentia peccandi,
 quantum ad defectibilitatem, non est à Deo, sed est in creatura ra-
 tionali, quia est ex nihilo; & D. Thomas in eadem dist. q. 1. resol-
 vit, quod potentia peccandi, quantum ad id quod potentiæ est, à Deo
 est, sed quantum ad defectum, qui implicatur, non est à Deo.

XL. Sanè tota hæc D. Bonavent. & D. Thomæ Doctrina coinci-
 dit cum Lulliana; dicit enim quod malum non est à libero arbitrio
 quâ tali, quod idem est, ac non esse ab ipso, quatenus à Deo crea-
 tum est, sed ab ipso ut defectivo; & defectivum est, quatenus est
 ex nihilo: quod est idipsum, quod dicit Lullius, esse per ipsum se-
 cundum quod ex nihilo est productum: & quidem tota hæc doctrina
 est D. August. passim, dum agit contra Manichæos, docens rationa-
 les creaturas esse defectibiles, quia ex nihilo sunt, non autem qua-
 tenus bonæ à Deo creatæ sunt: Unde, lib. *contra Epistolam funda-*
menti, cap. 38. postquam docuit, corruptionem naturarum non esse
 à Deo, sed ex eo quod de nihilo factæ sunt, subjungit: « Neque illud
 dixeris: non faceret Deus naturas corruptibiles, in quantum enim
 „ naturæ sunt, fecit Deus; in quantum autem corruptibiles, non
 „ Deus fecit. . . . Cum enim dicitur: *natura corruptibilis*, non unum
 „ sed duo nomina: Item, cum dicitur; Deus fecit ex nihilo, non

„ unum , sed duo nomina audivimus. Redde ergo istis singulis illa
 „ singula , ut cum audis *naturam* , ad Deum pertineat ; cum audis
 „ *corruptibilem* , ad nihilum „. Sub corruptibilitate autem compre-
 hendit potentiam peccandi in naturis rationalibus. Unde Berti Au-
 gustinianus, de Theolog. Discip. lib. 12. cap. 10. dicit : *Quod ergo*
possit voluntas ad malum flecti, id non habet ex intrinseca ratione liberta-
tis, sed conditione creaturæ defectibilis ; & lib. 16. cap. 2. Propos.
2. scribit : Pertinet ad libertatis essentiam posse agere & non agere, non
verò posse peccare : quod inest libertati creaturarum ob istarum imper-
fectionem.

XLI. Etiam hæc est Doctrina Divi Anselmi , lib. *de libero arbi-*
trio , cap. 1. ubi probat , quod *potestas peccandi non pertineat ad liber-*
tatem arbitrii : cap. 2. ait : *Per liberum arbitrium peccavit Apostata An-*
gelus , sive primus homo ; quia per suum arbitrium peccavit , quod sic
liberum erat , ut nullâ aliâ re cogi posset ad peccandum. . peccavit au-
 tem per arbitrium suum , quod erat liberum , sed non per hoc , unde li-
 berum erat , id est , per potestatem , quâ poterat non peccare , & pec-
 cato non servire , sed per potestatem , quam habebat , peccandi , quâ
 nec ad non peccandi libertatem juvabatur , nec ad peccandi servitutem
 cogeatur.

XLII. Planè , sicut Lullus in libero Arbitrio distinguit , quod est
 per creationem , & quod est ut ex nihilo descendens ; ita ut idem
 liberum arbitrium , quâ creatum eligat bonum , & quâ pendens à
 nihilo eligat malum , quia à Deo non est creatum ad malum , sed
 unicè ad bonum ; ita , tum D. August. tum D. Anselm. & D. Bona-
 ven. eandem duplicitatem in libero arbitrio agnoscunt , & ita ut ip-
 sum , per se & ut liberum arbitrium , non valeat ad malum , quod est
 idem ac dicere quod non potest malum eligere per id quod est crea-
 tum vel per id quod habet à Deo ; sed tantum per id quod habet
 de defectu , in quantum est ex nihilo , & ad nihilum inclinatur : Un-
 de , cum hæc sit eadem ac relata Lulli Doctrina , immeritò hæc taxa-
 tur , quoniam rectum explicat sensum , & eundem quem præfati
 Doctores , imò quem omnes Catholici , tenent.



D I S S E R T A T I O II.

De modò, quò divinæ dignitates habent suum actum in generatione
& spiratione, quoad Proposit. 4, 10 & 11, ex q. 5 & 44.

§. I.

In Proposit. 4. ex quæst. 5. rectè docet Lullus, quòd in generatione,
& spiratione est actus omnium Dei dignitatum; & quòd Pater gene-
rando bonificat, magnificat, &c. Filium; & Pater, & Filius spi-
rando bonificant, magnificant, &c. Spiritum Sanctum.

I. **V**ERBA, quæ quartò locò in Lullo notantur, sunt ista: Pa-
ter de sua bonitate generat Filium in bonificando, & generan-
do, ut Filius sit bonus, & ipsamet bonitas, cum sit genitus de tota
ipsa; Et mox: Pater & Filius spirant Spiritum Sanctum, & ad hoc
concurrunt æqualitèr omnes dignitates (id est attributa) ut Spiritus
Sanctus sit bonus per bonificare, magnus per magnificare, æternus per
æternificare, & sic de aliis attributis dignitatum; alioquin dignitates es-
sent in illa spiratione otiosæ, quod est impossibile. Concluditur ergo,
quòd Pater spirat Spiritum Sanctum cum bonificare, magnificare, &c.
Quæst. 5.

II. Quid displicuerit huic Cenfori in hujusmodi verbis non video,
nam certum est, Patrem generare Filium de sua bonitate & de tota
ipsa bonitate, ut Filius sit bonus, & sit, ob infinitatem nature, ipse-
met bonitas. Etiam Spiritus Sanctus producit bonus & de bonita-
te, ut sit bonus, non enim esset bonus nisi de bonitate produceretur;
Unde, cum Pater generando Filium, sicut naturam & essentiam, ut
omnes suas perfectiones illi communicet, ideo producit illum bonum,
magnum, æternum, &c. & sic bonificat illum, id est, producit illum bo-
num; magnificat illum, æternificat illum, &c. ista enim verba nihil aliud
significant nisi producere in ratione perfectionis, cui attribuuntur:
atque adeò Pater generat Filium in bonificando, magnificando, &c.
& dicitur quòd Pater generat Filium in bonificando & generando,
ut clarius intelligatur, quòd ille actus bonificandi est ipsemet actus
generandi; & sicut, nisi Pater de sua Deitate generaret Filium,

Filius non esset Deus, ita nisi illum generaret de sua bonitate, ille non esset bonus; & sicut Pater illum generat de sua Deitate, ut ille sit Deus & Deitas, ita illum generat de sua bonitate, ut ille sit bonus & bonitas; & quia Pater bonus generat Filium, generando illum bonificat, hoc est producit bonum.

III. Hoc idem intelligitur in spiratione Spiritus Sancti; cum enim Pater & Filius spirando, illum producant bonum, magnum, & sic de cæteris dignitatibus, omnes dignitates concurrunt ad ejus spirationem, non tamquam Personæ producentes, sed tamquam rationes, ob quas Spiritus Sanctus producit in linea uniuscujusque, V. G. bonitas est ratio cur Pater & Filius producant Spiritum Sanctum bonum; magnitudo est ratio, cur producant ipsum magnum, &c. & ita Spiritus Sanctus est bonus per bonificare; id est, per actum quò producit bonus, magnus per magnificare, id est, per actum quò producit magnus, &c. : Atque ita Pater & Filius spirant Spiritum Sanctum cum bonificare, magnificare, &c. quia spiratio cum qua spirant, cum sit actus quò ipse producit bonus, magnus, &c. est bonificare, magnificare, &c. seu est actus producendi bonum, magnum, &c. Quia verò est necesse, quòd Pater generando Filium illum producat bonum, magnum & sic de cæteris divinis dignitatibus, & quòd Pater & Filius, spirando Spiritum Sanctum, illum producant bonum, magnum, &c. ipsæ dignitates, tum in generatione, tum in spiratione, non possunt esse otiosæ, quia nequit esse divina productio, quin sit productio boni, magni, &c. quòd idem est ac bonificare, magnificare, &c. : Ideo tam generare, quàm spirare est per bonificare, magnificare, &c.

IV. Si fortè tamen hic Censor offensus fuit illis verbis, *bonificare, magnificare, &c.* dum dicitur Patrem bonificare, magnificare, &c. Filium, & Spiritum Sanctum, tom. 2. cap. 2 & 4. ostensum est quàm appositè utatur Lullus prædictis verbis ad exprimendum breviter & distinctè actum, quò Pater bonus Filium producit bonum, quò Pater magnus Filium producit magnum, &c. & hoc idem sufficienter declaratur in textu notato, dum dicitur quòd Pater generando bonificat Filium, ut Filius sit bonus; & quòd Pater & Filius spirando bonificant, magnificant, &c. Spiritum Sanctum, ut Spiritus Sanctus sit bonus, magnus: Unde, sicut Christus, Joan. 10. 36. de seipso dicit: *Quem Pater sanctificavit*, ut ostenderet se naturalem esse & proprium Dei Patris Filium & Deum, quia Pater sanctus generando sanctificavit ipsum, producendo eundem sanctum de sua sanctitate,

ut exponunt Patres ad hunc locum, ita, cum Pater bonus, magnus, æternus, &c. producat de sua bonitate, magnitudine, æternitate, &c. Filium bonum, magnum, æternum, &c. illum generando bonificat, magnificat, æternificat, &c. & hoc idem, proportionem servatâ, est de Spiritu Sancto quoad suam spirationem. Nec mirum, quod Lullus efformaverit prædicta verba ad dilucidè & breviter exprimendum suum sensum, ut sæpè occurrit in Autoribus adhuc sacris; & præter adducta loci citatò, nunc occurrit Divus Aug. qui efformat Verbum *intellectuare* ad instar Verbi *illuminare*, Sermon. 18. in Psal. 118. ubi, num. 4. ait: „Sed ita dicitur (Angelus) intellectum dare homini, & quasi, ut ita dicam, *intellectuare* hominem; quemadmodum quisquam dicitur lucem dare domui, vel *illuminare* domum, cui fenestram facit.”

V. Ut autem clariùs percipiatur Lulli sensus, integrum expono textum qui sic habetur: *Quæstio quinta, an sicut dicimus (sic corrigenda videtur editio Panormitana) bonitas, magnitudo, &c. in Deo sunt idem numerò, sic possimus dicere: personalitas, bonitas, &c. sunt idem numero? Similiter: utrùm bonificare, magnificare & diligere sint idem numerò; & an Pater & Filius per diligere spirent Spiritum Sanctum, personam aliam à Filio, & non per bonificare magnificare, &c.?* Ex tribus, quæ hîc inquiruntur, ad primum ostendit Lullus, quod bonitas, magnitudo & cætera Dei attributa sunt idem numerò; & eodè modò quod personalitas, bonitas, &c. sunt etiam idem numerò: & quod bonificare, magnificare, &c. sunt idem numerò: ad quæ clariùs explicanda subjungit: „Sed hîc oportet recurrere ad regulas C. D. E. (sunt regulæ artis Lullianæ, secundùm quam petiit ipse Magister Thomas solvi has quæstiones ab ipso propositas) & considerare sic: Bonitas Dei, & sic de magnitudine & aliis, secundùm primam speciem regulæ de C. & secundùm suam diffinitionem, est id ratione cujus bonum agit bonum; & per secundam speciem ipsius regulæ C. habet in se coëssentiale & substantiale bonificabile, & bonificare; & ideo bonificare per secundam speciem regulæ D. est de bonificante & bonificabili, & hoc in generatione & spiratione per regulam E. ut divina bonitas per tertiam speciem regulæ C. sit in alio, hoc est Pater in Filio: *Itaque Pater de sua bonitate generat Filium in bonificando & generando, ut Filius sit bonus, & sit ipsamet bonitas, cum sit genitus de tota ipsa.*”

VI. Per allata verba facilè potest intelligi quod, cum bonitas divina sit id, ratione cujus bonum agit bonum, ut supponit Lullus ex sua

sua arte , consequenter requirit activum , passivum , & actum de sua linea, & ideo est in ipsa bonificativum, bonificabile, & bonificare (his enim vocibus breviter & distinctè exprimuntur) atque ita per bonificare nihil aliud intelligitur , quàm agere bonum , seu actus quò activus in ratione bonitatis agit in suum passivum in eadem ratione , & consequenter bonificare est de utroque , & quia divina bonitas est ipsamet essentia Dei , & ad eundem finem se habet , ideo tam in generatione quàm in spiratione requirit , quòd sit suum bonificare : Adeoque Pater in generando bonificat Filium , hoc est ipsum agit bonum. Hòc positò , subjungit. : “ Unde sequitur quòd bonificare sit de bonificante & bonificabili formaliter , & quòd ratione finis sit personale , ita quòd est Pater , & est Filius essentialiter , sed unum est in Patre ut Pater , & aliud in Filio ut Filius , & hoc ratione relationis & distinctionis Patris & Filii : sicut essentia divina , quæ sub una ratione est Pater , & sub alia ratione est Filius , & sub alia ratione Spiritus Sanctus , ipsa permanente indivisa ”. Hæc scribit Lullus , quia , cùm bonitati , quæ est essentialis Dei perfectio , per se conveniant activus , passivus , & actus , sicut ipsa est essentialis Dei perfectio , ita ad essentiam Dei spectant hæc sua essentialia correlativa ; & sicut una est essentialiter bonitas in Patre & Filio , ita unum est in ipsis essentialiter bonificare ; & sicut divina essentia , adeoque divina bonitas , sub una ratione est Pater , sub alia Filius , & sub alia Spiritus Sanctus : ita bonificare essentialiter sub una ratione est Pater , & sub alia est Filius , & sub alia Spiritus Sanctus ; atque ita bonificare formaliter & essentialiter est de bonificante & bonificabili essentialiter sumptis , & ratione finis , id est , ratione finis ad quem se habet divina essentia cum omnibus attributis & correlativis essentialibus , qui finis est productio unius Personæ ab alia , ipsum bonificare est personale , quatenus cum ipso bonificare una Persona producit aliam , & sic sub diversa ratione est omnes Personæ ; & quia productio personarum est per generationem , & spirationem , ideo , ut supra explicuit , bonificare est in generatione , & spiratione.

VII. Ut respondeat Lullus ad secundum & tertium quæsitum sic discurret : *Item quando dicitur , quòd Pater non spirat Spiritum Sanctum per bonificare , magnificare , &c. Sed per amare ; respondeo dicendo sic : Secundum nonam regulam substantia transmittit extra se suam similitudinem ; & considero diffinitionem æqualitatis : Unde sequitur , quòd Pater in diligendo Filium , & Filius in diligendo Patrem , spirant Spiritum*

*Alius Text.
prop. 4.*

Sanctum per amorem ; & ad hoc concurrunt æqualiter omnes dignitates ; ut Spiritus Sanctus sit bonus per bonificare , magnus per magnificare , & æternus per æternare , & sic de aliis attributis dignitatum (id est , de aliis attributis , quæ sunt ipsæmet dignitates) alioquin non esset spiratus perfectè , neque spiratio esset perfectæ ; & dignitates in illa spiratione essent otiosæ , quod est impossibile. Concluditur ergo , quod Pater spirat Spiritum Sanctum cum bonificare , magnificare , &c. sed in ipso spirare sunt omnes actus dignitatum , ita sub ratione amandi , sicut in generatione Filii sub ratione intelligendi ; & distinctio , quæ est inter Filium & Spiritum Sanctum , consistit in hoc , quod Pater intelligendo generat Filium , hoc est intelligendo se Patrem , intelligit Filium genitum , sed Pater in diligendo (sic corrigendum est ex Manuscripto , non , intelligendo , ut habetur in impressis) Filium , & Filius Patrem , diligunt se esse unum spiratorem , diligendo unum spiratum per amorem.

VIII. In hoc textu supponit Lullus doctrinam catholicam , quod Pater in diligendo Filium , & Filius in diligendo Patrem , spirant Spiritum Sanctum ; & quia habent de se transmittere suam similitudinem , per communicationem suarum perfectionum ; & etiam quia in Deo omnes perfectiones sunt æquales : ideo quia Pater & Filius spirando Spiritum Sanctum , ipsum producant bonum , magnum , æternum , &c. & omnes dignitates æqualiter concurrunt , tamquam ratio agendi , ad ejus spirationem , ut ipse sit bonus per bonificare , id est , per actum , quod producit bonus , magnus per magnificare , &c. quia , nisi ita esset , non esset perfectè spiratus , utpote non esset ipsi perfectè communicata tota divina essentia cum suis attributis ; & in illa spiratione omnes dignitates essent otiosæ , quia in illa non esset actus uniuscujusque earum , quod est impossibile , quia unaquæque ex vi propriæ perfectionis requirit actum proprium in divina productione ; & proinde concluditur , quod Pater & Filius spirant Spiritum Sanctum cum bonificare , magnificare , &c. quia ratione bonitatis , magnitudinis , &c. spirando , illum producant bonum , magnum , &c. & quia spirant per diligere , etiam bonificare , magnificare , &c. in spiratione sunt ipsum diligere , quod Pater , & Filius spirant Spiritum Sanctum , & sic soluta manet quæstio quoad omnes sui partes.

IX. Sufficienter patere arbitror ex hujusmodi textus reflexiore , immeritò taxatam fuisse Lulli doctrinam in hac quæstione ; nam , præter supra animadversa , non potest suspicari Lullum prætere bonificare , magnificare , &c. esse actus distinctos ab intelligere & velle , & distinctos etiam esse à generatione , & spiratione , quia probat eum.

dem esse actum, videlicet quod in generatione bonificare, magnificare, &c. sunt ipsum generare, & in spiratione, bonificare, magnificare, &c. sunt ipsum spirare. Deinde dum Lullus dicit quod dignitates Dei non sunt otiosæ, nullatenus suspicari potest intendere, ipsas absolutè bonificare, magnificare, &c. ac proinde generare & spirare; quia expressè dicit de bonitate, & intelligitur de omnibus aliis, quod est id ratione cuius bonum agit bonum, ac proinde dignitatibus attribuit bonificare, magnificare, &c. tamquam rationi agendi, non autem tamquam subiecto propriè & absolutè agenti; imò expressè explicat quod ratione bonitatis, magnitudinis, &c. Pater generando bonificat, magnificat, &c. Filium; & Pater & Filius ratione bonitatis, magnitudinis, &c. spirando bonificant, magnificant, &c. Spiritum Sanctum. Neque tandem dici potest Lullum confundere generationem cum spiratione per hoc, quod utrique adscribat bonificare, magnificare, &c. nam expressè docet quod generatio est per intelligere, & spiratio per diligere, ac proinde, licet utraque sit per bonificare, magnificare, &c. non confunduntur, quia aliud est bonificare, magnificare, &c. generando, ac spirando.

§. II.

In Prop. 10. & 11. ex quæst. 44. & 50. docet Lullus Patrem se bonificare & se facere bonum, latè sumpto facere, in producendo Filium, quia à seipso habet, & non ab alio, bonificare, seu producere bonum Filium: quod bonificare est quid bonum in Patre; vel quia bonificat Filium, qui, licet distincta Persona, est ipse & idem Deus ac Pater.

X. Ex quæst. 44. hic notatur decimò loco textus: *Ut Pater sit bonus, per bonum agere facit se bonum in producendo Filium; & mox: Quia Deus Pater se facit bonum, disponit homini virtutes morales, per quas se possit facere bonum. Quæst. 44. circa medium.* Cum sensu notato in his verbis coincidit textus, qui ad propositionem undecimam ex quæst. 56. notatur, videlicet: *Quoniam, sicut Deus est ita magnus per suam bonitatem, sicut per suum intellectum, oportet quod sicut Deus intelligit se per suum intellectum, ita bonificet se per suam bonitatem; alioquin sua bonitas & suus intellectus non essent æquales in magnitudine potestatis, &c. quod est impossibile; sed Deus se bonificare non potest, cum sit bonus formaliter, æternaliter, & infinitè, sed ratione finis boni-*

facit se, in quantum Deus Pater facit se bonum in producendo Filium bonum. Unde sequitur de necessitate esse in Deo productionem personarum.

XI. Sanè cùm recta critice doceat non ex quibusdam verbis per se & solitariè consideratis desumendum esse Autoris sensum, sed ex collatione contextûs, tum antecedentium, tum etiam consequentium: si ad hoc animadvertisset Censor relatorum textuum, difficultatem apparentem solvisset; nam illud *facit se bonum* in quæst. 44. notatum, ex textu quæst. 50. sanò sensû intellexisset, præcipuè illud quod in ipso dicitur, *quod Pater bonificet se per suam bonitatem, & quod facit se bonum*; quia in quæst. 50. asseritur. *quod Pater est bonus formaliter, æternaliter & infinitè*; & ex hoc apertè deducit, quod *Deus se bonificare non potest* in sensu absoluto, quem præferunt hæc verba absolute prolata; ac proinde in illo discursu prævio, in quo ex æqualitate magnitudinis in Dei bonitate & intellectu deducitur quod, sicut Deus intelligit se per suum intellectum, ita bonificet se per suam bonitatem: ly *bonificet se* solùm intelligitur generaliter de actu bonitatis, non autem determinatè de actu productivo, vel de actu quod de non bono fiat bonus; sed, cùm bonitati divinæ debeat correspondere actus bonitatis, & hic, ut explicat in textu, non possit esse tale bonificare, quod Deus de non bono fiat bonus, vel quod Deus se producat bonum absolute, quia est bonus formaliter, æternaliter, & infinitè: ideo planum fit quod ly *facit se bonum* in primo textu, & ly *bonificet se* in secundo, juxta contextum non intelligitur de bonificare quod de non bono fiat bonus, vel quod seipsum producat absolute & in rigore.

XII. Sensus autem in ipsa quæstione 50. exprimitur; nam, cùm Deus se formaliter non possit bonificare, *ratione finis, bonificat se*, id est, habendo se ad finem proprium, exequitur actum bonificandi: unde, cùm hic finis in Deo sit producere Deum, ad hoc enim se habet tota divina natura, cum suis perfectionibus, quia exigit & petit hujusmodi infinitam productionem, ideo *Pater facit se bonum in producendo Filium*, hoc est, exequitur actum bonificandi producendo Filium; & quia Filius, licet sit distincta Persona à Patre, est ipsemet Deus ac Pater, ideo Pater producendo Filium bonificat se, seu facit se bonum in producendo Filium, quatenus se exprimit in Filio, vel Filium, alterum se producit, juxta phrasim Augustini, Epist. 66. ad Maximum, dum dicit: *Neque enim Pater, ut haberet Filium de seipso, minuit seipsum, sed ita genuit de se alterum se, ut totus maneret in se, & esset in Filio tantus, quantus est solus*; & hoc

idem exprimitur in primo textu, dum dicitur quodd *Pater facit se bonum in producendo Filium*. Proinde etiam ex contextu apparet, quodd, cum Deus formaliter, infinite & æternaliter sit bonus, dum in textibus reperitur, quodd *Pater facit se bonum*, non intelligitur quodd de non bono fiat bonus, ut sonare videtur, *facere se bonum*, per se & solitariè consideratum; sed tantum intelligitur, quodd se bonum exprimit vel exercet in producendo Filium, quod exprimit in primo textu, dicens quodd *ut Pater sit bonus* (nedom essendo sed agendo) *per bonum agere, facit se bonum in producendo Filium*, id est, ut sit bonus agendo, producit Filium, quâ productione se facit bonum, id est, se exprimit bonum agendo.

XIII. Expōitâ relatorum textuum intelligentiâ resultat ex eisdem inter se collatis, & debitâ reflexione animadversis; clariùs autem elucet ex contextibus earumdem quæstionum; ante eorum tamen adductionem refricanda est doctrina Lulli, quam tum, tom. 1. tum etiam 2. observare fecimus, quâ generalem exhibet explicationem sui modi loquendi; nam in lib. de 14. art. Fidei (tom. 2.) in Prologo, postquam dixit oportere uti illis verbis, quæ non sunt in usu, nempe *bonificare, magnificare, &c.* ad explicandam divinam productionem, sic præfatur: “Quando autem dicimus *bonificare, magnificare, &c.* non intendimus dicere tot esse distinctos actus, quot
” sunt divinæ dignitates in numero; ac etiam protestamur quod nec
” tempus, nec mensuratio, vel imperfectio cadant in *bonificare;*
” *magnificare, &c.* quia nos dicimus & probamus in quolibet actu
” infinitatem, æternitatem, & perfectionem; & ideo in ipsos actus
” non potest cadere imperfectio, cum in quolibet actu sit infinitas,
” æternitas, &c. Et dum nos dicimus *justificare*, non intendimus di-
” cere, quodd de injusto fiat justum, sed intendimus affirmare divi-
” nam justitiam frui suomet actu infinite & æternaliter in bonitate,
” magnitudine, &c. & hoc idem intendimus dicere de *bonificare,*
” *magnificare, possificare, verificare, &c.*

XIV. Quibusdam postea interpositis, ita subjungit: “Præterea
” in hac arte utimur his vocabulis, videlicet *operari & facere, fe-*
” cundum quod in aliquibus locis habent eadem significata, in ali-
” quibus verò non eadem; & quandoque significant generatio-
” nem & processionem, & quandoque non; & ideo nos ordina-
” mus hanc regulam in hac arte videlicet quod per *operari, & fa-*
” *cere*, in fruitione intrinseca dignitatum intelligamus virtutem pro-
” ductivam producentem, Filium Dei & Sanctum Spiritum.” Ex

quod August. num. 12. adductus dicit, Patrem generare alterum se, & sic Pater se facit bonum *productivè* in producendo Filium, quia producendo Filium, qui est alter ipse, seipsum producit in Filio, non in seipso.

XIX. Alter ad undecimam propositionem textus habetur, in q. 50. in qua scribitur: *cùm Deus sit trinus & incarnatus, quæro: quare non fecistis in arte quæstionem de divina Trinitate & de Incarnatione?* Ad quam Lullus ita respondet: "Ars est generalis omnibus, Christianis, " Judæis, Sarracenis, ac etiam Paganis, sed non esset generalis " omnibus, si in ipsa esset Fides Christiana explicitè; verumtamèn " est in ipsa implicitè, ut apparet in pluribus, & maximè in quæ- " tionibus ultimis per diffinitiones principiorum, sicut (ut in Ma- " nuscr.) per diffinitionem æqualitatis deductam per divinam boni- " tatem, magnitudinem, æternitatem, &c. *Quoniam sicut Deus est ita* " *magnus per suam bonitatem, sicut per suum intellectum, oportet* " *quod, sicut intelligit se per suum intellectum, ita bonificet se per suam* " *bonitatem, alioquin sua bonitas & finis intellectus non essent æquales* " *in magnitudine potestatis, virtutis, voluntatis, &c. quod est impossi-* " *bile; sed Deus se bonificare non potest, cùm sit bonus formaliter,* " *æternaliter, & infinite, sed ratione finis bonificat se, in quantum Deus* " *Pater facit se bonum in producendo bonum Filium: unde sequitur de ne-* " *cessitate in Deo esse productionem Personarum; alioquin definitio bonita-* " *tis non esset æterna, & sic de aliis definitionibus attributorum divinarum,* " *quod est impossibile. Et de aliis articulis; hoc est, similiter in arte con-* " *tinetur implicitè probatio aliorum Fidei articulorum.*

Text. prop.
11.

XX. Idem planè sensus, qui in alio textu, intelligitur in isto, & aliquo modo explicatior; nam *Primò* intelligitur quod Deum se bonum facere, est idem, ac bonificare se. *Secundò*, quia in primo discursu, ex æqualitate intellectus & voluntatis, deducitur Deum bonificare se, sicut intelligit se, hoc bonificare se, debet esse actus consimilis actui, quod intelligit se, ac proinde solum concluditur esse in bonitate suum actum bonificandi, sicut in intellectu est actus intelligendi. *Tertiò* in discursu subsumpto supponitur, Deum esse formaliter, æternaliter & infinite bonum, & propterea non posse bonificare se, vel reddendo se de non bono bonum, vel seipsum absolute producendo; quia tamen debet in ipso esse actus bonitatis, ut etiam in agendo sit bonus, ideo producit Filium; & quia actus producendi Filium est actus bonificandi Filium, quia Pater bonus producit Filium bonum, ideo Pater in producendo Filium bonificat se, vel

vel se facit bonum, hoc est, exercet se ut bonus; cùm enim nedùm sit bonus formaliter seu in essendo, sed etiam finaliter seu in agendo, & sit bonus in agendo, quatenus producit Filium; & hoc est se exercere in bono, quod est quodammodo, facere, generaliter sumptum: ideo modò dictò Pater se bonificat, & se bonum facit.

XXI. Proinde in quæstionibus & eorum textibus rotatis nunquam est sensus absolutus: *Pater bonificat se*, vel *Pater se facit bonum*; sed restrictus, nempe *Pater bonificat se*, vel *se facit bonum*; hoc est *exercet se in agendo bonum, in producendo Filium*; vel *bonificat se & se facit bonum productivè, in producendo Filium, qui est idem bonum ac Pater*; in hujusmodi autem locutionibus ita explicatis, prout textus requirunt, nulla est intelligentiæ difficultas: præcipuè cùm de hujusmodi mysteriis difficulter cum proprietate loqui possimus; & aliquando ad divina sanò sensu sit adhibitum Verbum *facere*, ut Joan. 1. 30. *Post me venit vir, qui ante me factus est*; Hæbr. 3. 1. *Considerate Apostolum & Pontificem confessionis nostræ Jesum, qui fidelis est ei, qui fecit illum*; & Act. 2. 36. *Certissimè sciat ergo omnis domus Israel, quia & Dominum eum & Christum fecit Deus hunc Jesum, quem vos crucifixistis*: quæ loca expendens Petavius Theol. Dogm. tom. 2. lib. 2. de Trinit. cap. 3. num. 1. ait: *His ita respondent Patres, ut hæc loca, & in his Verbum faciendi partim divinæ Verbi substantiæ, partim humanæ tribuant. Sed non eodem sensu omnes interpretantur. Et quidem D. Athanasius ibi ait, consuetudinem esse Scripturæ uti verbo faciendi pro eo quod est gignere. Etiam D. Cyril. Alexand. ibi num. 3. aliò sensu verbum faciendi usurpari censet, pro eo quod est declarari vel ostendi.*

XXII. Præterea similibus verbis utitur Scriptura, ad exprimendum actum divinarum perfectionum, ut Isaïæ 5. 16. *Et exaltabitur Dominus exercituum in judicio, & Deus Sanctus sanctificabitur in justitia*; Ezech. 36. 23. *Et sanctificabo nomen meum magnum..... cum sanctificatus fuero in vobis coram eis*; & cap. 38. 23. *Et magnificabor & sanctificabor: & notus ero in oculis multarum gentium, & scient quia ego Dominus*. Plura similia habentur in Scriptura, quæ non denotant novam in Deo operationem, sed exercitium seu actum suarum dignitatum cum terminatione ad extra: quò modò, quamvis dispari ratione, videtur posse dici Patrem se bonificare & magnificare per hoc, quod habeat actum bonificandi & magnificandi terminatum ad Filium, producendo ipsum de seipso; & quia producere bonum & magnum Filium est quid bonum & magnum, & hoc à se & per

se habet Pater, & non ab alio, ideo, sepositâ intelligentiâ novitatis, poterit dici, Patrem se bonificare producendo Filium bonum, quia à se & non ab alio habet hoc bonificare, & hoc est quid bonum in ipso: ad instar hominis, qui, licet cum novitate operationum & cum sui mutatione, se bonificat & magnificat, operando bona & magna.

XXIII. Similia ac in Lullo possunt apud Patres, quamvis non eadem, sed æquivalenti expressione, observari. D. Cyrill. Alexandr. Thesauri, lib. 1. cap. 6. ad hanc Arianorum objectionem: *Si perfectus Pater in sua magnitudine est, nec aliquid ad perfectionem suæ naturæ deest, superflue, quasi plenitudo Deitatis suæ, Filius sibi adjungitur*; Respondet hoc modo: *Perfectus certè Pater in sua magnitudine invenitur; perfectus autem est, non solum quia Deus, sed etiam quia Pater: quare qui Deum negat Patrem esse, is fecunditatem aufert à divina natura, ut jam perfecta non sit, cum generandi virtute careat. Notio ergo perfectionis fecunditas est, & sigillum, quod Patris ostendit perfectionem, Filius est, qui ex Deo prodit. . . . naturâ igitur inest Patri fecunditas, & ideo perfectus est, quia genuit. Sanè idem sensus, qui à Lullo in textibus notatis de bonitate, exprimitur hîc à D. Cyrillo de perfectione; quia enim Pater est perfectus, nedum in essendo, sed etiam in operando, ut perfectus sit in operando generat Filium, quia hæc generatio est notio perfectionis, & Filius genitus ostendit Patris perfectionem: atque ita Pater perfectus est quia genuit, quasi generatio illum reddat perfectum; & quia à seipso, & per seipsum, non autem ab alio nec per alium, habet generare, ideo, si fas est dicere, seipsum perficit, vel sibi dat perfectionem, quia à seipso habet hanc perfectionem, quæ est generare.*

XXIV. Pariformiter potest discurre ex aliis Patrum dictis: sic August. Epist. 174: *Hanc perversitatem pellit ex animo, qui didicerit Patrem verum Deum esse, gignendo veritatem, non participando.* Idem lib. 3. contra Maximin. cap. 15. *In forma Dei Filium esse non negas, & Deo Patri æqualem negas, majorem Patris formam putans esse, quàm Filii; tanquam non habuerit Pater unde formam suam compleret in Filio, quem de seipso genuit; non fecit ex nihilo, non ex alio.* Idem lib. 15. de Trinit. cap. 14. *Proinde tanquam seipsum dicens Pater, genuit Verbum sibi æquale per omnia; hæc autem expressio seipsum dicens, videtur coincidere cum illa Lulli se bonificans; & propterea, conformiter ad illam ejus sententiam adductam, num. 12. quodd Pater genuit alterum se, sæpè repetit quodd Pater genuit id quod est ipse,*

ut lib. de Fide & Symbolo, cap. 3. *Deus verò, cùm Verbum genuit; neque de nihilo, neque de aliqua jam facta conditaque materia, sed de seipso id quod est ipse.*

XXV. Apud Petavium, lib. 5. de Trinit. cap. 4. num. 12. Faustus Rhegiensis, verbò *facere* utitur, ita ut Filius Patrem faciat, dicens: *Hoc ipsum Filii nomen ex Patris derivari nomine creditur, nec tamen posterius invenitur, quia, nisi iste nasceretur, Pater illi non diceretur. Ecce nomen quod absolutè coævum illi est, à quo est; & cùm Filius ex Patre sit, Patri nomen Filius facit: acquirit genitori vocabulum pietatis persona nascentis, cùm hoc ex illo sit, nec hoc posterius, nec aliud probatur antiquius.* Idem apud Petav. ibi cap. 15. num. 13. dicit Patrem esse sui Autorem, nam de Patre loquens ait: *Ipse sibi Autor & Filio, quia una origo est & fontis & fluminis; & ibi, num. 14. Lactantius Firmianus, lib. 1. cap. 8. de Deo ait: Verùm quia fieri non potest, quin id, quod sit, aliquando esse cœperit, consequens est, ut quando nihil ante illum fuit, ipse ante omnia ex seipso sit procreatus, & adducit Senecam dicentem: Deus ipse se fecit: Unde, sicut ut exprimatur quòd Pater à seipso, & non ab alio, est Deus, dicitur esse sibi Autor, & se procreasse; melius, ut intelligatur à seipso habere actum generandi, quod est quid bonum in Patre, poterit, sanò intellectu observatò, dici quòd Pater seipsum bonificat.*

XXVI. Egregiè videntur confirmari prædicta ex Card. Cienfuegos in *Ænigmate Theol. Disp. 7. sec. 1. §. 4.* ubi postquam §. 1. sibi objecisset quòd ex sua doctrina sequitur idem posse producere seipsum realiter, *quoniam (ut sibi objicit) juxta principia sententiæ nostræ prædicatum, quòd producit, est aliquod ex absolutè præexistentibus in producente, & cum ipso realiter identificatis: sicut etiam prædicatum ipsum producens ut quod reperitur absolutè existens in termino producto, & cum ipso realiter identificatum sub ea ratione: nullaque realitas positiva est in genito, quæ non sit immediatè per identitatem in generante, & vice versà, sive ea realitas absoluta tantum sit, sive relativa etiam. Ergo verificatur in toto rigore, Patrem producere realiter suammet entitatem vel realitatem positivam; non quidem adequatè omnem, sed aliquam: adeoque aliquid sūt; quod simul cum reliquorum communicatione sufficiens erit ad hoc ut totum illud positivum, quod in Patre est generans, in Filio dicatur genitum. Ergo verè & propriè sunt idem generans realiter & genitum, Pater & Filius. Hoc idem argumentum variis urget instantiis; & respondet, nunquam sequi Personam seipsam realiter producere, quia, ut ait §. 4. num. 39. Cogitatio nostræ*

contendit & probat satis , Personam productam esse aliam personaliter à persona generante , quin in ratione Personæ identificetur cum illa penès modum.

XXVII. Hoc ipsum postea explicat , & num. 41. ita subjungit :
 „ Fit tertio , productiones divinas in sensu proprio & in lata signi-
 „ ficatione appellari posse productionem sui ipsius , cum in nostris
 „ principiis non solum identificetur entitas producta penès modum
 „ absolutum utrimque cum producente , sed insuper quā absoluta
 „ cum producente , prout relativā , & quā relativa & producta cum
 „ generante ut absolute existente : Unde Pater , non solum quā prin-
 „ cipium communicativum tribuit Filio suam substantiam , sed insu-
 „ per quā principium productivum tribuit esse reale verè & propriè
 „ penès modum essendi respectivum , entitati , quam ipse Pater ha-
 „ bet secum identificatam immediate entitative penès absolutum.
 „ Quā ratione minori improprietate (quamquam improprie semper
 „ & abusive : & propterea nunquam ita loquendum sine explicatio-
 „ ne aut addito) quàm in pervulgata sententia , dici potest Pater
 „ generans aut producens aliquod modò latò seipsum , id est produ-
 „ cens realiter aliquid , quod præexistit actu formaliter in Patre
 „ cum ipso identificatum entitative & adequate secundum aliquem
 „ essendi modum illius : & in eo sensu principium sui potius quàm
 „ in communi sententia ; juxta quam non modò falsæ , sed planè ab-
 „ surdæ forent Patrum locutiones quamplurimæ.

XXVIII. Locutiones Patrum , quas hîc commemorat Cienfuegos ,
 sunt sequentes , quas hîc adducit , nempe S. Justinus Martyr in con-
 futatione responsionis ad tertiam quæstionem cujusdam Græci , ait :
*Per seipsum produci significationem productionis habet ejus , quod se ipso
 producitur. Id autem , quod per seipsum productum sit , ab eo , quod per
 alium productus sit , ipsa productione non differt ;* num. 42. adducit Lac-
 tan. Firmian. à nobis relatum , num. 25. & dictum Senecæ *Deus ipse
 se fecit* : quæ , ut ait , sunt dicta „ ad modum , quò de Curtio Ruffo
 „ dixisse Tiberium refert Tacitus , lib. 11. Annal. *Videtur mihi ex se
 „ ipso natus* ; & Ezech. 29. recensetur superbia Pharaonis aientis :
 „ *Ego feci memetipsum.* „ Laudat , num. 43. Divum Hieron. ad
 Ephes. cap. 3. ubi expendens illud Pauli : *ex quo omnis Paternitas ,*
 adjungit : *sui origo est , suæque causa substantiæ , non potuit aliunde ha-
 bere , quòd subsistit.* & D. Aug. lib. 4. de Trinit. dicentem : *Pater est
 principium & origo Deitatis* , quæ verba ex Augustino desumpsit Concil.
 Tolet. 6. Etiam idem Cienfuegos , disp. 5. sect. 2. §. 3. alios Patres

adducit, ad quos hîc se refert, ut est, num. 26. D. Athanas. Orat. 4. contra Arian. dicens: *Est Pater in Filio, eò quòd quidquid est Filius, id universim sit proprium substantiæ Patris; & postea: estque vice versâ Pater in Filio, eò quòd id, quod est Patri proprium ac suum, id ipsum sit Filius.* Gregor. Nazian. ibi, num. 28. Tract. de Fide, docet, Patrem dum generat Filium, *producere alium ipsum; & Orat. 49. Pater est alius idem; & Aug. Epist. 66. ad Maximum, dixit: Pater genuit alium se.*

XXIX. Has locutiones explicans ibidem Cienfuegos, ait: “Porro, cum Pater significet in recto Paternitatem & Filiationem pariter Filius: cum Filius dicitur generari, & cum dicimus Patrem generare, denotamus Patrem generantem & Filium genitum, penès prædicata illa in recto significata, ut mutuo respectiva, secundum quæ Pater est alius realiter à Filio, & Filius alius realiter à Patre (quin sub illa ratione esse valeant idem, sed alter & alter solum.) Et cum aliunde illam & prædicata penès modum existendi absolutum sint realiter idem inter se, imò & unumquodque, ut respectivum, cum alio quâ absoluto, & è contra: idcirco in illismet prædicatis, in quibus & ratione quorum sunt alius & alius ab invicem, sunt etiam idem ad invicem entitativè & physicè; consequenter sub eo modo absoluto essendi unum est realiter alterum; & cum simul sint distincta realiter sub modo essendi relativo, aliudque propterea alius: ideo summa cum proprietate est unusquisque alter simul & ego. Ad modum quò, juxta vulgare proloquium, amicus alter ego, vel alter Hercules, amicus Herculis, appellatur.

XXX. Colligendo quæ hucusque sparsim sunt dicta, deduci potest, quòd, si apud Patres citatos, quia Pater divinus à seipso est, & non ab alio, dicitur sui causa, origo, & Autor, &c. cum ipse Pater à seipso habeat, & non ab alio, bonificare Filium, ipsum producendo bonum; & hoc ipsum bonificare esse quid bonum in Patre, poterit etiam Lullus dicere, latò quidem & improprio sensu, Patrem se bonificare & bonum facere in producendo Filium. Etiam, si Pater est perfectus quia genuit; si est verus Deus gignendo veritatem; si formam suam complet in Filio; & hoc habet Pater per seipsum generando Filium, quod est quodammodo se reddere vel (generali impropriâ locutione) se facere perfectum, verum & completum: poterit etiam dicere Lullus simili modo Patrem se facere bonum. Præterea, si Pater genuit alterum se, ex Augustino, sicut etiam seipsum dicens, genuit Filium, & quòd genuit id quod ipse est; &

hoc est quia Filius genitus, licet altera Persona, est idem Deus ac Pater, eodem sensu poterit dicere Lullus, quod Pater se bonificat in Filio, vel producendo Filium, ut hoc alio modo explicuimus Lulli locutionem, & multò magis eo modo quo citatus Cienfuegos hujusmodi explicat locutiones: ac proinde immeritò notantur relati textus apud Lullum.

DISSERTATIO III.

De Sarracenorum salvatione; satisfactione sacramentali; die judicii; & hominis formatione in utero matris, quoad propositiones §. 6. 7. 8. & 9. ex quæstionibus 8. 21. 22. 31. & 35.

§. I.

Docet Lullus Prop. §. ex quæst. 8. Sarracenos cum peccato originali non posse salvari.

QUINTO loco hæc notantur in hoc libro: *Sarraceni salvari non possunt, cum sint damnati per peccatum originale.* Quæst. 8. Consideratis his solis verbis videtur hunc Censorem prætere, quod Lullus intelligat, Sarracenos, adhuc hanc vitam degentes, jam esse damnatos; sicut miseri in inferno reclusi; & propterea non posse salvari, sicut isti, quia in inferno nulla est redemptio. Non puto alio sensu notatam esse dictam propositionem, quia illa propositio: *Sarraceni salvari non possunt.*, obvio sensu intelligitur de ipsis manentibus Sarracenis, & baptisma non recipientibus, quò modò verum est non posse salvari, quia similes locutiones passim à Christianis usurpantur, & è suggestibus depromuntur ad exprimendam necessitatem Fidei Christianæ, & Baptismatis ad salvationem; non autem negant illam potentiam, quâ Sarraceni possunt ad Fidem Christianam converti, vel gratiâ Dei extraordinariâ possunt amoris Dei actum elicere, vel contritionem perfectam de peccatis actualibus, & sic mundari simul à peccato originali; quia ista, nisi exprimantur, in similibus locutionibus non intelliguntur: unde prout est cogitare, quod illa causalis: *Cum sint damnati per peccatum originale* reddat hunc sensum:

Cum sint additi damnationi per peccatum originale, sicut solemus dicere homines perversissimos jam esse damnatos; non autem æquum est intelligere Sarracenos esse simili damnatione affectos, ac in infernum detrusos, quia hoc de hominibus viventibus in hoc mundo est maximum absurdum, quod non est æquum credere Lullum protulisse.

II. Hæc dicta sunt solum inspectis verbis notatis; at maximè mirandum est, hunc Censorem, qui quæstionem & solutionem in Lullo legit, hæc verba notasse, nec advertisse errorem typicum in illa voce *damnati*. Sanè, quandoque bonus dormitat Homerus; sed audiat Lullus: « Quæstio 8. Utrùm omnes homines possent salvari, ita » quòd nullus damnetur, dato quòd omnes essent Christiani? Et » quare Sarraceni damnantur, si credant se Deum credere? Et quare » Deus tot permittit infideles? Numquid non esset melius quòd om- » nes essent Christiani? Solutio. *Considerando medium, & suam de-* » *finitionem, respondeo sic: suppositò, quòd omnes homines essent Chris-* » *tiani, & tenerent principium, medium, & finem, quare sunt, possent* » *salvari; sed illi qui devianti sunt à medio, salvari non possunt, cum* » *finis sine medio haberi non possit. Sarraceni autem salvari non possunt,* » *cum sint devianti (non damnati, ut errore typico habetur in editione* » *ab hoc Censore examinata) per peccatum originale; & quod sit pecca-* » *tum originale probavimus in libro articulorum Fidei.* »

Text. pr. 6.

III. Ex reflexione hujus integri textûs simul & tituli quæstionis, Primò apparet nedùm error typicus in verbo *damnati*, quod ponitur loco vocis *devianti*, sed etiam, quàm facilè cognosci poterat Sarracenos esse deviatos à salvatione per peccatum originale; quia statuto hoc principio quòd *illi, qui sunt devianti à medio salvationis, salvari non possunt*, deducit Lullus conclusionem, quòd Sarraceni salvari non possunt; ac proinde causalis vel ratio, quare salvari non possunt, debet esse quia sunt devianti; aliter non cognosceretur discursus, qui hunc syllogismum comprehendit: *Illi qui sunt devianti à medio salvationis, salvari non possunt; sed Sarraceni sunt devianti à medio salvationis per peccatum originale: ergo salvari non possunt.* Unde, nisi velit quis voluntariè Lullum facere stupidissimum & inconsequentem, debet agnoscere Lullum ibi intendere Sarracenos esse, non *damnatos*, sed *deviatos* à medio salvationis per peccatum originale; ac proinde evanescunt omnia, quæ ex supposita Sarracenorum, adhuc hanc vitam degentium, damnatione objici poterant contra relatum textum. Secundo, licèt Lullus de facto scripisset, quod Sarraceni sunt *dam-*

dam-
nati per peccatum originale , ex contextu debet intelligi quòd *dam-*
nantur , quando moriuntur , ob peccatum originale , vel quòd post
mortem sunt *dammati* , vel quòd per peccatum originale dum vivunt ,
sunt *addicti damnationi*. Ratio est , quia in quæstione inquiritur , *quare*
Sarraceni damnantur ? Quòd , de quibuscumque intelligitur , dum
moriuntur , & sic supponit eos , dum vivunt , non esse damnatos :
unde pronum est solutionem hujus quæstionis , dato quòd in ipsa di-
catur quòd sunt *dammati* , intelligere sub aliquo ex adductis sensibus ,
qui unicè correspondent quæstioni propositæ.

IV. *Tertiò* ex eodem textu apparet , quàm multa paucis complec-
tatur Lullus ; nam supponit Baptismum , quo homines fiunt Chris-
tiani , esse medium necessarium ad salvationem , & hoc in ipsa quæ-
stione jam supponitur , dum inquiritur : Utrùm omnes homines possent
salvari , ita ut nullus damnetur , dato quòd omnes essent Christiani ?
Nam ex hujusmodi quæstione ut fixum præsupponitur , Christianita-
tem esse dispositionem necessariam ad salvationem , ut apud omnes
est certum ; quæ tamen quæstio est de omnibus , & in adultis re-
quiritur legis christianæ adimpletio : propterea , *suppositò quòd omnes*
homines essent Christiani , si tenerent principium , medium , & finem ,
quare sunt , scilicet *principium* gratiæ sanctificantis , *medium* Fidei , &
cæterarum virtutum , prout sunt sub præcepto , & *finem* perseveran-
tiæ usque ad mortem , *possent salvari* , quia hæc necessariò prærequi-
runtur ad salvationem obtinendam ; & propterea , si hæc haberent ,
possent salvari , & de facto salvationem consequerentur. Hæc sanè
doctrina , quam ibi præscribit Lullus , est pura catholica doctrina ,
nec indiget aliis doctrinis stabiliri , cum apertè constet ex Evangelio.

V. Deducitur ex hujus quæstionis solutione , alterius resolutio ,
videlicet : *Quare Sarraceni damnantur , si credant se Deum credere* ?
Nempe , *quare damnantur* suo tempore , eo scilicet , quo moriuntur ,
non autem dum adhuc vivunt , quia intelligitur quæstio in sensu vul-
gari , quo de similibus loqui solemus. Ad hujus solutionem præmittit
Lullus , quòd illi , *qui sunt deviat* à medio salvationis , id est ab omni
illo , quod requiritur ad salvationem obtinendam , prout dicitur &
supponitur in præcedenti quæstione , esse Baptismus , gratia , fides ,
& aliæ virtutes cum charitate & perseverantia finali ; *salvari non pos-*
sunt , ut evidens est , quia sine medio , finis haberi non potest ; & quia
Sarraceni sunt deviat ab hoc medio *per peccatum originale* ; certum est
enim ipsos esse dicto peccato infectos , & consequenter ipsos esse des-
titutos gratiâ cæterisque , quæ sunt medium ad salvationem necessa-
rium :

rium : ideo , licet credant se Deum credere , sub hac deviatione , *salvari non possunt.*

VI. Unde illa propositio : *Sarraceni salvari non possunt* solum intelligitur in illo eodem sensu , quod communiter dicimus , nullum sine baptismo posse salvari , neminem extra Christi Ecclesiam posse vitam æternam obtinere , similiaque plura : intelligitur enim , quod cum peccato originali , & dum sint sine baptismo & aliis , quæ sunt medium ad salvationem necessarium , salvari non possunt , non enim à Lullo profertur propositio omnino absoluta , quod *Sarraceni salvari non possunt* , sed determinata , nedum per id quod supponitur in quæstione de necessitate baptismi , sed etiam per illam causalem *cum sint utriusque peccati originali* id est , dum sint ita devianti , prout etiam supponitur in illa generali maxime *id est* , dum sint ita devianti , prout salvationis , *salvare non possunt.* Quod autem absolute possint Sarraceni salvari , sicut & omnes infideles , quatenus possunt ad fidem Catholicam converti , & ordinari sub medio salvationis , docet Lullus in solutione tertiæ quæstionis , dicens : quod *Deus permittit tot esse infideles , ut fideles habeant subjectum sive materiam ad convertendum infideles ;* & ad hoc inculcandum subdit : “ Unde propter hoc ” dixit Christus B. Petro : *Petre si diligis me , pascere oves meas :* etiam ” dixit : *Qui vult venire post me , tollat crucem suam & sequatur me :* ” Unde videtur , quod infideles fierent Christiani , & si non fiant , ” caveant sibi illi , per quos possent esse Christiani , & non curant , ” quia legitur in Evangelio : *Vae illi homini per quem scandalum venit.* ”

§. I.

In Propositione 6. ex quæst. 21. docet Lullus quod non satisfaciens opere , non est absolutus à peccato , non autem negat ejus absolutionem à culpa.

VII. Difficultatem sexto ingerunt hæc verba , nempe : *Utrum , si Sacerdos me absolvat à peccato cum pœnitentia , quam mihi injungit , & ego sim cum bona voluntate satisfaciendi , & post aliud tempus amittam istam bonam voluntatem , & non faciam illam pœnitentiam : utrum sim absolutus ?* Fractio mediæ frangitur duratio formæ & finis ; & principium non se potest habere ad finem per lineam continuam , & destruitur influentia & refluentia absolutionis : unde sequitur quod negatio quæstio-

nis est tenenda. Quæst. 21. Difficultas autem videtur stare in hoc, quodd hic textus prætere videtur, absolutionem sacramentalem stare in suspenso, & effectum non producere, usque ad exhibitionem satisfactionis in opere; dumque hæc non exhibeatur, non manere poenitentem absolutum; ac proinde immediate post absolutionem sacramentalem, supposita confessione, contritione, & satisfactione in voto, non confertur gratia, nec eximitur homo à reatu pænæ æternæ, nisi postquam adimpleta est satisfactio; & ipsius voluntate deficiente, manet eodem modo ligatus ac erat ante Sacramentum Poenitentiae.

VIII. Antequam hujusmodi difficultatem dissolvam, observandum est, hujus libri quæstiones non esse pronatas ab alio, sed à Thomâ Atrebatensi, qui exigit solutiones juxta principia & regulas artis Lullianæ; nec solutiones ad Tyronem, sed ad ipsum Magistrum Thomam sub Epistola directas esse; & propterea, nedum more suo, quod brevissime tangit materias, respondet Lullus, sed quia ad hominem doctum scribebat, paucis multa complectitur, multa ut scita supponit, rationesque & sententias tantum indicat, ut apparet in hac 21. quæstione; ad cujus intelligentiam supponendum est ex quæst. 22. quod absolutio sacramentalis ratione effectus, quem causat, consideratur duplex, nempe absolutio à culpa, & absolutio à pœna; & hæc, alia est absolutio à pœna æterna, & alia à temporali; cum enim per sacramentum remittatur pœna æterna, & maneat subeunda pœna temporalis, ad quam complendam ordinatur satisfactio, sacramentalis, quam injungit Confessarius, ideo ad hujus etiam pœnæ temporalis absolutionem ordinatur absolutio sacramentalis, & illius etiam dicitur absolutio, cum hæc omnia præstari possint per Sacramentum Poenitentiae, ad quæ causanda fuit à Christo institutum.

IX. Hæc præ oculis habito, attendendus est textus, qui ita se habet: "Quæst. 21. utrum si Sacerdos me *absolvat à peccato, cum poenitentia*, quam mihi injungit, & ego sim in bona voluntate satisfaciendi, & post aliud tempus amittam ipsam voluntatem, & non faciam illam poenitentiam: utrum sim absolutus?" Sanè ex terminis hujus quæstionis apparet hic agi de absolutione, non à culpa, sed à pœna temporali; tum quia quærit, *si Sacerdos absolvat à peccato cum poenitentia quam injungit*; quoniam poenitentia, quam Sacerdos injungit, non est necessaria ad absolutionem à culpa, utpote, quamvis eam non injungeret, supposita debita dispositione in poenitente,

haberetur absolutio à culpa, sed, quia per poenitentiam quam injungit, intendit Sacerdos ut poenitens satisfaciat pro temporali poena, ideo ejus absolutio prout per injunctionem poenitentiae contrahitur, determinatur ut fit & intelligatur absolutio à poena temporali. Nec obstat, quòd dicat: *me absolvat à peccato*, quia reatus poenae consequitur ad culpam, & propterea nedum culpa, sed etiam reatus poenae intelligitur sub peccato; nec potest absolvi poenitens à reatu poenae, quin prae-supponatur absolutio à culpa, & propterea absolutio consistit in his verbis: *Absolve te à peccatis tuis*; & licet solum exprimat peccata, causat tamen omnes praedictos effectus. Ex alio capite cognoscitur quòd hic agitur de absolutione quoad poenam temporalem, quia quaestio est de illo, qui prius habuit voluntatem satisfaciendi, & postea amittit hanc voluntatem, & non facit poenitentiam; cum enim poenitentia injungatur ad satisfaciendum pro poena temporali, quaestio facit hunc sensum, an illa bona voluntas satisfaciendi, quam habuit sub Sacramento, sufficiat ut fit absolutus à temporali poena, vel adhuc maneat ligatus, eò quòd amisit bonam voluntatem, nec poenitentiam adimplevit.

X. Supposito hòc quaestionis sensu, plana est intelligentia solutionis, quae ita proponitur: *Solutio. Considera definitionem medii durationis, & quartam regulam (scilicet quare) & tunc apparebit solutio quaestionis; ita quòd fractio medii, frangitur duratio formae & finis; & principium (fractio videlicet medii) non possit se habere ad finem per lineam continuam, sed destrueretur influentia & refluentia absolutionis: unde sequitur, quòd negativa quaestionis est tenenda.* Hoc est; cum medium sit id, per quod principium influit fini, & finis refluit principio: medium durationis est id per quod hujusmodi influentia & refluentia durat: Quarta regula quare considerat finem; & quia finis, ad quem tendit absolutio Sacerdotis per injunctionem poenitentiae, est solvere poenitentem à debito poenae temporalis, & hoc per medium poenitentiae quam injungit: fractio hòc medii per defectum poenitentiae, non durat forma absolutionis, nec finis intentus, & quia sine hoc medio non potest continuari influxus principii, scilicet Sacerdotis absolventis, usque ad finem liberationis poenitentis à reatu poenae, sed ex defectu medii, necessario deficeret illa influentia & refluentia; ideo negativa quaestionis est tenenda, scilicet quòd ille poenitens non maneat absolutus in sensu quaestionis, videlicet à poena temporali.

XI. Confirmatur, hanc esse intelligentiam hujus quaestionis & ejus

solutionis, ex immediata, q. 22. earumque collatione; nam in 21. inquit de eo, qui non adimplet poenitentiam, an sit absolutus; & in 22. quærit de adimplente poenitentiam injunctam, levem tamen, an sit liberatus; & quia in hac expresse quærit *an sit liberatus à pœna & culpa?* Duplicem conjungit solutionem, & quoad culpam & quoad poenam, ut §. sequenti examinabimus; quoad absolutionem autem & liberationem à pœna, docet quod si poenitentia æquipollet peccato, vel si poenitentia, quantumvis levis, sit comitata magnâ contritione & dolore, ita ut sic æquipolleat peccato, sic manet poenitens absolutus à pœna: quare videntur ambæ quæstiones de absolutione à pœna procedere; tum ex earum immediata consecutione; tum ex eo quod prima sit de non adimplente poenitentiam, & secunda de eam, levem tamen, adimplente.

XII. Hæc omnia amplius patent ex sensu Lulli alibi certo, quod videlicet Sacramentum Poenitentiae, suppositâ debitâ in poenitente dispositione, immediatè causat gratiam & remittit peccatum quoad culpam, nec hujusmodi effectus suspenditur usque ad satisfactionem in opere. Nam in Lib. Proverb. part. 3. cap. 39. *de Confessione* postquam num. 1. dixit: *Confessio est enarratio peccatorum facta Presbytero cum contritione*; & num. 2. *Confessio, quæ est cum contritione, est vera*, num. 13. scribit: *Vera confessio affert veniam, & falsa confessio maledictionem*. Lib. de Doctrina Puerili, cap. 26. *de Poenitentia*; postquam varia dixit de hoc magno Sacramento, ait: *Amabilis Fili, cum poenitentia faciat parcere omnia peccata commissa, & faciat dare beatitudinem Paradisi, fac poenitentiam dum es in hoc mundo*. In Lib. Clericorum, cap. 30. *de Poenitentia* sexto Sacramentò ait: *Ad veram autem poenitentiam tria requiruntur, contritio, confessio & satisfactio, sine quibus non est dispositum Sacramentum Poenitentiae, nec Presbyter potest eos, qui de commissis veniam à Deo petunt, absolvere*; atque ita, dum hæc sint, fit absolutio à peccatis, nec suspenditur usque ad satisfactionem in opere, cum nullibi hoc insinuet; imò docet per contritionem perfectam, quæ semper præcedit satisfactionem, dimitti homini peccata, ut in Lib. Proverb. part. 3. cap. 38. num. 3. dicens: *Deus non potest se defendere, quin parcat contritioni & ploratu hominum*; & num. 5. *de magna contritione, magna venia*. Hoc idem insinuat in Lib. Sent. q. 123. num. 1. dicens: *Deus per gratiam disponit peccatorem, qui est ligatus, ut se moveat ad bonas cogitationes, & ad peregrinationes, & ad faciendum eleemosynas, orationes, & sic de similibus, ut libere sit contritus & agat poenitentiam*

de commissis : & tunc , si hoc facit , in illo instanti in quo hoc facit , & incipit , iustitia & misericordia Dei remittunt culpam , & gratia infundit charitatem in subiectum ordinatum & bene dispositum. Idem docet in lib. quæst. per ar. demonstr. solub. q. 87. ubi num. 4. docet quodd , quando anima per gratiam Dei est contrita , Deus illi parcit.

XIII. Nedum doctrina , sed etiam modus loquendi Lulli in hac quæstione videtur conformis D. Bonavent. in 4. dist. 15. art. 1. q. 3. ubi quærit : *Utrum extra charitatem , abstinentem à peccatis possibile sit satisfacere* ; & resolvit negativè , quia satisfacere importat divinam acceptationem & reconciliationem , quod extra charitatem non habetur. Ad tertiam autem objectionem ita respondet : “ Ad illud quod
 „ objicitur , quodd nullus tenetur ex charitate implere mandata , di-
 „ cendum , quodd quando satisfactionis opus ab homine imponitur
 „ homini , non tenetur illud opus facere ex charitate , five in charitate ,
 „ quia præceptum , sed necesse habet in charitate facere ad hoc quodd
 „ sit emendatorium & Deo placitum ; & ideo dico quodd opere illò
 „ inunctò completò , non tenetur illud iterare ; sed si dubitat pro-
 „ babiliter se Deo non satisfecisse , non debet à satisfactione cessare ,
 „ quousque per signa probabilia habeat certitudinem de *culpa dimissa*
 „ & *pœna*. Unde , sicut dictum est de aliis Sacramentis , maxime
 „ de Eucharistia , quodd non valet nisi habenti charitatem , non tamen
 „ tenetur quis accedere ex charitate secundum veritatem , sed se
 „ probabiliter disponere : ita etiam de satisfactione dicendum , quodd
 „ opera inuncta in satisfactionem tenetur facere , & tenetur se dis-
 „ ponere , quantum est in se , & sic *absolutus est* in foro Ecclesiæ ,
 „ & à pœna suæ conscientiæ , & in foro Dei *absolutus est* , ut non
 „ peccet in hoc faciendo. Sed tamen per hæc opera non *absolvitur*
 „ omnino ; & ideo sanum consilium est quodd homo semper poeniteat .
 Ipse Bonav. ibid. art. 2. q. 2. etiam scribit : “ Ad illud quod objici-
 „ tur , quodd confessio est propter reconciliationem ; dicendum , quodd
 „ non est solum propter hoc , sed ad arbitrandum pœnam inter ho-
 „ minem & Deum , quâ solutâ , tunc fit reconciliatio perfecta.

XIV. Ex hac D. Bonav. doctrina habemus , *Primò* , quodd per satisfactionem in opere datam , nisi sit facta in charitate , non habetur reconciliatio cum Deo , & per huiusmodi satisfactionem , dum per signa probabilia noscitur esse sufficiens , probabiliter habetur certitudo de *culpa dimissa* & *pœna* ; atque ita sentit D. Bonavent. quodd absque huiusmodi sufficiente satisfactione opere executâ , non est culpa dimissa & pœna : similiter ergo potest dicere Lullus , quodd ubi

nulla fit satisfactio, peccator non est absolutus, hoc intelligendo à culpa simul & poena; quia licet per absolutionem cum satisfactione in voto fit absolutus à culpa; cum tamen, deficiente opere satisfactorio, deficiat absolutio à poena, quæ à culpa ortum ducit, ideo quodammodo deficit absolutio à culpa; & hōc modō facīle potest intelligi Lulli textus, si aliquis pertinaciter vellet intelligi de absolutione à culpa, intelligendo quōd ille peccator non est absolutus à culpa simul & poena. *Secundō*, dicit D. Bonav. quōd dum fit facta satisfactio, homo absolutus est in foro Ecclesiæ, consequenter itaque absque satisfactione non est absolutus, quod est idē ac docet Lullus. *Tertiō*, dicit, quōd per hęc opera satisfactoria injuncta, dummodo non adæquent, *non absolvitur omninō*: potuit itaque dicere Lullus peccatorem nullam exequentem satisfactionem non esse absolutum. *Quartō*, dicit idem S. Doctor, quōd solutā satisfactione fit reconciliatio perfecta; atque ita ipsā deficiente, non datur perfecta reconciliatio, neque absolutio, & ad hujus instar potest dici, Lullum, dum negat illum hominem esse absolutum, intelligi de absolutione perfecta, quæ est finis intentus per Pœnitentiæ Sacramentum.

§. III.

Sensus Lulli in Prop. 7. ex q. 22. est, quōd cum voluntate levis tantum pœnitentiæ non remittitur peccatum grave quoad culpam, & consequenter nec quoad pœnam.

XV. Septima difficultas est circa hunc textum, q. 22. scilicet: *Utrum per levem pœnitentiam, quam Sacerdos mihi injungit, si eam faciam, sim liberatus à pœna, & culpa?* Solutio. Si culpa est magna in anima, & pœnitentia levis in corpore, ratione disproportionis, peccator non est liberatus à culpa, nec per consequens à pœna; sed si culpa est parva in anima, & æquipollet pœnitentiæ corporis, liberatus est peccator à pœna & culpa. Item, si culpa est magna in anima, & pœnitentia est levis in corpore; sed contritio & dolor & culpa æquipollent in anima, ratione virtutis Sacramenti, liberatus est peccator à pœna & culpa. Circa hunc textum non videtur esse difficultas de secunda assertione, quōd scilicet si culpa est parva in anima, & ei æquipollet pœnitentia corporis injuncta à Sacerdote, tunc peccator liberatur à culpa & pœna; quia hoc videtur esse apud omnes certum. Neque videtur esse difficultas circa tertiam assertionem, quōd si culpa est magna in

anima, si tamen, licet poenitentia sit levis in corpore, contritio & dolor in anima est aded magna, quod illa levis poenitentia per hujusmodi adjunctionem æquipolleat culpæ, tunc etiam liberatur peccator à poena & culpa: non inquam in hoc videtur esse posse difficultas, quia etiam apparet certum; & in hunc casum expresse tenet fieri totalem liberationem Henricus, quodl. 8. quæst. 19.

XVI. Unde tota difficultas stare videtur circa primam assertionem; ad cujus intelligentiam prænoto, quod in hujus quæstionis titulo duplex intelligitur quæstio, una circa liberationem à culpa, alia circa liberationem à poena, ad differentiam antecedentis, ubi sola fuit quæstio de liberatione à poena, in illo, qui habuit voluntatem satisfaciendi, & tamen opere non satisfecit; & quidem prima assertio in solutione hujus quæstionis intelligi plenè non potest, nisi ex paucis verbis, quæ omisit Censor ex textu, nempe: *In ista quæstione oportet considerare, quid est poenitentia per secundam regulam* (nempe regulam *Quid artis Lullianæ*) *& considerare definitionem æqualitatis, & distinguere inter sensuale & intellectuale.* Nam poenitentia sacramentalis non est qualiscumque actus, vel operatio externa, licet à confessario injuncta, & à poenitente adimpleta; sed debet ortum ducere ab animo & voluntate satisfaciendi à poenitente concepta; cum enim contritio, confessio, & satisfactio saltem in voto, sint partes vel quasi partes essentielles Sacramenti Poenitentiae concurrentes suo modo ad effectum primarium ipsius, nempe remissionem culpæ, sicut requiritur in poenitente ad hunc effectum causandum contritio & confessio, quæ in actu animæ principaliter consistunt, ita requiritur in anima satisfactio seu voluntas satisfaciendi, ita ut, prout Mastrius, in 4. disp. 5. q. 21. ar. 1. num. 563. & q. 1.1. num. 308. docet ex Scoto, *si peccator tale propositum non haberet saltem implicite, sed haberet voluntatem contrariam vel negativam, Sacramentum non conficeretur*: unde sacramentalis poenitentia utrumque importat, voluntatem scilicet satisfaciendi, & opus à Confessario injunctum executione mandare.

XVII. Præterea, sicut ad Sacramentum Poenitentiae, ut remittat culpam, non sufficit quæcumque confessio & contritio, sed debet esse correspondens & proportionata: sic voluntas satisfaciendi debet esse proportionata peccato, saltem generaliter & confuse; & hoc innuit D. in textu, dum dicit, considerandam esse definitionem æqualitatis; & sicut poenitentia opere executi debet esse proportionate æqualis peccato, vel poenæ temporali correspondenti peccato,

quoad culpam dimisso, ut homo sit liber à poena, ita ut nisi talis sit, non absolvitur, saltem à tota poena: ita voluntas satisfaciendi saltem generaliter & confuse debet esse proportionatè æqualis peccato, ita ut velit satisfacere quantum ab ipso requirit divina justitia in Sacramento poenitentiae; hæc autem voluntas satisfaciendi, saltem generalis & confusa, & etiam saltem implicite, adeo requiritur, ut sine ipsa nec culpa remitti possit, sicut nisi adsit contritio, vel saltem attritio supernaturalis: hæc autem omnia prævenit D. in citatis verbis, ut scilicet consideratò quid est poenitentia, & æqualitate ac differentiâ inter sensuale & intellectuale: poenitentia intellectualis, nempe voluntas satisfaciendi, quæ requiritur ad poenitentiam sacramentalem, fit proportionatè æqualis peccato in anima, ut dimittatur culpa, sicut poenitentia sensualis injuncta debet esse proportionatè æqualis poenæ peccato correspondenti, quæ etiam ut sensualis consideratur, ut ipsa dimittatur poena.

Text. prop.
7.

XVIII. Unde, dum ad quæstionem propositam: *Utrum per levem poenitentiam, quam Sacerdos mihi injungit, si eam faciam, sim liberatus à poena & culpa?* Respondet: *Si culpa est magna in anima, & poenitentia est levis in corpore, ratione improportionis peccator non est liberatus à culpa, nec per consequens à poena, per ly poenitentia levis in corpore, non intelligitur pura corporalis satisfactio, sed intelligitur utraque satisfactio, voluntas scilicet satisfaciendi per corpus, vel per corporale opus, & ipsum opus injunctum: id est, si tantum est voluntas leviter satisfaciendi corporaliter, satisfactio est improportionata cum magnitudine culpæ, & ratione improportionis, licet fiat levis poenitentia injuncta, peccator non est liberatus à culpa, nec per consequens à poena; cum enim, ut remittatur culpa, requiratur voluntas satisfaciendi cum proportionata æqualitate ad culpam; propterea, si pro culpa magna in anima non est voluntas satisfaciendi in proportionata magnitudine, sed tantum voluntas levis poenitentiae & improportionatæ, tunc, licet peccator faciat levem poenitentiam, tamen non liberatur à culpa, nec per consequens à poena.*

XIX. Quod autem per ly *poenitentia est levis in corpore* intelligatur in hoc textu voluntas tantum leviter satisfaciendi in corpore, præter ipsam levem corporalem satisfactionem, patet ex contextu juxta ea, quæ præmonuimus ex eodem; scilicet quod per regulam *quid poenitentia seu satisfactio sacramentalis præcipue consistit in voluntate satisfaciendi, ad quam consequitur satisfactio in opere; & quod facta differentiâ inter sensuale & intellectuale, debet attendi proportionata*

proportionata æqualitas satisfactionis cum peccato ; atque ita , cum peccatum quoad intellectuale importet gravem culpam in anima , & quoad sensuale importet gravem poenam temporalem in corpore , in quam commutatur poena æterna , dum ex meritis Christi peccatum dimittitur , ut ex parte satisfactionis detur proportio intellectuali gravi culpæ animæ , debet esse enim in anima voluntas graviter satisfaciendi , quæ quidem voluntas est quid intellectuale ; & quod proportionatur gravi poenæ in corpore debitæ peccato , quæ est quid sensuale , est gravis satisfactio per corpus exhibita , quæ etiam est quid sensuale : unde , cum ex contextu *ratione improprietatis* non sufficiat levis poenitentia in corpore ad liberationem magnæ culpæ in anima , evidens est , quod per *ly levis poenitentia in corpore* principaliter intelligitur animæ voluntas tantum leviter poenitendi vel satisfaciendi in corpore ; cum aliunde ad remissionem culpæ necessario requiratur voluntas satisfaciendi ad proportionatam æqualitatem cum culpa.

XX. Deinde in titulo hujus quæstionis non supponitur in peccatore bona voluntas satisfaciendi , sicut supponitur in antecedenti quæstione , atque ita solutio hujus quæstionis requirit & habet locum pro casu , quod peccator non habet debitam voluntatem satisfaciendi ; & pro hoc casu , ut evidens est ex dictis , solvitur in hac prima solutionis parte ; pro casibus autem , quibus adfit debita voluntas satisfaciendi , solvitur in duabus sequentibus partibus , ex quibus magis manifestatur exposita intelligentia primæ partis solutionis ; dicitur enim in secunda ejus parte : *Sed si culpa est parva in anima , & ei æquipollet poenitentia corporis , liberatus est peccator à poena & culpa* , hoc est , si voluntas satisfaciendi in corpore est proportionatè æqualis parvitati culpæ , & ipsa poenitentia in opere est etiam proportionatè æqualis poenæ correspondenti culpæ , liberatur peccator nedum à culpa , sed etiam à poena. Tertia solutionis pars est ista : *Item , si culpa est magna in anima & poenitentia levis in corpore , sed contritio & dolor & culpa æquipollent in anima , ratione virtutis Sacramenti liberatus est peccator à poena & culpa*. In hoc tertio casu , supponitur in peccatore , nedum contritio , & dolor , per se requisita & necessaria ad remissionem culpæ , sed etiam talis , quod cum levi satisfactione corporali sufficiat ad æquipollendum etiam poenæ temporali correspondenti magnitudini culpæ : ac proinde supponitur extraordinarius dolor contritionis , & cum iste non videatur posse esse fine voluntate , saltem implicità , æqualiter satisfaciendi , ideo *ly*

Alius Text.
PROP. 7.

Alius Text.
PROP. 7.

pœnitentia levis in corpore hîc non potest intelligi de voluntate leviter satisfaciendi, sed de satisfactione in opere; quia in hoc textu supponitur in pœnitente illa contritio, confessio & satisfactio quantum ad voluntatem, quæ requiritur & sufficit, ut virtute Sacramenti dimittatur culpa; hæc autem voluntas satisfaciendi requisita ad Sacramenti effectum, ut ostendimus ex Lullo, debet esse voluntas satisfaciendi cum proportionata æqualitate: adeoque hæc voluntas supponitur in hoc tertio casu, & levitas tantum est in opere inuncto & executo; & quia istud per se est improporcionatum cum pœna, ideo virtute Sacramenti, & quia augetur ejus valor per extraordinarium dolorem, ita ut dolor & opus inunctum æquipollean pœnæ correspondenti gravitati culpæ, ideo tunc liberatur à pœna & culpa.

XXI. Unde in hoc tertio casu, juxta doctrinam à Lullo in textu præmissam, breviter innuitur illa æqualitas cum differentia sensualis, & intellectualis, & culpæ & pœnæ, & melius intelligitur cum casu alio hîc subintellecto, nempe in casu quò supponatur in pœnitente contritio, confessio, & satisfactio bonæ voluntatis, quæ requiruntur & sufficiunt ad remissionem culpæ magnæ per Sacramentum pœnitentiæ, & Sacerdos injungat levem pœnitentiam quam adimpleat pœnitens, tunc iste liberatur à culpa magna, quia contritio confessio & bona voluntas satisfaciendi æquipollent culpæ in anima; quia tamen satisfactio in opere non æquipollet pœnæ correspondenti illi magnæ culpæ, si iste peccator afferat extraordinarium dolorem, ita ut simul cum levi pœnitentiâ inuncta æquipollet pœnæ correspondenti illi magnæ culpæ; tunc virtute Sacramenti, nedum liberatur à culpa, sed etiam à pœna. Et hæc sanè est legitima intelligentia totius hujus quæstionis.

XXII. Porro, quodd mens Lulli sit, quodd ut remittatur culpa, requiritur voluntas satisfaciendi ad proportionatam æqualitatem cum peccato, constat ex ipso, quia ad remissionem culpæ, præter contritionem & confessionem, semper requirit satisfactionem talem, quæ sit proportionata. Sic lib. sent. quæst. 49. agens de modo quo peccator potest cum gratia Dei exire de peccato, ad differentiam Dæmonis, qui non potest, ait: « Verumtamen si peccator multum multiplicat suum intelligere in objectando Deum, & sua attributa, & » vilitatem peccati, culpam & pœnam infernalem & coelestem gloriam, & multum diligit agere pœnitentiam de commissis, tunc se » disponit ad habendam contritionem & pœnitentiam, & mox venit » gratia Dei cum misericordia & justitia, quæ de proprio amabili

» peccatoris sic removet characterem peccati, . . . & tunc peccatum, quod antea erat dilectum, est oditum, & homo est curatus. » Hic sanè ad deletionem peccati requirit satisfactionem seu poenitentiam, quæ sufficit esse in voluntate, & non requiritur esse in opere ad deletionem peccati quoad culpam, & hoc ipsum supponit ubicumque agit de Sacramento poenitentiae. Adeo autem requirit satisfactionem ad justificationem peccatoris, quod q. 92. num. 3. exponens dictum Christi in Evangelio, scilicet, ei qui peccat in Spiritum Sanctum non remitti peccatum, dicit : *Et ideo Christus intendit dicere, quod qui peccat in morte per obstinationem, postquam homo post mortem non potest satisfacere, non remittitur ei peccatum, quia sua definitiva sententia jam est data.*

XXIII. Præterea q. 112. resolvit Lullus quod Deus de sua ordinata potestate non potuerit salvare humanum genus sine satisfactione : Unde q. 131. *Utrum Deus possit dimittere mortale peccatum sine aliqua satisfactione*, ita resolvit : Solutio. *Vade ad centesimam decimam quaestionem*, in qua resolvit quod sine satisfactione non potest dimitti mortale peccatum ; & , ut breviter concludam, semper requirit satisfactionem, ut etiam ostendit textus adductus, num. 12. Quod autem hæc satisfactio debeat esse proportionata peccato, etiam indicatur ab ipso ; quia semper ad peccata gravia, requirit magnam satisfactionem : Unde lib. prov. part. 3. cap. 40. de satisfactione sic scribit : num. 2. *secundum quod offensa est magna, convenit quod satisfactio sit magna.* Et num. 3. *si nimium comedisti & bibisti, satisfac cum jejniis & parum bibere.* In sequentibus numeris similes designat satisfactiones ; & num. 19. ait : *Deo non potes satisfacere, nisi secundum proportionem.* In lib. de anima rat. p. 9. spe. 1. q. 10. *Quomodo anima, quæ est in peccato mortali convertitur in statum gratiæ ?* Scribit : « Anima quæ est in peccato, disponitur ad esse in statu gratiæ in quantum se judicat ad » satisfactionem per conscientiam, contritionem, & poenitentiam, & » petit veniam, & habet placitum de illa vindicta, quam justitia » Dei voluerit facere de ipsa ; & postquam anima se ponit in ratione, » non potest illi deficere gratia Dei, quæ debet concordantiam cum » justitia & misericordia, & per hunc modum Deus benedictus convertit illam de malo in bonum. »

XXIV. Hanc eandem, quam exposuimus, Lulli doctrinam de necessitate voluntatis satisfaciendi pro peccato ad proportionatam æqualitatem, ut culpæ condonatio obtineatur, expressè defendit Egregius Theologus Amort Theol. Eccl. tom. 3. trac. de Sacra-

mento pœnitentiæ disp. 1. q. 2. ubi hanc ponit conclusionem : *Ad veram pœnitentiam jure naturæ exigitur propositum satisfaciendi juxta offensi arbitrium pro obtinenda condonatione culpæ.* Quam probat ex Trident. Sess. 14. cap. 8. ubi sic habetur : *Sanè & divinæ justitiæ ratio exigere videtur , ut aliter ab eo in gratiam recipiantur ; qui ante baptismum per ignorantiam deliquerint , aliter verò qui semel à peccato & dæmonis servitute liberati , & acceptò Spiritûs Sancti donò , scientes templum Dei violare , & Spiritum Sanctum contristare non formidaverint. Et Divinam clementiam decet , ne ita nobis absque ulla satisfactione peccata dimittantur debent ergo Sacerdotes Domini , quantum Spiritus & prudentia suggererit , pro qualitate criminum & pœnitentium facultate , salutare & convenientes satisfactiones injungere : ne , si fortè peccatis conniveant , & indulgentius cum pœnitentibus agant , levissima quædam opera pro gravissimis delictis injungendo , alienorum peccatorum participes efficiantur. Habeant autem præ oculis , ut satisfactio , quam imponunt , non sit tantum ad novæ vitæ custodiam & infirmitatis medicamentum , sed etiam ad præteritorum peccatorum vindictam , & castigationem.* Sanè hujusmodi satisfactio exigitur à Concilio ut in gratiam Dei recipiatur peccator : ac proinde saltem voluntas hujusmodi satisfactionis requiritur in peccatore ut à culpa liberetur.

XXV. Conformiter ad hanc Concilii doctrinam docent Patres ibi ab Amort relati , satisfactionem necessariam esse pro obtinenda remissione peccati quoad reatum culpæ , & quidem ex ipsa natura rerum , ex quibus D. Cyprian. Serm. de lapsis ait : *Putasne Dominum posse citò placari ? Putas facile eum misereri tui ? Orare oportet impensius , justis operibus incumbere , ut crimen & culpa diluatur. Si precem toto corde quis faciat , si ad veniam delicti sui Dominum justis & continuis operibus inflectat , misereri talium potest Deus , roganti potest clementer ignoscere , potest in acceptum referre quidquid pro talibus fecerint Sacerdotes.* D. Gregor. in cap. 15. lib. 1. Reg. *Quid prodest confiteri flagitia , si confessionis vocem non sequitur afflictio pœnitentis ? Tunc namque benè conversum peccatorem cernimus , cum dignâ afflictionis austeritate delere nititur , quod loquendo confitetur. Unde Dominus arborem foliis decoram , sed fructu sterilem , maledixit , quia confessionis ornatum non recipit sine fructu afflictionis.* S. Eligius , Hom. 4. ad pœnitentes : *Si condignam Deo pœnitentiam obtulistis , verè Deo reconciliamini per Christum & per nos ; qui enim peccando factus est ei inimicus , nisi satisfaciendo non potest reconciliari ut fiat amicus.* Plures similes textus videri possunt apud ipsum Amort , tum ibi , tum ubi agit de satisfactione , tum

in opere de Indulgentiis, ubi egregiè probat adhuc tempore Indulgentiæ, debere pœnitentibus imponi congruam satisfactionem.

XXVI. Ex his omnibus colligitur recta Lulli intelligentia in notatis textibus ad q. 21 & 22. Et conformem esse ejus loquendi modum Concilio Tridentino & relatis Patribus, dum non adimplentem pœnitentiam injunctam negat q. 21. absolutum, prout in citatis textibus negatur reconciliatio non agentibus pœnitentiam; ita tamen quòd utrobique intelligatur remissum peccatum quoad culpam, dum cum confessione & contritione adsit voluntas & propositum ad debitam proportionem satisfaciendi; non enim negaretur non pœnitentibus reconciliatio, nisi ipsa voluntas agendi pœnitentiam requireretur ad remittendam culpam; & quia cum quadam æqualitate debet fieri satisfactio, ideo rectè dicit Lullus, q. 22. quòd cum voluntate solùm leviter satisfaciendi in corpore, non dimittitur quoad culpam peccatum grave; quod tamen etiam dimittitur quoad pœnam, si præter confessionem, contritionem, & voluntatem satisfaciendi adsit in opere æquipollens satisfactio; vel talis sit extraordinarius dolor, quòd conjunctus pœnitentiæ, estò levi, æquipolleat gravi peccato.

§. I V.

Cum post ultimum judicium non sit amplius futura variatio diei & noctis, sed dies perpetuus, dicitur in Prop. 8. ex quæst. 31. dies judicii dies æternus, id est invariabiliter duraturus.

XXVII. Octava propositio, quæ notatur ex quæst. 31. est ista: *Et quando quæritur, utrum ille dies (scilicet judicii) sit naturalis? Respondeo quod erit dies æternus.* Sanè nescio quid erroris subolferit iste Censor in hujusmodi verbis; nam idem dicit Lullus, quod Magister Sententiarum in 4. dist. 48. & cum ipso omnes ejus interpretes; ait enim quòd finito judicio, tunc recipiet sol mercedem sui laboris, quia septemplex lucebit, & tunc non erit vicissitudo diei & noctis, sed tantum dies; unde Zacharias: *Et erit dies una, quæ nota est Domino, non dies neque nox; & in tempore vespere erit lux, quia tunc non erit varietas diei & noctis, quæ modò est, sed continua dies & lux;* & post pauca: *Potest etiam intelligi illud Esaiæ ea ratione dictum, quia Sol & Luna tunc non habebunt ortum & occasum, sicut nunc: unde Isidorus illud Esaiæ quasi exponens ait: Post judicium sol laboris sui mercedem suscipiet; unde Propheta: Lucebit septemplex, & non ve-*

niet ad occasum nec sol nec luna, sed in quo creati sunt stabunt, nè impii in tormentis sub terra positi fruantur luce eorum, unde Habacuc: sol & luna steterunt in ordine suo. Ecce aperte dicit solem & lunam tunc lucere, sed stabiliter permanere.

XXVIII. Itaque sensus Magistri Sentent. est, quòd, finito iudiciò, non erit amplius occasus & ortus solis, sed pura & perpetua dies, ita ut, dum juxta cursum regularem futura erat vespera cum tenebris, non succedent tenebræ, sed erit pura lux, & continua dies: unde, cum dies naturalis sit duratio viginti quatuor horarum cum successione diei & noctis, licet dies iudicii inceperit, ut ita dicam, tamquam dies naturalis, non finietur ut dies naturalis, quia, finito iudiciò, statim cessabit motus naturalis corporum cœlestium, in ordine suo statuentur sol & luna, & ex tunc non occidet sol nec succedet nox, sed erit dies perpetua; atque ita ille dies, qui incepit ut dies naturalis, reddetur dies æviternus, quia lux sua perpetuò durabit absque vicissitudine & mutatione lucis & tenebrarum; dies enim æviternus nihil est aliud, quàm dies perseverans ut dies iudicii; & hoc explicat Lullus, dum dicit quòd ille dies erit dies æviternus.

XXIX. Idem, quòd Magister, explicat D. Bonaven. in 4. dist. 48. num. 5. ubi ad illa verba: *Non erit vicissitudo diei & noctis* sic scribit: "Videtur malè dicere, quia si hæc luminaria facta sunt propter diem & noctem, sicut dicitur 1. Genesis: ergo cessante nocte debet cessare luminare, quod factum est, ut præesset nocti. Respondeo dicendum, quòd, cum dicitur quòd luna facta est, ut præesset nocti, non assignatur ratio productionis substantiæ, sed paucitatis luminis, ut esset tantum, quod compateretur noctem; secundum substantiam verò factum propter perfectionem universi; & quoniam non erit nunc nox, sed dies perfecta, dabitur lunæ luminositas competens diei, qualis est luminositas solis, & solis luminositas crescet usque ad perfectum diem. Itaque illa dies iudicii ex sensu D. Bonaven. reddetur dies perfectus absque lucis casu, & tenebrarum vicissitudine, ac proinde erit dies æviternus, nam ex ipso in 2. dist. 2. art. 1. q. 1. num. 4. ex D. Augustino. *Ævum enim solius esse incommutabilis est mensura; hoc autem ævum ex ipso ibidem est æviternitas*, ac proinde ille dies incommutabilis erit æviternus.

XXX. Explicatio, quam verbis Lulli adhibuimus, conformis est ejus doctrinæ in lib. Sent. quæst. 41. ubi, num. 1. ait, quòd ævum est una pars temporis remota ab omni motu naturali, & subiungit: Unde,

etiam Angelus non transeat in motum, quoad se non transit in tempus, quod non potest esse sine motu, sed transsit in tempus æviternatum, in quo est mensuratus cum mensura indivisibili & immobili & inalterabili, & ideo illa mensura est sine parte post partem, tota simul existens: & illam mensuram vocamus ævum, vel æviternitatem, & Angelus in ipsa existens est æviternus: Unde, cum juxta Lullum illud dicatur æviternum, quod indivisibiliter, immobiliter, & inalterabiliter perseverat: & dies judicii, judicii finitò, debeat sic perseverare semper dies absque vicissitudine lucis & tenebrarum, propterea consequenter ad hanc doctrinam dicitur in hac quæst. 31. *dies æviternus*, quod immeritò notatur, cum nullius erroris præferat speciem.

§. V.

Docet Lullus in Prop. 9. ex quæst. 35. quòd post prævias factus delineationes, in instanti & momento, quò perficitur ejus delineatio, figuratur mas vel fœmina.

XXXI. Tandem ad quæst. 35. hæc notantur verba in Prop. 9: *In momento accipit masculinitatis figuram aut fœmininitatis, ut cum puncto quantitatis & in instanti temporis sit genitus.* Quæst. 35. Et hæc est Censura: *Quærit, utrùm in momento fiat masculus aut fœmina figuratè, id est, (ut arbitror) utrùm in matrice mas & fœmina formantur in uno instanti, & respondet, ut ait propositio; quod non nisi de Christo dicitur quòd sit formatus in instanti.* Quantum necesse sit, non solas propositiones à textu avulsas per se solas, sed collatas contextui, considerare, ut proprius Autoris sensus dignoscatur, ferè in omnibus Lulli hucusque examinatis Censuris patenter est visum; hoc autem lagere maximè oportet in hac præsentì difficultate; & sanè miror, hunc Censorem, qui totum hujus quæstionis legit contextum, videri, velle nodum, ut ita dicam, in scirpo quærere, dum negligens antecedentia textus verba, impegit in ultima, quæ antecedentibus cohærent, & juxta ea suum habent sensum. Quare ut videatur nullum esse ad hujusmodi notam fundamentum, integrum exponam textum.

XXXII. Itaque ita scribit Lullus: "*Quæstio 35. utrùm humidum spermaticum viri cadat (cedat) in substantiam fœtus? Et utrùm illud humidum spermaticum & sensibile sit humidum radicale? Et utrùm in momento sit masculus aut fœmina figuratè? Solutio. Ad solvendum*

Text. prop.
9.

quæstionem istam oportet considerare secundam speciem regulæ C. (Quid) & secundam speciem regulæ D. (de quo) & nonam regulam (quomodo) & definitionem trianguli rubei (scilicet , principii , medii & finis) dicendo sic : Quòd humidum spermaticum viri positum in matrice mulieris , per modum conjunctionis cum humido quod invenit , fit forma humidi radicalis , & veniens in suo proprio humido nutrimentali , convertit humidum nutrimentale , quod invenit , generando per generantem naturalem & cum adjutorio corporum cælestium : Ita quòd sperma corrumpitur , & de ipso est (in manusc. fit) fœtus genitus , in quo motus transmittentis quiescit in movendo , & lineando , augmentando & nutriendo per vegetativum : ita quod est medium sive terminus (in manusc. ita quod medium est subiectum , sive terminus) ad quem influentia & refluentia , principii & finis tendit ; & ideo humidum radicale (est) genitum , & spermaticum cadit in substantiam fœtus , & vivit per humidum nutrimentale , ut dictum est ; & illud humidum radicale est insensibile & invisibile secundum formam , & depuratur in matrice mulieris , sicut aurum in fornace ; sed sua figura est visibilis , & per tactum ratione dulcedinis est sensibilis & in momento recipit masculinitatis figuram (in ultimo suæ perfectionis puncto) aut fœmininitatis , ut cum puncto quantitatis , & in instanti temporis fit genitum.

XXXIII. Nunc provocho ad cujuscumque sinceritatem , ut dicat , an ex his verbis omnibus possit , vel à longè , conjici , Lullum sentire , quòd in matrice mas & fœmina in uno instanti formantur ? Ut eadem objicitur . Certè præmittit Lullus debere considerari principium , medium , & finem in hominis ex spermate generatione , quæ præcisè requirunt successionis tractum . Deinde dicit quòd motus transmittentis , id est influxus generantis , quiescit in movendo , & lineando , & augmentando , & nutriendo ; quid amplius dici poterat ad intelligendum tractum successivum , qui requiritur ad formationem fœtus ? Hæc enim omnia , quæ per temporum spatia sunt , sunt motus prævii necessariò requisiti , ut fiat genitum . Præterea dicit etiam Lullus , quòd illud humidum radicale *depuratur in matrice mulieris , sicut aurum in fornace* ; atque ita , sicut aurum in fornace per varias temporum moras depuratur & perficitur , sic illud humidum per tractum temporis depuratur in matrice & perficitur , ut tandem in ultimo complemento suo sit genitus mas vel fœmina : unde post descriptam tantam naturæ operationem tractu successivò peractam , nihil est conformius , quàm illa verba , quæ subjicit : & in momento recipit masculinitatis figuram , aut fœmininitatis , ut cum puncto quantitatis

quantitatis & in instanti temporis sit genitum, intelligere de momento ultimæ dispositionis, vel ultimæ perfectionis, quæ requiritur ad figuram masculi vel foeminæ; hæc enim ultima perfectio post prævias delineationes advenit in aliquo momento & instanti temporis: in illo ergo instanti temporis perfectè est formatus mas vel foemina; atque in instanti ultimo ad alia subsequente est genitus perfectè; & ideo nullatenus intelligitur de puro instanti non subsequente ad alia, sed de ultimo complente totum tempus requisitum ad hujusmodi formationem.

XXXIV. Quod autem hominis, & cujuscumque alterius generatio, fiat, non in instanti, sed per successivas moras, docet Lullus frequentissimè, ut in lib. *quæst. per Art. demonstrat. solub.* q. 134 & 135. in lib. *Chaos* (tom. 3.) latè describit omnia principia quæ ad generationem cujuscumque elementati requiruntur, & præter mixturem & digestionem elementorum, quæ in omnibus concurrunt, in animalibus; & signanter in homine, dicit requiri substantiam vegetativam, sensitivam, & imaginativam, quæ cum elementativa debent uniri & componi, corruptò prius esse specificò spermatis, ex quo fit embryonis generatio; hæc autem omnia variò tempore fiunt & non in instanti: unde Titulo *de tempore chaos*, num. 5. ex hujusmodi operationibus probat dari tempus, sic: *generatio & corruptio, mixtio & digestio, non possunt sine tempore se habere: ergo oportet tempus aliquid esse*; & hoc idem indicat, in Lib. *Prov.* (tom. 6.) par. 2. cap. 92. num. 8. dicens: *In illo tempore, quò embryo est dispositus ad esse animatus animâ rationali, creatur anima*; nam si in instanti formaretur homo, non requireretur tempus ad dispositionem embryonis.

XXXV. Hæc omnia ampliùs patent, in lib. *de homine* (tom. 6.) dist. 1. par. 1. *de corpore hominis*, uti, postquam explicuit quomodò elementa miscentur, digeruntur, & componuntur in corpore hominis, tit. *de vegetativa*, num. 1. exponit modum generationis humanæ dicens: « Unde dicimus quòd vegetativa in homine sit una forma, quam vocant potentiam vegetativam, & venit cum semine viri, » quod transmittit in foeminam, & illud semen est elementatum de » quatuor elementis, in quo vegetativa est plantata, & cum semen » viri est introductum in foemina, conjungit se ejus materia cum » materia seminis foeminæ per contactum, & vegetativa movet formam seminis quem vir transmittit in foeminam, & informat formam seminis mulieris, ut forma seminis foeminæ moveat mate-

„ riam seminis foeminae, & talis motus fit cum dulcedine, quia ele-
 „ mentativa intrat in vivum esse sub habitu vegetativae, quae est ani-
 „ ma vegetativa, vivens & convertens & transmutans influentiam,
 „ quae venit de foemina, per generationem in essentiam seminis,
 „ quod venit à viro... & sicut granum frumenti exit supra terram
 „ generando ex terra & augmentando arborem, quam facit, ita
 „ exit vegetativa seminis viri de elementativa, & facit arborem,
 „ quae est corpus hominis, per generationem, hoc est corpus em-
 „ brionis ». Similiter, tit. *de sensitiva* dicit: „ quoddam movente unâ
 „ substantiâ aliam, sic fit corpus embrionis lineatum, formatum & figu-
 „ ratum, animatum, & vivum; & tit. *de imaginativa*: & sic embrio est
 „ totus filius vel filia viri & foeminae per omnes suas partes corporales...
 „ de quibus est formatus, lineatus, figuratus, & compositus per gene-
 „ rationem. Tandem eadem dist. 1. par. 2. de Ani. ratio. tit. *Quaestio*
de quando, num. 2. dicit: „ Alia opinio est vera, quoddam Deus creat
 „ animam in illo tempore, in quo embrio est lineatus, organisatus
 „ & formatus per elementativam, vegetativam, sensitivam, & ima-
 „ ginativam, & in illo tempore conjungit Deus illam cum corpore,
 „ & ex ipsa & corpore fit homo.

XXXVI. Instantaneam Christi conceptionem & formationem do-
 cet Lullus tanquam ei peculiarem, & ex consequenti tenet necessa-
 riam esse successionem in aliorum naturali conceptione. In Lib. de
 Deo & Jesu-Christo, par. 2. *de Jesu-Christo*, q. 7. *quando fuit Je-*
sus, num. 2. ait: „ Jesus in quantum homo fuit principiatus homo
 „ in divina natura, & fuit principiatus de humana natura in utero
 „ nostrae gloriosae Dominae Sanctae Mariae; & propterea in illo inf-
 „ tanti, quod nostra Domina illum concepit, ex ipsa fuit assumpta
 „ humana natura, & fuit factus homo in divina natura sine succes-
 „ sione & motu principii, medii, & finis, quae in uno momento cum
 „ successione & motu non possunt esse secundum naturam ». Et n. 3.
 „ Non potuit esse successio nec motus in tempore Incarnationis; &
 „ ideo in illo instanti & momento Jesus in utero nostrae Dominae ha-
 „ buit omnia organa & membra corporis formata & figurata ». Hanc
 eandem doctrinam de instantanea Christi conceptione docet Lullus
 in aliis locis, ita quoddam supernaturaliter fuit facta, & consequenter
 mens ejus est, quoddam in naturalibus hominum conceptionibus non
 est instantanea embrionis formatio, ut in Lib. *de Doctrina Pue-*
rili, cap. 6.

DISSERTATIO IV.

De quibusdam Propositionibus circa Deum & Angelum de promptis ex variis quæstis five quæstionibus, ad calcem ejusdem Lib. Quæst. ad Thomam Attrebatensem scriptis.

§. I.

Rectè Lullus explicat Deum per esse illam bonitatem, quæ est ratio bono, quod agat bonum infinitum & æternum.

I. **I**DEM, ut puto, Cenfor, qui præfatum librum *quæst. ad Thomam Attrebatensem* examinavit, sequentes notæ dignas propositiones existimavit, quamvis nulli censuram adjecerit; & quidem primò hæc notat verba: *Quæritur quid est Deus? Solutio. Deus est illa bonitas, quæ æternaliter & infinite est ratio bono, quod agat bonum æternum & infinitum.* Quid in his verbis animum offendat non video, nam quod Deus sit bonitas, nedum non est quid absonum, imò est veritas definita contra Gilbertum Porretanum. Quod divina bonitas æternaliter & infinite sit ratio bono, quod agat bonum, æternum & infinitum, nulli est dubium; certum est enim, quod Pater bonus Filium bonum producit de sua bonitate; ac proinde bonitas est ratio Deo, cur bonum Deum producat, sicut sapientia est ratio cur sapientem, & æternitas est ratio cur æternum producat; nisi enim Deus produciens esset bonus & æternus, bonum & æternum Deum non produceret. Neque videtur notanda hæc Lulli sententia ed quia exponitur ut Dei definitio, quæ essentiam ejus debet exprimere, qualis non est in Deo agere bonum infinitum & æternum; nam, præscindendo ab hoc, notum est ad quæstionem *de quid* variè posse responderi, dummodo aliquid proprium subjecti explicetur, quamvis non pura essentia manifestetur. Fortè tamen notatur hæc locutio, quia dum dicitur, quod *Deus est illa bonitas, quæ est ratio bono, quod agat bonum*, intelligitur Deum alteri bono esse rationem quod agat bonum; ad hoc, etiam absque fundamento colligitur.

II. Ut autem hæc omnia melius pateant, iterum, repeto, quod, ut mens alicujus Autoris percipiatur, attendi debet methodus, quæ

scribit, & scopus, quem intendit. Præmonui jam ab initio ex Prologo hujus libri, ipsum ad hoc esse scriptum; ut quæstionibus à Magistro Thoma Attrebatensi propositis satisfaceret Lullus; & quidem, non utcumque, sed juxta principia & regulas suæ artis; & specialiter quoad definitiones huic operi subjunctas fuisse hanc methodo usum, ad ejusdem Magistri Thomæ petitionem, constat ex præfatione ad easdem præfixâ, in qua ait Lullus: „Magister Thoma, vos misistis
 „mihi vocabula, quæ sequuntur, ut definirem vobis *per artem*; &
 „sciatis (in Manuscr. & *vos sciitis*) quodd secundâ regula (nempe
 „quid) est de definitionibus, in quantum quærit de *quid*, & quia
 „dictum est in arte, quodd mixtio principiorum & regularum artis
 „fieri debet solvendo dubia, & ad inveniendum secreta: ideo data
 „est doctrina ad faciendum definitiones rerum, miscendo princi-
 „pium cum principio, regulam cum regula, & principium cum re-
 „gula, ut definitio appareat; & de hoc volumus exemplificare istò
 „modò super ea, de quibus vos quæritis.

III. Unde planum est, quodd ea, quæ hic dicuntur, ad hujusmodi methodum sint exigenda; ita tamen ut nunquam absonum exponant sensum; intelligentia tamen non ex verbis nudis à textu avulsis, sed cum contextu collatis desumi debet: quo pacto est manifestum, nihil malè olere in textu Lulli sic considerato, qui integrè ita habet: *Quæritur primò quid est Deus? Solutio. Deus est illa bonitas, quæ æternaliter & infinite est ratio bono* (in alia editione, *bona*) *quodd agat bonum æternum & infinitum. Ista definitio est facta per definitionem bonitatis, & applicata ad magnitudinem & æternitatem Dei; & in ipsa apparet mixtio principiorum per primam speciem* (melius in Manuscr. & *prima species*) *secundæ regulæ.* Ex hoc videtur, quodd cum bonitas, ut constat ex tom. I. diff. I. §. 2. à num. XIX. juxta artem Lullianam sic definiatur: *Bonitas est id, ratione cujus bonum agit bonum*, bonitas divina applicata ad magnitudinem sive infinitatem & æternitatem æternaliter & infinite est ratio bono, quodd agat bonum infinitum & æternum, & quodd appositè, juxta præscriptam methodum, sit data hæc explicatio.

Alius Text.
prop. 1.

IV. Quodd autem bonitas generaliter, seu per se sumpta, sit ratio bono quodd agat bonum, & quodd hoc per se conveniat divinæ bonitati, satis superque constat ex dictis tom. I. diff. I. à num. XIV. atque ita absque ullo scrupulo asseverari debet, quodd bonitas divina, quæ est infinita & æterna, imò ipsa infinitas & æternitas, est infinite & æternaliter ratio bono, quodd agat bonum infinitum & æternum; &

quodd hoc potest ipsi attribui ut ejus definitio; respondendo ad quæstionem, *quid est bonitas divina?* præscindendo an hoc eidem competat, vel non competat, essentialiter; cum enim rerum essentialia adeo difficulter noscantur, & in quo consistant plerumque disceptetur, sufficit ad rectam definitionem, aliquam proprietatem subjecti definiti explicare: ac proinde, dum percipiuntur hæc verba: *Illā bonitas, quæ æternaliter & infinite est ratio bono, quodd agat bonum infinitum & æternum*, statim & absque ulla ambiguitate intelligitur bonitas divina; hæc enim propriè & per se est illa bonitas, quæ infinite & æternaliter est ratio bono quodd agat bonum, quia est ipsi adeo proprium, ut nulli alteri nisi ipsi soli possit convenire.

V. Nunc propiùs accedendo ad Lulli responsionem, dum quæritur: *Quid est Deus?* quā dicit: *Deus est illa bonitas, quæ æternaliter & infinite est ratio bono, quodd agat bonum infinitum & æternum*: percontor: non-ne ad eandem quæstionem *quid est Deus?* Rectè responderetur: *Deus est bonitas infinita & æterna?* Vel: *Deus est illa bonitas, quæ est infinita & æterna?* Proculdubio hoc ita est, nam ad quæstionem de *quid*, rectè respondetur explicando proprietatem subjecti, quā sufficienter à quocumque alio distinguatur; Deo autem ita proprium est esse illam bonitatem, quæ est infinita & æterna, vel esse bonitatem infinitam, & æternam, quodd nulli alteri possit competere, & per hoc sufficienter distinctus à quocumque alio indigitatur: unde, cum ex dictis, satis superque constet, quodd bonitas infinita & æterna est illa bonitas; quæ infinite & æternaliter est ratio bono, quodd producat bonum infinitum & æternum, ad quæstionem *quid est Deus?* Rectè respondet Lullus: *Deus est illa bonitas, quæ infinite & æternaliter est ratio bono, quodd agat bonum infinitum & æternum*; imò explicatiùs innotescit Deus per hanc responsionem, quàm si solum diceretur, & quidem rectissimè: *Deus est illa bonitas, quæ est infinita & æterna*; quia in Lulli responsione manifestatur proprietas divinæ bonitatis infinitæ & æternæ, scilicet quodd sit ratio ad agendum bonum.

VI. Hinc patet, Lullum, attendendo ad infinitam Dei simplicitatem, & contradicendo erroribus Gilberti Porretani aliorumque apud Petavium, tom. 1. Theol. Dogm. considerantium divinas perfectiones, vel tamquam ab eo distinctas, vel tamquam adscititias, definire Deum per hoc, quodd est suamet infinita & æterna bonitas, & ita ut hujus bonitatis immensæ explicet proprietatem, quā ipsimet Deo infinite & æternaliter est ratio, quodd agat bonum; nemo autem

inficiari potest, Deum rectè definiri per esse idem cum suis perfectionibus; & multo minùs, dum huiusmodi perfectiones secundum aliquam sui characteristicam proprietatem enodantur. Proinde evanescit scrupulus ille ab initio indigitatus, quasi Lullus intenderet, Deum quàm est illa bonitas, &c. *esse alteri bono ratio, quòd agat bonum*; planum est enim per dictam definitionem explicari per identitatem cum sua infinita & æterna bonitate; quæ, dum dicitur *esse ratio bono quòd agat bonum*, non alteri bono potest intelligi esse talis ratio, nisi illi bono, cuius est bonitas, vel illi bono, quod est ipsamet bonitas; ac proinde obvium est intelligere, quod Deus est illa infinita & æterna bonitas, quæ infinitè & æternaliter est ipsi bono, Deo, ratio quòd agat bonum infinitum & æternum: in qua explicatione nihil non catholicum suspicari potest, atque ita immerito notatur.

VII. Porro quoad Dei definitionem nota est illa ad Moïsen Dei responsio: *Ego sum qui sum*, quam exactam esse Dei definitionem ostendunt Patres apud Petavium, Theol. Dogm. tom. 1. lib. 1. cap. 6. & ibi num. 8. D. Ambros. in Psalm. 48. ita habet: *Denique cognoscens mentem ejus Deus, non respondit nomen, sed negotium: hoc est rem expressit non appellationem, dicens ego sum qui sum; quia nihil tam proprium Dei, quam semper esse; & tamen si ad corticem attenditur illa responsio, non videtur definitio, cum alia præter Deum etiam sint; quia tamen illi est proprium per se & æternaliter esse, apta judicatur explicatio. Etiam illa expressio, quàm Deus dicitur esse bonitas infinita & æterna, valdè propriè de Deo dicitur ex Bernardo, serm. 80. in Cantica, dicente: Si quid de Deo propriè dici possit, rectius congruentiusque dicetur: Deus est magnitudo, bonitas, justitia, sapientia, quàm Deus est magnus, bonus, justus & sapiens: quòd autem Lullus Deum explicans, dicat ipsum esse illam bonitatem, quæ est ratio bono quòd agat bonum infinitum & æternum, ex dictis supra clarè constat quàm aptè fit dictum.*

§. I I.

Lullus, dum dicit, quod Deus habet in se deificantem, deificabilem, & deificare, intelligit, ut explicat, quod habet tres Personas designatas per illos correlativos.

VIII. Hæc alia, locò citatò notantur verba: *Quid habet Deus in se coëssentiale, substantiale, & naturale?* Solutio. Deus habet in se coëssen-

*ialem, substantialem & naturalem deificantem, deificabilem, & deificare ; hoc est Beatissimam Trinitatem ; alioquin potestas non esset in Deo , per quam posset esse deitas sustentata ; neque naturam haberet ad concretum , quod est Deus ; neque in ipsa deitate potestas haberet suam definitionem , eò quòd in ipsa deitate , potestas non esset hoc , per quod divina bonitas, magnitudo , &c. possunt existere & agere. Ad hæc intelligenda præmittit Lullus ante solutionem, se respondere per definitionem potestatis ; quia scilicet per definitionem potestatis probat assertionem, quâ ad quæstionem propositam respondet, videlicet : *Deus habet in se coëssentialem, substantialem, & naturalem deificantem, deificabilem, & deificare, hoc est Beatissimam Trinitatem.**

IX. Sanè hæc responsio , si paulisper reflectatur , per seipsam est patens , cùm sensum suum explicet Lullus , videlicet deificantem, deificabilem, & deificare esse beatissimam Trinitatem ; atque hic est sensus solutionis : *Deus habet in se coëssentiales, substantiales, & naturales tres Personas, vel Patrem, Filium, & Spiritum Sanctum, qui sunt deificans, deificabilis, & deificare.* Non est ulla difficultas , quòd unaquæque divina Persona est coëssentialis, substantialis & naturalis ; quòd autem Pater, Filius, & Spiritus Sanctus sint deificans, deificabilis & deificare, ut exprimit Lullus, intelligitur per hoc , quia deificans est Deus primâ productione producens Deum, seu generans Deum ; deificabilis est Deus primâ productione productus, seu Deus genitus ; & deificare est actus ab utroque per amorem procedens, amboque connectens ; & in hoc sensu esse intelligendos deificantem, deificabilem, & deificare in hoc textu convincitur ex eodem, quia apertè dicitur eos esse Patrem, Filium, & Spiritum Sanctum ; ac proinde debent intelligi eò sensu, quòd specialiter dictis Personis conveniunt ; prout explicuimus.

X. Nec est necesse quòd hæc omnia explicentur in his quæstiunculis ; quia, nedùm præsupponitur tota doctrina data in hoc libello, sed etiam expressa in arte generali, ad quam consequitur totus liber ; & quæstiones proponuntur à Viro docto, in arte generali & phrasibus Lulli initiato ; ac proinde sufficit indicare sensum suâ phrasi, ut ille solutionem intelligat ; cùmque in arte generali sufficienter sit explicatum, qualiter per correlativa, scilicet deificans, deificabilis, & deificare, & alia similia, intelligantur Pater, Filius, & Spiritus Sanctus, non est necesse ad intelligentiam hujus solutionis, hæc omnia hic repetere. Porro quomodo juxta mentem Lulli, & coherentè ad sensum Sacræ Scripturæ & Patrum, hæc intelligantur,

explicatum manet, tom. 2. cap. 2. & diffusius toto cap. 4. ac proinde non oportet huc ea repetere.

XI. Præterea in ipsomet libello hæc sufficienter explicantur in variis locis, præsertim, quæst. 5. nam ibi num. II. ex hoc *quod bonitas est id ratione cuius bonum agit bonum* inferuntur in ipsa bonificans, bonificabilis, & bonificare coessentialia, & substantialia; & hoc in generatione & spiratione; ita quod Pater generans Filium sit bonificans, quatenus ipsum producit bonum, & Filius sit bonificabilis & bonificatus seu productus bonus; & in hac productione est bonificare, seu actus quo Pater producit Filium bonum, hoc autem bonificare essentialiter est Pater ac Filius; & quia in spiratione Pater & Filius producunt Spiritum Sanctum bonum per amorem, illud bonificare, quod per amorem exit & procedit ab ambobus, est Spiritus Sanctus: & cum idem sit discursus de bonitate & deitate, ac eorum correlativis, sicut per bonificantem intelligitur Pater producens bonum, ita per deificantem intelligitur Pater producens Deum; & sicut per bonificabilem intelligitur Filius, ita per deificabilem; & sicut per bonificare procedens ab ambobus per amorem intelligitur Spiritus Sanctus, ita per deificare. At pro maiori intelligentia consulantur loca citata, tom. 2.

XII. Varias rationes adducit Lullus, deductas ex definitione potestatis, in notato textu, in ostensionem suæ solutionis: *Prima est: alioquin potestas non esset in Deo, per quam potest esse Deitas sustentata*; cum enim *potestas sit id ratione cuius bonitas magnitudo*, &c. possunt *existere & agere*, ut explicat ejus definitio, nisi in Deo esset deificans, deificabilis, & deificare, deficeret Deo potestas agendi, & Deitas sub potestate, vel per potestatem, non esset in Deo principium, quo productionis divinæ; seu non posset esse ratio, cur Deus Deum produceret. *Secunda ratio est: Neque (Deitas) naturam haberet ad concretum, quod est Deus*; cum enim natura sit principium operationum, nisi Deus ratione Deitatis produceret Deum, & sic esset in Deo deificans, deificabilis, & deificare, Deitas non haberet naturam ad concretum, quod est Deus, id est non haberet rationem & characterem naturæ, quod est se habere ad operationem; cum deficeret Deo operatio quâ Deus produceret Deum. *Tertia, ratio est: Neque in ipsa Deitate potestas haberet suam definitionem, eò quòd in ipsa Deitate, potestas non esset hoc, per quod divina bonitas, magnitudo*, &c. possunt *existere & agere*. Dum dicitur quòd per potestatem divina bonitas, magnitudo, &c. possunt agere, non intelligitur absolute

lutè & ut quòd, sed ut quo & tamquam ratio agendi: sic ergo divina bonitas, magnitudo, &c. non possent agere ratione potestatis in Deitate, si in ipsa non essent deificans, deificabilis, & deificare; quia, nisi ita esset, Deus bonus ratione bonitatis non produceret Deum bonum, nec Deus magnus ratione magnitudinis produceret Deum magnum, &c. & sic potestas in Deitate non haberet suam definitionem, quam supra exposuimus.

§. III.

Rectè docet Lullus in 3. quæst. notata, quòd Angelus habet in se formam, materiam & conjunctionem spirituales, ex quibus est substantialiter & essentialiter.

XIII. Alia Lulli doctrina, quæ ibi notatur, est ista: *Quæritur quid habet Angelus in se sibi coëssentiale, substantiale, & naturale?* Solutio. *Angelus habet in se formam & materiam, & conjunctionem, ex quibus est constitutus substantialiter, essentialiter, & naturaliter; alioquin non haberet ex quo esset, neque sua principia possent inesse Angeli quietem habere, neque ipse Angelus posset in se existere & agere naturaliter.* Plura complectitur hic textus, ad quæ danda est satisfactio; & quidem quoad sensum, qui primò videtur fuisse notatus, quatenus dicitur Angelum esse constitutum ex forma & materia & earum conjunctione, jam tom. 2. cap. 14. explicuimus qualiter sine ulla erroris umbra intelligatur forma & materia in substantiis spiritualibus creatis; & idem manifestavimus in hoc tom. 3. Dist. 1. Dissert. 7. §. 3. à num. 10. ac proinde supervacaneum est in hoc djutius immorari.

XIV. Attamen, ut alia, quæ fortè notantur in hoc textu, intelligentur, habenda est ante oculos Lulli doctrina super creaturarum constitutione. Itaque prima & primitiva principia, ex quibus constituuntur creaturæ, sunt similitudines divinarum perfectionum, nempe bonitas, magnitudo, duratio, &c. ac proinde ex istis est constituta substantia Angeli. Hæc prima principia sunt substantia, & essentialia, & naturalia, quia ad essentiam, substantiam & naturam Angeli spectant, sicut & cujuslibet alterius substantiæ creatæ. Dicta principia in Angelo sunt distincta ab invicem, quia sunt finita & terminata, ita ut bonitas tantum est bonitas, & non magnitudo; & quia sunt distincta, ut constituent Angelum, mutuo se afficiunt, ita


ut bonitas sit magna per magnitudinem, & magnitudo bona per bonitatem, & sic de cæteris: & propterea in unaquaque ex his creatis perfectionibus est ratio activa, ratio passiva, & actus de suo genere: unde cum omnes constituent æqualiter substantiam Angeli, ex ratione activa ipsarum omnium fit una ratio activa, & ex ratione passiva omnium fit una ratio passiva; & ex actu omnium, fit unus actus, seu connexio. Ratio activā coalita ex omnium rationibus activis, est forma; ratio passiva coalita ex omnium rationibus passivis, est materia; & actus coalitus ex omnium actibus est connexio seu conjunctio earum; & ita, mediantibus istis tamquam formā, materiā, & unione, componitur Angelus ex suis primitivis principiis seu similitudinibus divinarum perfectionum.

XV. Inde est, quod innotato textu dicitur, quod Angelus ex dicta forma, materia & conjunctione *est constitutus essentialiter, substantialiter & naturaliter*, quia, sicut dictæ perfectiones, scilicet bonitas, magnitudo, &c. sunt Angelo essentielles, substantiales, & naturales, ita tales sunt dictæ rationes; ac proinde ex ipsis est constitutus Angelus essentialiter, substantialiter & naturaliter. Ratio, quæ ad hoc assignatur, nempe: *Alioquin non haberet ex quo esset*, est patens, quia Angelus, cum sit substantia creata, est per compositionem ex illo ex quo est; & nisi essent in ipso dicta forma, materia, & conjunctio, non haberet ex quo esset compositus. Alia ratio additur: *Neque sua principia possent in esse Angeli quietem habere*; quia dicta principia, ut in Angelo quietem habeant, debent mutuo se afficere & componi, ut in ipso quiescant; hoc autem non esset, nisi mediante dicta ratione activā, passivā, & connexivā se mutuo afficerent, & Angelum componerent. Tandem subjungitur alia ratio: *Neque ipse Angelus per se posset existere & agere*; hoc autem est, quia, nisi in se habeat totam rationem essendi, quæ comprehendit rationem activam, passivam, & connexivam, per se non existeret, neque posset per se agere naturaliter, quia non haberet rationem activam; & si non haberet in se rationem passivam, non haberet in se aliquid in quo ageret, quia hoc necessariò debet esse ratio passiva; ac proinde non posset agere naturaliter.

XVI. Fortassè hic textus notatur propter hoc, quia quæritur: *Quid habeat Angelus in se sibi coessentiali, substantiali, & naturali?* Hæc autem quæstio est proportionatè eadem cum antecedenti in qua quæritur: *Quid habeat Deus in se coessentiali, substantiali, & naturali?* Ac proinde utriusque solutio debet esse eadem proportionatè:

ita ut, vel illa, quæ habet Deus in se coëssentialia, substantialia, & naturalia, quæ sunt deificans, deificabilis, & deificare, sint in Deo forma, materia & conjunctio, quemadmodum in Angelo; vel forma, materia, & conjunctio, quæ sunt id, quod Angelus habet in se coëssentiale, substantiale, & naturale, sunt quædam Trinitas Personarum in Angelo, quemadmodum id, quod habet Deus coëssentiale, substantiale & naturale, est Beatissima Trinitas divinarum Personarum.

XVII. At, licet eisdem terminis sit concepta utraque quæstio, non eadem est in utrâque intelligentia, nec eadem est utriusque solutio. Constat enim coëssentiale esse quod ad eandem essentiam attinet, five eam participando, five eam constituendo; & quia forma, materia & conjunctio in Angelo eandem Angeli essentiam constituunt, ideo dicuntur coëssentiales; quia verò tres divinæ Personæ participant eandem divinam essentiam, & sunt eadem essentia, licet eam non constituent, quemadmodum forma, materia & conjunctio constituunt Angelum, ideo dicuntur esse Deo coëssentiales, sicut etiam consubstantiales & connaturales, quin, licet una sit deificans, altera deificabilis, & altera deificare, se habeant in Deo tamquam forma, materia, & conjunctio, sed tamquam Persona generans, genita, & spirata; sicut forma, materia, & conjunctio in Angelo, licet sint coëssentiales, quatenus eandem essentiam constituunt, sint etiam substantiales, utpotè partes substantiæ ejusdem; & sint naturales, utpote ex eisdem est, & per easdem operatur ejus natura: non sunt nisi forma, materia, & conjunctio ejusdem, non autem quædam Trinitas Personarum ejusdem essentiæ Angelicæ; sunt tamen quædam Trinitas correlativorum in Angelo, ex quibus intellectus fide perductus potest ascendere ad cognoscendum supremos correlativos in Deo, qui sunt Pater, Filius, & Spiritus Sanctus; & ad hoc innuendum eisdem ferè verbis utrasque proposuit Lullus quæstiones.



INDEX TITULORUM, DISTINCTIONUM, AC DISSERTATIONUM TOMI III.

SYNOPSIS CAPITIS.

Page 3.

DISTINCTIO I.

*De prima classe Censurarum super lib. B. Raymundi Lulli inscriptum :
Disputatio Raymundi & Eremitæ super aliquibus dubiis Quæstionibus
Sententiarum Magistri Petri Lombardi , prolatarum.* pag. 9.

DISSERTATIO I. De demonstratione Mysteriorum Fidei ,
quoad Censuras Textuum Quæstionis 1. 12. & aliarum , quæ circa
hoc notantur; & de Fidei necessitate. pag. 9.

§. I. Afferuntur Textus & Censuræ ; & ostenditur non esse erro-
neum Mysteria Fidei posse demonstrari Fide & revelatione sup-
positâ. *ibid.*

§. II. Ostenditur immeritò notari à laudato Censore Textus ex dic-
tis quæstionibus excerptos. pag. 20.

DISSERTATIO II. De actibus à Lullo attributis divinæ essen-
tiæ & perfectionibus , ex Textibus desumptis ex q. 2. 4. 20. 23.
& 24. & eorundem Censura. pag. 29.

§. I. Exponuntur Textus , & ostenditur in eisdem nullum esse er-
rorem. *ibid.*

§. II. Modum loquendi in relatis textibus non esse erroneum , sed
conformem Patrum & Doct. usui loquendi, ostenditur. pag. 38.

DISSERTATIO III. De concursu divinæ voluntatis in Filiâ
Dei generatione , ad Textum notatum ex quæst. 6. Sententiarum.
pag. 47.

Tom. III.

ij *INDEX TITULORUM, &c.*

§. I. Quid Senferint Patres circa quæstionem, an Pater scilicet voluntate genuerit Filium? *ibid.*

§. II. Doctrina Lulli in quæst. 6. Sentent. notata, est omninò conformis relatis Patrum documentis. *pag. 52.*

§. III. Immeritò dicitur in *relata Censura super notatum textum*, Lullum intellexisse, Filium per amorem generari. *pag. 61.*

DISSERTATIO IV. De Propositionibus 4. 5. & 6. notatis in q. 7. 11. & 13. ejusdem libri Sententiarum. *pag. 66.*

§. I. In Propositione 4. ex q. 7. Lullus unicè docet, quòd potentia seu potestas divina est potentia generandi & potentia spirandi; & ita eadem potentia; quæ aliunde est potentia generandi, quatenus est potentia spirandi, est una communis potentia spirativa. *ibid.*

§. II. Lullus in quinta Propositione ex q. 11. sentit, Deum non esse in genere reali, sed tantum in genere purè intentionali, substantiæ; quæ ratio substantiæ sic concepta, non est Deus. *pag. 70.*

§. III. Lullus in Propositione 6. ex q. 13. unicè docet, distinctionem inter Filium & Sanctum Spiritum esse aded perfectè bonam, æternam, &c. sicut est distinctio inter Patrem & Filium; non autem quod in ipsis sit distincta bonitas, æternitas, &c. *pag. 74.*

DISSERTATIO V. de Propositionibus 7. 8. 9. & 10. notatis in q. 16. 17. & 18. ejusdem Libri Sententiarum. *pag. 78.*

§. I. Immeritò attribuitur Lullo in Propositione 7. ex q. 16. quòd non agnoscit amorem Dei naturalem. *ibid.*

§. II. Solùm tenet Lullus in 8. Propositione ex q. 17. damnatum habere propter antiqua merita minorem pœnam accidentalem, id est magis remissam. *pag. 82.*

§. III. Docet Lullus in Propositione 9. ex q. 18. naturalem animæ capacitatem totaliter repleti gloriâ, quæ eidem confertur secundum merita, non autem secundum naturalia. *pag. 88.*

§. IV. Docet Lullus in Propositione 10. ex q. 18. quòd quantitas naturalis animæ limitat charitatem ne sit infinita; non autem eam limitat quoad gradus latitudinis ejusdem. *pag. 109.*

DISSERTATIO VI. De Propositionibus 11. 12. & 13. notatis ex q. 21. 22. 16. 33. & 38. Libri Sententiarum. *pag. 116.*

§. I. Juxta Lullum in Propositione undecima ex q. 21. Pater, Filius, & Spiritus Sanctus non sunt alius & alius Deus, sicut Martinus, & Guillelmus sunt alius & alius homo; sed tantum sunt alia, & alia individua substantia rationalis naturæ, seu alia & alia Persona. *ibid.*

I N D E X T I T U L O R U M , &c. iij

§. II. Quoad Prop. 12. ex q. 22. Pater productivè seu activè constituit, & distinguit Filium, generando ipsum; & Pater & Filius activè constituunt, & distinguunt Sanctum Spiritum, spirando ipsum; non formaliter & intrinsecè. pag. 120.

§. III. Per agere Deum mediatè solum docet Lullus in Prop. 13. ex q. 16. 33. & 38. Deum agere cum creatura, movendo & juvando ipsam; non autem Deum immediatè non attingere effectus creaturarum. pag. 123.

DISSERTATIO VII. De Propositionibus 14. 15. 16. 17. & 18. ex q. 38. 41. 45. 48. & 49. Libri Sententiarum. pag. 132.

§. I. In 14. Propositione ex q. 38. dicitur calor naturalis esse de esse essentiae hominis, quoad statum viventis naturaliter, licèt non sit essentia physica & metaphysica ejusdem. ibid.

§. II. Quoad Propositionem 15. ex q. 41. docet Lullus quod Deus, ut Autor naturæ, & potestate ordinatâ, non potest Angelum destruere, benè tamen potestate absolutâ. pag. 133.

§. III. Rectè censet Lullus in Prop. 16. ex q. 45. Angelum, & animam componi ex propria spiritali materia; non autem eâ, quæ est subiectum transmutationum; operationem autem eorum extrinsecam esse accidentalem, & non permanentem. pag. 136.

§. IV. Hominem quoad naturam esse Angelo absolutè nobiliorem non adstruit Lullus in Prop. 17. ex q. 48. sed tantum excedere Angelum extensivè, ratione corporis, quod non est in Angelo. pag. 149.

§. V. In decima octava Propositione docet Lullus, quod peccatorem non se avertentem à peccato, sed eidem adhærentem, non potest Deus juvare, juvamine effectivò, quod eum justum faciat de peccatore. pag. 152.

DISSERTATIO VIII. De sensu Lulli circa remanentiam panis in Eucharistia, in Prop. 19. ipsi oppositam ex q. 126. 127. & 129. Lib. Sent. ubi exponuntur varii textus ex aliis libris de prompti in idem coincidentes. pag. 155.

§. I. Ostenditur B. Lullum tenere eandem catholicam de sacro sancta Eucharistia doctrinam, quam Ecclesia, præcipuè in Concilio Tridentino, profitetur. ibid.

§. II. Exponuntur textus notari cum eorum Censura, & demonstratur Lullum in eisdem non sentire substantiam panis remanere in Eucharistia. pag. 162.

§. III. Lulli loquendi modum conformem esse SS. Patribus, ostenditur, pag. 183.

§. IV. Elucidatur quòd superest ex notatis Lulli textibus, sicut etiam aliqui alii ex variis libris deprompti ad Eucharistiam spectantes, ut omnis offendiculi scrupulus auferatur. *pag. 187.*

DISSERTATIO IX. An Lullus cum Ubiquistis senserit, Corpus Christi esse ubicumque est natura divina, in q. 128. Sententiarum, quoad Prop. 20. *pag. 214.*

§. I. Demonstratur, ex mente Lulli, Corpus Christi solùm esse in loco determinato, & non ubicumque est natura divina. *ibid.*

§. II. Adducitur Textus, & Censura prout à laudato Censore exposita, & ostenditur Lullum non sentire cum Ubiquistis Corpus Christi esse ubique est natura divina, sed tantùm Corpus Christi posse esse ubique sacramentaliter. *pag. 222.*

§. III. Ostenditur malè attribui Lullo absolutè, quòd Corpus puri hominis non possit esse miraculosè in duobus locis sacramentaliter. *pag. 233.*

DISTINCTIO II.

De secunda classe Censurarum adversùs Lib. Quæstionum super Magistrum Sententiarum. *pag. 241.*

DISSERTATIO I. De Propositionibus 1. 2. 3. 4. 5. 6. & 7. ex Quæstionibus 5. 7. 22. 41. 48. 86. & 90. *ibid.*

§. I. Proponuntur & breviter exponuntur propositiones 1. 2. 3. & 4. *ibid.*

§. II. Docet Lullus in Prop. 5. quòd Christus ut homo non fuit mortalis naturaliter, id est, ex naturali pondere, & dispositione sui Corporis, prout immunis à peccato, & Deo uniti; fuit tamen mortalis per accidens & ab extrinseco; quæ tamen mortalitas non fuit supernaturalis, sed naturalis & conformis naturæ assumptæ. *pag. 244.*

§. III. Substantia naturaliter non potest creari, nec esse sine accidente, nec accidens sine substantia; benè verò supernaturaliter, quoad propositionem 6. *pag. 253.*

§. IV. Docet Lullus in Prop. 7. Animam non habere, id est, non fuisse ipsi datum liberum arbitrium ad malum, uti ad bonum, sed simpliciter ad bonum. *pag. 254.*

DISSERTATIO II. de Propositionibus 8. 9. 10. 11. & 12. ex q. 94. 98. 102. & 133. Lib. Sententiarum. *pag. 260.*

§. I. In Prop. 8. Docet Lullus humanitatem in Christo non habere

INDEX TITULORUM, &c. v

proprium suppositum.

ibid.

- §. II. Ex contextu quæstionis in Prop. 9. notatæ clarè dignoscitur, nihil esse in ea suspectum vel confusum. *pag. 266.*
- §. III. In Prop. 10. Tantùm dicit Lullus, quòd Christus secundùm modum numerandi est duo, non autem quòd absolutè sit duo, vel quòd sit duo supposita. *pag. 273.*
- §. IV. Rectè & conformiter ad plurimorum Theologorum Sententiam loquitur Lullus de Indulgentiis in Prop. 11. *pag. 277.*
- §. V. Docet Lullus in Prop. 12. humanitatem in Christo per se, id est, ex connaturali virtute, non facere hominem Deum. *pag. 282.*

DISTINCTIO III.

De tertia classe Censurarum adversùs Librum Quæstionum super Magistrum Sententiarum. *pag. 284.*

DISSERTATIO I. De Propositionibus à prima usque ad decimam, ex Prologo & q. 1. 3. & 12. *ibid.*

§. I. De sua Arte, non de hujus Libri doctrina, dicit Lullus eam se habuisse à Deo; & quia in neutra est ullus error, immeritò Censura notatur. *ibid.*

§. II. Nullum fit in Prop. 5. verbum de actu beatifico Dei, sed tantùm creaturæ; atque ita ille non constituitur in creatura. *pag. 287.*

§. III. Ex contextu in Prop. 6. Passio in Deo intelligitur esse productio passiva. *pag. 290.*

§. IV. In Prop. 7. solùm Spiritui Sancto attribuitur appropriatè Missio Angeli Gabrielis, non autem privativè ad alias Personas. *pag. 294.*

§. V. Rectè sentit Lullus in Prop. 11. quòd anima sensitiva hominum est genita, & distincta à rationali. *pag. 298.*

DISSERTATIO II. De Prop. 12. & sequentibus usque ad 17. *pag. 322.*

§. I. Solùm intelligit in Prop. 12. Lullus, Deum de potestate ordinata non potuisse sibi unire creaturam irrationalem. *ibid.*

§. II. Rectè asserit Lullus in Prop. 14. Deum, quoad se & suam infinitam bonitatem, tantùm distare à peccato mortali, quantum à veniali; magis verò distare à Deo peccatum mortale, quàm veniale. *pag. 333.*

§. III. Docet Lullus in Prop. 17. Beatum non in specie aliqua,

vj **INDEX TITULORUM; &c.**

sed in ipsa divina essentia, seu intelligibilitate increata, videre Deum intuitivè. pag. 337.

DISTINCTIO IV.

De Censuris latis adversus Librum de Quæstionibus Magistri Thomæ Autrebatensis. pag. 342.

DISSERTATIO. I. De forma in Christo; futurorum mutabilitate; & libero ad peccandum arbitrio, quoad propositiones 1. 2. & 3. ex quæstionibus 1. 3. & 4. pag. 342.

§. I. Doctrina Lulli in Prop. 1. est, quòd, quia Filius Dei se fecit hominem de humana natura, se habet activè ad esse Christi, & humana natura passivè sub ipso; ac proinde, ut Christus sit una persona ex duplici natura, Filius Dei est forma, id est, ratio formalis, ut sit una persona ex illis. pag. 343.

§. II. In Prop. 2. præscita à Deo, quæ sunt futura secundum causas inferiores, non autem secundum æternam Dei dispositionem, possunt à Deo ad preces Justorum mutari, ex sensu Lulli. pag. 353.

§. III. In Prop. 3. ex q. 4. docet Lullus, quòd homo non eligit malum per liberum arbitrium, ratione perfectionis, quam habet per creationem, sed ratione defectus, quem habet, prout ex nihilo est ortum. pag. 357.

DISSERTATIO II. De modo, quo divinæ dignitates habent suum actum in generatione & spiratione, quoad Prop. 4. 10. & 11. ex q. 5. & 44. pag. 366.

§. I. In Prop. 4. ex q. 5. rectè docet Lullus, quòd in generatione, & spiratione est actus omnium Dei dignitatum; & quòd Pater generando bonificat, magnificat, &c. Filium; & Pater, & Filius spirando bonificant, magnificant, &c. Spiritum Sanctum. *ibid.*

§. II. In Prop. 10. & 11. ex q. 44. & 50. docet Lullus Patrem se bonificare & se facere bonum, latè sumptò *facere* in producendo Filium; quia à seipso habet, & non ab alio, bonificare, seu producere bonum Filium: quod bonificare est quid bonum in Patre; vel quia bonificat Filium, qui, licèt distincta Persona, est ipse & idem Deus ac Pater. pag. 371.

DISSERTATIO III. De Sarracenorum salvatione; satisfactione sacramentali; die iudicii; & hominis formatione in utero matris, quoad Propositiones 5. 6. 7. 8. & 9. ex q. 8. 21. 22. 31. & 35. pag. 382.

I N D E X T I T U L O R U M , &c. vii

- §. I. Docet Lullus Prop. 5. ex q. 8. Sarracenos cum peccato originali non posse salvari. *ibid.*
- §. II. In Prop. 6. ex q. 21 docet Lullus, quòd non satisfaciens opere non est absolutus à pœna; non autem negat ejus absolutionem à culpa. *pag. 385.*
- §. III. Sensus Lulli in Prop. 7. ex q. 22. est, quòd cum voluntate levis tantùm pœnitentiæ non remittitur peccatum grave quoad culpam, & consequenter nec quoad pœnam. *pag. 390.*
- §. IV. Cùm post ultimum judicium non sit amplius futura variatio diei & noctis, sed dies perpetuus, dicitur in Prop. 8. ex q. 31. Dies judicii dies æviternus, id est, invariabiliter duraturus. *pag. 397.*
- §. V. Docet Lullus in Prop. 9. ex q. 35. quòd post prævias foetis delineationes, in instanti & momento, quò perficitur ejus delineatio, figuratur mas vel foemina. *pag. 399.*
- DISSERTATIO IV. De quibusdam Propositionibus circa Deum & Angelum depromptis ex variis quæsitis sive quæstionibus, ad calcem ejusdem Lib. Quæst. ad Thomam Attrebatensem scriptis. *pag. 403.*
- §. I. Rectè Lullus explicat Deum per esse illam bonitatem, quæ est ratio bono, quòd agat bonum infinitum & æternum. *ibid.*
- §. II. Lullus, dum dicit, quòd Deus habet in se deificantem, deificabilem, & deificare, intelligit, ut explicat, quòd habet tres Personas designatas per illos correlativos. *pag. 406.*
- §. III. Rectè docet Lullus in 3. q. notata quòd Angelus habet in se formam, materiam & conjunctionem spirituales, ex quibus est substantialiter & essentialiter. *pag. 409*

F I N I S.

76770596

